


Jusiñamui uai:  
Jusiñamui jito rafue  
illa rabenico



New Testament in Huitoto, Murui (PE:hui:Huitoto, Murui)

# **Jusiñamui uai: Jusiñamui jito rafue illa rabenico** **New Testament in Huitoto, Murui (PE:huu:Huitoto,** **Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

## **Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files dated 29 Jan 2022

145a1f66-dca1-5de3-9c00-4e533605e488

## Contents

|                            |     |
|----------------------------|-----|
| MATEO . . . . .            | 1   |
| MARCOS . . . . .           | 81  |
| LUCAS . . . . .            | 129 |
| JUAN . . . . .             | 208 |
| HECHOS . . . . .           | 262 |
| ROMANOS . . . . .          | 328 |
| 1 CORINTIOS . . . . .      | 358 |
| 2 CORINTIOS . . . . .      | 394 |
| GÁLATAS . . . . .          | 413 |
| EFESIOS . . . . .          | 424 |
| FILIPENSES . . . . .       | 436 |
| COLOSENSES . . . . .       | 443 |
| 1 TESALONICENSES . . . . . | 450 |
| 2 TESALONCENSES . . . . .  | 456 |
| 1 TIMOTEO . . . . .        | 459 |
| 2 TIMOTEO . . . . .        | 467 |
| TITO . . . . .             | 473 |
| FILEMÓN . . . . .          | 477 |
| HEBREOS . . . . .          | 479 |
| SANTIAGO . . . . .         | 507 |
| 1 PEDRO . . . . .          | 515 |
| 2 PEDRO . . . . .          | 524 |
| 1 JUAN . . . . .           | 529 |
| 2 JUAN . . . . .           | 536 |
| 3 JUAN . . . . .           | 537 |
| JUDAS . . . . .            | 538 |
| APOCALIPSIS . . . . .      | 542 |

## MATEO JESUCRISTO ENIRUEMO ILLA RAFUE CUIAFUE

*Jesucristo ie usumatiai*  
(Lc 3.23-38)

<sup>1</sup> Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. <sup>2</sup> Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. <sup>3</sup> Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. <sup>4</sup> Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. <sup>5</sup> Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. <sup>6</sup> Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñona ollena, David micori Urías micorina jobaimemo orede. Jobaimemo naimie fiodailla mei, naiñaiñona ote. <sup>7</sup> Salomón micori jitodi Roboam micori. Roboam micori jitodi Abías micori. Abías micori jitodi Asa micori. <sup>8</sup> Asa micori jitodi Josafat micori. Josafat micori jitodi Joram micori. Joram micori jitodi Uzías micori. <sup>9</sup> Uzías micori jitodi Jotam. Jotam micori jitodi Acaz. Acaz micori jitodi Ezequías micori. <sup>10</sup> Ezequías micori jitodi Manasés. Manasés micori jitodi Amón. Amón micori jitodi Josías. <sup>11</sup> Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. <sup>12</sup> Naie meinomo Jeconías micori Salatiel micorina comuitate. Salatiel micori jitodi Zorobabel micori. <sup>13</sup> Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. <sup>14</sup> Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. <sup>15</sup> Eliud micori jitodi Eleazar micori. Eleazar micori jitodi Matán. Matán micori jitodi Jacob micori. <sup>16</sup> Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

<sup>17</sup> Abraham micori illa facaiseмона David micori jeicia facaisemo Jesús ie catorce nanoramaci mameci jai ite. David micori facaiseмона Babiloniammo ite nairai anamo cai jaiajai

illa facaisemo catorce nanoramaci mameci jiai ite. Babiloni-amo ite nairai anamo cai jaiagai illa facaisemona Jesús jeicia facaisemo catorce nanoramaci mameci jiai ite.

### *Jesús jeicia rafue*

*(Lc 2.1-7)*

<sup>18</sup> Jesucristo comuilla rafuena lloiticue. Jesús eidi María. Naiñaiñoña jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñoña uruesitate. <sup>19</sup> José micori maremie. María jai uruesillana naimie micori fidianona, naiñaiñoña meidaitañellena jira, naiñaiñoña bainino dotaacade. Jiaimie diga illamona urueside raillanona comecina facajanona, naiñaiñoña dotaacade. <sup>20</sup> Naimie micori comecina iemo facaia, naimie micori nicairillanona, naimie micorimo Jusiñamui jaienicici bairiano raite:

—José, David micori jito, Maríana jaciruiñoño ono, o aina illena. Jusiñamui Joreño naiñaiñoña jai uruesitate. <sup>21</sup> Himana jocoite. Ie comini naimaci jeacinomona naimie jilloitajaibilla jira, Jesúna o jitalle naimie mamecidi —raite. <sup>22</sup> Bie rafue suide, Jusiñamuidi ie lloraima micori jaiie llotataga uaina suillena. <sup>23</sup> Jaiie llotatate:

Himana uiñoñediñaiñoño comuite uruedi.

Himana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

<sup>24</sup> José micori casidemo, Jusiñamui jaienicici lloga uaina finode. Maríana ote, ie aina illena; <sup>25</sup> iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jidade naimie mamecina Jesúna.

## 2

### *Monamo ite ramo comeciaina facauidino rafue*

<sup>1</sup> Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeciaina facauidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

<sup>2</sup> —¿Ninomo como jeiciga omoi judíuai illaimadi? Jitoma bisoillafomo como bairede ucuduna cidicai. Naiemona naimie jeiciana jai uiñotícaí. Naimiemo iobillacinona fecalena biticai.

<sup>3</sup> Herodes micoridi naicinona cacajanona, ie comeci jarire ite. Jiaimie naimie meifomo illana jitañede. Jerusalémo itinodi jiai jarire itimaci. <sup>4</sup> Ie facaise Herodes micori judíuai illaicomínina uaiduanona, naimacimo Cristo raillamie jeiciana jicanote. <sup>5</sup> Uai otimaci:

—Judea railla eniruemo. Belémo. Iena Jusiñamui facaina micoridi jaie cuega:

<sup>6</sup> Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baifemo faite

cuega. <sup>7</sup> Iena cacaja mei, Herodes micoridi monamo ite ramo comeciai facauidino bainino uaidote. Naie ucudu bairia facaise raise uñollena jicanote. <sup>8</sup> Naimacina Belémo orede.

Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai fecaadicue —llote.

—Jii —fairiotimaci. <sup>9-10</sup> Iena naimie micori llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. <sup>11</sup> Fo jaillano uruena, ie ei María diga, ciotimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caïmare sorirede rana jiai fecadimaci. <sup>12</sup> Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

### *Egiptomo Jesús jailla rafue*

<sup>13</sup> Naimaci jailla mei, José micori inia anamo nicairite. Nicairillanona, Jusiñamui jaienicidi naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

<sup>14</sup> José micori raire casillano, nai urue diga, Jesús ei diga, Egiptomo naiona jaide. <sup>15</sup> Herodes micori fioidille dinori nainomo ite. Ie muidona Jusiñamui ie facaina lloraïma micori llotataga uai jai suide. Jaie lloga: “Egiptomona cue Jitona jai uaidoticue”.

### *Mena años itisaiai dierisedena faia rafue*

<sup>16</sup> Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite iisaiai diese faetate. Belén ecimo itino uruina jiai faetate. Naie ucudu mena años jaie nano bairena jira, mena años itisaiai dierisedena faetate. <sup>17</sup> Raquel micori jaie eia isoi, Belén itino birui eedimaci. Jeremías micori iena jaie cuega:

<sup>18</sup> Ramá railla nairai dinena Raquel micori eo eiana cacadicue. Cai usuño Raquel micori eede.

Naiñaiño micori uruiái micoriai facaina eede.

Jiaie cominimona firaduacinona jitañede, naiñaiño uruiái micoriai jai fiodailla jira.

<sup>19</sup> Digarui illanona, Herodes micori fiodailla mei, Egiptomo José micori dane nicairillanona, Jusiñamui jaienici naimiemo bairede. <sup>20</sup> Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

<sup>21</sup> Ie jira ie eniruemo naie urue diga, ie ei diga, abido jaide. <sup>22</sup> Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillena naimiemo llote. <sup>23</sup> Nazaret railla nairai dine jaide, nainomo illena. Iemona Jusiñamui facaina lloraini micoriai jaie cuegafuiaí jai suide. Cristona jaie cuetimaci: “Naimiedi Nazaret imie”.

### 3

*Jofue iñenanomo Juan Bautista micori illa rafue*  
(Mr 1.1-8; Lc 3.1-9, 15-17; Jn 1.19-28)

<sup>1</sup> Diga años illanona, Juan Bautista raillamie micoridi jofue iñenanomo illanona, cominina dafaiña, Jusiñamui rafuena naimacina llofueuide. <sup>2</sup> Comini naimie micori dine billanona, naimacimo llote:

—Omoi jeacinona fainonocaida, omoi comeciai iuailai meido. Jusiñamui dibeimo omoi i. Naimie anamo omoi illana naimie jitailla jira, omoiimo iena lloiticue —llote. <sup>3</sup> Isaías micoridi Jusiñamui facaina lloraíma. Juan Bautista micori nia iñenia, Isaías micoridi naimie micorina jaie cuete: Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite. <sup>4</sup> Juan micoridi camello itiraíai ie nilla iniroina jitade. Igoi iena ie moilligaina jitade. Fioduaina rite. Cifona mete. Jamai rana guite. <sup>5</sup> Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. <sup>6</sup> Jusiñamui naimaci jeacinona naimaci llua meino, naimacidi Juan micori bautizaga. <sup>7</sup> Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Ñiese Jusiñamui riicailifuemona jilloitomoi? Cue

dine omoi billena, ¿bu omoimo llua? <sup>8</sup> Omoi comeciai iuaillai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuaillai meiduana uiñoiticaí. Ie mei omoi bautizallomoi. <sup>9</sup> Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifuemona jilloiticaí”. Ero, omoimo lloiticue: Cue llua isoi omoi finoñenia, naimie riicaillifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. <sup>10</sup> Ero, llisiñede riará tiedomoi. Tiia mei, marañena jira, iena jobaidomoi. Ie isoidomoi. Omoi marañena jira, Jusiñamui omoína jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoína duere finoite. <sup>11</sup> Jusiñamui díbeimo omoi comeciai iuai omoi meidoia, jinui díga omoína bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie díbeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoína duere finoite. <sup>12</sup> Trigona omoi betaia, mare trigona eenotomoi. Marañede ra oni dotajanona, iena jobaitomoi. Ie isoide. Naimie rafuena lluanona, comeciai iuaillai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

*Jesús bautizaja rafue*  
(Mr 1.9-11; Lc 3.21-22)

<sup>13</sup> Juan micori Jordán dine nia ia, Galileamona Jesús bite. Naimiena bautizallena, Juan micori dine bite. <sup>14</sup> Juan dinena naimiemo llote:

—Bautizallena cuemo bitio; ia dama ite. Cuena o bautizaia, cuemona mare.

<sup>15</sup> Jesús uai ote:

—Cuena mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. <sup>16</sup> Jesús bautizaja mei, jinuímona bite. Mona bojodena ciode. Jusiñamui Joreño, ucugi isoi, naimie emodomo ana billana ciode. <sup>17</sup> Ie facaise monamona Jusiñamui llote:

—Bimie cue eo isiruíga Jito. Naimieri iobidicue.



## 4

*Jesúna Taife ramo faia rafue*  
(Mr 1.12-13; Lc 4.1-13)

<sup>1</sup> Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. <sup>2</sup> Cuarenta digarui Jesús guiñede. Naie facaise fuilla mei, guiñeno illamona, aimetaite. <sup>3</sup> Ie facaise Taife naimie dine bite. Jesús aimetailana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicono jaita”. <sup>4</sup> Jesús uai ote:

—Dama ite. O lluaña finoñeiticue. Jusiñamui facaina lloñama micori iena jaie cuega: “Jiaie rafuedi llomenico guilla baiñemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

<sup>5</sup> Ie mei Jerusalémo Jusiñamui jofu muidomo Taife Jesúna uite. <sup>6</sup> Raite:

—Jusiñamui Jitodiodena, eniruemo mai ana uai. David micori ona jaie cuega:

Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci cuega. Naie lloga uai suillena, bie jofu muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>7</sup> Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

<sup>8</sup> Ie mei a ite anedumo Taife naimiena uite, naie anedumona nana nairaiaia cioillena. Naie nairaiaia eo ebire eruaide. <sup>9</sup> Naimiemo llote:

—Nana bie nairaiaia cue anamo birui illamona, cuena o sedaia, nana bie nairaiaia omo iiticue. O caiñici ifodo ana rainada, cuemo iobillacino o fecallena.

<sup>10</sup> Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. <sup>11</sup> —Ie facaise naimiemona Taife jaide. Naimie jailla mei, Jusiñamui jaienisai Jesús dine bitimaci. Naimiena ecallena bitimaci.

*Galileamo Jesús illa rafue*  
(Mr 1.14-15; Lc 4.14-15)

<sup>12</sup> Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. <sup>13</sup> Nainomo rilla mei, Capernaumo jaide. Capernaum

nairai jorai fuemo ite. Nainomo Zabulón railla enirue ite. Neftalí railla enirue jiai ite. <sup>14</sup> Nainomo Jesús jailla jira, Isaías micori jaie ciegafuiaí jai suide. <sup>15</sup> Naimie micori naie cominina jaie ciega:

Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judíuainedino jai itimaci.

<sup>16</sup> Jeacino anamo naimaci illamona, naga naie eniruemo ite  
comini jitiredinomo itimaci isoidimaci

Jusiñamuina uiñoñoeno fiodaicana jaidimaci; iadedi eo mare  
rafue birui cacaitimaci.

Naie rafue naimaci comeciaina lligaiñoite. Naie rafuena  
uitimie bairenite

cuega. Jusiñamuina naimaci uiñoñoena jira, naimacina iese  
cuega. Jesús nainomo birui llofuia jira, mare rafuena jai ca-  
cadimaci. <sup>17</sup> Galileamo rilla mei, Jesús llocana jaide. Llofute:

—Jusiñamui dibeimo illena, omoi jeacinona fainonocaida,  
omoi comeciái iuaina meido. Ie cominina omoi jaillena birui  
jitaide.

*Ie llofueoicaiganona jaillena, Jesúdi nagaamagamiena fetua  
rafue*

*(Mr 1.16-20; Lc 5.1-11)*

<sup>18</sup> Jiairuido Galilea railla jorai fuemo Jesús macaritemo,  
menamiena ciode. Naga ie ama iaímaiaí. Damie Simón. Jiaici  
naimie mamecidi Pedro. Ie ama Andrés diga ite. Lloijina  
fairaima iaímaiaí. Iese jaca naie iaímaiaídi maijuidiaímaiaí.  
<sup>19</sup> Iaímaiaímo lote:

—Cue diga omico jaoicaillena, cue diga mai bi. Cue  
llofueganona omico jaillena jitaídícue. Lliciaína birui  
ocabitomíco; iadedi cominina oitomíco, cue dibeimo naimaci  
illena.

<sup>20</sup> Iena cacajanona, ieconi iaímaiaí lloijina fainonocaida,  
naimie diga jaidiaímaiaí. Ie llofueganona jaillena,  
jaidiaímaiaí. <sup>21</sup> Lliaí bai Jesús jaidemo, jaie menamiena  
ciode. Naga ie ama iaímaiaí. Damie Jacobo. Jiaímie Juan  
Iaímaiaí moodi Zebedeo. Naimie diga botemo itiaímaiaí.  
Lloijina sigaidimaci. Jesús iaímaiaína uaidote, naimie  
llofueganona jaillena. <sup>22</sup> Ieconi iaímaiaí mooná fainonocaida,  
botemona ari billanona, Jesús diga jaidiaímaiaí.

*Jesús ailluena cominina llofuia rafue*

*(Lc 6.17-19)*

<sup>23</sup> Nana Galileamo Jesús jaide. Judíuái ofiracuaimo  
llofueuide. Naimie anamo comini illana Jusiñamui jitailla  
jira, Jesúdi Jusiñamui dibeimo naimaci comeciái iuaina

meiduana llofujete. Ie cominina naimaci illena llofujete. Naga isoide duicono duidinona jillotate. <sup>24</sup> Iemona nana Siria railla eniruemo naimie mameci soride. Naie comini naga isoide duicono duidinona naimie dine atidimaci. Abi isiredinona atidimaci. Jananiai anamo illa cominina atidimaci. Naillidinona atidimaci. Niraidanidinona atidimaci. Nana naimacina jillotate. <sup>25</sup> Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

## 5

### *Anedumo naimie ia, Jesús lloga rafue* (Lc 6.20-23)

<sup>1-2</sup> Ailluena cominina Jesúna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoína Jusiñamui ie cominina sedaacana rafuena ja llofueitícue. Naimie anamo naimaci illena llofueitícue. <sup>3</sup> Ero, Jusiñamui naimiena jitaidinona sedaite. Comeciaina facadimaci: “Naimie jitaillacinona dani finonidicai; ia naimie caina canuanona, iena finoitícai”. Naimie cominina naie isoidino illamona, naimie naimacina canoite. Iemona caimare iitimaci. <sup>4</sup> Jusiñamui sunaitinona sedaite. Ailluena comini jeacino finocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuiñotaite. Iemona caimare iitimaci. <sup>5</sup> Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iese iite. Iemona caimare iitimaci. <sup>6</sup> Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci. <sup>7</sup> Jusiñamui cominina duenaitinona sedaite. Naimacina naimie duenaillamona, Jusiñamui naimacina ico duere finoñeite. Iemona caimare iitimaci. <sup>8</sup> Jusiñamui jeanide começredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. <sup>9</sup> Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mameçirenitimaci. Iemona caimare iitimaci. <sup>10</sup> Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaiaitimaci. Iemona caimare iitimaci. <sup>11</sup> Cuemo omoi duia, duere sefuitomoi. Jiaie comini omoína jeare ñaitimaci. Omoína duere finoitimaci. Omoi joreña tainona lloitimaci. Duere sefuitomoi; iadedi

Jusiñamui omoïna caimare itataite. <sup>12</sup> Omoï isoi omoï jaiagaimona Jusiñamui facaina lloraini micoriai jaie duere sefuidimaci. Iena omoï uiñuamona, monamo Jusiñamuimona ailluena ibana ico omoï feiñua jira, birui omoï duere sefua, iocire omoï jai.

*Jesús comini illa rafue*

*(Mr 9.50; Lc 14.34-35)*

<sup>13</sup> Jesús llote:

—Jusiñamui ie cominina sedaacalle rafue nia llofueitucue. Llicisi rifaia, jai marañede. Iena rifaiñellena, llicisimo sal joneticai. Sal isoidomoï. Jusiñamui jitailla isoi omoï illamona, jiaie comini marañede rafuena eo finoñedimaci. Sal ie caimano jai iñenia, ¿ñiese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi omoï iñenia, naimie omoïna duere finoite.

<sup>14</sup> 'Cuemo omoï duilla jira, jiaie cominina Jusiñamuina omoï uiñotajamona, lligaiñora isoidomoï. Anedumo ite nairai jaca bairede. Ie illanona jaca uiñoticaï. Jusiñamui jitailla isoi omoï illamona, jiaie comini naimiena uiñoitimaci.

<sup>15</sup> Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena. <sup>16</sup> Ie isoide. Cue rafuena jamaiñeno; iadedi omoï marena illamona, cominina Jusiñamuina uiñota. Omoï marena illamona, comini omoï mare finoca rafuena uiñoitimaci. Iemona: “Jusiñamui maremiena” raitimaci.

*Jesúdi Moisés micorina llofua rafue*

<sup>17</sup> Jesús llote:

—Jusiñamui ie cominina sedaacalle rafue nia llofueitucue. Iena cue llofua jira, omoïmona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai marañede” raiñedicue. “Jusiñamui facaina lloraini micoriai jaie llogacinuai marañede” jiai raiñedicue; iadedi omoïna naie llogacinaina raise uiñotaacaducue. <sup>18</sup> Biemo omoï comeciaina faca. Mona, enirue diga, nia ia, nana naie llogacinuai jaca suite. <sup>19</sup> Omoï einamacï raitimaci: “Dajerie llogacino jiaie llogacino baifemo faite”. Cue raiticue: Naga llogacino omoï ñnoñenia, naga omoï llofueñenia, nana Jusiñamui jitaillacinona finoñedomoï. <sup>20</sup> Ero, Jusiñamui jitailla rafuedo judíuai illaicomini baifemo omoï jaiñenia, Jusiñamui sedajanomo jaca iñeitomoï. Naimaci naie jaie llogacinuai uiñoitimaci; iadedi naimaci comeciai Jusiñamui dibeimo iñedimaci.

*Jesúdi iciriñena llofua rafue*

*(Lc 12.57-59)*

21 Jesús llote:

—Omoi llofuera inimona bie jai cacadomoi. Moisés micori omoi jaiagaimo llote: “Comena meineño. Comena bu meineia, jeacino jai finode. Naimie fiodaillena juez llua”.

22 Naie llogacinodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

23-24 ’Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra fainonocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

25 ’Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaita. 26 Nana raise ibañoia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriño.

*Jesúdi iima ie aiñede riño diga illa llua rafue*

27 Jesús llote:

—Omoi llofuera inimona bie jai cacadomoi. Moisés micori jiaie llote: “Omoi aiñede riñoia diga iño. Omoi iniñede iñiaia diga iño”. “Iena bu finoia, jeacino jai finode” raitomoi.

28 Jiaie rafue birui lloiticue. Ie aiñede riño eruaillamona naiñaiño bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode. 29-30 Biena ñaiticue. Nie isoide rafue omoina jeacino finotaia, iemo eruaiño. Iena lliño. Iemo comecina facaño. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañoia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoño.

*Jesúdi iima ie aina dotaja llua rafue*  
(Mt 19.9; Mr 10.11-12; Lc 16.18)

31 Jesús llote:

—Omoi llofuera inimona bie jai cacadomoi. Moisés micori jai e llote: “Te aina bu dotaacania, naiñaiño mo dotajacanabena fecaja”. Iedo jai jaicabidomoi. Iena bu finoia, omoi mona mare. <sup>32</sup> Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñona ie aina illena bu ua mei, naimiedi jeacinona jai finode. Jeacino finoñellena, aina dotaño.

*Jesúdi Jusiñamui mameci jamai ebena llinoñenana llua rafue*  
<sup>33-35</sup> Jesús llote:

—Omoi llofuera inimona bie jai cacadomoi. Moisés micori omoi jaiagaimo llote: “Taino lloño; ia Jusiñamui omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoi mona mare. “Jusiñamui caina duere finoñeite” raitomoi. Iemona monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jiai llinotomoi. Jusiñamui mamecina jamai ebena llinoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi llinoia, Jerusalén naimie nairaina jira, naimie mamecina jiai llinotomoi. <sup>36</sup> Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jiai llinoño. Dama Jusiñamui iena usere itataja jira, dama naimie iena jitire itataja jira, ifotirai mamecina omoi llinoia, Jusiñamui mamecina jiai llinotomoi. <sup>37</sup> Ie jira Jusiñamui mameci jamai ebena llinoño. Jiaie ra mameci jamai ebena llinoño; iadedi nie isoide rafuena omoi finoia, omoi lloga uaina taino lloño fino. Uanaicinona jaca llono. Uanaicinona omoi lloñenia, Taifemona omoi uaina otomoi.

*Jesúdi iba oñenana llofuia rafue*

*(Lc 6.29-30)*

<sup>38</sup> Jesús llote:

—Omoi llofuera inimona bie jai cacadomoi. Moisés micori jai e llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere

finoia, o duere sefuilla isoi, juez naimiena duere finua". Iedo birui jai jaicabidomoi; <sup>39</sup> iadedi birui omoimo lloticue: ibana oñeno. Maraiñede rafue finodimiemona omoi abina riidoñeno. Omoi cacaina naimie dutaia, naimie diga iciriñeno. Enefebeimo omoi uieco dobaiño, enefebei omoina naimie dutallesa. Naimie omoina duere finoia, ibana oñeno. <sup>40</sup> Omoi iniroi bairollena omoina bu llogidoia, juez nia omoimo lloñenia, naimie jitailla iniroi bai femo naimiemo feca. <sup>41</sup> Daje kilómetro naimaci raruia omoina uillana illaicomini ocuia, iena uiño. Nibai omoi comeci jitañede; ia naimacina canolena, iena mena kilómetros uiño. Naimaci ocuilla bai femo uiño. <sup>42</sup> Omoimo ite rana bu jicaia, iena caidiñeno. Omoi rana bu jamai jicuaño uia, abido atillena, iena caidiñeno feca.

*Jesúdi omoina gaiñenano isiruillena llua rafue*

*(Lc 6.27-28, 32-36)*

<sup>43</sup> Jesús llote:

—Omoi llofuerainimona bie jai cacadomoi. Llotimaci: "Omoi cominina isirui; iadedi omoi nairaiñedinona enoi". Iedo jai jaicabidomoi. <sup>44</sup> Omoimo birui lloticue: Omoi nairaiñedinona isirui. Omoi gaiñenanona isirui. Omoina duere finodino facaina Jusiñamuimo jii. Naimaci comecia iuai meiduaña naimiemo jicuaño. <sup>45</sup> Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate. <sup>46</sup> Naimie comini omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: "Mare" raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini bai femo faiñedomoi. Naimaci isoi it-  
 omoi. <sup>47</sup> Dani omoi cominina omoi uaidoia, mare; ia omoina gaiñenanona omoi uaidoñenia, naimaci bai femo faiñedomoi. Jusiñamuina inoñedino bai femo faiñedomoi. Naimaci isoi it-  
 omoi. <sup>48</sup> Iena omoi uiñuamona, omoi Moo Jusiñamui finua isoi, mare rafuena finocana omoi jai.

## 6

*Jesúdi mare rafue finuana llua rafue*

<sup>1</sup> Jesús llote:

—Omoina nia llofueiticue. Jiaie comini iena cioillena, mare rafuena omoi finoiadedi, omoina: "Mareuidinodimaci" naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena.

Iena ja ñaiticue. <sup>2</sup> Dueredinomo rana omoi jamai fe-caia, iena uainino feca. Jiaie cominimona iobillacinona omoi feiñollena, iena fecaño. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci. <sup>3</sup> Dueredinomo rana omoi fecaia, jiaie cominimo iena lloño. <sup>4</sup> Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoina: “Mare” raite.

*Jesús Jusiñamuimo jia rafue*

*(Lc 11.2-4)*

<sup>5</sup> Jesús llote:

—Jusiñamuimo omoi jia, maredinona abi caitadino isoi omoi iñeno. Ofiracomo naimacina comini cioillena, marefodo jidimaci. Jicabilla facaiseconi naisomo naimacia, naimacina comini cioillena, marefodo jai jidimaci. Naimacina: “Jusiñamuina eo sedadimaci” comini raillana jitaidimaci. Cominimona iobillacinona birui jai feiñotimaci. <sup>6</sup> Omoi jiacania, omoi jofomo fo jai. Nainomo Jusiñamuimo anado omoi ji. Iena Jusiñamui uiñuamona, omoi jicaca rafue naimiemona feiñoitomoi.

<sup>7</sup> Jusiñamuimo omoi jia, naimiena ñnoñedino isoi jamaicinona ñaiño. Naimaci comecina facadimaci: “Daje jiracinona diga icaiño cai jia jira, ja muidomo cai Moo caina raise cacaite”. <sup>8</sup> Naimaci isoi iñeno. Nia omoi jicañenia, naimie omoi jitaille rafuena uiñote. <sup>9</sup> Naimiemo omoi jiacania, iese ji:

Ore Moo, monamo itio.

Comini ori iobidesa.

<sup>10</sup> O illaimana jira, nana cominina o anamo raire itata.

O jaienisa o jitaillacinona finua isoi, cominina o jitaillacinona finota.

<sup>11</sup> Nagarui guille caimo itata.

<sup>12</sup> Caina jeare jaino finoia, iena caimona feilla isoi, cai jeacinona omona feilla jira, cai jeacinona oni dota.

<sup>13</sup> Caimo ramo bu faia, caina cano, iena cai ñnoi raillano. Jeacinona finuamona caina jillota.

Iese omoi ji. <sup>14</sup> Omoina jiaie comini jeare finoia, iena omoi feitaia, omoi monamo ite Moo omoi jeacinona iena faitajanona, jai oni dotaite; <sup>15</sup> iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

*Jesús guiñenaruina llua rafue*

<sup>16</sup> Jesús llote:



—Omoína nia llofueitícue. Raitomoi: “Jusiñamuina eo raise cai sedajanona, birui cai guiñeíticai. Iemona naimie caina eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeítimaci. <sup>17</sup> Ero, naimaci isoi omoi iñeno; iadedi omoi guiñenarui ia, omoi abiai raise fino. <sup>18</sup> Iemei cominidi omoi guiñenarui illana uiñoñeítimaci. Naimacimona iobillacinona feiñoñeítomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

*Jesúdi Jusiñamuimo comecina facaja rafue*

*(Lc 12.33-34)*

<sup>19</sup> Jesús llote:

—Omoi jofomo ailluena rana eenocana uiñeno. Giireco iena guicabite. Dajerie ra nemuide. Omoi jofomona jiaie comini iena fiacadimaci. Ailluena ra eenuamo omoi comeciaina facañeno; <sup>20</sup> iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Giirecuaimona, nemuillamona, fiirirainimona, iena nainomo faifiñeítomoi. <sup>21</sup> Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

*Jesús cai comecina llua rafue*

*(Lc 11.34-36)*

<sup>22-23</sup> Jesús llote:

—Cai uisi diga rana ciodicai. Cai uisi maraiñenia, rana raise cioñedicai. Ie isoide. Cai comeci maraiñenia, maraiñedicinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

*Jesús raruiaina llua rafue*

*(Lc 16.13)*

<sup>24</sup> Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiai ollemo comecina omoi eo facaia, Jusiñamui jitaillacinomo comecina raise facañeítomoi.

*Jesúdi Jusiñamui cai sedajana llua rafue*

*(Lc 12.22-31)*

<sup>25</sup> Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite. <sup>26</sup> Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite. <sup>27</sup> Omoimona, ¿bu ie comeci jarire facajamona a sairite? Iese jaca buna a sairifede. Dama Jusiñamui omoína a sairitarede. <sup>28</sup> ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maijiñedimaci. Iniroina tiforiñedimaci; <sup>29</sup> iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. <sup>30</sup> Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ñno. <sup>31</sup> Omoi comeci jarire finoñeno. “¿Buena guiticai? ¿Buena jitaíticai?” raiñeno. Iemo comeciaina eo facañeno. <sup>32</sup> Jusinamuina ñnoñedino iemo comecina facacabidimaci. Nana omoi jitaillacinona omoi Moodi uiñua jira, naimaci isoi iñeno. <sup>33</sup> Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite. <sup>34</sup> Jusiñamui omoi birui jitailla ra omoimo iite. Iena uiñuamona, jiairuido suille rafuemo jarire comecina facañeno. Ico omoi jitailla ra omoimo jai iite.

## 7

*Jesúdi jiaie cominina mameriñenana llua rafue  
(Lc 6.37-38, 41-42)*

<sup>1</sup> Jesús llote:

—Omoína nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite. <sup>2</sup> Jiaie cominina omoi mamerilla diese Jusiñamui omoína duere finoite. <sup>3</sup> Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca. <sup>4</sup> Omoimo maraiñedicino illamona, ¿niese omoi ecimo itimiema mameritomoi? <sup>5</sup> Omoimo ite maraiñedicinomo omoi comecina facacaiñena jira, maredinona abi caitadinomoi.

Omoï comeciaina nano raise fino. Iemei omoï ecimo itimiena canorenitomoï. Naimie comecina raise canorenitomoï.

<sup>6</sup> Ero, eo mare rana omoï jiconiaino fecañeno. Eo raifide rana omoï chanchuai mo fecañeno. Naimacimo omoï fecaiadedi, iena feiñoñeitimaci. Omoïna gaiñenamona, jiconiaino omoïna ainitimaci. Chanchuai iena jamaillamona, iena saitaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoï llocabia, omoïna duere finoitimaci. Omoï rafuena jamaïtimaci.

*Jesúdi cai jitailla ra jicaja llua rafue*

*(Lc 6.31; 11.9-13)*

<sup>7-8</sup> Jesús llote:

—Daje ra omoï faifia, iena jenodomoï. Raise jenoia, iena baitomoï. Damiena omoï jenoia, naimie illanomo jaidomoï. Nainomo naimiena baillamona, omoïna feiñoite. Ie isoide. Buena omoï jitaia, Jusiñamuimo jica. Iena omoï jicaja jira, iena naimie cacajamona, omoïmo iite. <sup>9</sup> Ero, omoïmona naimiemo llomenicono ie moomo ie jito jicaia, noficina fecañede. <sup>10</sup> Lliciaina jicaia, jaiona fecañede. <sup>11</sup> Jeacinona finocabidomoï; iadedi mare ra omoï uruiaino fecacabillana uiñotomoï. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

<sup>12</sup> Jusiñamui jitaillacinona omoï finuamona, jiaie cominina marena fino. Jiaie comini omoïna finuana omoï jitailla isoi, naimacina fino. Naimaci omoïna marena finuana omoï jitaia, naimacina marena fino. Naimaci omoïna maraiñeno finuana omoï jitaia, naimacina ie isoi maraiñeno fino. Moisés micori ie isoidicinona jaie llofuite. Jusiñamui facaina lloraini micoriai ie isoidicinona jaie jiai llofuetimaci.

*Jesúdi Jusiñamui dine rille llua rafue*

*(Lc 13.24)*

<sup>13-14</sup> Jesús llote:

—Jusiñamui dine omoï rillena, janorede naisodo omoï jailla isoi isoilla. Naisomo ite nasedi janorede isoide. Naimie dine naie rilla jira, naiedo omoï jai. Nainomo jaidino jaca iitimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

*Jesúdi abi caitadinomona abi rairuillana llua rafue*

*(Lc 6.43-44)*

<sup>15</sup> Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacinodo omoi jaia, Jusiñamui rafuedo raise jaiñeitomoi. <sup>16</sup> Naimaci lloga rafuemona naimaci Jusiñamui llorainiñenana uiñoitomoi. Ero, eecuaimona uvas railla riara oñega. Eecuaimona higos railla riara jiai oñega. <sup>17</sup> Mare riaramona mare llisilla comuide. Maraiñede riaramona maraiñede llisilla comuide. <sup>18</sup> Mare riaramona maraiñede llisilla comuiñede. Maraiñede riaramona mare llisilla comuiñede. <sup>19</sup> Mare llisilla comuitañena jira, naga maraiñede riara jaitaca, iena jobaillena. <sup>20</sup> Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusinamui naimacina duere finoite.

*Jesúdi ie Moo ie comini sedajanomo ille llua rafue  
(Lc 13.25-27)*

<sup>21</sup> Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jittaille rafue finodimiedi nainomo iite. <sup>22</sup> Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticai. O uaido jananiaina oni oredicai. O uai diga siño rafuena finodicai” lloitimaci. <sup>23</sup> Uai oiticue: “Omoina uiñoñediecue. Cue cominiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

*Jesúdi naimiена #nuana ñaia rafue  
(Lc 6.47-49; Mr 1.22)*

<sup>24</sup> Jesús llote:

—Cue lluana cacadomoi; iadedi omoimona nana iñoñedomoi. Cue lluana iñotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. <sup>25</sup> Noci deidemo, eo jinuidemo, jofomo ille toia, aifi bitemo, jofo raise finua jira, jofo goiñede. Iena faifiñede. Ie isoide. Cue lluana iñotimie faifiñeite. <sup>26</sup> Cue lluana iñoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana raiñede. <sup>27</sup> Noci deidemo, eo jinuidemo, jofomo ille toia, aifi bitemo, jofo goillamona, jai eo judaisite. Iena faifide. Ie isoide. Cue lluana iñoñedimie faifite —llote.

<sup>28-29</sup> Moisés micori rafue uiñoraini isoi naimie llofueñena jira, illaimamo ite uai itimie isoi naimie llofua jira, nainomo ite cominidi naimie lluari rajjicadimaci.

## 8

*Jesúdi efonaitimiena jillotaja rafue*  
(Mr 1.40-45; Lc 5.12-16)

<sup>1</sup> Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci.

<sup>2</sup> Efonaitimie naimie dine billanona, naimiena raise uaiduamona, caiñici ifodo ana rainadate. Raite:

—Maestro, o jitaiadedi, cuena jillotaredio.

<sup>3</sup> Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. —Ieconí naimie jillode.

<sup>4</sup> Jesús naimiemo llote:

—O jilluana bumo lloñeno; iadedi Jerusalémo, Jusiñamui jofomo, Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca. —Iemei Jesús oni jaide.

*Jesúdi capitán mullaïmana jillotaja rafue*  
(Lc 7.1-10)

<sup>5</sup> Capernaum railla nairaimo Jesús ria, capitán raillamie naimie dine bite. Naie capitán Roma railla nairai imie. Judíuñedimie. Billanona, duere llote:

<sup>6</sup> —Maestro, cuena cano. Cue jofomo cue mullaïma ite. Ie abina niraïdanide. Naimie abi eo isirede. Naimiena jillota.

<sup>7</sup> Jesús uai ote:

—Naimie dine jaiticue, naimiena cue jilloitallena.

<sup>8</sup> Naie capitán dane llote:

—Jaiñeno. Jamai bue isoidicue. Iemo, ¿ñiese cue jofomo biitio? O uaido bene lluanona cue mullaïma jilloite. <sup>9</sup> Jiaie illaïcomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaïma illa jira, naimiedi cue uaina ñnote. O anamo naie duico illa jira, o uaina o lloia, cue mullaïma jilloite.

<sup>10</sup> Iena cacajanona, Jesús raijicaide. Naimie diga jaidinomo llote:

—Bie isoi cue uaina ñnotimiena jaca baiñedicue. Cai judíuai cominimona biesedimiena jaca iñede. <sup>11</sup> Ero, Jusiñamui ie cominina sedajanomo naimaci illena, diga judíuaiñedino cue llua uaina ñnoitimaci. Naga nairaiïmona ñnoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. <sup>12</sup> Ailluena judíuaiñedino ñnoitimaci. Jusiñamui ie cominina sedajanomo duillanodi omoi judíuai. Naimiena

omoi ñnoñena jira, omoina oni dotaite. Dotaja mei, eo duere sefuillamona eetomoi.

<sup>13</sup> Capitámo Jesús llote:

—Mai jai. Cue uai siñonana o ñnua jira, o jitailla rafue omo jai suide. —Ieconí naimie mullaíma jillode.

*Jesús Pedro jifaiñoña jillotaja rafue*

(Mr 1.29-31; Lc 4.38-39)

<sup>14</sup> Oni jaillanona, Pedro jofomo Jesús ridemo, Pedro jifaiño duillana cide. Naiñaiño abí cuaride. <sup>15</sup> Naiñaiño ñine jaillanona, naiñaiñoña jetade. Jetajamona ieconí naiñaiño jillode. Abí cuariñede. Naiñaiño naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue*

(Mr 1.32-34; Lc 4.40-41)

<sup>16</sup> Naie ñaiona naimie ñine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. <sup>17</sup> Naimacina Jesús jillotajamona, Isaías micorí jaie ciegafuiaí iese jai suide. Naimie micorí jaie ciega: “Caina jilloitajanona, cai duicono oni oretate”.

*Jesús ie llofuegamiena damie jaillana ie rafue*

(Lc 9.57-62)

<sup>18</sup> Ailluena comini naimie ecimo illana Jesús cianona, ie llofueoicaiganomo ruica ñine jaillena llote. <sup>19</sup> Ieconí Moisés micorí rafue llofueraíma naimie ñine billanona, llote:

—Maestro, o jaillinomo o ñiga jaiacadícue. O llofuegamiena jaiacadícue.

<sup>20</sup> Jesús uai ote:

—Janorede ocainaiáidi joforedimaci. Silliñiaí jillainaiáredimaci; iadedí jofonidícue. Monamona billanona, iimana jaidícue; iadedí buenidícue. Jofonidícue. Cue ñiga o jaiacania, bue isoidena cuemona oñeitío. Iemo o comecina raise faca.

<sup>21</sup> Ie facaise jiaie llofuegamie Jesús mo llote:

—O ñiga jaitícue; ia cue moo ñia fiodaíñena jira, o ñiga ñia jaiñeitícue.

<sup>22</sup> Jesús naimie uai ote:

—Cue ñiga idai mai bí. Cuena ñnoñedinodí o moona canoredimaci. Naimie fiodaia, naimiena naimaci raille. Cue rafue jiaie rafue baifemo faíte. Cue ñiga mai bí.

*Jesúdi joraina llícaitaja rafue*

(Mr 4.35-41; Lc 8.22-25)

<sup>23</sup> Naie llofuegamie ñiga Jesús ñaia mei, ruica ñine jaillena, botemo jaide. Ie llofueoicaigano jiai jaidimaci. <sup>24</sup> Botemo

jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, <sup>25</sup> jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

<sup>26</sup> Jesús uai ote:

—¿Bue ñellena jacinaitomoi? Cuen a raise inoñedomoi. Jacinaiñeno.

Iemei Jesús naidacaillano, aifina lletade. Joraina jiai llícaitate. Ieconí llícaide. Bagoñede. <sup>27</sup> Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

*Jesúdi Gadara railla eniruemo illa rafue*

(Mr 5.1-20; Lc 8.26-39)

<sup>28</sup> Ruica dine naimaci ridemo, Gadara railla eniruemo sijidimaci. Ieconí menamie Jesús dine bitiaimaiai. Jananiai anamo ite iaimaiai. Comini raioillanomo noñie moto ifuaimona bitiaimaiai. Nai iaimaiai eo riirena jira, jaca bu nainomo jainide. <sup>29</sup> Jesúsna iaimaiai ciua facaise jananiai iaimaiaina cuirioitate:

—Jusiñamui Jitodio. ¿Ñiese cocona nibaiacadio? Coco duere sefuille facaise nia inede; iadedi birui cocona duere finuaibidio —cuirioidiaimaiai.

<sup>30</sup> Naie bai iaire ailluena chanchuai guillano itimaci. <sup>31</sup> Jananiai Jesúsno duere llotimaci:

—Oni caina o oretajanona, chanchuai abimo caina oreta.

<sup>32</sup> Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abimo jaide. Iemona iconiaido chanchuai joraimo aisicana jaillanona, corobaiside.

<sup>33</sup> Iena ciuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiai rafuena llotimaci. <sup>34</sup> Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

## 9

*Jesús tisitaitimiena jillotaja rafue*

(Mr 2.1-12; Lc 5.17-26)

<sup>1</sup> Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride. <sup>2</sup> Nainomo rilla mei, naimie dine comini ie biramo biide tisitaitimiena atide.

Naimiena atidinodi Jesús naimiena jillotajana ñnote. Iena Jesús uñuanona, tsitaitimie mo llote:

—Moo, o comecina ocuiño. O jeacino cue feitaja jira, iena jai oni dotadicue. Ie facai ibana jai ofneiticue.

<sup>3</sup> Jesús dine ofidinomona dajerie Moisés micori llogacinona llofuerañi itimaci. Jesús llwana naimaci cacajano, Moisés micori llogacinona llofuerañi comecina facadimaci: “Dama Jusiñamui jeacina dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. <sup>4</sup> Naimaci comeciaina facajacinona Jesús uñuamona, Jesús dinena jicanote:

—¿Bue ñellena omoi comecina jeare facadomoi? <sup>5</sup> Bimiemo: “O jeacina jai oni dotadicue” cue lloia, cue uai siñonana uññoñeitomoi; ia bimiemo: “Mai naidacaillanona macari” cue lloia, cue uai siñonana uññoitomoi. <sup>6</sup> Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uññollena, tsitaitimie mo lloiticue: “Mai naidacai. O biira ferianona, o jofomo mai jai”.

<sup>7</sup> Iese naimie raillamona, tsitaitimie jillode. Naidacaida, ie jofomo jaide. <sup>8</sup> Comini iena ciuanona, jacinaitimaci. Bimiemo ie uaina Jusiñamui fecajana naimaci uñuamona, Jusiñamuimo iobillacinona fecadimaci.

*Jesúdi Mateona fetua rafue*  
(Mr 2.13-17; Lc 5.27-32)

<sup>9</sup> Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.  
Naidacaida, naimie diga jaidicue.

<sup>10</sup> Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci. <sup>11</sup> Nainomo fariseuai comini jamai bitimaci. Moisés micori llogacinodo eo jaidimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

<sup>12</sup> Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaídímaci. Ie isoide. Mareuidino cuena jitaiñedimaci; ia maraiñedino cuena jitaídímaci. <sup>13</sup> Jusiñamui facaina lloraima micori jaie cuega rafuemo omoi comeciaina



faca: “Jusiñamui llote: ‘Rana cuemo omoi fecajana jitaídícue; ia comínina omoi dueruillana jiaí jitaídícue’ llote”. Comínina cue dueruilla jira, Jusiñamui díbeimo naimaci illena, mareuidinona itatajaíbiñedícue; iadedí Jusiñamui díbeimo naimaci illena, maraiñedínona itatajaíbitícue. Omoimona maraiñedíno díga nabairítícue; ia naimacina uaíbitícue.

*Jesús díne Juan Bautista llofueoicaigano billa rafue*

*(Mr 2.18-22; Lc 5.33-39)*

<sup>14</sup> Naie facaise Juan Bautista llofueoicaiganodí Jesús díne bite. Naimíemo llote:

—Cai einamací llua isoi, Jusiñamuina cai raise iobitallena, guiñenaruillai illa facaiseconí guiñedícai. Cai jeacino facaina sunaícabítícai. Fariseuai comíní jiaí guiñedímací; iadedí o llofueoicaigano guitímací. Cai einamací llogacínodo jaidícai. ¿Bue ñellena o llofueoicaigano iedo jaiñedímací?

<sup>15</sup> Jesús uai ote:

—Jiaíe rafuedo iena lloítícue. Coniruedí ie aína uaruí ia, io-billa jira, ie nabaiñíai sunaiñedímací. Iobillamona guitímací. Jiaíruido jai aíreiacade conirue naimací díga íñenia, naimací comecí sunaíllamona, naimací jitaía, guiñenaruilladí iite. Ie isoide. Cue comíní díga biruí cue illa jira, íocíre ítímací. Íco cue jaille meí, sunaítímací. Ie muidona biruí cue llofueoicaigano guícabítímací. <sup>16</sup> Jiaíe rafuedo iena lloítícue. Nia jocoñega comue íniroidí jacaíe íniroímo jillíñega. Jillíadí, jocua meí, comue íniroí jacaíe íniroímona fo llírite. Eo fodo cuararíte. Jai maraiñeno cíote. <sup>17</sup> Jacagomona finoca bolsa como finoca vino joneñega. Jonegadena, maíríñena jira, sírillamona, ígoí raíre cuararíte. Vino faííte. Ígoí jiaí faííte. Como finoca vino comogomo jonelle. Iemeí iena faííñeíte. Ie isoide. Omoi einamací rafue ífomo jiaíe rafue biruí íte. Iena omoímo llocabítícue. Iedo jaidícai —llote.

*Jesúdí mena dúide riñona jillotaja rafue*

*(Mr 5.21-43; Lc 8.40-56)*

<sup>18</sup> Juan Bautista llofueoicaigano díga Jesús llotemo, jiaímíe naimíe díne bite. Naimíedí júdíuai ofíraco sedaraima. Jesúna duere jícanollena, caíñící ífodo raínadacáida llote:

—Cue jisa como fíodaíte. O onollí naíñaiñomo o jonellesa, naíñaiño jilloillesa, cue jofomo cue díga maí bí.

<sup>19</sup> Iena cacajano, Jesús naimíe díga jaide. Ie llofueoicaigano jiaí jaidímací. <sup>20</sup> Baí jaíllanona, dúídíñaiño jínafona jaide. Naimíe íniroína jetallena, naimíe díne bite. Ie jeraimona doce años jaca díaide. Billanona naimíe íniroína jetade. <sup>21</sup> “Naimíe íniroí cue jetajamona jilloítícue” comecina fa-cajamona, naíñaiño naimíe íniroína jetade. <sup>22</sup> Ieconí Jesús dobaidacáida, abído erodatemo, naíñaiño cíoide. Raíte:

—Ñoo, o comecina ocuiño. Cuen a o ñnua jira, jai jillodio.

Iecon i naiñaiño jillode.

<sup>23</sup> Ofiraco sedaraima jofomo Jesús rillano, naie jofa nama jisa jai fiodailla jira, comini merire fillana cacade. Ailluena failliñailana cacade. <sup>24</sup> Jesús ñnena raite:

—Jofomona nana omoi jino jaillana jitaide. Cuemona biñaiño fiodañedesa. Jamai ñide.

Iena cacajano, naiñaiño jai fiodaite uiñuamona, Jesús jaisitimaci. <sup>25</sup> Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiño ñi naidacade. <sup>26</sup> Naie rafue nana naie enirue itinomo llocana jaide.

### *Jesúdi uisínide iaímaiaína jillotaja rafue*

<sup>27</sup> Ofiraco sedaraima jofomona Jesús bai jaidemo, uisínide iaímaiaí naimie jinafona jaidiaímaiaí. Jesúsna ado uaidotiímaiaí:

—Cai illaima David micori jitodio. Jusiñamuimona o billa jira, cocona duenai.

<sup>28</sup> Uai oñeno Jesús Capernaumo jaide. Naimie fo jailla mei, naimie ñine bitiaímaiaí. Iaímaiaímo Jesús jicanote:

—¿Omicon a cue jillotajana ñnotomico?

Fairiotiaímaiaí:

—Jii.

<sup>29</sup> Iaímaiaí uisina Jesús jetajano raite:

—Cuen a omico ñnua ñiese jilloitomico.

<sup>30</sup> Iecon i iaímaiaí uisídi cide. Jesús naie rafuena llua na eo janotade.

—Bumo lloñeno —llote; <sup>31</sup> iadedi iena llocana jaidiaímaiaí. Iemona Jesús mameci nana naie eniruemo itinomo soride.

### *Jesús ñaiñedimiena jillotaja rafue*

<sup>32</sup> Capernaumona Jesús bai jaidemo, naimie ñine Janaba anamo illamiena jiaie comini atidimaci. Janaba anamo naimie illa jira, naimie ñainide. <sup>33</sup> Jesús Janabana oni orede. Oretaja mei, naie iima ñaite. Nainomo ite comini raíjicailanona raitimaci:

—Cai comini ñine bie isoide iima jilluana jaca cioñedicaí.

<sup>34</sup> Ie jira fariseuai comini ñnena raitimaci:

—Taife ñibeimo Janaba illamona, Jesúsdi Taife uaido Janabana oni orede —raitimaci.

### *Jesúdi cominina duenaila rafue*

<sup>35</sup> Diga ñairaímo ie llofueoicaigano diga Jesús llocana jaide. Nainomo judíuai ofiracuáimo llofueide. Naimie anamo comini illana Jusiñamui jitailla jira, Jesúsdi Jusiñamui

dibeimo naimaci comeciai iuaina meiduana llofujete. Ailluena duidinona jillotate. Naga isoide duicomona jillotate. <sup>36</sup> Naimacina duenaite. Naimaci comeciai iticino oni duiñoitimie iñena jira, naimacina duenaite. Ailluena cominina cide. Toica llaudaiai isoi ebe isoi jaidimaci. Naimaci comeciai ocuiñoñidimaci. Jusiñamui naimacina sedaacana uiñoñedimaci. <sup>37</sup> Naimacina duenaillamona, ie llofueoicaiganomo llote:

—Illimo ailluena trigo ia, iena ollena, ailluena maijirainina jitailla. Ie isoide. Ailluena comini ite naimacimo Jusiñamui rafuena cai llollena; iadedi naie rafuena lloraini eo iñedimaci. <sup>38</sup> Ie rafue naimaci llollena, ailluena cominina raire naimie oretallena Jusiñamuimo jicano.

## 10

*Jesúdi ie doce llofueoicaiganona fetua rafue*  
(Mr 3.13-19; Lc 6.12-16)

<sup>1</sup> Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duicono oni oretallena, iena jiai iñonocaide. <sup>2</sup> Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiai Zebedeo jito iaimaiai. <sup>3</sup> Felipe. Bartolomé. Tomás. Cueno jiai uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo. <sup>4</sup> Jiaie Simón. Naimiedi cananista comini facaisemo duide. Judas Iscariote micori. Naimiedi Jesúna gaitatate.

*Jesúdi ie llofueoicaiganona oretaja rafue*  
(Mr 6.7-13; Lc 9.1-6)

<sup>5</sup> Jesús ie llofueoicaiganona oni oretajanona, raite:

—Judíuaiñedino dine jaiñeno. Samaritano railla comini dine jaiñeno; <sup>6</sup> ia cai judíuai comini dine jai. Naimacimona ailluena comini Jusiñamui rafuena nia iñoñedimaci. Faificana nia jaidimaci. <sup>7</sup> Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”. <sup>8</sup> Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno. <sup>9</sup> Ucubena uiñeno. Guille ifo meidollena, rana uiñeno. <sup>10</sup> Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jiguidana uiñeno. Jiaie cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno. <sup>11</sup> Nie

nairaimo omoi ria, omoi rafuena jitaidimiena jeno, naimie jofomo omoi illena. Naie jofomo omoi i, naie nairaimo omoi ille dinori. <sup>12</sup> Naie jofomo omoi rillanona, naie cominina marena uaido. <sup>13</sup> Omoina naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitaifenia: “Jusiñamui omoina canoite” naimacimo lloñeno. <sup>14</sup> Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina jaidino. Maraiñede rafuena naimaci finuana naimaci uiñollena, omoi eilliaina jaidino. <sup>15</sup> Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

*Jesús duere sefuillifuenta llua rafue*

<sup>16</sup> Jesús ie llofueoicaiganomo nia llote:

—Naimacina janallari fañellena, naimaci duere sefuñellena, toica llaudaiaia raise sedajana jitaidimaci. Ie isoide. Eo maraiñede comini motomo omoina oretaiticue. Omoina duere finoacanitimaci. Raise sedajana jitaidomoi. Jaio fiadañellena, aiside. Naimiena bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i. <sup>17</sup> Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci. <sup>18</sup> Cue rafue omoi llua muidona, omoina gaitajanona, illaicomini dine omoina uitimaci. Omoina llogidoitinomo cue rafuena lloitomoi. Naie illaicominimo iena jiai lloitomoi. <sup>19</sup> Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomoi. <sup>20</sup> Dani omoi comeciia icinodo ñaiñeitomoi; ia Jusiñamui Joreño uaido ñaitomoi. <sup>21</sup> Cueno ñnotomoi; ia ailluena cuena ñnoñeitimaci. Cueno omoi ñnua jira, omoina enoitimaci. Iemona dajerie ie amana meinetallena, naimiena llogidoite. Dajerie moodie ie uruena meinetallena, naimiena llogidoite. Dajerie uruiaidi naimaci moona, naimaci eina meinetallena, naimacina llogidoitimaci. <sup>22</sup> Cue muidona ailluena comini omoina enoitimaci; iadedi cue uaina fañonocaiñedimie cue Moo diga monamo ja muidomo jaca iite. Naimiena jillotaiticue. <sup>23</sup> Cue rafue naimaci jitaifenamona, omoina nie nairai duere finoia, dinomona cue rafuena llollena, jiaie nairaimo raie jai. Cue rafuena omoi llollena, diga judiaia illanuaimo nia jaitomoi. Nana naie

comini nia inoñenia, Jusiñamui dinena dane abido biiticue. <sup>24</sup> Ero, ie llofueraima duere sefuia, ie llofuegamie daje isoi duere sefuite. Ie eci illamie duere sefuia, ie mullaima daje isoi duere sefuite. <sup>25</sup> Ie isoide. Cue cominina omoi jaillamona, cue duere sefuia, jiai duere sefuitomoi. Taife mameci jiaici llinuanona, “Beelzebúdio” jiaino cuena raitimaci. Iese cuena naimaci jeare ñaia jira, cue cominina omoi illa jira, omoina jiai jeare ñaitimaci.

*Jesúdi jaciruiñeno llofuia rafue*

*(Lc 12.2-9)*

<sup>26</sup> Jesús nia llote:

—Cuena inoñedino omoina jeare ñaitimaci; ia nana cue rafuena llocana omoi jailla jira, naimacina jaciruiñeno. <sup>27</sup> Omoimo rafuena anado jai lloticue. Iena nana cominimo marefodo llono. Ado llono. <sup>28</sup> Omoi abina meineredimaci; ia omoi joreña meinenidimaci. Omoina naimaci meineia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. <sup>29</sup> Omoina duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fioidañede. <sup>30</sup> Ero, niga ifotirai omoimo illana Jusiñamui uiñote. <sup>31</sup> Naimiedi omoina sedajana jiai uiñote. Silliñiai baifemo Jusiñamui isiruigamoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

*Jesús naimiena janoñenana llofuia rafue*

*(Lc 12.8-9)*

<sup>32</sup> Ie llofueoicaiganomo Jesús nia llote:

—Cue rafuena omoi lluamona, jiaino omoina duere finoitimaci. Cuena birui omoi janoñenia, nana comini Jusiñamui uicomo ico ia, nainomo omoina janoñeiticue. “Cue cominidomoi” omoina raiticue. <sup>33</sup> Cuena birui omoi janoia, nana comini Jusiñamui uicomo ico ia, nainomo omoina janoiticue. “Cue cominiñedomoi” omoina raiticue.

*Jesús muidona nana comini uri iñena rafue*

*(Lc 12.51-53; 14.26-27)*

<sup>34</sup> Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuena inoñedinodi cuena inotinona enoitimaci. Enoillamona cuena inotinona duere finoitimaci. <sup>35</sup> Cue lloga rafuena damierie inua muidona, ie moo illa dibeimo ie jito iñeite. Ie ei illa dibeimo naiñaiño jisa iñeite. Ie jifaiño illa dibeimo naiñaiño mio iñeite. Iese cominina uri itañedicue. <sup>36</sup> Omoi

comini coninina enoitomoi. Iemona duere sefuitomoi. <sup>37</sup> Ero, ie moona cue baifemo bu isiruia, ie eina cue baifemo bu isiruia, cue jitailla ra naimie finoacaiñena jira, cuemo raise duiñede. Ie uruia cue baifemo bu isiruia, cuemo raise duiñede. <sup>38</sup> Cue facaina bu fioldaiacaiñenia, cuemo raise duiñede. Naimiedi cue comini naimiena lloiacaiñedicue. <sup>39</sup> Cue facaina fioldaiacaiñedimie ja muidomo faifite. Cue diga jaca iñeite; iadedi cue facaina fioldaitimie monamo cue diga jaca iite.

*Jesús Jusiñamuimona ibana feiñua llua rafue*

*(Mr 9.41)*

<sup>40</sup> Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuen feiñotimiedi cuena oretatimiena jiai feiñote. <sup>41</sup> Naimie cue comini illamona, damierie Jusiñamui facaina lloraimana feiñoitimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. <sup>42</sup> Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena llorena, orede.

## 11

*Jesús dine Juan Bautista micori ie llofueoicaiganona oretaja rafue*

*(Lc 7.18-35)*

<sup>1</sup> Ie doce llofueoicaiganona Jesús oretaja mei, iaiei ite comini illanuaimo naimiedi ie rafuena llocana jaide.

<sup>2</sup> Ie facaiseconi cárcelmo Juan Bautista micori Jesús finoca rafuena fidiano, iena raise uiñollena, Jesús dine ie llofueoicaiganona orede. <sup>3</sup> Jesúmo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uiñoiacadica. Imieñediodena, jaiimie billemo nia ocuiridica.

<sup>4</sup> Jesús uai ote:

—Cue llua cacadomoi. Cue finoca rafuena ciodomoi. Juan dine abido omoi jaillanona, iena naimiemo llono.

<sup>5</sup> “Uisidino jai ciolimaci. Ñuja-ñujacaida jaidinodi jai raise macaritimaci. Efonaitino jai jillolimaci. Jefona cacaiñedinodi jai jefona cacasite. Fiollaillamona damierie jai jillolimaci.

Dueredino mare rafuena jai cacadimaci” naimiemo llono. <sup>6</sup> Jiai llono: “Ñibai nana cue rafuena raise cacaiñedio; ia cuena jaca nia inocana o jai, caimare iitio”.

<sup>7</sup> Juan llofueoicaigano abido jailla mei, naimie ecimo ailluena ite cominimo Jesúdi Juan rafuena llote:

—Jofue iñenanomo naimie navui ia, naimie dine jaidomoi. ¿Ñie isoidimiena ciodomoi? Daje uaido rafuena começina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Ñie isoide rafue naimiemo ia, cue rafuena llocana jaide. <sup>8</sup> ¿Bue ñellena naimie dine jaidomoi? Mare iniroina jítadimiena cioñedomoi. Mare iniroina jítadinona omoi cioacaniadedi, illaicomini dine jaidomoi. <sup>9</sup> Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoi naimie llua jira. <sup>10</sup> Malaquíás micori naimiema jaie cueda: Jusiñamui raite: “Ero, o uicodo cue rafuena lollena, damiena

oretaiticue,

comini começaina marecinona duiñollena”

cueda. Malaquíás Juan Bautistana cuede. <sup>11</sup> Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuede; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi. <sup>12</sup> Juan llofua tainiamona ailluena comini cue rafuena inuamona, Jusiñamui dibeimo birui duere iacadimaci. <sup>13</sup> Nana Jusiñamui facaina lloraini micoriaidi cue billena jaie llotimaci. Moisés micori iena jiai jaie llote. Juan facaise naie llogacino jai suide. <sup>14</sup> Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena inotomoidena, Juandi naimiema uiñotomoi. <sup>15</sup> Omoi jeforena jira, raise fueollena, cue llamo cacarei.

<sup>16</sup> Jesús nia llofuede:

—Ero, omoina ñaiticue. Jifanote uruia isoidomoi. Uruia jifanoiacania, naimaci nabaiñaina uaiduanona, raitimaci: <sup>17</sup> “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. <sup>18</sup> Ie isoidomoi. Juan jirorainide. Caimare guñede; ia naimie diga nabairiñedomoi. Naimiema gaiñedomoi. Ie jira omoi mona dajerie naimiema raitimaci: “Janaba anamo naimie illamona, naimie uarico isoi ite” raitimaci. <sup>19</sup> Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi.

Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”. Iese raitomoi; iadedi Jusiñamuina ñnotinodi cue finoca rafuena marenana uiñotimaci.

*Dajerie nairai Jesúna ñnoñena rafue*

*(Lc 10.13-15)*

<sup>20</sup> Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite. <sup>21</sup> Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi ñnoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uiñotallena, ebinide iniroina jitajanona, naimaci ifogiamo jusefona jonetimaci. <sup>22</sup> Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. <sup>23</sup> Omoimona damierie Capernaum railla illanomona bitomoi. Birui abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciai iuai omoi meidoñenia, monamo cue Moo diga jaca iñeitomoi; iadedi naimie omoina duere finollemona sunaitomoi. <sup>24</sup> Jusiñamui uicomo nana comini ico ia, cue rafuena omoi ñnoñena jira, Sodoma railla nairai baifemo duere sefuitomoi —llote.

*Jesús ie Moo diga ñaia rafue*

*(Lc 10.21-22)*

<sup>25-26</sup> Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

<sup>27</sup> Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiena uiñotadicue. Ie muidona naimiena uiñotomoi. <sup>28</sup> Omoi jeacinomona omoi jillobillena, duere jaidomoi. Omoi comeciai marena uri illena, cue dibeimo mai omoi i. <sup>29</sup> Cue llucacino anamo omoi i. Cue riinina jira, cuemona omoi fueo. Iemei omoi comeciai marena uri iite. <sup>30</sup> Omoina cue canua jira, cue llucacino anamo omoi iacanano ia, sefuinide. Omoina cue canolle jira, cue llucacino finuana sefuinide.



## 12

*Sábadoruimo Jesús llofueoicaigano maijia rafue  
(Mr 2.23-28; Lc 6.1-5)*

<sup>1</sup> Ie rafue lluamona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naido jaide. Ie llofueoicaigano aimetailla jira, trigona tijiano, golluano, guicana jaidimaci. <sup>2</sup> Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, camona jai maijidimaci. Iese cai abimo jeacinona jai finodimaci.

<sup>3</sup> Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. <sup>4</sup> Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede. <sup>5</sup> Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijuidimaci. Jusiñamuina naimaci sedallena, ocainana fatimaci. Iraina bonodimaci. Iese maijuidimaci; iadedi Jusiñamuimona jeacino finoñedimaci. Moisés micori jaie ciegafuiaina raise cacañedomoi. Iena raise facañedomoi. <sup>6</sup> Omoimo nia lloiticue. Jusiñamui jofomo finoca rafue baifemo faiticue. <sup>7</sup> Jusiñamui facaina lloraima iena jaie cuela: “Cuemo rana omoi fecajana jitaidicue; ia omoi jitaillamona, jiaie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedinona finodomo?” lloñedomoi. Cuemona cue llofueoicaigano jeacino finoñedimaci. <sup>8</sup> Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

*Jesúdi onollina idisarodimiena jillotaja rafue  
(Mr 3.1-6; Lc 6.6-11)*

<sup>9</sup> Bai jaillanona, nairai dine rillanona, naimaci ofiracomo Jesús fo jaide. <sup>10</sup> Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona

naimie jai maijiacana jira, naimiena llogidoiacadimaci.  
 11 Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi.  
 12 Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

13 Onollina idisarodimiemo llote:

—O onolli mai oni ñuita.

Iena ñuitajamona jillode. 14 Iena ciuanona, fariseuai jino jaidimaci. Naimiena meinellena, coniniri siadotimaci.

*Isaías micori jaie Jesúna ñaia rafue*

15 Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

16 —Cuenallocana jaiñeno —naimacimo llote. Naimie mameci are sorillana jitaiñede. Fariseuai diga ie uai uaitaiacaiñede. 17 Iemona Isaías micori jaie cuezafuiai jai suide. Jusiñamui Isaías micorina jaie cuetataga:

18 Ero, cue fetoca mullaíma ite.

Naimiedi cue isiruigamie. Naimieri iobidicue.

Cue Joreño naimiemo cue fecajanona, judíuaiñedinomo naimacina cue jilloitaacanana lloite.

19 Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

20 Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue llamona, naimiena inotinona canoite.

Nana comini naimie anamo ille dinori iese naimie canoite.

21 Naimaci jillobillena, ie rafue cacajanona, ailluena judíuaiñedino naimiena inoitimaci.

*Fariseuai Jesúna jeare ñaia rafue*

(Mr 3.19-30; Lc 11.14-23; 12.10)

22 Jesús dine damieriedi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Cíode.

23 Naiena ciodino raijicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuridicai.

24 Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

25 Naimiena naimaci enoillana Jesús uiñuanona, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. <sup>26</sup> Ie isoide. Beelzebú uaido jananiaina omoi lua isoi cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. <sup>27</sup> Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uñollena. Iemei cue finoca rafuena uaitañeitomoi. <sup>28-29</sup> Ero, mairidimie ie jofomo ite rana nibai fiacadomoi. Iena fillena, naimiena nano raise omoi maiga. Raise maia mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llua jai uñotomoi. <sup>30</sup> Cue dibeimo iñedimie cuena enoide. Cue dibeimo cominina itatañedimiedi naie cominina cuena iñotañede. <sup>31</sup> Ie jira omoimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreña jeare ñaiacinona dotañeite. <sup>32</sup> “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreña omoi jeare ñaia, Jusiñamui iena birui feitañeite. Iena ico jaca feitañeite.

*Jesúdi riará llisilla llua rafue*  
(Lc 6.43-45)

<sup>33</sup> Jesús llote:

—Llisillamona nie isoide riará illana uñoticaí. Amena ie llisilla llillamona, amena marena uñoga. Llillamona, amena marañenana jiaí uñoga. <sup>34</sup> Ie isoide. Omoi ñaiamona omoína uñoticaí. Cuena omoi marañeno ñaia jira, omoi comeciái iticinona uñoticaí. Omoi marañena jira, jaió nairaidomoi isoidomoi. <sup>35</sup> Mareuidimie mare ie comecimona ñaite; iadedi marañedimie marañede ie comecimona ñaite. <sup>36</sup> Jamái ebena birui omoi ñaia, Jusiñamui uicomo nana comini ico illa fa-caiseconi Jusiñamui iba oite. <sup>37</sup> Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciái iuai meido.

*Dajerie Jesús siño rafuena fñuana jitailla rafue*  
(Mr 8.12; Lc 11.29-32)

<sup>38</sup> Naie facaiseconi dajerie Moisés micori llogacinona llo-fueraini dajerie fariseuai diga Jesúmo llotimaci:

—Maestro, o lloga uaina cai ñnollena, siño rafuena o finuana cioacadicaí.

<sup>39</sup> Jesús uai ote:

—Maraiñedicinona finocabidomoi. Jusiñamui díbeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeíticue. Ero, Jonás micori jaie ite rafuena uiñotomoi. Naiemo omoi comeciaina omoi faca. <sup>40</sup> Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iíticue. Iemei naiemona jilloíticue. <sup>41</sup> Lliciaí jeraimona naimie jillua mei, Ninive railla nairai díne Jonás micori jaide. Nainomo Jusiñamui rafuena llote. Naie comini iena cacajano, naimaci comeciaí icinuaina meidotimaci. Cue rafuena omoi cacajamona, omoi comeciaí icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi” omoína raiñeíticue. Jonás micori baífemo birui uaidicue; iadedi cuena ñnoñedomoi. <sup>42</sup> Ero, Saba railla nairai ie illaiño micoridi Salomón micori díne jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baífemo birui uaidicue; iadedi cuena ñnoñedomoi. Omoi comeciaí icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoína ico ñaite: “Naimiedi siño rafue finuana ciodomoi. ¿Bue ñellena naimiena ñnoñedomoi?” omoína ico ñaite.

*Janaba anamo illamie rafue*

*(Lc 11.24-26)*

<sup>43</sup> Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jaie illanona baillena, jofue iñenanomo jaide; iade baiñede. <sup>44</sup> Baiñena jira, naimie comecina facade: “Navui cue anamo illamie díne abido jaiticue”. Abido naimie bia, naie iima comeci namanidena naimie baite. <sup>45</sup> Iemei oni jaillanona, jaie siete jananiaina naimie díga atide, naimaci anamo naie iima illena. Naie siete jananiai naimie baífemo maraiñedimaci. Iemona naie iima eo fodo jaide. Ie isoide birui ite maraiñede comini. Cue rafue naimaci ñnoñenia, eo fodo jaitimaci.

*Jesús ie comini*

*(Mr 3.31-35; Lc 8.19-21)*

<sup>46</sup> Jofomo comini díga Jesús nia ñaia, naimie ei, ie amatiaí díga, bite. Naimie díga ñaiacanano, jino naidaide. <sup>47</sup> Damie Jesúmo llote:

—O ei, o amatiaí díga, jino ite. O díga ñaiacade.

<sup>48</sup> Naimiemo Jesús dinena jicanote:

—¿Bu cue ei? ¿Bu cue amatiaí?

49 Ie llofueoicaigano dine ie onolli ñuitajanona, raite:

—Jadi, cue ei, cue amatiái. <sup>50</sup> Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

## 13

*Trigo judaidimie rafue*

(Mr 4.1-9; Lc 8.4-8)

<sup>1</sup> Nai jofomona nairui Jesús jaillanona, jorai fue dine jaide.

<sup>2</sup> Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. <sup>3</sup> Ailluena rafue naimacimo llote:

—Jusiñamui omoína sedaacana omoi fueollena, bie rafuena lloiticue. Damie trigona judaiaide. <sup>4</sup> Naimie judaia mona, naisomo janore iduai juide. Naimie bai jailla mei, silliñiaí iena guisaibitimaci. Ie jira sicoñede. <sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, <sup>6</sup> raise jainañena jira, ecasillamona duide. Ie jira llisiñede. <sup>7</sup> Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede. <sup>8</sup> Mare eniruemo jiaie iduai juide. Sicode. Llisillamona danademo cien diga llisillana ote. Jiaínamona sesenta diga llisillana ote. Jiaínamona treinta diga llisillana ote. <sup>9</sup> Omoi jeforena jira, raise fueollena, cue lluomo cacarei. Iena ñno.

*Jesús ie como lloga rafuena llofuia rafue*

(Mr 4.10-12; Lc 8.9-10)

<sup>10</sup> Ie llofueoicaigano Jesús mo jicanuaibiside:

—¿Bue ñellena bie isoide rafuedo cominina llofuetio?

<sup>11</sup> Uai ote:

—Jusiñamuidi omoína ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñoñañede.

<sup>12</sup> Jusiñamuina ñnotimie Jusiñamui rafuena ñnocana jaite. Jusiñamui naimiena uiñoñaite; iadedi Jusiñamuina ñnoñedimie Jusiñamui rafuena uiñoñecana jaite. <sup>13</sup> Ie jira bie isoidicínodo naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoñoeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. <sup>14</sup> Isaías micori naimacina jaie cuega rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>15</sup> Omoi comeciái jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisínidomoi isoidomoi. Siño rafuena jai cioiacaiñedomoi.

Iena jai uññoiacaiñedomoi.

Cue dibeimo iacaiñedomoi, omoına cue jilloitai raillanona”.

Isaías micorí Jusiñamuina ñnoñedinona iese jaie cuete; 16 iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ni ua omoi marena ille jillaci. 17 Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

*Jesúdi trigo judaidimiena llua rafue*

(Mr 4.13-20; Lc 8.11-15)

18 Jesús llote:

—Ero, omoına trigo iduaina judaidimie rafuena llofueitícue. 19 Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaino cacaja uaina ñnotañede. 20 Jiaie iduai noñemo juide. Dajerie comini comeciai naie noñie isoidimaci. Jusiñamui uai nano naimaci cacaia, iena caimare feñnotimaci. 21 Noñemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. 22 Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci. 23 Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Raiticiai trigo motomo illa rafue*

24 Jesús jiaie rafuena llote:

—Jusiñamui ie cominina sedaacana rafuena lloitícue. Naimie dibeimo comini jaillena, naimie rafue llocana jaidícue. Jiaie uaido iena omoimo lloitícue. Damie trigona judaiaide. Ie illimo mare iduaina judaide. 25 Naimie inia mei, ie enoidimie trigona eruaide raiticiaina bainino judaiaide. Iemei oni jaide. 26 Trigo sicuamona lliside. Naie facaise naie raiticiai como raise bairede. 27 Judaidimie maijiraini iena ciuanona, naimiemo llote: “Mare iduai navui ritio.

¿Niesedeta raiticiai eo sicode?”<sup>28</sup> Uai ote: “Cuena enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?”<sup>29</sup> Uai ote: “Dama ite. Raiticiai omoi raitia, trigona jiai jaitaitomoi. Dama iesede.<sup>30</sup> Danomo sicoite. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

*Jesúdi mostaza ido llua rafue*

*(Mr 4.30-34; Lc 13.18-19)*

<sup>31</sup> Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riará sicode.<sup>32</sup> Mostaza ido eo janorede; iadedi sicua mei, eo aillue riará jaillamona, nainomo silliñiai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

*Jesús siritate rana llofuia rafue*

*(Mr 4.33-34; Lc 13.20-21)*

<sup>33</sup> Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

<sup>34</sup> Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede.<sup>35</sup> Jusiñamui facaina lloraima micori iena jaie cuega: Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaise-mona jaca bu iena uiñoñede. Birui naimaci uiñollena, iena lloiticue”.

*Jesús trigo motomo riga raiticiaina llofuia rafue*

<sup>36</sup> Comini jino faionocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñollena, trigo motomo riga raiticiai rafuena caimo llono.

<sup>37</sup> Uai ote:

—Mare iduai judaidimiedi cue. Jusiñamui rafuena lloiticue.<sup>38</sup> Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini.<sup>39</sup> Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisai. Trigodi cuena inotino.<sup>40</sup> Jobaillena raiticiai ofitaja isoi, ico abido cue bia, daje isoi ite.<sup>41</sup> Cue jaienisaina oretaiticue, nana jecinona finoraini diese ofitallena, cue illanomona iraimo dotallena.

<sup>42</sup> Nainomo eo duere sefuillamona, eetitimaci. Subicaitimaci.  
<sup>43</sup> Iemei jitoma lligaiñua isoi, Jusiñamui sedajanomo naimiena  
 ñnotinodi marena bairenitimaci. Omoi jeforena jira, raise  
 fueollena, cue lluamo cacarei. Bie isoi omoi duere se-  
 fuiñellena, cue lluana ñno.

*Jesúdi eniruemo isiruiga reica rana llofuia rafue*

<sup>44</sup> Jesús llote:

—Jusiñamui díbeimo comini jailla rafuena lloiticue. Jiaie  
 uaido iena omoimo lloiticue. Eniruemo isiruiga raifide ra bu  
 baia, ie nama jai ñena jira, naie eniruena uainino íbaacade,  
 naie ra ollena. Ucube ollena, naie rari íobilla jira, nana  
 naimiemo ite raruiaina fecaite. Iemei eniruena íbaite. Ie  
 isoide. Jusiñamui illanomo omoi illena, jiaie rafue uanona  
 jaiñeno. Dani Jusiñamui rafuena uanona jai. Dani íemo omoi  
 comeciaina faca.

*Perlas railla rafue*

<sup>45</sup> Jesús llote:

—Jusiñamui díbeimo comini jailla rafuena lloiticue. Iena  
 omoi raise uíñollena, perlas railla rana íbaraimana lloiticue.  
 Eo mare perlas íballena jenocabide. <sup>46</sup> Eo raifide perla naimie  
 baia, naie perlana íballena, nana ie raruiaina fecaite. Ie  
 isoide. Jusiñamui íe cominina sedaacaja rafuena omoi cacaja  
 jira, iena ocana jai.

*Jesús lloijina ñaia rafue*

<sup>47</sup> Jesús llote:

—Jusiñamui díbeimo comini jailla rafuena lloiticue. Iena  
 omoi raise uíñollena, lloijina lloiticue. Joraimo lloijina  
 comini faianona, naga isoide lliciaina otimaci. <sup>48</sup> Ari sonua  
 mei, mare lliciai diese fetodimaci. Marañede lliciai diese  
 oni faitimaci. <sup>49</sup> Ie isoide. Íco abido cue bia, íese íite.  
 Jusiñamuina ñnotinomona naimiena ñnoñedino diese oni  
 fetollena, Jusiñamui jaienisaí biitimaci. <sup>50</sup> Iemei iraimo  
 Jusiñamuina ñnoñedinona dotaitimaci. Nainomo eo duere  
 sefuillamona eetitimaci. Subicaitimaci.

*Jesús llofueoicaiganodi mare rafuena jai uíñua rafue*

<sup>51</sup> Ie llofueoicaiganomo Jesús jicanote:

—¿Nana cue lluana cacadomoi?

Uai otimaci:

—Jii, nana cacadicaí.

<sup>52</sup> Naimacimo llote:

—Ie jofomo comini bia, naimacina raise nafuellena,  
 naimacina caimare itatallena, jofu nama íe mare  
 raruiaimona naimaci jitailla ra naimacimo fecade. Comini  
 comeciaina lloiticue. Jusiñamui facaina lloraini micoriai  
 llogacinona uíñotomoi. Cuemona Jusiñamui íe cominina



sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

*Nazaretmo Jesús illa rafue  
(Mr 6.1-6; Lc 4.16-30)*

<sup>53</sup> Naie rafuena Jesús llua mei, nainomona Nazaretmo jaide. <sup>54</sup> Ie eniruemo rillanona, Nazaretmo ite ofiracomo llofuate. Naiemona cominidi rajicaillamona raitimaci:

—¿Niese naimiedi eo abina uñote? ¿Niese siño rafuena naimiedi finode? Naimiedi jamai bue isoidimie. <sup>55</sup> Naimie amederaima jito. Naimie eidi María. Naimie amatiaidi Jacobo, José, Simón, Judas. <sup>56</sup> Naimie miriñotiaidi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

<sup>57</sup> “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iinoñedomoi.

<sup>58</sup> Naimie uaina naimaci iñoñena jira, Jesús ailluena siño rafue finoñede.

## 14

*Juan Bautista micori fiodailla rafue  
(Mr 6.14-29; Lc 9.7-9)*

<sup>1</sup> Naie facaiseconi Herodes railla gobernador Jesús mamecina cacade. <sup>2</sup> Naimie ecimo maijuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

<sup>3-4</sup> Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluana gaiñenano, naimiena duere finode. Herodes Juan micorina gaitatajanona, cárcelmo jonetade. <sup>5</sup> Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite.

<sup>6</sup> Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. <sup>7</sup> Ie jira naiñaiño llote:

—Nie isoide rana o jitaiadedi, omo iiticue. Illaima uai cuemo illa jira, iena ua finoiticue.

<sup>8</sup> Naiñaiño ei naiñaiño mo lluanona, naiñaiño uai ote:

—Juan Bautista ifogí bandejamo jonecaida, cuemo ine.

<sup>9</sup> Iena cacajano, naimie sunaite; iadedi naimie jino ie llua uaina jira, nainomo naimie uaidogano jiaí jai cacaja jira, Juan micorina meinetajana llote. <sup>10</sup> Ie lloga uaina finollena, cárcelmo soldadona orede. Nainomo Juan micorí ifogina jaitade. <sup>11</sup> Bandejamo naimie micorí ifogí jonecaida, soldado atiano, Herodías jisamo fecade. Ieconí ie eimo fecade. <sup>12</sup> Iena fidiana, Juan micorí llofueoicaigano naimie micorí abina uai bitimaci. Iena naimaci raia mei, Jesús mo llua idimaci.

*Jesús cinco mil iñiaina eaja rafue  
(Mr 6.30-44; Lc 9.10-17; Jn 6.1-14)*

<sup>13</sup> Juan micorí meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanua imona eillido bitimaci. <sup>14</sup> Eniruemo Jesús sijia, ail-luena cominina dafafide. Naimacina cianona, naimacina duena illanona, duidinona jillotate. <sup>15</sup> Jitoma ana itemo, ie llofueoicaigano naimie dine llua bitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianorí ite nairaimo naimaci guille ollena, naimacina oreta.

<sup>16</sup> Uai ote:

—Naimacina oretañeiticue. Naimacina omoi eca.

<sup>17</sup> Uai onaisite:

—Dani caimo ite cinco llomenico, mena lliciaí diga.

<sup>18</sup> Uai ote:

—Iena cuemo ati. <sup>19</sup> Raitie illanomo comini ana raillesa llono —raite.

Naie cinco llomenicono naie mena lliciaí diga uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. <sup>20</sup> Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci. <sup>21</sup> Cinco mil iñiaí diese guitimaci. Naimaci aitiaí jiaí guitimaci. Naimaci uruiaí jiaí guitimaci.

*Jesús jinui emododo macarilla rafue  
(Mr 6.45-52; Jn 6.16-21)*

<sup>22</sup> Guilla mei, botedo ie llofueoicaigano ruica dine jaillena llote. Naie facaiseconí naimie cominina nia facadote. <sup>23</sup> Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. <sup>24</sup> Naie facaiseconí ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. <sup>25</sup> Nia monañedemo, jinui emododo naimaci dine

Jesús bite. <sup>26</sup> Naimiena naimaci ciuanona, jacinailamona, raitimaci:

—¿Bu joreño caimo billana ciodicai? —Jacinailamona cuiroidimaci. <sup>27</sup> Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

<sup>28</sup> Pedro uai ote:

—Uanai cai Namadio. O dine cue billesa cuemo llono.

<sup>29</sup> Jesús uai ote:

—Cue dine bi. —Ie jira botemona jinui emodo Jesús dine Pedro macarite; <sup>30</sup> iadedi aifi billana naimie ciuanona, jacinainte. Jinuimo anabaiacade. Ado cuiριοide:

—Nama, cuena cano.

<sup>31</sup> Jesús ie onolli oni ñuitajanona, naimiena llinuanona, raite:

—Eo janore cue uaina ñnotio. ¿Bue ñellena eo ñnoñedio? Cuena ñnotiodena, jinui emododo cue dine niadedi ridio.

<sup>32</sup> Botemo a iaimaiaia jaillamona, ie facaise aifi llucaide. <sup>33</sup> Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

*Jesúdi duidinona Genesaret eniruemo jillotaja rafue*

*(Mr 6.53-56)*

<sup>34</sup> Ruica dine jaillanona, Genesaret railla eniruemo ridimaci. <sup>35</sup> Jesúsna nainomo itino uiñuamona, naimie dine duidinona atillena, nana nairaimo jiaie cominina oredimaci.

<sup>36</sup> Naimie dine billanona, dani ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

## 15

*Jesúdi comini comeciaina ñaia rafue*

*(Mr 7.1-23)*

<sup>1</sup> Jerusalémona fariseuai comini Jesús dine bitimaci. Moisés micori llogacinona llofueraini jiaí bitimaci. <sup>2</sup> Naimiemo jicanotimaci:

—¿Bue ñellena o llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi raise jocoñedimaci. Ie jira cai abimo jeacino finodomoí.

<sup>3</sup> Jesús uai ote:

—¿Bue ñellena nana Jusiñamui llogacinodo jaiñedomoí? Omoi einamací llogacinodo jaidomoí; iadedi nana Jusiñamui llogacinodo raise jaiñedomoí. <sup>4</sup> Jusiñamui jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. <sup>5</sup> Iese Jusiñamui llote; iadedi omoi einamací llotimaci: “Jusiñamuimo cai ucubena cai fecajamona, cai

moona, cai eina jai canonicai”. <sup>6</sup> Iese omoi finocabilla jira, omoi einamací llogacinodo omoi jaillamona, Jusiñamui uaina jamaidomoi. <sup>7</sup> Mareuidinona abi caitauidinodomoi. Isaías micori omoína jaie raise llote. Naimiedi Jusiñamui llwana cuete:

<sup>8</sup> Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci. “Ona sedadicaí” llotimaci.

Jamai ñaitimaci. Naimaci comeciai cue dibeimo raise iñede.

<sup>9</sup> Cue uai itena, jamai comini llucacina naimaci llofuecabilla jira, tainona cuena sedadimaci.

<sup>10</sup> Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uinollena, cue llua mo cacarei. <sup>11</sup> Omoi einamací isoi omoi guinena, naimaci isoi omoi onollina omoi jocoñena, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoi mo jeacino illa jira, Jusiñamuina nabaiñedomoi. Omoi comeciái jearena jira, jeacina finocabidomoi.

<sup>12</sup> Ie llofueoicaigano naimiemo lluaibitimaci:

—O llua muidona, fairseuai cominina icidio.

<sup>13</sup> Naimie dinena uai ote:

—Dama ite. Nana cue Moomona oñega rafuedi jai ieconi dute. Naimaci rafue cue Moomona oñena, ja muidomo ieconi dute. <sup>14</sup> Naimacina fañonocai. Uanaicina naimaci uinonena jira, uisnidino isoidimaci. Jaiimena uisnidimie ifoia, dafomo uaidiaimaiai. Ie isoide. Uanaicina fariseuai uinonena jira, uanaicina llofuenidimaci. Uanaicino jaiñedimaci. Ja muidomo faifitimaci.

<sup>15</sup> Pedro naimiemo llote:

—Aillinano o llua caimo raise llono.

<sup>16</sup> Uai ote:

—¿Niese cue llwana jiai nia cacaiñedomoi? <sup>17</sup> Nie isoide ra guitomoina, omoi jebemo jaide. Ie mei omoi abiamona jino bite; <sup>18</sup> iadedi omoi comeciaino iticinomona jearedena ñaitomoi. Omoi comeciái jearena jira, jearede rafuena finocabidomoi. <sup>19</sup> Omoi comeciái jearena jira, jeare comeciaina facacabidomoi. Comena meinecabitomoi. Omoi añede riño diga icabitomoi. Omoi iniñede ima diga icabitomoi. Firicabitomoi. Tainona llogiricabitomoi. Jai comini joreña jeare ñaicabitomoi. <sup>20</sup> Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comiñede.

*Jesúdi judío iñaiñediñaiñona jillotaja rafue  
(Mr 7.24-30)*

<sup>21</sup> Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide. <sup>22</sup> Ie facaiseconi naie eniruemona judíuñediñaiñodi billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

<sup>23</sup> Jesús uai oñede. Ie jira ie llofueoicaigano naimie dine billanona, duere llote:

—Naiñaiño na abido ie jofomo oreta. Caimo duere jicanuaibitesa.

<sup>24</sup> Jesús uai ote:

—Faificana jaillana naimaci jai jailla jira, dani cai judíuai cominimo cue Moo cuena oretate. Naimiedi judíuñediñaiño mo cuena oretañede.

<sup>25</sup> Ie facaise naimie dine naiñaiño billanona, naimiemo iobillacinona fecallena, caiñici ifodo ana rainada raite:

—Maestro, cuena cano.

<sup>26</sup> Judíuaiñedinona naimie canoñenana naiñaiño uiñollena, naiñaiño mo Jesús llote:

—Urui ai guillamona jiconiaina eadicaidena, marañede.

<sup>27</sup> Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona gutimaci. —Iese llote; ia jiaie rafuemo comequina facade. Uruiaina llote; iadedi judíuai mo comequina facade. Jiconiaina llote; ia judíuaiñedinomo jiai comequina facade. Comequina facade: “O cominimo o rafue duide; ia cai Namana o illa jira, nibai o rafue caimo janore duide”.

<sup>28</sup> Jesús uai ote:

—Cue uaina o ñnua jira, o jitailla rafuena finoiticue. —Ieconí naiñaiño jisa jillode. Janaba naiñaiñomona oni jaide.

### *Jesús ailluena duidinona jillotaja rafue*

<sup>29</sup> Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei, <sup>30</sup> ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate. <sup>31</sup> Ailli uainidino jai ñaiana cacajamona, ailli onollina idisaruidino onolli jai marenana illana ciuamona, ailli ñuja-ñujaidino macaridino jai marena macarillana ciuamona, ailli uisnidino jai ciuana ciuamona, nainomo ite comini eo raijicaidimaci. Cai Jusiñamuimo iobillacinona fecadimaci.

*Jesúdi cuatro mil iñiaina ecaja rafue  
(Mr 8.1-10)*

<sup>32</sup> Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci baii raillanona. Naimacina cue duenaila jira, naimacina canoacadicue.

<sup>33</sup> Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

<sup>34</sup> Jesús jicanote:

—¿Níga llomenico omoimo ite?

Uai otimaci:

—Siete. Janorede llicisiriaí caimo jiaí ite.

<sup>35</sup> Comini ana raillena Jesús llote. <sup>36</sup> Naie llomenico llicisiriaí diga uanona, Jusiñamui iobillacino fecade. Taiilluanona, ie llofueoicaiganomo fecade, naie cominimo fecallena. <sup>37</sup> Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. <sup>38</sup> Nainomo cuatro mil iñiaí guitimaci. Naimaci ainiaí jiaí guitimaci. Naimaci uruiaí jiaí guitimaci. <sup>39</sup> Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

## 16

*Fariseuai comini Jesús mo siño rafuena fñuana jicanuano billa rafue*

*(Mr 8.11-13; Lc 12.54-56)*

<sup>1</sup> Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie fñuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

<sup>2</sup> Jesús uai ote:

—Jitoma sojicaidemo, mona jiairenia, raitomoi: “Ico are maremonanite”. <sup>3</sup> Jiaí raitomoi: “Jitiramo mona jiairenia, ja noci deite”. Monamo omoi eruaillamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. <sup>4</sup> Jeacinona finocabidomoi. Jusiñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeциаina omoi faca. Fiodaillamona naimie jillode. Ie isoi cue jiaí jilloiticue. —Ie llua mei, naimacimona Jesús ie llofueoicaigano diga oni jaide.

*Jesús siritate rana llofuia rafue*

(Mr 8.14-21)

<sup>5</sup> Ruica dine naimaci rillanona, ie llofueoicaigano llomeniconona feillana uibiñotimaci. <sup>6</sup> Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiaçinomona abi rairuillena ñaite. <sup>7</sup> Jesús iese llua jira, iena naimaci raise cacaiñena jira, dani coniniri siadotimaci:

—Llomeniconona cai atiñena jira, caimo iese llote.

<sup>8</sup> Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise ñnoñedomoi. Omoina canoredicue. ¿Bue ñellena dani omoi llomenico iñenana siadotomoi?

<sup>9</sup> ¿Ñiese ñnoñedomoi? ¿Ñiese cue navui siño finoca rafuemo começaina facañedomoi? Navui cinco mil iñia; cinco diganicodemo gutimaci. Monillamona, guigamona fiebillamona, doce cirigaiaimo iraidomoi. <sup>10</sup> Jiaicaiño cuatro mil iñia; siete diganicodemonona gutimaci. Monillamona guigamona fiebillamona, siete cirigaiaimo iraidomoi.

<sup>11</sup> Omoina cue ecallena, ¿ñiese cuena birui ñnoñedomoi? Llomeniconona ailli ñañedecue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

<sup>12</sup> Ie facaise naimie llua jai cacadimaci. Llomenico siritate rana naimie ñañede; iadedi fariseui llofuiaçinomona naimaci abina rairuillena ñaite. Saduceuai llofuiaçinomona naimaci abina rairuillena ñaite.

*Pedro Jesúsna llua rafue*

(Mr 8.27-30; Lc 9.18-21)

<sup>13</sup> Cesarea Filipo railla eniruemo Jesús jaidemo, ie llofueoicaiganomo jicanote:

—¿Ñiese jiaie comini cuena raitimaci?

<sup>14</sup> Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraina micoridio”.

<sup>15</sup> Jesús dane jicanote:

—¿Ñiese omoi cuena raitomoi?

<sup>16</sup> Pedro uai ote:

—Odi cai Jilloitaraimadio. Cristodio. Jusiñamui facaina lloraini micoria; o billena jaie llotimaci. Cai cajede Jusiñamui Jitodio.

<sup>17</sup> Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade.

<sup>18</sup> Pedro, o comecina uifnoticue. Cuena como o lloga uaina meidoñeitio. Bie rafuena jiaie cominimo o llumona, jiai inoitimaci. Cuena inuamona, cue cominina jaitimaci. Cue dibeimo inedino iena itatanidimaci. <sup>19</sup> Ailluena cominimo Jusifamui ie cominina jailla rafuena nano lloramana jaitio. O llucinodo jaitino cue cominina jaitimaci. O llucinodo jaiñeitino cue cominina jaiñeitimaci

<sup>20</sup> Iena llua mei, ie llofueoicaiganona rairuide:

—Cue Cristonana bumonia lloñeno.

*Jesús ie fodaillena llofua rafue*

(Mr 8.31–9.1; Lc 9.22–27)

<sup>21</sup> Naie facaisemona ie llofueoicaiganomo Jerusalémo naimie jaillena maredo llote:

—Nainomo cai judiaui illaicomini cuena eo duere finoitimaci. Cuena meineitimaci; iadedi darui amani illanona, fodaillamona jilloiticue.

<sup>22</sup> Pedro dinena lletade:

—Nama, Jusifamui iena jitañede! Bie isoide rafue omo suiñeite.

<sup>23</sup> Jesús jinafo dine naimiemo erodate. Raite:

—Cuemona oni jai. Iese ñaiñeno, Taife isoi o comecina o facaja jira. Jusifamui isoi cuemo comecina facañedio. Comini isoi cuemo comecina facadio. Iese o comecina facañeno.

<sup>24</sup> Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite. <sup>25</sup> Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaiacania, jaca faifiñeite. <sup>26</sup> Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite. <sup>27</sup> Cue jaienisai diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue. <sup>28</sup> Unaicinona omoimo lloiticue. Omoimona dajerie ñia fodaifñeitomoimo, illaimana cue bairellena cioitomo.

## 17

*Jesús abi meidocaila rafue*

(Mr 9.2–13; Lc 9.28–36)

<sup>1</sup> Seis digarui illanona, anedumo comini inenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uifñede. <sup>2</sup> Nainomo rilla mei, naimaci uicomo naimie abi



meidocaide. Jitoma isoi naimie uieco bairecaide. Naimie iniroi naie dacaiño eo userecaide. <sup>3</sup> Naie facaise naimacimo Moisés micori joreño, Elías diga bairede. Elíadi Jusiñamui facaina jaiie lloraima. Jesús diga ñaitiaimaia. <sup>4</sup> Jesúmo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

<sup>5</sup> Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie llamo cacareillanona, iena ñno —llote. <sup>6</sup> Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. <sup>7</sup> Jesús naimaci dine billano, naimacina jetajanona, raite:

—Mai jaciruiño naidacai.

<sup>8</sup> Naimaci erorillamona, dama Jesúna ciodimaci. <sup>9</sup> Anedumona bitimacimo, naimacimo Jesús llote:

—Omoi ailli ciua rafuena bumo lloño, cue fiodaillamona cue jillua dinori.

<sup>10</sup> Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitarama biite” raitimaci. Jusiñamuimona o billana ñnoticai. Odi cai Jilloitaramana ñnoticai. Odi cai Jilloitaramadiomo, ¿bue ñelli iese raitimaci?

<sup>11</sup> Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lollena. Jusiñamui dibeimo naimaci illena, comini imaci comeciai meiduana llote. <sup>12</sup> Ero, naimie jai bite; iadedi bie comini naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, imana cue jaillena; iadedi duere sefuiticue.

<sup>13</sup> Ie muidona Jesús llofueoicaigano naimiedi Juan Bautista micorina ñaiana jai uiñotimaci.

*Jesúdi Janaba anamo itimiena jillotaja rafue  
(Mr 9.14-29; Lc 9.37-43)*

<sup>14</sup> Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caiñici ifodo rainadacaida raite:

<sup>15</sup> —Maestro, cue jitona duenai. Janaba anamo naimie ite. Iemona naillicabide. Duere sefuide. Uai-uaicabide.

Jiaicaiñodedi iraimo uailanona, uside. Jinuimo jiai uailanona, niadedi corobaite. <sup>16</sup> Naimiena jilloitallena o llofueoicaigano dine naimiena atidicue; iadedi naimiena jillotanidimaci.

<sup>17</sup> Iena cacajanona, Jesús ie llofueoicaiganomo llote:

—Cue uai siñonana nia ñinoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñinollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

<sup>18</sup> Naimiena atiamona, Jesús naimiemo Janaba illana uñote. Janabana Jesús lletaja jira, naie uruemona Janaba oni jaide. Ieconí naie urue jillode.

<sup>19</sup> Ie mei ie llofueoicaigano Jesús mo anado jicannotimaci:

—¿Bue ñellena Janabana oni oretanidicai?

<sup>20</sup> Uai ote:

—Raise nia omoi ñinoñena jira, uanaicinona omoimo lloiticue. Janaba oni oretallena, cue uai navui omoimo iticue. Birui raise cuena omoi ñinoñenia, bie Janaba oni oretanidomoi. Jusiñamuina eo janore ñinotomoidena, diga rana finodomoi. “Oni bai jai” bie anedumo llotomoidena, omoína naimie canuamona, bie anedu oni liai bai jaite. Jusiñamuina omoi ñinoia, naga rana finoredomoi. <sup>21</sup> Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

*Jesús ie fiodaillena dane llofuia rafue*

*(Mr 9.30-32; Lc 9.43-45)*

<sup>22</sup> Galileamo ie llofueoicaigano diga danomo itemo, Jesús naimacimo llote:

—Monamona billanona, ñimana jaidicue. Jusiñamui jitailla jira, cuena jiaie comini gaitajanona, illaicomínimo fecaitimaci. <sup>23</sup> Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

*Jesúmo Jusiñamui jofo facaina damie ibataja rafue*

<sup>24</sup> Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

<sup>25</sup> Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesús mo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

<sup>26</sup> Uai ote:

—Raise llotio. Naimacimo duide cominimona ocabitimaci. Ie jira Jesús raite:

—Naimaci jitoniana ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; <sup>27</sup> iadedi Jusiñamui jofo ucube orainina coco icinllesca, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

## 18

*Jesús ie llofueoicaigano moto imiena ille rafue*

(Mr 9.33-37; Lc 9.46-48)

<sup>1</sup> Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiena ille?

<sup>2</sup> Iena cacajanona, Jesús daje urue uaiduanona, naimaci motomo jonete. <sup>3</sup> Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi.

<sup>4</sup> Bie urue isoi abi iedoñedimiedi Jusiñamui ie cominina sedajanomo imie moto naimiena ille. <sup>5</sup> Bie isoidimie cuemo duillamona, naimiena feiñotimiedi cuena jai feiñote; <sup>6</sup> iadedi cuena inotimiena jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimiena dotacadena, cuemona mare.

*Jesúdi jeacinona finoñenana llofua rafue*

(Mr 9.42-48; Lc 17.1-2)

<sup>7</sup> Jesús llote:

—Ramo faitino duere sefuillesca. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite. <sup>8-9</sup> Biena ñaiticue. Nie isoide rafue omoina jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onollí jaita. Omoi uisina juicono. Iemona jeacinona finoñellena, Jusiñamui dine daje onollí diga, daje eillí diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi

raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoño.

*Jesúdi naimiena ñnotinomona damie faifillana jitaiñena rafue*  
(Lc 15.3-7)

<sup>10</sup> Jesús llote:

—Urue isoi omoi illena como lloticue. Iena dane lloiticue. Cue Moo naimacina uiñua jira, bie urue isoidinona jamañocaiño. Monamo cue Moo ecimo naimaci jaienisaí jaca ite, naimacina canollena. <sup>11</sup> Jusiñamuimona cue billanona, naimiena ñnoñedinona naimaci jeacinomona jilloitallena biticue. <sup>12</sup> Ero, omoimo iena jiaie rafuedo lloiticue. Damie mo cien diga toica llauda ite. Naiemona daje feiraite. Iena faifñellena, jiaie llaudaiaina fañonocaida, iena jenuaite. <sup>13</sup> Iena baillanona, ieri iobite. Baillari oni jaiñedinori baifemo iobite. <sup>14</sup> Ie isoide. Jusiñamui naimiena ñnotinomona damie faifillana jitaiñede. Ie jira naimacina jeacina finotaño.

*Jesús omoi ecimo itimie omoina jeare fñuana llofua rafue*  
(Lc 17.3)

<sup>15</sup> Jesús nia llote:

—O ecimo itimie ona jeare finoia, naimie dine iena lluai. Daímaiaí iena omico llono. O uai naimie fairioia, naimie o díbeimo jai iite. <sup>16</sup> O uai naimie fairioñenia, jiaí menamiena uiño, o llamo iaímaiaí cacareillesa. <sup>17</sup> O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina ñnoñediniena omoi nabaiñena isoi, Moisés llogacínodo raise jaiñedin omoi nabaiñena isoi, naimiena nabaiño. Omoi ofiracomo naimiena feiñoño. <sup>18</sup> Iese omoi finoia, omoi comeciaí daje isoi lloillamona, Jusiñamuimona mare.

<sup>19</sup> 'Omoimo nia lloiticue. Daje isoi comecina cue Moo Jusiñamui jicallena menamaiaí facajamona, cue Moomo iaímaiaí jianona, cue Moo iaímaiaí jitaille rafuena finoite. <sup>20</sup> Menamie cue díbeimo illamona, damie amani cue díbeimo illamona, naimaci motomo iticue.

<sup>21</sup> Pedro naimie mo jicanuaíbite:

—Nama, cue ecimo itimie cuena jeare finoia, ¿niga icaiño íbana cue oño iena feítaiticue? Nibaí siete digacaiño.

<sup>22</sup> Jesús dinena uai ote:

—“Nibaí siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloiticue.

<sup>23-24</sup> 'Jusiñamui ie díbeimo itinona iese sedaite: Daje nairaí illaimadi ie maijiraína uaidote, naimaci cuentas íballena. Damie eo debede. Díez mil ucubena debede. <sup>25</sup> Naimie

ucube iñena jira, naie illaimadi ie cuenta iballena, naimie ai, ie uruiaí diga, nana ie raruiaí diga, fecallena lloté. <sup>26</sup> Iena cacajano, ie illaima uicomo cañici ifodo raita duere jicade: “Nama, dama ite. Fecuisse omo ibaiticue”. <sup>27</sup> Naimie duenaillamona, naie illaima lloté: “Ibatañeiticue. Cuemo jai debeñedio. Mai jai”. <sup>28</sup> Ie mei naimie jaide. Bai jaillanona, jiaie maijiraima diga dafaifide. Jai debeñedimieo janore debede. Cien ucubena debede. Jai debeñedimie dinena ie cimaimona llinuana lloté: “O debia cuemo mai iba”. <sup>29</sup> Ie jira debedimie cañici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”. <sup>30</sup> Uai ote: “Ja raire jitaídicue”. Naimiena duenaiñena jira, cárcelmo naimiena jonetade, ie cuenta iballe dinori. <sup>31</sup> Naimie nabaiñiaí iena fidianona, sunaitimaci. Ie jira naimaci illaima dine nana naie rafuena lluidimaci. <sup>32</sup> Naie illaimadi nano debedimienaa abido uaiduano, naimiemo lloté: “Maraiñedio. Navui o cuentana ibatañedicue, cuemo o duere jicanua jira. <sup>33</sup> ¿Bue ñe o nabaina duenaiñedio, ona cue duenaila isoi?” <sup>34</sup> Icirillamona, naie illaima naimiena cárcelmo jonetade, nainomo duere sefuillena, nana ie cuenta iballe dinori. <sup>35</sup> Ie isoide. Cue Moo Jusiñamui omoína duere finoite, omoi comeciaí jitaillamona omoi ecimo itimie ie maraiñede finoca rafuena omoi feitañenia —lloite.

## 19

*Jesús iima ie aina dotaja rafuena llofua rafue  
(Mr 10.1-12; Lc 16.18)*

<sup>1</sup> Ie llofueoicaigano diga Galileamona jaillanona, Jordán railla ille ruica díbeimo Judeamo Jesús jaide. <sup>2</sup> Ailluena comini naimiena racadimaci Nainomo duidinona jillotate. <sup>3</sup> Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio? ¿Ñie isoide rafue muidona damie ie aina dotarede?

<sup>4</sup> Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaimaiaina finode. Imana finode. Riñona jiaí finode”. <sup>5</sup> Ie jira Jusiñamuidi jaie lloté: “Ie ai diga illena, iima ie moona fainonocaite. Ie eina jiaí fainonocaite. Ie ai diga illamona, menade comedi daamiena jai jaide” lloté. <sup>6</sup> Menade come jai damiena jai ite. Jusiñamui iese iaimaiaina itataja jira, iima ie aina dotañellesa. Riño ie inina dotañellesa.

<sup>7</sup> Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite”?

<sup>8</sup> Jesús uai ote:

—Jusiñamui uaina raise omoi ñnoñena jira, Moisés micori ñima ie aina dotajana rairuiñede; iadedi nano dofoconi iese ñede. <sup>9</sup> Jiaie riño diga naimie illena, ie aina bu dotaia, jiaie ñima diga naiñaiño ñenia, naimiedi jeacinona jai finode. Ie aina dotajana rairuidicue.

<sup>10</sup> Naimiemo ie llofueoicaigano ñinena llotimaci:

—Iese ia, cai jitaillamona aina jamai cai dotanina jira, damamei aínidicai.

<sup>11</sup> Naimacimo Jesús lloti:

—Nana comini omoi como llucacino jainidimaci. Dani Jusiñamuina jitaidinoo iedo jairedimaci. <sup>12</sup> Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

*Jesúdi naimie ñine uruiai billana jitailla rafue*

*(Mr 10.13-16; Lc 18.15-17)*

<sup>13</sup> Jesús ñine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñañilla atisite. “Naimacina raise cano” ie Moomo lloñena jitaidinaci. Ie llofueoicaigano iena rairuidimaci; <sup>14</sup> iadedi Jesús raite:

—Uruiai cue ñine billesa. Naimacina rairuiñeno. Cueno bie isoide ñnotinodi Jusiñamui ie cominina sedajanomo jainaiidimaci.

<sup>15</sup> Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue*

*(Mr 10.17-31; Lc 18.18-30)*

<sup>16</sup> Jesús oni jaillanona, conirue Jesús ñine bite. Jicanote:

—Maestro, Jusiñamui diga cue jaca illena, ¿ñie isoide mare rafuena finoiticue?

<sup>17</sup> Jesús ñinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñnocana jai.

<sup>18</sup> Uai ote:

—¿Ñie llogacinuaina ñnoiticue?

Jesús ñinena uai ote:

—Comena meineño. O añede riño diga ñeno. Fñeno. Jiaimiena o llogidoia, tainona lloñeno. <sup>19</sup> O moo uaina ñno. O ei uaina ñno. O abina o isiruilla isoi, nana cominina isirui.

<sup>20</sup> Naie conirue uai ote:

—Nana iena jai ñnoticue. ¿Ñie isoide rafuena ñia finoiticue?

<sup>21</sup> Jesús ñinena uai ote:

—Jusiñamui jitaillacinodo o jaiacania, o raise marebicaia-cania, omo ite raruiaina feca. Naie ucubena dueredinomo feca. Cueno o inuamona, monamo ico jaca iitio. Cue llofuegamiena o illena, mai cue diga bi.

<sup>22</sup> Iena naimie cacajano, sunaite. Naimiemo eo ailluena ra illa jira, iena feacaacainede. <sup>23</sup> Jesús ie llofueoicaiganomo llo-te:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite. <sup>24</sup> Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

<sup>25</sup> Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

<sup>26</sup> Naimacimo eruailanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

<sup>27</sup> Pedro uai ote:

—Ero, o llua isoi nana cai rana fainonocaida, o diga jaicabidicai. ¿Niese Jusiñamuimona ibana feiñoiticai?

<sup>28</sup> Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai iite, nainomona omoi judiuai doce nairaiaina omoi sedallena. <sup>29</sup> Cueno naimie isiruillamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite. <sup>30</sup> Jamai bue isoidomoi. Omoimona jiaino jamai bue isoidimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

## 20

*Jesús Jusiñamui ie cominina sedaacana llua rafue*

<sup>1</sup> Jesús llo-te:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide. <sup>2</sup> Dajeriema baillanona, “Omoimo daberie ibaiticue” llo-te. “Jee” raitimaci. Ieconi ie illimo maijillena, naimacina orede. <sup>3</sup> Jitoma nia oni daidemo,

mercadomo naimie jiaïnona ciode. Jamai itimaci. <sup>4</sup> Ie jira naimacimo llote: “Cue illimo maijiai. Raise ibaiticue” llote. <sup>5</sup> Ie mei jaidimaci. Jitoma naidai ia, jiaïnona ciuanona, naimacimo maijillena llote. Jitoma oni caidemo, jiaïnona ciuanona, naimacimo maijillena jiai llote. <sup>6</sup> Jitoma jasici muido itemo, jiaïnona ciuanona, jicanote: “¿Bue ñellena namonana jamai itomoi?” <sup>7</sup> Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote. <sup>8</sup> Jitoma edaciidemo, naie patrón ie mullaïmamo llote: “Maijiraïnina uaido. Jinafona maijiaidinona raire nano iba. Ie mei jitiramo maijiaidinona jinafo iba” llote. <sup>9</sup> Ie jira jinafona maijiaidinona nano ibade. Dabe ibade. <sup>10</sup> “Naimaci baifemo feiñoiticaï” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñoitimaci. <sup>11</sup> Ie jira naie patrón joreñaona jeare ñaitimaci: <sup>12</sup> “Jinafona maijiaidino dallu maijidimaci. Ecasilla facaise maijñedimaci; iadedi namonana maijidicaï. Dani cai ibaja isoi ibadio” ñaitimaci. <sup>13</sup> Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. <sup>14</sup> O ucubena jai o feiña jira, mai jai. Cue jitailla jira, da o ibaja isoi dallu maijidinona ibadicue. <sup>15</sup> Cue ucubena jira, cue jitaille isoi cue ibaia, ¿niese cuena jeare ñaitomoi? Jiaïnona cue duenailanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue. <sup>16</sup> Jamai bue isoidomoi. Omoi mona jiaïno jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

*Jesúdi ie fiodaïllena dane llua rafue*

*(Mr 10.32-34; Lc 18.31-34)*

<sup>17</sup> Jerusalémo ie llofueoicaigano diga Jesús jaidemo, dani naimaci diga ñaïllena, naimacina oni uite. <sup>18</sup> Raite:

—Ero, Jerusalémo jai jaidicaï. Monamona billanona, iimana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. <sup>19</sup> Judúaiñedino illaicomimimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodaïlla mei, darui amani illanona, Jusiñamui cuena jillotaite.

*Jesús dine Jacobo Juan iaïmaiaï ei billa rafue*

*(Mr 10.35-45)*

<sup>20</sup> Naie facaise Jesús dine Jacobo, Juan iaïmaiaï ei diga, bitiaïmaiaï. Iaïmaiaï moodi Zebedeo. Jesús dine iaïmaiaï ei rillanona, naimiena raise uaidollena, caiñici ifodo ana rainadacaida llote:



—Omo daje rafue jicanoiacadicue.

<sup>21</sup> Naiñaiño mo Jesús dinena jicanote:

—¿Bue ñiaibitio?

Naiñaiño uai ote:

—Illaimana o jailla mei, cue jito iaimaiai o ecimo illana o llwana jitaidicue. Damie o nabeimo. Jiaimie o jarifebeimo. —Jiaino baifemo iaimaiai illena, naiñaiño iese llote. <sup>22</sup> Naimacimo eruaillanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaiño jito iaimaiaimo jicanote:

—¿Ie isoi duere sefuiacadomico?

Uai otiaimaiai:

—Jii.

<sup>23</sup> Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

<sup>24</sup> Iena jiaie llofueoicaigano cacajano, naie iaiaimaiairi iciritimaci. <sup>25</sup> Jesús nana naimacina uaiduanona, raite:

—Nana illacominidi naimaci anamo itinona ocuicabidimaci; <sup>26</sup> iadedi omoi dine iese iñena. Omoimona bu imiena iacania, omoi mullaimana naimie jaisoillasa. <sup>27</sup> Omoimona bu imiena iacania, omoina naimie canocana jaisoillasa. <sup>28</sup> Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena ñnuamona jilloitimaci. Coninina omoi canua —llote.

*Jesús mena uisindiaimaiaina jillotaja rafue*

*(Mr 10.46-52; Lc 18.35-43)*

<sup>29</sup> Jericó railla nairaimona jaidimacimo, ailluena comini naimaci jinafona racadimaci. <sup>30</sup> Ie facaiseconi mena uisindiaimaiai nai fuemo raidiaimaiai. Jesús naiedo jaillano cacajano, naimiena ado uaidotiaimaiai:

—David micori Jitona o illamona, Jusiñamuimona o billa jira, cocona duenai. Cocona cano.

<sup>31</sup> Iaimaiai llucaillena, Jesús diga jaidino iaimaiaina lletade; iadedi eo cuirioidiaimaiai:

—Maestro, David micori Jitona o illamona, cocona duenai.

<sup>32</sup> Iaimaiaina Jesús cacajano, ieconi naidadajanona, iaimaiaina uaidote. Jicanote:

—¿Niese omiconona cue nibaiana jitaidomico?

<sup>33</sup> Uai otiaimaiai:

—Maestro, coco uisina o cioitajana jitaidicoco.

<sup>34</sup> Iaiimaiaina duenaillanona, iaiimaii uisina jetade. Ieconi iaiimaii uisidi cide. Iaiimaii jai ciuanona, ie llofueganona iaiimaii jaillena, Jesús diga jaidiaimaii.

## 21

*Jesús illaïma isoi Jerusalémo jailla rafue  
(Mr 11.1-11; Lc 19.28-40; Jn 12.12-19)*

<sup>1</sup> Oni jaillanona, Jerusalémo iaireicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiëna orede. <sup>2</sup> Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaiimaiaina suiñuano bene ati. <sup>3</sup> Omicomo “¿Bue ñellena bie suiñodomico?” bu jicanoia, llono: “Coco Nama naie iaiimaiaina jitaide. Nailli naimie iaiimaiaina raire abido ore-taite” —raite.

<sup>4</sup> Jusiñamui facaina lloraima micori jaie llua isoi, bie rafue suide. <sup>5</sup> Naimie micori jaie cuete:

Jerusalén itinomo llono:

“Ero, omoi illaïma omoïna sedallena biite.

Abi iedoñoeno biite.

Burra urue emododo naimie biite”

cuete. <sup>6</sup> Iaiimaii jaillanona, Jesús llua isoi finodiaimaii.

<sup>7</sup> Burra ie urue diga atidiaimaii. Burra urue emodomo naimie llofueoicaigano naimaci iniroina jobianona, ie emodomo Jesús rainadate. <sup>8</sup> Naimiëna iobitallena, illaïma isoi naimie jaillena, ailluena comini imaci iniroi diga, naiso motomo jobedimaci. Jiaino raforono uanona, naiso motomo jobedimaci. <sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraïma billa! ¡Naimiedi David micori Jito!  
¡Jusiñamui mamecido bitimie eo mare! ¡Jusiñamui caina jilloita-jasa!

<sup>10</sup> Jerusalémo naimie ridemo, nana nainomo itino naie rafuena uifoiacadimaci.

—¿Buta bite? —jicanotimaci. <sup>11</sup> Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

*Jesúdi Jusiñamui jofomona damieriena dotaja rafue  
(Mr 11.15-19; Lc 19.45-48; Jn 2.13-22)*

<sup>12</sup> Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaïaina fecallena, naimiemo toïca laudaïaina fecallena, nainomo comini jaisoidimaci. Naie cominina ibatajanona, ofomaïaina, toïca laudaïaii diga, damierie fecauidimaci. Iena

Jesús cɨuanona, naimaci mesaiana oni caicode. Ucugina fecauidino rairacuai jiaí oni caicode. <sup>13</sup> Naimacimo llote:

—Ie facaina lloraima Jusiñamui llogacino jaie cuela: “Cue jofo ite, nainomo cuemo comini jállena” cuela. Ero, ailluena omoi ibataja jira, naimie jofona fíruruidino jofona omoi finoca.

<sup>14</sup> Ie facaise uisinidino Jusiñamui jofomo naimie dine bitimaci. Ñuja-ñujacaida macaritino jiaí bitimaci. Naimaci billanona, Jesús naimacina jillotate. <sup>15</sup> Nainomo Jesúsdi diga mare rafuena finode. Diga cominina jillotate. Iena cɨuanona, nainomo ite uruiaí ado cuiriisite:

—David micori Jitori iobidicai. Jusiñamui lloraini micoriai jaie llua isoi, cai Jilloitarama jai ite.

Iena cɨuanona, iena cacajanona, judúuai illaicomini iciritimaci. <sup>16</sup> Naimiemo jicanotimaci:

—¿Bie uruiaí cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Ñiese iena cacaiñedomoi? Naimie cuete:

Naimiemo Jusiñamuidi uruiaina mare iobillacinona fecataite.

<sup>17</sup> Naimacina fainonocaida, Betaniamo Jesús jaide, nainomo inillena.

*Jesús higuera railla riarana faidua rafue*

*(Mr 11.12-14, 20-26)*

<sup>18</sup> Ie areruido Jerusalémo abido ie llofueoicaigano diga Jesús bia, aimetaite. <sup>19</sup> Nai fuemo higuera railla riarana cɨuanona, iena jibuide. Naiemo naie llisilladi ñede. Dama ie ibena cide. Ie jira naie amenana llote:

—Biemona jaca llisiñeite. —Iese railla dacaiño naie riaradi duide. <sup>20</sup> Ie llofueoicaigano iena cɨuanona, rajjicaillamona raitimaci:

—¿Ñiese naie riararaire duide?

<sup>21</sup> Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoi. Raise omoi ñnoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite. <sup>22</sup> Naimie iena finuana omoi ñnuamona, nie isoide rafue cue Momo omoi jicajia, iena naimie finoite.

*Jesúdi ie siño uaina llua rafue*

*(Mr 11.27-33; Lc 20.1-8)*

<sup>23</sup> Jerusalémo rillanona, Jusiñamui jofomo Jesús fo jailla mei, nainomo ite cominina llofue. Judúuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

<sup>24</sup> Jesús dinena uai ote:

—Omoimo daje rafuena nano jicanoitícue. Raise omoi fairioia, omoimo cue uaido cue finoca rafuena lloiticue.

<sup>25</sup> Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llwana ñnoñedomoi?” <sup>26</sup> “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

<sup>27</sup> Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

*Jesúdi mena jito iaímaiaí illa llua rafue*

<sup>28</sup> Judíuai illaicominimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijiaí”.

<sup>29</sup> Uai ote: “Jaiacaiñedicue” llote. Dallu illanona, ie comecina dane facajano, maijiaide. <sup>30</sup> Jiaie jitemo daje isoi llote. Naimie uai ote: “Jii, maijiaiticue” llote. Iese llote; iadedi maijiaíñede.

<sup>31</sup> ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoína ñaiticue. Omoimona marañedimaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiaí iitimaci; iadedi nainomo jaca iñeitomoi. <sup>32</sup> Marena omoi comeciaina itatallena, Juan micori navui bite; iadedi naimie micorina ñnoñedomoi. Ucube oraini naimie micori rafuena ñnotimaci. Callirediñaiñuai naimie micori rafuena ñnotimaci. Iena uiñotomoi; iadedi omoi comeciái iuaillaina meidoñedomoi. ñnoñedomoi.

*Jesúdi marañede maijiraini rafuena llua rafue*

(Mr 12.1-12; Lc 20.9-19)

<sup>33</sup> Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jainomo fecade. Ie mei jiaie eniruemo jaide. <sup>34</sup> Uvas jai einaila facaise riaraiaina sedaraini dine naie patrón

janore mullaiaina orede, naimie facaise iedinona naimie feiñollena; <sup>35</sup> iadedi naie sedarainidi ie mullaiaina duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci. <sup>36</sup> Ie mei patrón jiaie mullaiaina orede. Naimacina jiaie duere finodimaci. <sup>37</sup> Ja muidomo ie jitona orede. “Cue jitona jaciruitimaci. Naimie uaina inoitimaci” comecina facade. <sup>38</sup> Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. <sup>39</sup> Naimiena jino dotajanona, naimiena meinetimaci. <sup>40</sup> Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

<sup>41</sup> Judíuai illaicomini uai otimaci:

—Naie marañedinona dueruiño meineite. Ie mei jiaie cominimo naie illi fecaite, iena sedallena, naiemona riarana feiñollena.

<sup>42</sup> Naimacimo Jesús llote:

—Naie illi sedaraini isidomoi. Jusiñamui facaina lloraima micori omoína jaie cuete. Ie ciegafuena raise facañedomoi. Naimie micori ciega:

Jofo finoraini jitañena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona, “Eo mare” raiticai ciega. Jusiñamui cominina damierie jaillana naimie micori cuete. Jusiñamui oretagamiena damierie jitañenamona, naimie cominina jaiñeitimaci; iadedi Jusiñamui oretagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isidomoi. Naie nofici isoidicue. Cue rafuena omoi jitañena jira, naimie cominina jaiñeitomoi. <sup>43</sup> Jusiñamuidi ie cominina sedajanomo omoína itatañeite; iadedi jiaie cominina nainomo itataite, naimie jitailla rafuena naimaci finua jira.

<sup>44</sup> Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bummo ana uaia, naimiena saitaite. Ie isoide. Cue lluana omoi jamaia, duere sefuitomoi. Iena omoi inoñenia, ja muidomo faifitomoi.

<sup>45</sup> Jesús lluana naie judíuai illaicomini cacajanona, naimiedi naimacina ñaiana jai uiñotimaci. <sup>46</sup> Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

## 22

*Jesúdi illaima ie jito aina ua llua rafue*

<sup>1</sup> Jusiñamui jofomo Jesús nia illanona, nainomo itinona llofuede:

<sup>2</sup> —Jusiñamui díbeimo comini jailla rafuena omoimo lloiticue. Iena omoi uñollena, bie rafuedo iena lloiticue. Illaimadi ie jito ai ua rafue finode. <sup>3</sup> Naimie ie mullaini orede, rafuemo llogano uaidollena; iadedi nai llogano biacaiñedimaci. <sup>4</sup> Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaiái, farediretaiái diga, jai faga. Jai nana fuite. Rafuemo mai bi’ ”. <sup>5</sup> Naimaci cacarefiacaiñede. Damie ie illimo jaide. Jiamie ie chinganamo jaide. <sup>6</sup> Jiaino mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. <sup>7</sup> Ie jira naie illaima eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate. <sup>8</sup> Ie meinoconi ie fiebide mullainimo llote: “Rafue guille jai nana finoca; ia llogano marañedimaci. <sup>9</sup> Naiso bojicaillanomo jai. Nana o ciolle diese llono: ‘Rafuemo bi’ llono”. <sup>10</sup> Ie jira ie mullaini jai naisona jaide. Marañedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaima nainomo fecaca iniroina jítadimaci. <sup>11</sup> Illaima fo bia, mesamo itino jibuillena, dinomo daje ima rafue ie mare iniroina jitañenana ciode. <sup>12</sup> Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide. <sup>13</sup> Ie jira naie illaima ie mullaiaimo llote: “Naimie cuena inoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote. <sup>14</sup> Ero, naie rafuemono omoi fueo. Illaima ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

*Jesúmo gobiernomo ucubena fecajana jicanua rafue  
(Mr 12.13-17; Lc 20.20-26)*

<sup>15</sup> Naimacimo Jesús llua mei, fariseuai comini abido jailanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci. <sup>16</sup> Ie jira naimie dine naimaci cominimona dajerie oredimaci. Herodianuai railla cominina jiai jaidimaci. Jesús dine rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. <sup>17</sup> Omo rafuena jicanoiacadicaí. Dani Jusiñamuina sedadicaí; iadedi romanos railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —llotimaci.

18 Naimaci comeai na marañediciónona facajana Jesús uñuamona, uai ote:

—¿Bue ñellena cuena facacitomoi? Maredinona abi caitadomoi. 19 Ucube cuemo acata —llote. Ie jira acatatimaci.

20 Jesús dinena jicanote:

—¿Bu ie joreño nainomo ite? ¿Bumo jainaiade bie cueba radi?

21 Uai otimaci:

—César.

Jesús dinena raite:

—César iena itedi César mo ille. Jusiñamui iena itedi Jusiñamuimo ille —raite.

22 Naimie lluaña cacajano, rajicaidimaci. Naimie jeare uai oña jira, naimie dinomona oni jaidimaci.

*Jesús dine saduceuai railla comini billa rafue*

*(Mr 12.18-27; Lc 20.27-40)*

23 Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo llotimaci:

24 —Maestro, Moisés micori jaie cueba: “Iima fiodailla meinoconi, naimie urue iñena, ie ama naie feciño olle. Naimiedi uruiaina ie ama facaina comuitaite” cueba. 25 Ero, cai motomo siete amatiaite. Nano doforamie ie aina ote. Naimie nia uruiainide fiodailla. Ie emodo imie ie ama feciño ote. Uruiaínide jiaie fiodailla. 26 Naie siete digamiedemona iese sefuide. 27 Ja muidomo naie riño jiaie fiodaite. 28 Fiodaillamona, ico naimaci jilloiadedi, ¿bu naie riño ienite? Naiñaiño siete digamiena ñniredi —lloitimaci.

29 Jesús uai ote:

—Moisés micori cueba fuaiaia raise omoi uññoña jira, Jusiñamui uaina raise omoi uññoña jira, bie isoide rafuena raise uññoñedomoi. 30 Fiodaillamona jillua mei, Jusiñamui diga ite comini añitimaci. ñninitimaci. Monamo Jusiñamui jaienisai añidimaci. ñnunidimaci. Ie isoi iitimaci. 31 Fiodaitino jilluana omoimo lloiticue. Jusiñamui omoi jaiagaimo jaie llogacinona ññoñedomoi. Naimie llote: 32 “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiaie jillotaite —llote. 33 Nainomo ite comini iena cacajano, naimie llofuiari rajicaidimaci; ia saduceuai dinena uainicaidimaci.

*Jesús nanoca llogacinona llofui rafue*

*(Mr 12.28-34)*

34 Saduceuai comini uainicaillana fariseuaidi jai fidiano, Jesús dine ofidimaci. 35 Naimacimona damiedi Moisés micori

jaie llogacinona eo uifnote. Jesúsna facacillena, naimiemo jicanote:

<sup>36</sup> —Maestro, Moisés micori jaie llogacinuaimona, ¿nie llogacino ua nanoca llogacinona?

<sup>37</sup> Jesús dinena uai ote:

—Moisés micori jaie cuela: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”. <sup>38</sup> Bie ua nanoca llogacino. <sup>39</sup> Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. <sup>40</sup> Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide —llote.

*Jesús dinena fariseuai cominimo jicanua rafue*

*(Mr 12.35-37; Lc 20.41-44)*

<sup>41</sup> Naimie dine nia fariseuai comini ia, Jesús naimacimo llote:

<sup>42</sup> —Jusiñamui lloraini micoriai jaie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

<sup>43</sup> Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

<sup>44</sup> Jusiñamuidi cue Namamo llote:

“Illaimana o illamona, cue nabei dine ana rai.

Ona ñnoñedino o anamo itataiticue”.

<sup>45</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

<sup>46</sup> Uaina onidimaci. Naie facaisemona Jesús ie uaina dane uaitañedimaci.

## 23

*Jesúdi judíuai illaicominina ñaia rafue*

*(Mr 12.38-40; Lc 11.37-54; 20.45-47)*

<sup>1</sup> Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

<sup>2</sup> —Moisés micori llogacinuaina llofuerainidi naie rafuedo jai jaicabidimaci. Fariseuai comini iedo jiai jaicabidimaci.

<sup>3</sup> Naimaci llofuiacino omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci



llofuiacinodo naimaci jaiñena jira. <sup>4</sup> Omoi einamaci llogacinuaido raise omoi jaillena, diga rafuena omoi finuana jitaídímaci; iadedi iedo omoi jaillena, omoína jaca canoñedímaci. “Jusiñamuina eo raise sedadícái” comecina facadímaci. Iemo naimaci comecina facajamona, <sup>5</sup> iena omoi cioillena, nana naimaci finua rafuena marefodo finodímaci. Jiaie comínimo ite Jusiñamuimo jirabe baifemo faitibena uiacacabidímaci. Iniroi fuedadi aillofena jonegana gaidímaci. <sup>6</sup> Rafue ia, naimaci jamai bue isoiñedinomo comecina facajanona, rafue nama ecimo raíacadímaci. Ofiracomo uicomo raíacadímaci, comíni naimacírí acarillena. <sup>7</sup> Níne naimaci jia, nana comíni naimacína uaiduana gaidímaci. Maestrodícínona uaiduana jiaí gaidímaci. <sup>8</sup> Jusiñamuina eo raise naimaci sedajana omoi uiñuana jitaídímaci. Naimaci isoi iñeno. Omoi damacína jira, omoi mona damíe omoi baifemo faiamo comecina facañeno. Naimíena maestróna raíñeno. Omoi baifemo cue illanona, omoi maestrodícue. <sup>9</sup> Omoi Moo Jusiñamui monamo illanona, dama naimíena seda. Jiaimíena sedañeno. Jusiñamui isoi jiaimíena “Moo” raíñeno. <sup>10</sup> Omoi damacína jira, omoi mona damíena “Cai illaíma” raíñeno. Omoi illaímana jai itícue. <sup>11</sup> Omoi mona bu imíena jaiacania, omoi mullaímana naimíe nano jaillamona, omoína naimíe canua. <sup>12</sup> Jusiñamuidi “Jiaíno afemo itícue” raillano comecina facadímíena jamai bue isoidímíena itataite; ia Jusiñamuidi “Jiaíno afemo iñedícue” raillano comecina facadímíena jamai bue isoiñedímíena itataite.

<sup>13</sup> Naie facaise Moisés micorí llogacínona llofueraínidi fariseuai comíni diga illanona, Jesús naimacímimo llote:

—Jusiñamui omoína duere finoite. Mareuidínona abí caitadínodomoi. Jusiñamui díbeimo comíni illana jitaíñedomoi. Naimíe díbeimo omoi illana jiaí jitaíñedomoi. Ie muidona Jusiñamuimona duere sefuitomoi. <sup>14</sup> “Jusiñamuina eo sedadícái” omoi comíni comeciána facajana jitaídomoi. Ie jira are jidomoi; iadedi íese iñedomoi. Maraiñede rafuena finocabidomoi. Jífuianona feciñuai rana bairocabidomoi. Ie jira Jusiñamui omoína eo duere finoite. <sup>15</sup> Damíena omoi díbeimo itatallena, omoi isoi Jusiñamui rafuedo naimíe jaillena, diga rafuena finodomoi. Omoi díbeimo illa meí, omoi baifemo omoi einamaci llogacínodo naimíe jaillana jitaídomoi. Omoi diga íco naimíe ua faífite. Comínina uanaíñedícínodo jaitatomoi. Iese omoi illa jira, duere sefuitomoi.

<sup>16</sup> Omoi llofuiacino diga comínina canoñedomoi. Mareuidínona abí caitadínodomoi. Raicabítomoi: “Cai lloga uai cai finollena jiaí comíni uiñollena, Jusiñamui jofomo ite oro mamecina llinotícái; iadedi Jusiñamui jofó mamecina

cai linoia, cai lloga uaina cai finoñenia, caimona mare. Jusiñamui mona duere sefuiñeiticai” raicabitomoi. <sup>17</sup> Abi uiñoñedomoi. Omoi llofuiacino diga cominina canoñedomoi. Jusiñamui jofomo naie oro jainaiaila jira, naie orodi mare; iadedi naie oro naie jofo baifemo uaiñede. Abina omoi uiñoñena jira, Jusiñamui omoina duere finoite. <sup>18</sup> Jiai raitomoi: “Jusiñamuimo faga toica ocaina jobaisoillano mamecina cai linoia, cai lloga uaina cai finoñenia, caimona mare; iadedi Jusiñamuimo fecaca toica ocaina mamecina cai linoia, cai lloga uaina jaca finoiticaí”. <sup>19</sup> Abi uiñoñedomoi. Omoi llofuiacino diga cominina canoñedomoi. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede. <sup>20</sup> Ero, Jusiñamuimo ocaina jobaisoillano mamecina omoi linoia, nainomo ite ocaina mamecina jiai llinotomoi. <sup>21</sup> Jusiñamui jofo mamecina omoi linoia, Jusiñamui nainomo illa jira, naimie mamecina jiai llinotomoi. <sup>22</sup> Monamo ite ra mamecina omoi linoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoi. Omoi llua rafuena omoi finoñenia, Jusiñamui omoina duere finoite.

<sup>23</sup> Mareuidinona abi caitadinona omoi illamona, omoimo nia lloiticue. Nana omoi illimo ite ramona, nana omoimo ite ucubemona Jusiñamuimo janore jisa fecacabidomoi. Nana comini omoi isoi illena jitaïdomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñenia, Jusiñamui omoina duere finoite. <sup>24</sup> Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñeno namo gutadomoi. Ie isoide. Omoi llofuiacino diga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

<sup>25</sup> Omoimo nia lloiticue. Omoi einamací llogacínodo eo jaidomoi; iadedi omoi comeciaina raise finoñedomoi. Eo fiidomoi. Jifuianona comini rana bairodomoi. Jecinona finocana jaidomoi. <sup>26</sup> Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamací rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoina duere finoite.

<sup>27</sup> Omoimo nia lloiticue. Marena finoca raiäfo isoidomoi. Jinofe marena eruaide; iadedi nainomo mare ra iñede.

Comini illaici jamai ite. Jai maraiñede. <sup>28</sup> Ie isoidomoi. Marena eruaïdomoi; iadedi maredinona abi eo caitadomoi. Omoi comeciaï eo maraisiñede. Omoi comecina raise omoi finoñenia, Jusiñamui omoïna duere finoite.

<sup>29</sup> Omoi mo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaïllena finodomoi. Mareuidino micoriai raiafo emodo marena eruaïllena finodomoi, <sup>30</sup> raillano: “Cai jaiagai Jusiñamui facaina lloraini micoriaina meinetimaci. Naie facaiseconi iticaïdena, naimaci isoi finoñedicaï. Cai jaiagai isoi birui iñedicaï” raitomoi; <sup>31</sup> iadedi omoi llua mona Jusiñamui facaina lloraini micoriai meinetino uruaï omoïna uiñoticaï. <sup>32</sup> Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. <sup>33</sup> Omoi maraiñena jira, jaio nairai isoidomoi. Ja muidomo iraimona jillobiñeitomoi. Nainomo duere sefuitomoi. <sup>34</sup> Cue rafuena lloïllena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiaï oretaiticue. Dajeriena meinetomoi. Naimacina coraitomoi. Omoi ofiracomo dajeriena faitomoi. Diga nairaimo naimacina duere finoitomoi. <sup>35</sup> Abel micori jaie ite. Naimie maremie. Ie ama naimiena meinete. Naimie facaise mona omoi jaiagai ailluena mare cominina meinetimaci. Ie mei omoi jaiagai Zacariaïna meinetimaci. Naimiedi Berequiás jito. Jusiñamui jofomo Jusiñamuimo toïca ocaina jobaisoïllano ecimo naimiena meinetimaci. <sup>36</sup> Uanaicino omoi mo lloiticue. Naimacina omoi jaiagai meinia muidona, omoïmona Jusiñamui birui ibana oite. Naimaci isoi maraiñede rafuena finocana jaidomoi. Jusiñamui omoïna duere finoite.

*Jesús Jerusalémo itinomo llua rafue  
(Lc 13.34-35)*

<sup>37</sup> Jesús llote:

—Jerusalémo itino, omoi mo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoïna cue sedallena, atava ie uruaï sedaja isoi, diga icaïño cue anamo omoïna uaidoiacadicue; iadedi omoi dinena cuena jitaïñedomoi. <sup>38</sup> Iemona Jusiñamuidi omoi illanona jai faïnonocaïde. <sup>39</sup> Cue Moo dine jaiticue. Cue jailla mei, cuena cioïñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

## 24

*Jesúdi Jerusalémo ite Jusiñamui jofo judaiana llua rafue*  
(Mr 13.3-23; Lc 17.22-24; 21.5-24)

<sup>1</sup> Jusiñamui jofomona ie llofueoicaigano diga Jesús jino jaidemo, Jesúna nai jofona eruaitatimaci. <sup>2</sup> Jesús dinena llote:

—Bie jofona ciudomoi. Uanaicinona omoimo lloiticue. Nana bie jofomo ite noficiai ico judaisite —llote. <sup>3</sup> Ie mei Olivos railla anedu dine rillanona, Jesús naie muidomo raidemo, ie llofueoicaigano naimiemo iena anado llotimaci:

—Jusiñamui jofo judaiana omo jicanoiacadicaí. ¿Niruido iena suite? Caimo llono. O abido billirui iaírei ia, ¿nie isoide rafue suite, o abido billiruina cai uifñollena?

<sup>4</sup> Uai ote:

—Omoína bie rafuena bu jifueñellena, omoi abina rairui.

<sup>5</sup> Ailluena comini cue mamecido billanona: “Cristodicue” raitimaci. Diga cominina jifueitimaci. Iemona omoi abina rairui. <sup>6</sup> Jobaimiai illena fidiitomoi; iadedi jaciruiñeno. Iese suite; iadedi abido nia biñeiticue. <sup>7</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuai suite. <sup>8</sup> Iese suia, omoi duere sefuillifue omoimo suite.

<sup>9</sup> Cuen a ñinoñedino omoína gaitatajanona, omoína meineitimaci. Cue cominina omoi illamona, nana nairaiiai omoína enoitimaci. <sup>10</sup> Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoína janoñeitimaci; iadedi omoína enoillamona, omoína llogidoitimaci. <sup>11</sup> Naie facaise diga comini raitimaci: “Jusiñamui facaina llorainidicaí”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci dibeimo itataitimaci. <sup>12</sup> Jeacino eo comuicana jailla jira, ailluena comini conini isiruiñeitimaci; <sup>13</sup> iadedi cuena fañonocaiñedimie ja muidomo monamo jaca iite. Naimiena jillotaiticue. <sup>14</sup> Diga cominidi Jusiñamui dibeimo comini ille rafuena nana nairaimo lloitimaci, nana nairaiiai iena cacaillena. Ie mei abido biiticue.

<sup>15</sup> Cue llamo cacarei. Daniel micorí Jusiñamui facaina lloraima. Naimie micoridi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, <sup>16</sup> naiemona omoi jillobillena, duere omoi sefuifñellena, Judeamo omoi illamona, aneduai dine omoi aisi. <sup>17</sup> Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uifñeno. <sup>18</sup> Aneduai dine raire rillena, illimo omoi ia, abido jofomo biñeno, omoi iniroi omoi diga uillena. <sup>19</sup> Naie rafuemon

jillobillena, naie facaise urueside riño duere sefuite. Uruena nia jirode riñodi jiai duere sefuite. <sup>20</sup> Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano. <sup>21</sup> Naie facaise comini eo duere sefuitimaci. Enirue finua facaise mona iese comini nia duere sefuiñedimaci. Ico iese eo duere sefuiñeitimaci. <sup>22</sup> Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>23</sup> 'Te facaise omoimo bu raia: "Jai, Jusiñamui facaina lloraima benomo birui bairede. Naimiedi Cristo", iena iñoño. Jiaimie raia: "Oni batine Cristo birui bairede", iena iñoño. <sup>24</sup> Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. <sup>25</sup> Ero, bie rafue nia suiñenia, iena omoimo jai lloticue. <sup>26</sup> Omoimo naimaci raia: "Ero, batine jofue iñenanomo Cristodi ite", nainomo jaiñeno. Naimaci raia: "Ero, bene bie jofomo Cristo ite", iena iñoño. <sup>27</sup> Mona borillamona mona jillacidi usere cide. Nana cominimo bairede. Ie isoide. Cue abido bia, nana comini iena uiñoitimaci. <sup>28</sup> Urujaisai rifaide ramo ofillana uiñua isoi, nana cuena iñotino cue billena uiñoitimaci.

*Jesús abido ie bille rafue*

(Mr 13.24-37; Lc 17.26-30, 34-36; 21.25-33)

<sup>29</sup> Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite. <sup>30</sup> Ie mei monamo baireiticue. Ieconinana nairaiai jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue. <sup>31</sup> Cue jaienisaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

<sup>32</sup> 'Higuera raila riaramona omoi fueo. Bie eniruemo naie riaruilla mona, fiemona raire illana uiñotomoi. <sup>33</sup> Ie isoide. Bie rafue ico suia, cue billirui iaiei illena uiñoitomoi. <sup>34</sup> Uanaicinona omoimo lloiticue. Nana bie rafue suille facaiseconi bie nairai nia iite. <sup>35</sup> Mona enirue diga fuite; iadedi cue lloga uai jaca suite. <sup>36</sup> Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. <sup>37</sup> Abido cue billirui iaiei ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci.

<sup>38</sup> Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. <sup>39</sup> Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. <sup>40</sup> Naie facaiseconi menamie illimo danomo iitiaimaia. Damie Jusiñamui dine jaite. Jiaimie fiebillanona, Jusiñamuimona duere sefuite. <sup>41</sup> Mena riño danomo doberitiaiñuai. Dañaiño Jusiñamui dine jaite. Jiañaiño fiebillanona, Jusiñamuimona duere sefuite. <sup>42</sup> Cue billirui omoi uiñoñena jira, iemo ocuiri. <sup>43</sup> Bie rafuemo omoi comeciaina omoi faca. Jofo namadi firiraima nie naiona billena uiñotena, ie rana faifñellena, ie jofona raise sedade. <sup>44</sup> Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nargarui ocuiri.

*Jesúdi patrón ie mullaimana ie jofona sedataja llua rafue*  
(Lc 12.41-48)

<sup>45</sup> Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaima inogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide. <sup>46</sup> Patrón ico abido bia, ie jofona ie mullaima raise sedaia, mullaimari naimie iobillamona, ie mullaima marena iite. <sup>47</sup> Iobillamona, patrón ie mullaimana nana ie raruiaina sedatataite; <sup>48</sup> iadedi ie mullaima marañenia, ie comecina facaite: “Cue patrón are biñeite. Naimie lloga uaina finoñeiticue”. <sup>49</sup> Ie comecina iese facaja jira, naimie anamo ite mullaiana faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. <sup>50</sup> Ie ocuiriñena facaise ie patrón abido billanona, naimiena duere finoite. <sup>51</sup> Ie isoide. Cue abido bia, cuena inotinori iobiticue; ia cuena inotinona abi caitadino dine cuena inoñedinona dotaiticue. Nainomo duere sefuillano eetimaci.

## 25

*Jesúdi diez jitaiñuaina llua rafue*

<sup>1</sup> Jesús llote:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitaiñuaimo ite rafue isoidimaci. Naiñaiñuai lamparinai

llinuanona, iima ie aina ua meinomo finoca rafuemo jaiacadi-maci. <sup>2-4</sup> Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci. <sup>5</sup> Iima diga ie rafue dine jaillemo ocuridimaci. Iima are biñena jira, inidimaci. <sup>6</sup> Daje dberuisse damie ado lluana cacadimaci. Llote: “Jadi, naie iimadi jai bite. Mai bi, naimie uicomo naimiemo cai dafaiñillesa”. <sup>7</sup> Casillanona, naie jitaiñuai lamparíniai unedimaci. <sup>8</sup> Abi uiñoñediñaiñuai dinena abi uiñotiñaiñuaimo jicadimaci: “Farena caimo feca. Cai lamparíniai boacaiñedesa”. <sup>9</sup> Uai otimaci: “Fecaacaiñedicaí. Omoimo cai fecaiadedi, caimo baiñeite. Omoi jitaia, chinganomo ibajai”. <sup>10</sup> Naiñaiñuai ibajailla mei, naie iima ride. Naimiemo ocuridiñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie iima ibaide. <sup>11</sup> Ie mei naie farena ibajaidiñaiñuai abido billano, raitimaci: “Nase econo”. <sup>12</sup> Naie iima uai ote: “Uanaicinona omoimo lloiticue. Omoina uiñoñedicue. Econoñeiticue”. <sup>13</sup> Ie isoide. Cue billiruina omoi uiñoñena jira, nagarui cuemo omoi ocuri.

*Jesúdi patrón ie mullaiaimo ucubena fecaja llua rafue*

<sup>14</sup> Jesús llote:

—Abido cue bia, Jesiñamui ie cominina sedaite. Naie fa-  
caise ite comini daje patrómo ite rafue isoide. Patrón jiaie  
enirue jaiacana jira, ie mullaiaina ie ucubena eenotade.  
<sup>15</sup> Damie mo cinco diga ucubena fecade. Jiaimiemo men-  
acubena fecade. Jiaimiemo dacubena fecade. Nagamie ie  
majille dinori fecade. Ie mei oni jaide. <sup>16</sup> Cinco diga ucubena  
feñotimie jaillanona, iena fecallena, rana ibade. Iemona  
jiaie cinco diga ucubena ote. <sup>17</sup> Menacubena feñotimie  
iena fecallena, rana ibade. Iemona jiaie menacubena ote.  
<sup>18</sup> Dacubena feñotimie eniruemo naie ucube eenote. Iena  
fecallena, rana ibañede. Iemona buena oñede. <sup>19</sup> Digarui  
illanona, naie patrón abido bite. Naimaci cuentas siadollena,  
ie mullaiaina uaidote. <sup>20</sup> Cinco diga ucubena feñotimie bite.  
Ie ucube atiano raite: “Patrón, cinco diga ucubena cuemo  
fecadio. Jiaie cincona oticue”. <sup>21</sup> Patrón uai ote: “Raise  
marena majidio. Eo mare mullaimadio. Janore ucube o  
raise sedaja jira, ona ailluena rana sedataiticue. Cue diga  
caimare jaca iitio”. <sup>22</sup> Menacubena feñotimie bite. Raite:  
“Patrón, cuemo menacubena fecadio. Iemona jiaie menacube  
oticue”. <sup>23</sup> Naimie patrón uai ote: “Raise marena majidio.  
Eo mare mullaimadio. Janore ucube o raise sedaja jira,  
ona ailluena rana sedataiticue. Cue diga caimare jaca iitio”.  
<sup>24</sup> Dacubena feñotimie bite. Raite: “Patrón, o riirenana  
uiñoticue. O mullaiai majiamona ganacabidio. <sup>25</sup> Ucubena

cue faifiñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”.<sup>26</sup> Patrón uai ote: “Maraiñedio. Rairaiedio. Cue mullaiaia maijiamona cue ucube uana uiñotio.<sup>27</sup> Bancomo naie ucubena jonetiodena, naie ucubemona jiaie ucube janore uamona, abido cue bia, iena feiñoticue”.<sup>28-30</sup> Ie mullaiaimo llotte: “Naimiemona ie ucubena bairo. Diez ucube illamiemo iena fecá. Bie maraiñede mullaiaima jitreidinomo cuemona oni dota. Nainomo comini duere sefuillanona eetitimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoína duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

*Jesúdi cominina duere finolle llua rafue*

<sup>31</sup> Jesús llotte:

—Omoína nia llofueiticue. Abido cue bia, nana cue jaienisaia diga biiticue. Illaimana ico cue bia, illaiaima illa ifomo iiticue. Eo siño uaido biiticue.<sup>32</sup> Cue uicomo nana nairaiaia ofitimaci. Toica llaudaiaia sedaraiaima ie chivos motomona ie llaudaiaia oni fetua isoi, naimacina fetoiticue.<sup>33</sup> Cue jitaillacinona finodino diese cue fetuanona, cue nabeimo itataiticue. Cue jitaillacinona finoñedino diese cue fetuanona, cue jarifebeimo itataiticue.<sup>34</sup> Cue illaimana jira, cue nabeimo itinomo lloiticue: “Cue Moo omoi ri iobillanona, omoína jai caimare itatate. Cue Moo cominina omoi illa jira, cue sedajanomo mai bi. Nainomo duidomoi.<sup>35</sup> Cue jitaillacinona omoi finuamona navui aimetaiticuemo, cuena ecadomoi. Jiroacadicuemo, jinui cuemo fecadomoi. Omoi nairaia dine cue macaria, cuena omoi uiñoñoeno omoi jofomo cuena feiñotomoi.<sup>36</sup> Iniroinidicuemo, iniroi cuemo fecadomoi. Duidicuemo, cuena canollena, cuena jibuisaibidomoi. Cárcelmo iticuemo, cuena canollena, cuena jibuisaibidomoi”.<sup>37</sup> Cue jitaillacinona finodino dinena cuemo jicanoitimaci: “Nama, ¿niruido aimetaitiomo, ona ecadicaí? ¿Niruido jiroacadiamo, jinui omo fecadicaí? <sup>38</sup> ¿Niruido ona ciodicaí, cai jofomo ona feiñollena? ¿Niruido iniroina omo fecadicaí? <sup>39</sup> ¿Niruido duidiomo, ona jibuisaidicaí? ¿Niruido cárcelmo itiomo, ona jibuisaidicaí?”<sup>40</sup> Uai oiticue: “Uanaicínona omoimo lloiticue. Cuena #notinomonona jamai bue isoidimiena canodomoi, cuena jiaia canodomoi” lloiticue.

<sup>41</sup> Temei cue jarifebeimo itinomo lloiticue: “Cuemona oni mai jai. Cue cominiñedomoi. Jai faifidomoi. Duere omoi sefuillena, iraimo mai jai. Naie irai jaca duñede. Jusiñamuidi naiena Taife iena jai finode. Jusiñamuidi Taife comini iena jiaia jai finode.<sup>42</sup> Cue jitaillacinona omoi finoñenamona, navui aimetaiticuemo, cuena ecañedomoi. Jiroacadicuemo,



jinui cuemo fecañedomoi. <sup>43</sup> Omoi nairai dine cue macaria, omoi jofomo cuena feiñoñedomoi. Iniroinidicuomo, iniroi cuemo fecañedomoi. Duidicuomo, cuena canollena, cuena jibuisaibiñedomoi. Cárcelmo iticuomo, cue canollena, cuena jibuisaibiñedomoi”. <sup>44</sup> Cuemo jicanoitimaci: “¿Niruido aimetaitiomo, ona ecañedicai? ¿Niruido jiroacadíomo, jinui omo fecañedicai? ¿Niruido ona ciodicai, cai jofomo ona feiñollena? ¿Niruido iniroinidíomo, omo fecañedicai? ¿Niruido duidíomo, ona jibuisañedicai? ¿Niruido cárcelmo itíomo, ona jibuisañedicai?” <sup>45</sup> Uai oiticue: “Uanaicinona omoímo lloiticue. Diga comini cuena innotimaci. Naimacimona jamai bue isoidimiena omoi canoñena jira, cuena canoñedomoi” lloiticue. <sup>46</sup> Naimaci jaca isi cacaitimaci; iadedi cue jitaillacinona finodino cue Moo sedajanomo jaca itimaci.

## 26

*Judíuai illaicomini Jesúna gaitallena siadua rafue*  
(Mr 14.1-2; Lc 22.1-2; Jn 11.45-53)

<sup>1</sup> Ie llofueoicaiganona llofua mei, naimacimo Jesús llote:

<sup>2</sup> —Pascua railla rafue illena, menarui fiebide. Iena uinnotomoi. Monamona jaie cue billamona, imana jaidicue. Cue fodaillena cue Moo cuena oretate. Illaicomini cuena coraillena, birui cuena gaitaitimaci —llote. <sup>3</sup> Naie facaiseconi Jusiñamui diga nanoca ñairainidi, jaie illaicomini diga, nanoca ñairaima jofomo ofidimaci Nanoca ñairaimadi Caifás. <sup>4</sup> Jesúna jifuiano gaitallena coniniri siadotimaci. Naimiena meinelena jiai siadotimaci. <sup>5</sup> Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuiritimaci. Nia sedaiticai.

*Jesúmo riño caimare soride ra totaja rafue*  
(Mr 14.3-9; Jn 12.1-8)

<sup>6</sup> Betania railla nairaimo Jesús jaillanona, Simón jofomo jaide. Simódi jaie efonaitimie. <sup>7</sup> Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. <sup>8</sup> Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. <sup>9</sup> Iena fecacadena, eo ailluena raifide. Naie ucube dueredinomo fecadena, caimona mare.

<sup>10</sup> Naimaci ñaiana Jesús uifua jira, naimacimo llote:

—¿Bue ñellena naiñaiñona jeare ñaitomoi? Mare rafuena cuemo finode. <sup>11</sup> Omoi diga dueredino jaca itimaci; iadedi omoi diga jaca iñeiticue. <sup>12</sup> Cue abimo bie caimare soride

ra naiñaiño totajamona, cue fiodaillirui facaina naiñaiño iese finode. <sup>13</sup> Omoimo uanaicinona lloiticue. Ninomo cue mare finoca rafuena bu lloia, naiñaiña ubiñollena, nana cominimo naiñaiño finoca rafuena lloite.

*Judas micori raillamie Jesúsna gaitataiacana rafue*  
(Mr 14.10-11; Lc 22.3-6)

<sup>14</sup> Ie facaise Jesús llofueoicaiganomona Judas Iscariote micori raillamiedi Jusñamui diga nanoca ñairaini dine jaide. <sup>15</sup> Naimacimo jìcanote:

—Omoimo Jesúsna cue fecaia, ¿niga ucubena cuemo fecait-omoí? —jìcanote. Naimaci siadua mei, treinta ucubena naimiemo fecadimaci. <sup>16</sup> Naie facaiseconimona Jesúsna gaitatalliruimo naimie ocuride.

*Jesúdi ie fiodaille rafuena llua rafue*  
(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Pascua railla rafue ia, siritaga rana guiñedimaci. Dani llomeniconona guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jìcanotimaci:

—¿Ninomo pascua railla rafue ie guille finuana jitaideo?

<sup>18</sup> Uai ote:

—Jerusalémo omoí jaillanona, omoimo cue llogamiena omoí ciuanona, naimiemo llono: “Cai llofueraima fiodaille facaise iaiei ite. O jofomo ie llofueoicaigano diga pascua rafuena finoacade” llono.

<sup>19</sup> Ie muidona ie llofueoicaiganodi ie lluaana finodimaci. Pascua railla rafue guille finodimaci. <sup>20</sup> Nairui jitoma ana itemo, Jesús ie doce llofueoicaigano diga nainomo guisaide. <sup>21</sup> Naimaci mesamo guitimacimo, Jesús llote:

—Omoimona damie cuena gaitataite —llote. <sup>22</sup> Iena caca-janona, eo sunaitimaci. Damierie naimiemo jìcanoside:

—¿Cuena ñaitio?

<sup>23</sup> Uai ote:

—Omoimona damie bie platomo cue diga llomenico diga mutade. <sup>24</sup> Jusñamui facaina lloraíma cueda isoi, monamona jai billamona fiodaiticue; iadedi cuena gaitataitimie eo duere sefuite. Naimie jeiciñegadena, cuemona mare.

<sup>25</sup> Jesúsna gaitataitimiedi Judas micori. Naimie jìcanote:

—Maestro, ¿ona iese finotaiticue?

Uai ote:

—Ji, iese finotaitio.

<sup>26</sup> Naimaci nia guitimacimo, llomeniconona Jesús llinuanona, Jusñamui iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoí começina facajano, iena guiño.

27 Ie mei naimie jiroracona jiaí llinote. Jusiñamuimo iobilacinona llua mei, naie jiroracomo jai totaca vino naimacimo fecajano, raite:

—Biemona nana omoí jiro. 28 Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoímo jiaíe rafue birui itatajanona, omoí jeacino oni dotajana jai llote. Bie vinodi naie rafue facai ie. Cue llua isoi bie vinona omoí jiruamona, cue fiodaillamo omoí comeci. 29 Omoína bene dane iese caimare nabaiñeiticue. Cue Moo sedajanomo omoí diga cue ia, nainomo omoína dane iese caimare marena nabaiticue. —Iena jirodimaci.

*Jesúdi Pedro naimiēna januaana llua rafue*

*(Mr 14.26-31; Lc 22.31-34; Jn 13.36-38)*

30 Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. 31 Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloraíma micorí iena jaie cueda: “Toica llaudaíai sedaraímana meinetaíticue. Naimie toíniaí uaficaída jaitimaci” cueda. Naimie micorí caina cuete. 32 Ero, fiodaillamona cue jillua mei, omoí uicodo Galileamo jaiticue, nainomo omoí diga dafaífillena.

33 Pedro uai ote:

—O finolle rafue muidona nana jiaíno ona fainonocaía, ona jaca fainonocaiñeíticue.

34 Jesús dinena raite:

—Uanai omo lloíticue. Ja naio íitava nia ñaiñenia, dacaiño amani cuena janoítio.

35 Pedro uai ote:

—O diga cue fiodaíadedi, ona janoñeíticue.

Nana ie llofueoicaigano daje uaido jiaí raitimaci.

*Jesúdi Getsemanímo Jusiñamuimo jiaí rafue*

*(Mr 14.32-42; Lc 22.39-46)*

36 Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoímona oni bai janore jaiticue. Cue Moo diga ñaíllena, jaiticue.

37 Pedrona uite. Zebedeo ie jito iaímaíaina jiaí uite. Naimie sunaícaide. Ie comeci uri íñede. 38 Naimacimo llote:

—Cue comeci sunaícaide. Niadí fiodaíticue. Benomo fiebi; ia nia íniñeno cue facaina omoí jiaí.

39 Naimie janore bai jaillanona, eníruemo bitadate. Jíide:

—Ore Moo, o jitaía, cuena duere finoñeno; íadedi cue comeci jitaíllacinona finoñeno. Cuemo o jitaíllacino fino

—jüde. <sup>40</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia inedemo. <sup>41</sup> Iniñeno. Taife ramo omoina fai raillano, iena omoi inoñellena, Jusiñamuimo jü. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jü, omoina naimie ocuiñotallena —llote. <sup>42</sup> Ie mei dane jüllena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

<sup>43</sup> Ie llofueoicaigano dine dane billanona, naimaci uisi llirioilla jira, naimaci inisitemo ride. <sup>44</sup> Abido jaillanona dane jüde. Ailli daje isoidiuidido jüde. <sup>45</sup> Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fiodaiticue. Cuena ja gaitajanona, Jusiñamui jitailla jira, naimiena inoñedino anamo ja iiticue. <sup>46</sup> A naidacai. Maiña. Cue gaitataitimie jai bite.

### *Jesúna gaitalle rafue*

*(Mr 14.43-50; Lc 22.47-53; Jn 18.2-11)*

<sup>47</sup> Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci. <sup>48</sup> Jesús dine naimaci nia riñenia, Judas micori naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita —llote. <sup>49</sup> Jesús dine naimaci rillanona, Judas micori Jesús dine raire jaide. Naimiena uaidote:

—Maestro, jai biticue. —Ieconí naimiena llibanote. <sup>50</sup> Jesús dinena raite:

—¿Bue ñiaibitio?

Ie mei Judas micori diga bitinodi Jesúna gaitadimaci. <sup>51</sup> Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaíma jefona jai bonote. <sup>52</sup> Jesús naimiemo llote:

—O fuiriacania, o jiai fiodaitio. O lloebi dane eeno. Cue riiduanona, fuiriñeno. <sup>53</sup> Cuena riidollena, cue Moomo cue jicaia, eo ailluena jaienisaí cue dine naimie oretaité; <sup>54</sup> iadedi iese cuena riidoia, Jusiñamui facaina lloraini micoriai cue gafuiaí suiñeite. Cue fiodaille rafuena cuetimaci —llote. <sup>55</sup> Ieconí naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Firiraimadicueta cuena omoi gaitajai billa. Jusiñamui jofomo

nagarui llofuecabiticue; iadedi cuena gaitañedomoi. <sup>56</sup> Nana bie rafue suide, Jusiñamui facaina lloraini micoriai cuega-fuia suillena —llote. Ie facaise nana naimie llofueoicaigano naimiena fainonocaillano, aisidimaci.

*Jesúdi judíuái illaicomini dine illa rafue*

*(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Jesúna gaitadinodi Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamac jiai ofidimaci. <sup>58</sup> Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uiñollena, nainomo ite jofomo maijiraini diga raide.

<sup>59</sup> Naimiena meinellena, nana naie illaicomini Jesúmo nicino illana uiñoiacadimaci. <sup>60</sup> Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúna ñaitimaci; iadedi taino llotimaci. Ie mei menamie bitiaimaiaia. <sup>61</sup> Raitiaimaiaia:

—Bimie llote: “Jusiñamui jofona judairedicue. Judaia mei, darui amani illanona, iena dane finoredicue” —lloitiaimaiaia.

<sup>62</sup> Jusiñamui diga nanoca ñairaima Jesúmo jicanote:

—¿Niese iaimaiaia uai oitio? ¿Nie isoide rafue ona llogidotiaimaiaia?

<sup>63</sup> Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

<sup>64</sup> Jesús dinena uai ote:

—Jii, naimiedicue. Iena raise llotio. Monamona jiaie cue billamona, imana jaidicue; iadedi ico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

<sup>65</sup> Iena cacajanona, naimiemon Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitañedicaia. Ie ñaia mona dama naimie abina llogidote. <sup>66</sup> ¿Niese naimiena raitomoi?

Jiai illaicomini dinena uai otimaci:

—Naimie fiodaillesa.

<sup>67</sup> Ie mei naimie uiecona tuallaitimaci. Naimiena ducoidimaci. Jiai bucoidimaci. <sup>68</sup> Raitimaci:

—O Cristodiodena, ¿bu o bucoia? caimo llono.

Jesús uai oñede.

*Pedro di Jesúna janua rafue**(Mr 14.66-72; Lc 22.56-62; Jn 18.15-18, 25-27)*

<sup>69</sup> Naie facaise Pedro naie jofo nairaibirimo ite. Naie jofo nama mullaiño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. <sup>70</sup> Nana nainomo itinomo Pedro llote:

—O lluana uiñoñedicue.

<sup>71</sup> Nase fuemo Pedro jaidemo, naimiena jiaie mullaiño ciuanona, nainomo itinomo llote:

—Bimiedi Nazaret ie Jesús comini imie.

<sup>72</sup> Pedro uai ote:

—Uanaicinona cue lluana Jusiñamuidi uiñote. O llogamiena uiñoñedicue.

<sup>73</sup> Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

<sup>74</sup> Uai ote:

—Uanaí cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúna uiñoñedicue.

—Ieconí itava ñaite. <sup>75</sup> Iena cacajano, Pedro Jesús lluana uibiñote. Jaive Jesús Pedromo llote: “itava nia ñaiñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

**27***Pilato dine Jesús illa rafue**(Mr 15.1; Lc 23.1-2; Jn 18.28-32)*

<sup>1</sup> Monaidemo, nana Jusiñamui diga nanoca ñairainidi, nana einamaci diga, Jesúna siadotimaci. Naimiena meinellena siadotimaci. <sup>2</sup> Siadua mei, Jesúna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

*Judas micori fiodailla rafue*

<sup>3</sup> Judas micori Jesúna jai gaitatate. Naie illaicomini Jesúna meiniana lluana naimie micoridi uiñuamona, ie comece iuaina meidote. Illaicominimo ie treinta diga ucubena abido atide. <sup>4</sup> Raite:

—Jesús marañede rafuena jaca finoñede. Naimie fiodaíñeite. Naimiena cue gaitatajamona, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

<sup>5</sup> Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona. <sup>6-7</sup> Jusiñamui diga nanoca

ñairaini naie ucubena iraiá mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicai. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci. <sup>8</sup> Naie ucube muidona damie fiodailla jira, birui naie enirue mamecidi dirue ie enirue. <sup>9</sup> Iemona Jeremías micori jaie cuega rafue jai suide. Naimie micoridi Jusiñamui facaina lloraíma. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci. <sup>10</sup> Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

*Pilato dine Jesús illa rafue*

(Mr 15.2-5; Lc 23.3-5; Jn 18.33-38)

<sup>11</sup> Pilato railla gobernador uicomo Jesúna atia mei, Pilato Jesúmo jicanote:

—¿Judúuai comini illaimadio?

Jesús uai ote:

—Jii. Raise llotio.

<sup>12</sup> Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede. <sup>13</sup> Ie muidona Pilato naimiemo llote:

—Diga rafuena ona llogidotimaci. ¿Niese uai oñedio?

<sup>14</sup> Jesús nia uai oñede. Ie jira Pilato uainicaide.

*Pilatodi Jesús fiodaillana llua rafue*

(Mr 15.6-20; Lc 23.13-25; Jn 18.38-19.16)

<sup>15</sup> Naga año pascua railla rafue facaiseconi cárcelmo itinomona Pilatodi comini jicacamiéna jamai jino orede. <sup>16</sup> Bie año cárcelmo Barrabás raillamie ite. Naimie mameci eo are soride. <sup>17</sup> Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiai ite. Naimiedi Cristona jiai mameciredé.

<sup>18</sup> Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meineiacanana jiai uiñote. <sup>19</sup> Ie maijiracomo naimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca finoñede. Naimiena duere finoñeno. Jaive naio cue nicairillano, naimie muidona cue comeci jarire ite”. <sup>20</sup> Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llo timaci. <sup>21</sup> Comini ofilla mei, naimacimo Pilato dane jicanote:

—¿Nimie cue jino oretajana jitaidomoi?

Uai otimaci:

—Barrabás.

<sup>22</sup> Pilato dinena jicanote:

—¿Niese Jesúna cue finuana jitaidomoi? Naimiedi Cristona jiai mameciredede.

Nana uai otimaci:

—Naimiena cruzmo corai.

<sup>23</sup> Pilato dane jicanote:

—¿Nie isoide marañede rafuena finode?

Naimaci dinena ado ibi llonoidimaci:

—Naimiena corai.

<sup>24</sup> Jesúna jino oretajana jitañedimaci. Iena Pilato uiñuamona, comini jai uri iñenana naimie cñuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

<sup>25</sup> Uai otimaci:

—Dama iesede. Naimie fiodaite cai muidona. Jiai cai uruia; muidona.

<sup>26</sup> Ie mei Pilatodi Barrabás naimaci jitailla jira, jino orede; iadedi Jesúna sechedotajanona, naimiena coraillena orede.

<sup>27</sup> Dajerie soldaduai; Pilato jofomo Jesúna uite. Nana soldaduai nainomo ofidimaci. <sup>28</sup> Naimie iniroi duiñuano, naimiemo jiduirede iniroina jítadimaci. <sup>29</sup> Eecuaímona niga nuiciraina naimie ifogimo jítadimaci. Ie nabeillimo radosina jonete, illaímana naimie illa isoi. Caiñici ifodo raídímaci, illaímana naimie illa isoi. Raitimaci:

—Jadi, judíuai illaíma. —Iese raillanona naimiena jifanododimaci. <sup>30</sup> Naimiena tuallaítimaci. Naimie onollimo ite radosina naimaci llínocaida, naiedo naimie ifogina buta-butadimaci. <sup>31</sup> Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraillena oni uitimaci.

### *Jesúna coraia rafue*

(Mr 15.21-32; Lc 23.26-43; Jn 19.17-27)

<sup>32</sup> Jerusalémona naimaci jaillanona, Cirene railla eniruemona bitimiemo dafaífidimaci. Naimie mameci Simón. Naimiena Jesús uiga cruzna rocatatimaci.

<sup>33</sup> Gólgota raillanomo jaidimaci. Ifocoraína eruailla jira, iese mameciredede. <sup>34</sup> Nainomo rillanona, ie abi isirena cacaiñellena, vinomo erirede rana faianona, naimiemo fecadimaci; iadedi iena naimie facajano, iena jiroñede.



<sup>35</sup> Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uifollena, jifanododimaci. <sup>36</sup> Ie mei ana raidimaci, naimiemo eruaillena. <sup>37</sup> Naimie ifogi afebeimo ie llogiduaфуena jonetimaci. Iese cuega: “Bimiedi Jesús. Judíuai comini illaima”. <sup>38</sup> Ie mei mena firiruide iaimaiaina coraidimaci. Damie Jesús nabeimo coraica. Jiaimie Jesús jarifebeimo coraica. <sup>39</sup> Naisodo jamai jaidino Jesúsna mameritimaci. Mamerillamona, ifogiaina jaididimaci. <sup>40</sup> Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

<sup>41</sup> Ie facaise Jusiñamui diga nanoca ñairaini naimiena mameritimaci. Moisés micori llogacino llofueraini naimiena jiai mameritimaci. Einamaci naimiena jiai mameritimaci. Raitimaci:

<sup>42</sup> —Jiaie cominina jillotate; iadedi dama naimie abina jilloitanide. Naimiedi cai judíuai comini illaima raillamiedena, cruzmona naimie ana niade billasa. Ie mei naimiena inoiticai. <sup>43</sup> “Jusiñamui Jitodicue” naimie railla jira, naimiedi Jusiñamuina ja inotena, Jusiñamui jitaia, Jusiñamui naimiena jillotaite. —Iese naimiena mameritimaci. <sup>44</sup> Naimie diga coraica iaimaiaí daje isoi naimiena mameritiaimaiaí.

### *Jesús fiodailla rafue*

(Mr 15.33-41; Lc 23.44-49; Jn 19.28-30; Heb 9)

<sup>45</sup> Jitoma naidai itemona, daje amani horas mona jitibicaide. <sup>46</sup> Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fañonocaidio?” raite.

<sup>47</sup> Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote — raitimaci. <sup>48</sup> Naimacimona damie jarire jaillanona, fibecode ramo vinona faite. Radosimo jillillano jirrollena, naimiemo a fecade. <sup>49</sup> Ieconí jiaíno raitimaci:

—Ina nai. Dallu seda. Elías naimiena jilloitajaibillena sedaiticai.

<sup>50</sup> Ieconí Jesús dane ado cuirioita, fiodaite.

<sup>51</sup> Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode. <sup>52</sup> Diga raiafuai econote. Jesús jillua mei, raiafomona, fiodaillamona, ailluena Jusiñamuina

ñnotinodi jillodimaci. <sup>53</sup> Ie mei Jerusalémo naimaci jailanona, diga comini naimacina ciodimaci. <sup>54</sup> Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinailamona, naimie raite:

—Uanai bimiedi Jusiñamui Jito.

<sup>55</sup> Ailluena riñoniai naie rafuena aarena ciodimaci. Naimiena canollena, Galileamona Jesús diga navui bitimaci. <sup>56</sup> Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruai ei jiai ite.

### *Jesús raiafomo jonia rafue*

(Mr 15.42-47; Lc 23.50-56; Jn 19.38-42)

<sup>57</sup> Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús díbeimo jaidimie. <sup>58</sup> Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. <sup>59</sup> Ie mei Jesús abina cruzmona ana José uanona, jeanide mare userede iniroi diga naimie abina ferinote. <sup>60</sup> Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide. <sup>61</sup> María Magdalena raiafo uico dine jiaie María diga rainadatiiañuai.

### *Soldaduai Jesús raiafo sedaja rafue*

<sup>62</sup> Ie areruido, pascua railla rafue illarui, dajerie judúuai illaicomini Pilato dine jaidimaci. <sup>63</sup> Raitimaci:

—Ero, naie abi caitadimie nia fiodaiñenia, navui llote: “Cue fiodaillamona, darui amani illanona, jilloiticue”. <sup>64</sup> Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi arí oi raillano. Naimie abina naimaci fiñanona lloitimaci: “Naimie jai jillode”. Iese suia, cominina eo jifueitimaci.

<sup>65</sup> Pilato uai ote:

—Soldaduai omoído oreiticue, naie raiafo raise sedallena.

<sup>66</sup> Ie jira jaidimaci. Raona nitajano, raiafo raise ibaidimaci. Naiena sedallena, soldaduaína nainomo fainonocaidimaci.

## 28

### *Jesús fiodaillamona jillua rafue*

(Mr 16.1-8; Lc 24.1-12; Jn 20.1-10)

<sup>1</sup> Sábado fuilla mei, monaiacania, María Magdalena, jiaie María diga, raiafona jibuisaidiiañuai. <sup>2</sup> Ieconí ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide. <sup>3</sup> Eo queniredena eruaide. Naimie iniroi eo userede. <sup>4</sup> Nainomo ite soldaduai

naimiena eo jacinailamona, abi docaidimaci. Iemona fioidaitino isoi dallu itimaci. <sup>5</sup> Ie facaise naie jaienici di dinena naie riño iaiñuaimo llote:

—Jaciruiño. Coraica Jesúna omuiño jenuana uiñoticue. <sup>6</sup> Naimie bene iñede. Naimie llua isoi, fiodaillamona naimie jai jillode. Naimie ifo jeraimo billano mai jibuisaibi. <sup>7</sup> Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoi uicomo naimie jaite” llono. Bie rafue omuiño jai lloticue —llote. <sup>8</sup> Ie jira raiafomona rajicaillanona, eo iobillanona, raire jaidiañuai. Ie llofueoicaigano dine aisidiñuai. <sup>9</sup> Ie llofueoicaigano dine iañuai nia riñenia, Jesús iañuaimo dafaifillano, raite:

—Itomuiño. —Naimie dine iañuai rillanona, naimiena sedallena, naimie eillina llinotiañuai. <sup>10</sup> Jesús dinena raite:

—Jaciruiño. Cue llofueoicaiganomo llono: “Galileamo jai. Nainomo omoina cioiticue” llono.

### *Soldaduai raiafona sedademo suide rafue*

<sup>11</sup> Jaidiañuaimo, nainomo ite soldaduaïmona dajerie Jerusalémo jaide, nanoca Jusiñamui diga ñairainimo nana naimacimo suide rafue lollena. <sup>12</sup> Iena cacajano, einamacì diga iena siadotimaci. Ie mei naie soldaduaïmo ucubena fecadimaci. <sup>13</sup> Raitimaci:

—Jiaie cominimo llono: “Cai inia mei, ie llofueoicaigano ie abina fiano uitimaci” llono. <sup>14</sup> Iena cai gobernador fidiã, naimie diga ñaiticai, omoina naimie duere finoñellena —raitimaci. <sup>15</sup> Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

### *Jesús ie llofueoicaiganomo iraicaiño lloga rafue*

*(Mr 16.14-18; Lc 24.36-49; Jn 20.19-23)*

<sup>16</sup> Ie mei Galileamo naie once llofueoicaigano jaidimaci. Jesús lloga anedumo jaidimaci. <sup>17</sup> Naimiena naimaci cianona, naimiena sedadimaci; iadedi dajerie Jesús jilluana raise nia inoñedimaci. <sup>18</sup> Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. <sup>19</sup> Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza. <sup>20</sup> Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

## MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micorì illa rafue  
(Mt 3.1-12; Lc 3.1-9, 15-17; Jn 1.19-28)*

1-2 Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie llumona, Juan Bautista micorì llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena lollena, damiena oretaiticue”  
Jusiñamui raite.

3 Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino”  
llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

4 Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafafia, naimacimo llote:

—Omoi jeacinona fañonocaida, Jusiñamui dibeimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uiñotallena, mai omoi bautizallomoi.

5 Diga comini naimie micorì dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micorì bautizaga.

6 Juan micorìdi camello itirai ai ie nilla iniroina jítade. Igoi iena ie moilligaina jítade. Fioduaina rite. Ciifona mete. Jamai rana guite. 7 Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. 8 Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

*Jesús bautizaja rafue  
(Mt 3.13-17; Lc 3.21-22)*

9 Jordán dine Juan micorì nia ia, Galileamona, Nazaremona naimie dine Jesús bite. Nainomo Jesúsdi Juan bautizaga.

10 Bautizaja mei, jinui mona billana, ieconi mona bojodena cide. Jusiñamui Joreño, ucugi isoi, naimie emodomo ana billana cide. 11 Monamona Jusiñamui llote:

—Cue isiruiga Jitodio. Ori iobidicue.

*Jesúna Taife ramo faia rafue**(Mt 4.1-11; Lc 4.1-13)*

<sup>12</sup> Jesús bautizaja mei, Jusiñamui Joreño jofue iñenanomo naimiena uite. <sup>13</sup> Comini nainomo iñede. Difai ocainaiái itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

*Galileamo Jesús illa rafue**(Mt 4.12-17; Lc 4.14-15)*

<sup>14</sup> Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. <sup>15</sup> Llote:

—Jusiñamui birui omoína sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai iuaina meido. Bie rafuena mai omoi iino.

*Ie llofueoicaigano jaillena, Jesúdi nagaamagamiena fetua rafue*

*(Mt 4.18-22; Lc 5.1-11)*

<sup>16</sup> Jaiiruido Galilea railla jorai fuemo Jesús macaritemo, menamiena ciode. Naga ie ama iaímaiaí. Damie Simón. Jiaimie Andrés. Lloijina fairaíma iaímaiaí. Iese jaca naie iaímaiaídi maijuidiaímaiaí. <sup>17</sup> Iaímaiaímo llote:

—Cue diga omico jaiocaillena, cue diga mai bi. Cue llofueganona omico jaillena jitaidicue. Lliciaína birui ocabitomico; iadedi cominina oitomico, cue dibeimo naimaci illena.

<sup>18</sup> Iena cacajanona, ieconi iaímaiaí lloijina fainonocaida, naimie diga jaidiaímaiaí. Ie llofueganona jaillena, jaidiaímaiaí. <sup>19</sup> Lliai bai Jesús jaidemo, jiaie menamiena ciode. Naga ie ama iaímaiaí. Damie Jacobo. Jiaimie Juan. Iaímaiaí moodi Zebedeo. Botemo iaímaiaí lloijina sigaidiaímaiaí. <sup>20</sup> Jesús iaímaiaína uaidote, ie llofueganona jaillena. Ie maijiraini diga iaímaiaí mooná fainonocaida, botemona ari billanona, Jesús diga jaidiaímaiaí.

*Jesúdi Janaba anamo itimie jillotaja rafue**(Lc 4.31-37)*

<sup>21</sup> Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofuede. <sup>22</sup> Moisés micori llogacino llofueraíni isoi llofueñede. Illaíma uai isoi naimie llofuaí jira, nainomo ite comini naimie llofuíamona raijicaidimaci. <sup>23</sup> Janaba anamo illamie nainomo ite. <sup>24</sup> Jesús llofuiana cacaita, Janabadi imana ado cuirioitate:

—Odi Nazaret ie Jesús. ¿Bue ñeacadío cai diga? Caina duere finuaibidío. Ona uiñoticue. Odi Jusiñamui ie mare fetocamiedío.

<sup>25</sup> Jesús naimiëna lletade:

—Lliçai. Naimiëmona oni jaide.

<sup>26</sup> Janaba naimiëna docaitajanona, ado cuirioillanona, naimiëmona oni jaide. <sup>27</sup> Iena çuanona, nana nainomo itino rajicaidimaci. Coniniri siadotimaci:

—¿Ñiese ite? Bimie jiaie uaido llofujete. Janabamo naimië llua mei, ñimamona Janaba oni jaide. Janaba Jesús uaina ñnote.

<sup>28</sup> Iëmona nana Galilea eniruemo Jesús mameci are soride.

*Jesús Pedro jifaiñona jillotaja rafue*

(Mt 8.14-15; Lc 4.38-39)

<sup>29</sup> Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiaide. Jacobo, Juan diga jiai fo jaide. <sup>30</sup> Ie facaise Simón jifaiño duide. Abi cuaride. Nainomo itino Jesúmo naiñaiño duillana lote. <sup>31</sup> Iena cacajanona, naiñaiño ñine jaillanona, Jesús naiñaiño onollina ñnote. Naiñaiñona naidacaitade. Iëconi abi cuarilla fainonocaide. Guille finuanona, ie jofomo itinona ecade.

*Jesúdi ailluena duidinona jillotaja rafue*

(Mt 8.16-17; Lc 4.40-41)

<sup>32</sup> Navuida, jitiñicaidemo, Jesús ñine comini ailluena duidinona atidimaci. Janaba anamo itinona jiai atidimaci. <sup>33</sup> Nana Capernaum comini naie jofo nasemo ofidimaci. <sup>34</sup> Jesúdi diga duicono ailluena duidinona jillotate. Ailluena comini Janaba anamona jillotate. Naimiëna jananiai uiñua jira, Jesús naimaci ñaiana rairuide.

*Galileamo Jesús llofuia rafue*

(Lc 4.42-44)

<sup>35</sup> Ie areruido ña monaiñenia, Jesús casillanona, Capernaumona comini ñënanomo Jesús jaide. Nainomo Jusiñamuimo jide. <sup>36</sup> Monaia, casidemo, jofomo Jesús ñëna jira, Simón, ie nabaiñiai diga, Jesúsna jenuaide. <sup>37</sup> Baillanona, raite:

—Nana comini ona jenodimaci.

<sup>38</sup> Jesús uai ote:

—Jiaie nairaiaia ñine mai cai jailli. Nainomo llofueiacadicue. Ie jira Capernaumona jino biticue.

<sup>39</sup> Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

*Jesúdi efonaitimienona jillotaja rafue*

(Mt 8.1-4; Lc 5.12-16)

40 Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiadedi, cuena jillotaredio.

41 Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. 42 —Ieconí naimie jillode. 43 Ie facaise Jesús naimiena oretaiacanano, naimiemo riire llote:

44 —O jilluana bumo lloñeno; iadedi Jerusalémo Jusiñamui jofomo Jusiñamui diga ñairama dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca.

45 Iese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

## 2

### *Jesús tisitaitimiena jillotaja rafue*

(Mt 9.1-8; Lc 5.17-26)

1 Nigarui illanona, Capernaumo Jesús dane abido ride. Comini iena fidianona, 2 ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofuede. 3 Cominina Jesús llofuetemo, naimie dine nagaamagamie ie biiramo biide tisitaitimiena atidimaci. 4 Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econuano, Jesús ecimo naimiena ie biiramo biide diga, rao diga, ana ñuitadimaci. 5 Iena Jesús cianona, tisitaitimie jilluana naimaci inuana Jesús uiñote. Tisitaitimiemo llote:

—Nabai, o jeacino cue feitaja jira, iena jai oni dotadie. Ie facai ibana jai oñeitie.

6 Nainomo itinomona damierie Moisés micori llogacinona llofueraini nainomo raidimaci. Comecina facadimaci: 7 “¿Niese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. 8 Naimaci comeciai facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomo? 9 Bimiemo: “O jeacinona jai oni dotadie” cue lloia, cue uai siñonana uiñoñeitomoi; ia bimiemo: “Mai naidacaillanona, o biira ferinocaida, mai macari” cue lloia, cue uai siñonana uiñoitomoi. 10 Monamona jaie cue billanona, imana jaidie.

Ie jira jeacino oni dotaja uai cuemo ite. Iena omoi uñollena, tisitaitimiero lloiticue: <sup>11</sup> “Mai naidacai. O bira ferianona, o jofomo mai jai”.

<sup>12</sup> Iese naimie raillamona, tisitaitimie jillode. Naidacaida, ie bira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicai.

*Jesúdi Levína fetua rafue*  
(Mt 9.9-13; Lc 5.27-32)

<sup>13</sup> Jiairuido jorai fuemo Jesús dane jaide. Ailluena comini naimie dine ofillanona, naimacina llofue. <sup>14</sup> Llofua mei, Jesús bai macaritemo, Leví raillamiena cide. Levídi Alfeo jito. Gobierno ucube ouillanomo naimie maijuide. Nainomo raidena Levína cide. Naimiero llote:

—Cue llofuegamiena o jaillena, cue diga bi. —Naidacaida, Jesús diga jaide.

<sup>15</sup> Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. <sup>16</sup> Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. <sup>17</sup> Iena cacajano, Jesús llote:

—Ecairedinodi médicona jitañedimaci; ia duidinodi médicona jitañedimaci. Ie isoide. Mareuidino cuena jitañedimaci; ia maraiñedino cuena jitañedimaci. Jusiñamui dibeimo mareuidinona uaibiñedicue; iadedi maraiñedino uaibiticue. Omoimona maraiñedino diga nabairiticue; ia naimacina uaibiticue.

*Jesúmo comini guiñenana jicanua rafue*  
(Mt 9.14-17; Lc 5.33-39)

<sup>18</sup> Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiero llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci;



ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

<sup>19-20</sup> Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiaí sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

<sup>21</sup> Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

<sup>22</sup> Jacagomona finoca bolsa como finoca vino joneñega. Jonegadena, mairiñena jira, sirillamona igoí raire cuararite. Vino faifite. Igoí jiaí faifite. Como finoca vino comogomo jonelle. Iemei iena faifíñeite. Ie isoide. Omoí einamací rafue ifomo jiaie rafue birui ite. Iena omoímo llocabiticue. Iedo jaidicai —llote.

*Sábadoruimo Jesús llofueoicaigano maijia rafue*

*(Mt 12.1-8; Lc 6.1-5)*

<sup>23</sup> Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidimaci. <sup>24</sup> Dajerie fariseuai iena ciuano, llotimaci:

—Rairuica rana finosite. Moisés micorí rairuilla jira, sábadoruimo maijñidicai; iadedi trigona naimaci tijiamona, caimona jai maijdidimaci. Iese cai abímo jeacinona jai finodimaci.

<sup>25</sup> Ie llofueoicaiganona riiduano, Jesús uai ote:

—Cuemona jeacino finoñedimaci. David micorí jaie finoca rafuemo omoí comeciái raise facañedomoi. David micorí guille iñenia, naimie aimetaia, ie nabaiñiaí diga, Jusiñamui jofomo fo jaide. <sup>26</sup> Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiaí diga, David micorí iena guite; ia Jusiñamui naimacina duere finoñede. <sup>27</sup> Jusiñamui sábadona finuamona, sábadó ite, nairui illamona comini caimare illena; ia omoí llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. <sup>28</sup> Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

## 3

*Jesúdi onollina idisarodimiēna jillotaja rafue*

*(Mt 12.9-14; Lc 6.6-11)*

<sup>1</sup> Jiaie sábadoruimo judíuái ofiracomo Jesús dane jaide. Ie fa-  
caise onollina idisarodimie nainomo ite. <sup>2</sup> Nainomo itino Jesús  
eruidimaci, sábadoruimo Jesús naimie raabaca ie segoitai.  
Iena Jesús finoia, naimacimona sábadoruimo naimie jai maijia  
jira, naimiēna llogidoiacadimaci. Sábadoruimo bu maijia,  
naimacimona jeacino finode. <sup>3</sup> Onollina idisarodimiemo Jesús  
llote:

—Cue ecimo mai bai bi.

<sup>4</sup> Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui  
cue jillotaiadedi, birui mare rafuena finodicue. Cuenā  
birui omoi meineiadedi, birui maraiñede rafue finodomoí.  
Sábadoruimo, ¿nie isoide rafue finuana rairuidomoi?

Comini dinena uai oñedimaci. <sup>5</sup> Naimie uaina naimaci  
ñnoñena jira, riicaillanona, Jesús naimacimo erodate.  
Duidimiemo llote:

—O onolli mai oni ñuita.

Iena oni ñuitajamona jillode. <sup>6</sup> Iena cianona, fariseuai jino  
jaidimaci. Naimiēna meinellena, illaima Herodes díbeimo  
itinona baillanona, naimaci díga coniniri siadotimaci.

*Jorai fuemo Jesúdi ailluena cominina llofuia rafue*

<sup>7</sup> Naie nairaimona jorai fuemo Jesús, ie llofueoicaigano  
díga, oni jaide. Galilea railla eniruemona ailluena  
comini naimie díne bitimaci. Judeamona jiaino bitimaci.  
<sup>8</sup> Jerusalémōna, Idumeamona, Jordán ruicafebellemona, Tiro  
jinofemo ite eniruemona, Sidón jinofemo ite eniruemona  
ailluena bitimaci. Nana naimie siño finoca rafuena  
cacajanona, naimiēna cioacadimaci. <sup>9</sup> Comini naimiēna  
meetasi raillanona, ie llofueoicaiganomo daje botemo  
naimie jaillena eenogana llote. <sup>10</sup> Ailluena duidinona  
naimie jai jillotaja jira, nana duidino naimiemo riacadimaci.  
Jilloillena naimiēna jetaacadimaci. Iemona naimie illa  
bote eenuana jitaide. <sup>11</sup> Jananiai anamo itino Jesúsna  
cioia, Jesús uicomo ana bitadajanona, jananiai naimacina  
ñaitatajamona, raitimaci:

—Jusiñamui Jitodio. <sup>12</sup> —Ia Jesús naimiēna naimaci lluana  
rairuide.

*Jesúdi ie doce llofueoicaiganona fetua rafue*

*(Mt 10.1-4; Lc 6.12-16)*

<sup>13</sup> Naie facaise anedumo Jesús jaide. Ie jitaillano diese  
naimie díne uaidote. Naimie díne billa mei, <sup>14</sup> doce dígamienā  
fetode. Naimie díga jaicabillena, naimacina fetode. Ie ra-  
fuenā lollena, naimacina oretaiacade. <sup>15</sup> Janaba anamo

itinomona Janabana oni oretallena, ie uai naimacimo ite. <sup>16</sup> Iese mameciredimaci: Simón; naimie mameci jiaicidi Jesús jitaca Pedrona. <sup>17</sup> Jacobo, Juan; iaímaiaí Zebedeo jito iaímaiaí. Jiaie mameci iaímaiaína Jesús jonete Boanergesna. Naie mameci oni dobaiñuamona mona guruama. Iciriruilla jira, iese mamecirediaímaiaí. <sup>18</sup> Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide. <sup>19</sup> Judas Iscariote micori; naimiedi Jesúna gaitatimie.

*Fariseuai Jesúna jeare ñaia rafue  
(Mt 12.22-32; Lc 11.14-23; 12.10)*

<sup>20</sup> Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. <sup>21</sup> Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci. <sup>22</sup> Jerusalémona Moisés micori llogacinona llofueraíni naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúsdi Janabana oni oretate —raitimaci.

<sup>23</sup> Naimaci raillana naimie cacajanona, naimie dine Jesús naimacina uaidote. Llote:

—Janaba díbeimo Beelzebú illamona, dama ie abina oretanide. <sup>24</sup> Ero, daje isoi comeciaina lloñenamo daje nairai facañenia, danomo maijñidimaci. Oni jaidimaci. <sup>25</sup> Daje isoi comeciaina lloñenamo daje jofomo itino facañenia, danomo jainaiainidimaci. Oni jaidimaci. <sup>26</sup> Ie isoide. Beelzebú uaido jananiaina omoi llua isoi cue oretaia, Janaba ie díbeimo itino diga jai nabairiñede. Iemona naimie comini danomo iñeitimaci. Ie uai ieconi saite. <sup>27</sup> Ero, mairidimie ie jofomo ite rana nibai fiíacadomoi. Iena fiíllena, naimiena nano raise omoi maiga. Raise maiga mei, ie rana fiíredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. <sup>28</sup> Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; <sup>29</sup> iadedi naimiedi ie Joreño na jeare ñaiacinona jaca dotañeite. Jusiñamui iena jaca feitañeite —llote.

<sup>30</sup> —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

*Jesús ie comini**(Mt 12.46-50; Lc 8.19-21)*

<sup>31</sup> Jesús comini naimie dine rillanona, naimie diga ñaiacanano jino naidaidimaci. <sup>32</sup> Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

<sup>33</sup> Jesús dinena uai ote:

—¿Bu cue ei? ¿Bu cue amatiai?

<sup>34</sup> Naimie ecimo itinomo erodajanona, llote:

—Jadi, cue ei, cue amatiai. <sup>35</sup> Jusiñamui jitaillacinona finodimie cue amana, cue miriñona, cue eina. Imaci ua cue cominina.

**4***Jesúdi trigona judaidimiena llua rafue**(Mt 13.1-9; Lc 8.4-8)*

<sup>1</sup> Jiairuido jorai fuemo dane jaillanona, ailluena comini naimie dine ofillamona, Jesús naimacina llofue. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. <sup>2</sup> Ailluena rafuena naimacina llofue. Raite:

<sup>3</sup>—Omoi fueollena, bie rafuemo raise cacarei. Damie trigona judaiaide. <sup>4</sup> Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede. <sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, <sup>6</sup> raise jainañena jira, ecasillamona duide. Ie jira llisiñede. <sup>7</sup> Eecuai illanomo jiaie iduai juide. Eecuai sicuamona riarra eecuai ibaica. Ie jira llisiñede. <sup>8</sup> Mare eniruemo jiaie iduai juide. Sicode. Llisillamona danademo treinta diga llisillana ote. Jiaianamona sesenta diga llisillana ote. Jiaianamona cien diga llisillana ote. <sup>9</sup> Omoi jeforena jira, raise fueollena, cue lluomo cacarei. Iena iino.

*Jesús ie como lloga rafuena llofuia rafue**(Mt 13.10-23; Lc 8.9-15)*

<sup>10</sup> Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiana jicanotimaci.

<sup>11</sup> Uai ote:

—Jusiñamuidi omoiina ie sedaacana rafuena jai uiñotade. Jaiie iena uiñoñedomoi. Jiaie cominina iena nia uiñoñañede.

<sup>12</sup> Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci iñoñena jira, uiñoñoeno jaitimaci. Cue llofuiana jamai cacadimaci; iadedi naimaci iñoñena jira, raise cacaiñedimaci. Uiñoñedimaci. Jusiñamui dibeimo naimaci jaiacaiñena jira, Jusiñamui

naimaci jeacinona oni dotañeite. Iena feitañeite. <sup>13</sup> Cue como llofuiacinona omoi raise cacaiñenia, dane cue llofui, iena jiai raise nibai cacaiñeitomoi; <sup>14</sup> ia iena omoina llofueiticue. Trigona judaidimiedi Jusiñamui rafue lloraima isoide. <sup>15</sup> Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaino cacaja uaina inotañede. <sup>16</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaja, iena caimare feiñotimaci. <sup>17</sup> Nofiemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefui, abido danomo uaidimaci. <sup>18</sup> Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. inotimaci; <sup>19</sup> iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci. <sup>20</sup> Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi lamparína ñaia rafue*

*(Lc 8.16-18)*

<sup>21</sup> Jorai fuedo Jesúdi cominina nia llofueite:

—Jai uneca lamparín jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. <sup>22</sup> Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie inotimaci. Damierie inoñedimaci. <sup>23</sup> Omoi jeforena jira, raise fueollena, cue llamo cacarei. Iena ino.

<sup>24</sup> Cue llamo raise cacarei. Omoi cacaja diese Jusiñamui omoina uiñotaite. <sup>25</sup> Iena omoi inoia, Jusiñamui omoina canoite. Omoina uiñocana jaitaite. Jiaimie iena janore cacajamona, iena inoñenia, Jusiñamui naimiena faifitaite.

*Jesúdi Jusiñamui ie cominina sedaacana llofui rafue*

<sup>26</sup> Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. <sup>27</sup> Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede;

28 ia eniruemonana sicode. Monaila mei, lliside. Iemonana naicua comuide. 29 Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

*Jesúdi mostaza ido llua rafue*  
(Mt 13.31-35; Lc 13.18-19)

30 Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. 31 Jiaie rafuedo iena omoimo lloiticue. Damie mostaza idona rillamona, naiemona eo aillue riara sicode. Mostaza ido eo janorede; 32 iadedi sicua mei, eo aillue riara jaillamona, ie onogaillai jegairiena jira, icairo anamo manaidinomo silliniñai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

33 Naie isoide rafuiaido Jesúdi Jusiñamui ie cominina sedaacana rafuena cominimo llote. 34 Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofuede.

*Jesúdi jorai baguana llucitaja rafue*  
(Mt 8.23-27; Lc 8.22-25)

35 Ailluena comini llofua mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

36 Cominina fañonocaida, botemo naimie jai illamona, naimie llua isoi, oni jaidimaci. Jiaie botes jiai jaide.

37-38 Bai jaillanona, jillacimo Jesús inide. Ie ifogi almodamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinailamona, Jesúna casitatimaci. Raitimaci:

—Maestro, ¿ñiese itio inoilla? Caina cano. Jai buisaidicai. Corobaisaidicai.

39 Naimie casillano, aifina lletade. Jinui baguana llucitade. Iecon i aifi llucitade. Bagoñede. 40 Ie llofueoicaiganomo jicanote:

—¿Bue ñellena jacinaitomoi? ¿Ñiese cuena raise ñnoñedomoi?

41 Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina ñnote. Jorai naimie uaina jiai ñnote. —Bai jaillanona, ruica dine ridimaci.

## 5

*Jesúdi Gadara railla eniruemo illa rafue*  
(Mt 8.28-34; Lc 8.26-39)

<sup>1</sup> Ruica dine naimaci ridemo, Gadara railla eniruemo sijidimaci. <sup>2</sup> Botemona ari Jesús jaidemo, naimie dine damie bite. Naimiedi Janaba anamo itimie. <sup>3</sup> Comini raioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. <sup>4</sup> Diga icaiño lleo diga ie onollidi maiga; iadedi oni ecocaida, lleoona ticonote. Ie eilli jiai maiga; iadedi saitaicaida, lleoona ticonote. Ie jira buna naimiena raise mainide. <sup>5</sup> Nagarui nofie motomo ite. Anedumo jaisoide. Cuiri-cuirisoide. Dama ie abina nofici diga jaidode. Iese naimie isoide. <sup>6</sup> Nofiemona Jesúna ciuanona, aisicana Jesús dine bite. Naimiena sedallena, ie caiñici ifodo ana rainadate. <sup>7-8</sup> Jesús llote:

—Janaba, bimiemona oni jai.

Janabadi imana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoño.

<sup>9</sup> Jesús Janabamo jicanote:

—¿O mameci bu?

Uai ote:

—Aillosiedicai.

<sup>10</sup> Bie illanomona naimacina oretañellena Jesúmo duere jicanotimaci. <sup>11</sup> Naie facaise nainomo ite anedumo ailluena chanchuai itimaci. <sup>12</sup> Chanchuai abimo naimaci jaillena Jesúmo duere jicanotimaci. <sup>13</sup> Jesús dinena:

—Jee —raite. Ieconí ima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

<sup>14</sup> Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. <sup>15</sup> Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jitade. Naimie jai uairicoñede. Iena ciuanona, Jesúna jaciruitimaci. <sup>16</sup> Naie rafuena cioidino jaive Janaba anamo illamie jilluana llotimaci. Chanchuaimo suide rafuena jiai llotimaci. <sup>17</sup> Naie enirue itinodi Jesúmo naimaci eniruemona oni jaillena duere jicanotimaci.

<sup>18</sup> Botemo Jesús jaiacania, jaive Janaba anamo illamie Jesúmo jicanote, naimie diga jaillena; <sup>19</sup> ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

<sup>20</sup> Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

*Jesúdi mena duide riñona jillotaja rafue**(Mt 9.18-26; Lc 8.40-56)*

<sup>21</sup> Ruica díbeimo ie llofueoicaigano díga Jesús abido rilla mei, ailluena comini naimie dine ofidimaci. Jorai fuedo naimie nia ia, <sup>22</sup> Jairona mameciredimiedi Jesús dine bite. Naimiedi judíuai rafue ofiraco sedaríma. Jesúmo duere jícanollena, ana bitadate. <sup>23</sup> Duere jícanote:

—Cue jisa jai fiodaicade. Cue jofomo cue díga bi, o onolli naiñaiño o jonellena, naiñaiño jilloillena.

<sup>24</sup> Iena cacajano, ie llofueoicaigano díga, naimie díga Jesús jaide. Ailluena comini Jesúmo ñaijillanona jaidimaci. <sup>25</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. <sup>26</sup> Díga manorainimona duere sefuide. Jilloñede; ia fodo jaide. Nana ie ucube jiai fuite. <sup>27</sup> Jesús duidinona jilluana naiñaiño fidiamona, jinafo dinena billanona, naimie iniroina jetade. <sup>28</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade. <sup>29</sup> Ieconí diailladi fainonocaiide. Ie abí jilluana naiñaiño jai uiñote. <sup>30</sup> Ie abimona ie uai oni jaillana Jesús uiñuanona, dobaicaide. Cominimo jícanote:

—¿Bu cue iniroina jetade?

<sup>31</sup> Ie llofueoicaigano dinena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

<sup>32</sup> Raise uiñollena, Jesús ie ecimo itinomo erodate. <sup>33</sup> Duidiñaiño ie jilluana uiñua jira, Jesús dine jaciruicana bite. Naimie uicomo ana bitadajanona, nana naiñaiño ite rafuena llote. <sup>34</sup> Naiñaiño Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

<sup>35</sup> Naiñaiño díga Jesús nia ñaitemo, Jairo jofomona jiaíno bite. Jairomo llote:

—O jisa jai fiodaite. Maestrona ñaidoñeno.

<sup>36</sup> Iena cacajano, Jairomo Jesús llote:

—O comeci jarire iñeno; ia cuena nia ñno.

<sup>37</sup> Ailluena comini naimie díga jaillana rairuide. Dani díese jaillana jitaide: Pedro, Jacobo, Juan. Juandi Jacobo ama. <sup>38</sup> Jairo jofomo rillanona, nainomo itino eecuinaillana cacade. Failliñailana cacade. <sup>39</sup> Jesús fo jailla mei, nainomo itinomo jícanote:

—¿Ñiese itomoi eecuinailla? Cuemona naiñaiño fioidañedesa. Jamai inide.

<sup>40</sup> Iena cacajano, naiñaiño jai fiodaite uiñuamona, Jesúri jaisitimaci. Naimacina Jesús jino oretaja mei, nai jitaíño moo



diga, naiñaiño ei diga, ie llofueoicaigano diga, naiñaiño ecimo Jesús jaide. <sup>41</sup> Naiñaiño onollina llinocaida, judíuái uaido raite:

—Talita, cumi. —Iena oni dobaíñuamona: “Jitaíbici, mai naidacai” raite.

<sup>42</sup> Ieconí jilluanona naidacaide. Jai jilluano macarite. Naiñaiño mo doce años jai ite. Nana nainomo itino ierí eo raijicaidimaci.

<sup>43</sup> —Bumo bie rafuena lloñeno —naimacimo Jesús llote. Guillena naiñaiño na ecajana jiaí llote.

## 6

### *Nazaretmo Jesús illa rafue*

*(Mt 13.53-58; Lc 4.16-30)*

<sup>1</sup> Naie illanomona Jesús oni jailla mei, ie llofueoicaigano diga Nazaretmo ride. <sup>2</sup> Rilla mei, sábadoruimo nainomo ite ofiracomo llofue. Iena cacajanona, nainomo itino raijicaidimaci. Raitimaci:

—¿Niese eo abina uíñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie.

<sup>3</sup> Naimiedi amederaíma. María jito. Ie amataídi Jacobo, José, Judas, Simón. Naimie miriñotiaídi caí motomo jiaí ite. —“Caí comena naimie ite” raillanona naimie uaina jamaidimaci.

<sup>4</sup> Jesús naimacimo llote:

—Naga illanomo cominídi Jusiñamui facaina lloráima uaina feiñotimaci; iadedi naimie nairáimo naimie ia, ie jofomo naimie ia, ie cominí naimie uaina feiñoiacasiñede. Jamaisite. Ie isoide. Cue cominídomoína jira, cue uaina ñnoñedomoi.

<sup>5</sup> Ie muidona nainomo siño rafuena eo finonide. Damierie duidinona jetajamona, naimacina jillotate; <sup>6</sup> ia naimaci ñnoñenari raijicaide. Ie mei diga nairáímo Jesús llofuecana jaide.

### *Jesúdi ie llofueoicaiganona oretaja rafue*

*(Mt 13.53-58; Lc 4.16-30)*

<sup>7</sup> Ie doce llofueoicaiganona Jesús uaiduanona, naimacimo ie uai iñonocaide, jananiaí anamona cominina jilloitallena. Ie rafuena lollena, jiaíe illanuaimo naimacina menamierie oretaiacade. <sup>8</sup> Raite:

—Ailluena rana uíñeno. Omoi abí riídollena, jiguidana uíño. Llomeniconá uíñeno. Ailluena rana omoi uíñellena, bolsana uíñeno. Ucubena uíñeno. <sup>9</sup> Zapatona jitajano jai. Abí omoi meidolle iniroina uíñeno. <sup>10</sup> Nie nairáimo omoi jaia, daacomo omoi ri. Naie nairáimo omoi ille dinori, daacomo omoi i. <sup>11</sup> Omoína bu feiñoiacaiñenia, omoi uaina bu cacarefiacaiñenia, naie nairáimona omoi jaillanona, omoi eilliaímo ite jearacuaina oni jaidino. Maraiñede rafuena naimaci finuana naimaci uíñollena, omoi eilliaína jaidino.

<sup>12</sup> Jesús naimacimo llua mei, jaidimaci.

—Omoi jeacinona fainonocaillanona, Jusiñamui dibeimo omoi comeciai iuai meiduana omoi jai —llofuecana jaidimaci.

<sup>13</sup> Janaba anamo ite cominimona Janabana oredimaci. Duidino abimo farena gia mei, naimacina jillotate.

*Juan Bautista micori fiodailla rafue*

*(Mt 14.1-12; Lc 9.7-9)*

<sup>14</sup> Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

<sup>15</sup> Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

<sup>16</sup> Jesúsna fidiano, Herodes comecina facade: “Juan micori ie ifogina navui jaitaticue. Fiodaillamona naimie jai jillode”.

<sup>17-18</sup> Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

<sup>19</sup> Ie muidona Herodías dinena Juan Bautista micorina jearuite. Naimiena meinetaiacade; <sup>20</sup> ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori llua cacade. Iena gaide; ia iena raise cacaiñede. Ie muidona Herodías naimie micorina meinetanide; <sup>21</sup> ia ja muidomo naiñaiño sedallirui ride. Herodes cumpleños ie rafuena finode. Ailluena illaicominina ie rafuemo uaidote. Eo ucuberedinona jiai uaidote. <sup>22</sup> Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. <sup>23</sup> Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

<sup>24</sup> Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

<sup>25</sup> Herodes dine raire abido billanona, llote:

—Juan Bautista ifogí bandejamo ja jonecaida, cuemo ine.

<sup>26</sup> Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoia-caiñede. <sup>27</sup> Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. <sup>28</sup> Bandejamo naimie ifogí jonecaida, iena atiano, Herodías jisamo fecade. Ieconi ie eimo fecade. <sup>29</sup> Iena fidianona, Juan micori llofueoicaigano naimie micori abina uaibitimaci. Iena raitimaci.

*Jesús cinco mil iñiaina ecaja rafue*

*(Mt 14.13-21; Lc 9.10-17; Jn 6.1-14)*

<sup>30</sup> Jesús llofueoicaigano abido bia, Jesúsno nana naimaci finoca rafuena llotimaci. <sup>31</sup> Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

<sup>32</sup> Ie muidona botedo comini iñenanomo dani jaidimaci. <sup>33</sup> Ailluena comini naimaci oni jaillana cioidimaci. Naimacina uiñuamona, diga nairaiaimona aisicana jaidimaci. Jesús nia riñenia, uicodo ie jaillanomo ridimaci. <sup>34</sup> Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofuede. <sup>35</sup> Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade.

<sup>36</sup> Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

<sup>37</sup> Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

<sup>38</sup> Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

<sup>39</sup> Iena cacajano, cominimo raitie illanomo dajerise ana raillena Jesús llote. <sup>40</sup> Naimaci cien digamierie ana raisite. Jiaino cincuenta digamierie ana raisite. <sup>41</sup> Naie cinco llomeniconona, naie mena lliciai diga, Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. <sup>42</sup> Nana guillanona monidimaci. <sup>43</sup> Monillamona, fiebide guillena

iraidimaci. Doce cirigaiamo oruitatimaci. <sup>44</sup> Cinco mil iñiaí diese guitimaci. Naimaci ainiaí, imaci uruiaí diga, jiaí guitimaci.

*Jesús jinui emododo macarilla rafue*  
(Mt 14.22-27; Jn 6.16-21)

<sup>45</sup> Guilla mei, botedo ie llofueoicaigano ruica dine Bet-saidamo jaillena llote. Naie facaiseconi cominina naimie nia facadote. <sup>46</sup> Cominina facadua mei, aneduaímo dane jaide, Jusiñamui diga ñaillena. <sup>47</sup> Jitibicaidemo, nainomo dama ite. Ie llofueoicaigano jorai motomo jai itimaci. <sup>48</sup> Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; <sup>49</sup> ia naimiena naimaci ciuanona, comecina facadimaci: “¿Bu joreño caímo billana ciodicai?” <sup>50</sup> Naimiena ciuamona, nana jacinaillamona cuiroidimaci. Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

<sup>51</sup> Botemo Jesús jaide. Ie facaise aifi llücaide. Ieri eo rajicaidimaci. <sup>52</sup> Janore guillemona ailluena cominina naimie ecajana jaive ciodimaci; ia naimie uai siñonana nia raise uiñoñedimaci. Naimiena nia raise iñoñedimaci.

*Jesúdi duidinona Genesaret eniruemo jillotaja rafue*  
(Mr 14.34-36)

<sup>53</sup> Ruica dine jaillanona, Genesaret railla eniruemo ridimaci. Nainomo sijidimaci. <sup>54</sup> Botemona ari jaidemo, nainomo itino Jesúsna uiñotimaci. <sup>55</sup> Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atuidimaci. <sup>56</sup> Diga nairaiamo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

## 7

*Jesúdi comini comeciaina ñaia rafue*  
(Mt 15.1-20)

<sup>1</sup> Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiaí bitimaci. <sup>2</sup> Jesús llofueoicaiganomona damierie naimaci isoi guiñenana ciodimaci. <sup>3-5</sup> Fariseuai dinena Jesúsno jicanotimaci:

—¿Bue ñellena omoi llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi, raise jocoñedimaci. Ie jira cai abimo jeacino finodomoí.

Iese jicanotimaci, naimaci einamaci rafuedo naimaci jailla jira. Maraiñede rafue naimacimo suiñellena, iese ailluena judúuai jaidimaci. Naimaci guiacania, naimaci einamaci llua isoi, onollina diga icaiño jocuano, guitimaci. Mercadomona bia, naimaci einamaci llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamui mona mare. Iese cai finoñenia, Jusiñamui mona maraiñede. Naimie caina duere finoite”. Jearede rafue naimaci abimo oñellena, iese finouidimaci.

<sup>6</sup> Jesús uai ote:

—Mareuidinona abi caitauidinodomoí. Isaías micori jaie omoína raise llote. Naimiedi Jusiñamui lluana cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicai” llotimaci.

Jamai ñaitimaci. Naimaci comeciai cue dibeimo raise iñede.

<sup>7</sup> Cue uai itena, jamai comini llucacina naimaci llofuecabilla jira, tainona cuena sedadimaci

cuete. <sup>8</sup> Isaías micori llua isoi itomoi. Jusiñamui llogacina fainonocaida, omoi einamaci rafuedo jaidomoi. <sup>9</sup> ¿Bue ñellena nana Jusiñamui llogacino jaiñedomoi? Omoi einamaci llogacino jaidomoi; iadedi nana Jusiñamui llogacino raise jaiñedomoi. <sup>10</sup> Moisés micori jaie llote: “O moo uai ñnuanona, naimiena cano. O ei uai ñnuanona, naiñaiña cano. Ie moori jeare ñaitimie, ie eiri jeare ñaitimie meinelle”.

<sup>11-12</sup> Iese Moisés micori llote; iadedi omoi einamaci llotimaci: “Jusiñamui cai ucubena cai fecajamona, cai moonona, cai eina jai canonicai”.

<sup>13</sup> Iese omoi finocabilla jira, omoi einamaci llogacino omoi jaillamona, Jusiñamui uaina jamaidomoi. Bie isoide rafuedo jaca jaidomoi.

<sup>14</sup> Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llamo cacarei. <sup>15</sup> Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacina finocabidomoi. <sup>16</sup> Omoi jeforena jira, raise fueollena, cue llamo cacarei. Iena ñino.

<sup>17</sup> Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci.

<sup>18</sup> Uai ote:

—¿Niese cue llua jiai nia cacaiñedomoi? Nie isoide ra gutomoina, omoi comeciaino jeare iñede. <sup>19</sup> Omoi comeciaino

jaiñede; ia omoi jebemo jaide. Ie mei omoi abiaimona jino bite.

Jesús llamona, nana guille radi mare uiñoticaí. <sup>20</sup> Jesús llote:

—Omoi comeciaí jearena jira, jearede rafuena finocabidomoi. <sup>21</sup> Omoi comeciaí jearena jira, jeare comeciaína facacabidomoi. Omoi aiñede riño diga icabitomoi. Omoi iniñede ima diga icabitomoi. Firicabitomoi. Cominina meinecabitomoi. <sup>22</sup> Jiaí comini rana nicidocabitomoi. Jearede rafuena finocabidomoi. Iena ebiruitomoi. Jifuericabidomoi. Abina uradoicabidomoi. Jiaie comini joreña jeare ñaicabitomoi. Abina idocabitomoi. Ebena jaicabidomoi. <sup>23</sup> Bie isoidicinuai omoi comeciamo illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue  
(Mt 15.21-28)*

<sup>24</sup> Nainomona Jesús jaillanona, Tiro railla eniruemo jaide. Sidón railla eniruemo jiaí jaide. Nainomo jofomo jaillanona, iena buna fidiana jitañede; ia iena janonide. <sup>25-26</sup> Ie fa-  
caise judío iñaiñoñediñaiño ñaño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidiana, naimie ñe bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade. <sup>27</sup> Judíuaiñedinona naimie canoñenana naiñaiño uiñollena, naiñaiño mo Jesús llote:

—Uruiaí guillamona jiconiaína ecadicaídena, maraiñede. Uruiaí nano ecadicaí.

<sup>28</sup> Naiñaiño ñinena uai ote:

—Jii, maestro; iadedi jiconiaídi uruiaí guillamona fiebide guillemona guitimaci. —Iese llote; ia jiaie rafuemo comecina facade. Uruiaína llote; iadedi judíuaimo comecina facade. Jiconiaína llote; ia judíuaiñedinomo jiaí comecina facade. Comecina facade: “O cominimo o rafue duide; ia caí Namana o illa jira, ñibai o rafue caimo janore duide”.

<sup>29</sup> Jesús uai ote:

—Raise llotio. O jofomo mai abido jai. O jisamona Janaba oni jaide.

<sup>30</sup> Naimie llua isoi jofomo jaide. Ie jisa bñiramo bñidena ciode. Janaba naiñaiño moña oni jaillana jai uiñote.

*Jesús jefona cacaiñediñeña jillotaja rafue*

<sup>31</sup> Tiro railla eniruemonona Jesús oni jaide. Jaillanona, Sidón railla eniruemo jaide. Decápolis railla eniruemo jiaí jaide. Ja muidomo Galilea railla jorai fuemo ride. <sup>32</sup> Iena fidiano, naimie ñe comini jefona cacaiñediñeña atide. Naimie

gogoma. Naimiēna jilloitallena, naimiemo ie onolli jonellena Jesúmo jicadimaci. <sup>33</sup> Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñitude. Ie onocaimo tuajanona, iima ifena jetade. <sup>34</sup> Jusiñamui dine monamo eruaita, naimiēna duenaillamona, jafaicina faite. Judíuai uaido naimiemo llote:

—¡Efata! —Oni dobaiñuamona: “¡Ecoricaí!” raite.

<sup>35</sup> Ieconí ie jefodí ecoricaide. Jai raise cacade. Jai raise ñaite. <sup>36</sup> Cominimo:

—Bimie jai jilluana bumo lloñeno —Jesús diga icaiño llote; ia naimie uaina iñoñedimaci. Iena llocana uitimaci.

<sup>37</sup> Naimieri eo rajicadimaci. Coninina naimiēna raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

## 8

### *Jesúdi cuatro mil iñiaina ecaja rafue*

*(Mt 15.32-39)*

<sup>1</sup> Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

<sup>2-3</sup> —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenailla jira, naimacina canoia-cadicue.

<sup>4</sup> Jicanotimaci:

—¿Ñiese naimacina bene ecaiticai? Jofue iñenanomo iticai.

<sup>5</sup> Jesús jicanote:

—¿Ñiga llomenico omoimo ite?

Uai otimaci:

—Siete.

<sup>6</sup> Comini ana raillena Jesús llote. Naie llomeniconu uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. <sup>7</sup> Naimacimo janore llicisiriái jiaí ite. Ie facaina Jusiñamuimo iobillacinona fecaja mei, cominimo fecallena Jesús llote. <sup>8</sup> Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. <sup>9</sup> Nainomo cuatro mil iñiaí guitimaci. Naimaci ainiaí, imaci uruiaí diga, jiaí guitimaci. <sup>10</sup> Guilla mei, coninina naimaci jofuemo Jesús orede. Ie llofueoicaigano diga, botemo jailanona, Dalmanuta railla eniruemo jaide.

*Fariseuai comini Jesúmo siño rafuena finuana jicanuano billa rafuena*

*(Mt 16.1-4; Lc 12.54-56)*

11 Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uifnotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

12 Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

13 Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

*Jesús siritate rana llofua rafue*

*(Mt 16.5-12)*

14 Ruica dine rilla mei, Jesús llofueoicaigano llomeniconna feillana uibiñotimaci. Naimacimo daje llomenico ite. 15 Iena naimie uifnuamona, naimacimo Jesús llote:

—Fariseuai siritate ramona abina rairui. Illaima Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

16 Jesús iese llua jira, iena naimaci raise cacaiñena jira, dani coniniri siadotimaci:

—Llomeniconna cai atiñena jira, caimo iese llote.

17 Naimaci siaduana Jesús uifnuua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena ifnoñedomoi? Cuemo siño uai illana nia raise cacaiñedomoi. 18 Uisiredomoi. Jeforedomoi. ¿Ñiese cue navui siño finoca rafuemo comeaiaina facañedomoi? 19 Navui cinco mil ifñiai cinco diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

20 Jesús llote:

—Jiaicaiño cuatro mil ifñiai siete diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

21 Jesús dinena jicanote:

—¿Ñiese cuena nia raise ifnoñedomoi? Siño uai cuemo illana nia raise ifnoñedomoi.

*Jesús uisimidimiena jillotaja rafue*

22 Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisimidimiena atide. Naimiena jilloitallena, naimiena jetallena, Jesús mo jicanote.

23 Iena Jesús cacajanona, ie onollina llinuanona, nairai illa



jino femo uis inidimiena uite. Ie mei ie uisina tuade. Ie uisina jiai jetade. Naimiemo jicanote:

—¿Buena ciodio?

<sup>24</sup> A eruaillanona, uai ote:

—Comini macarillana ciodicue; ia amena isoi eruaidimaci.

Nia raise cionidicue.

<sup>25</sup> Ie uisina Jesús dane jetade. Iemona oni erocaillamona, jai jillode. Jai raise ciodo. <sup>26</sup> Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñeno; ia nainomo jaiñeno o jofomo mai abido jai.

*Pedro Jesúsna llua rafue*

*(Mt 16.13-20; Lc 9.18-21)*

<sup>27</sup> Cesarea Filipo eniruemo ite nairaiaimo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

<sup>28</sup> Uai otimaci:

—Damierie raitimaci: “Juan Bautista micoridío”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedío”.

<sup>29</sup> Jesús dane jicanote:

—¿Niese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci

<sup>30</sup> Jesús iena bumo llua rairuide.

*Jesús ie fiodaillena llofuia rafue*

*(Mt 16.21-28; Lc 9.22-27)*

<sup>31</sup> Ie facaise ie llofueoicaiganona ie duere sefuillena llofue. Llote:

—Cai judíuai illaicomini cuena eo duere finoitimaci. Cuena jitañellemona, cuena meineitimaci; iadedi darui amani illanona, fiodaillamona jilloiticue.

<sup>32</sup> Iena marefodo naimacimo llote. Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

<sup>33</sup> Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

<sup>34</sup> Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie

iite. <sup>35-37</sup> Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruñenamona, cue cominina bu jaia, jaca faifiñeite. Cue cominina bu jaiñenia, nibai eo duere sefuñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite. <sup>38</sup> Birui ite comini Jusiñamuina jitañedimaci. Naimiena jai fainonocaidimaci. Jecinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biiticue. Cue Moo uai cuemo illanona, ebire biiticue.

## 9

<sup>1</sup> 'Omoimo uanaicinona lloticue. Omoimona dajerie nia fiodañeitomoimo, illaimana ebire cue bairellena cioitomoio.

*Jesús abi meidocailla rafue*  
(Mt 17.1-13; Lc 9.28-36)

<sup>2</sup> Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uiñede. Nainomorrilla mei, naimaci uicomo naimie abi meidocaide. <sup>3</sup> Naie dacaiño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. <sup>4</sup> Naie facaise naimacimo Moisés micori joreño, Elías diga, bairede. Eliadi Jusiñamui facaina jaielloraima. Jesús diga ñaitiaimaiai. <sup>5</sup> Iaimaiai jaiacania, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

<sup>6</sup> Eo jaciruilla jira, naimie ñaia rafuena raise uiñoño jamai ebena ñaite. <sup>7</sup> Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie lluomo cacareillanona, iena ñino —llote.

<sup>8</sup> Iecononi erodajanona, dama Jesúna cidimaci. Jiaínona cioñedimaci.

<sup>9</sup> Anedumona bitimacimo, naimacimo Jesús llote:

—Omoi ailli cúa rafuena bumo lloñoeno, cue fiodaillamona cue jillua dinori. <sup>10</sup> Jesús llua isoi finodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci. <sup>11</sup> Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitarama biite”

raitimaci. Jusiñamuimona o billana ñnoticai. Odi cai Jilloitaraimana ñnoticai. Odi cai Jilloitaraimadiomo, ¿bue ñelli iese raitimaci?

<sup>12</sup> Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lollena. Jusiñamui ñibeimo naimaci illena, comini imaci comeciai meiduana llote. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca. <sup>13</sup> Elías isoidimie jai bite; iadedi Jusiñamui facaina lloraïma micori jai euega isoi, naimaci jitailla jira, naimiena jai meinetimaci.

*Jesúdi Janaba anamo itimiena jillotaja rafue*

*(Mt 17.14-21; Lc 9.37-43)*

<sup>14</sup> Ie jiaie llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraïni dinena ie llofueoicaigano uaina uaitaside. <sup>15</sup> Jesús billana comini cïuanona, jacinaisidimaci. Naimiena feñollena, naimie dine aisida jaidimaci. <sup>16</sup> Moisés micori llogacinona llofueraïnimomo Jesús jïcanote:

—¿Ñiese cue llofueoicaigano uaina uaitatomoï?

<sup>17</sup> Uai oñedimaci; ia cominimona ñamie uai ote:

—Maestro, Janaba anamo cue jito illa jira, o dine naimiena atidicue. Cue jito Janaba anamo illamona ñainide. <sup>18</sup> Nagarui Janaba bille diese, naimiena eniruemo uaitate. Iemona fueði mullede. Ie isidodi murude. Ie abi jaiare jai. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraïni bie rafuena, o llofueoicaigano ñiga, uaina uaitatimaci.

<sup>19</sup> Iena cacajanona, Jesús ie llofueoicaiganomo llote:

—Cue uai siñonana ñia ñnoñedomoi. Omoi ñiga are iticue. Raise omoi ñnollena, ¿nie ñinori omoi ñiga iiticue?

Naie ñuidimie moomo llote:

—O jito cue dine ñai ati.

<sup>20</sup> Naie urue Jesús dine atianona, Janaba naimiena ñaillitate. Iemona urue eniruemo uaide. Jabi-jabide. Fue mullede. <sup>21</sup> Jesús dinena ñaie urue moomo jïcanote:

—¿Ñie ñinori o jitodi bie isoi ite?

Uai ote:

—Naimie uruenamona. <sup>22</sup> Janabadi, ñiga icaiño iraimo usillena, naimiena uaitate. Corobaillena, ñiga icaiño jinuimo jiai uaitate. Janaba oni o oretarenia, cocona duenaillamona, cocona cano.

<sup>23</sup> Jesús uai ote:

—“O oretarenia” raitio. Ero, o jito jillotaredicue. Cueno o ñnoia, o jito jilloite.

24 Naie urue moo ieconi llote:

—Ona ñnoticue. Raise nia cue ñnoñenia, cuena raise ñnota.

25 Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemoni oni jai. Naimie dine dane biñeno.

26 Ado cuirioillanona, naimiena eo riire naillitajanona, Janaba oni jaide. Iemona naie urue fiodaitimie isoi erocaide. Naimiena ciuanona, nainomo itino raitimaci:

—Naimie jai fiodaite; 27 —ia Jesús naimie onollina llinocaida, naimiena a naidanete.

28 Iemona oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

29 Jesús uai ote:

—Jusiñamui omoi jiamona, naimiena raise omoi ñnuamona, bie isoide Janabana oretaredomoi. Naimiena omoi raise ñnoñena jira, bie uruemoni Janabana oni oretañedomoi.

*Jesús ie fiodaillena dane llofuia rafue*

*(Mt 17.22-23; Lc 9.43-45)*

30-31 Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitaiñede. Naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

32 Ie llofueoicaigano iena raise cacaiñedimaci; ia naimiemo iena jicanuana meiruitimaci.

*Jesús ie llofueoicaigano moto imiena ille rafue*

*(Mt 18.1-5; Lc 9.46-48)*

33 Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

34 Uai oñedimaci. Naimaci moto imiena illena, naisodo siadocana bitimaci. Meiruillanona, uai oñedimaci.

35 Naimie ana rainadaja mei, ie ecimo naimacina uaidote. Raite:

—Omoi moto imiena bu iacania, jamai bue isoidimiena naimie illa. Omoi muillaimana naimie jailla isoilla.

36 Iena naimaci raise uiñollena, nainomo ite cominimona daje urue bai jainanocaida, naimaci motomo naimiena jonete. Naimiena menioita, naimacimo llote:

37 —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

*Jesúdi ie dibeimo itinona llua rafue*  
(Mt 10.42; Lc 9.49-50)

38 Naie facaise ie llofueoicaiganomona Jesúsno Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

39 Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite. <sup>40</sup> Cai dibeimo itimiedi cai facaisena ite. <sup>41</sup> Ero, cuemo omoi duillamona, omoína bu janore canoia, Jusiñamuimona ibana feiñoite. Omoimo ñibai jamai jinuina fecajte; iadedi omoína naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

*Jesúdi jeacinona finoñenana llofuia rafue*  
(Mt 18.6-9; Lc 17.1-2)

42 Jesús nia llofujete:

—Cuena como iinotinona jeacinona finotaiacadimie iena finoñellena, naimie cimaimo aillue nofici maianona, joraimo corobaillena naimiena dotacadena, mare. <sup>43-48</sup> Biena ñaiticue. Nie isoide rafue omoína jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoñeno. Naimacimo ite aiai fioidañena jira, naie irai jaca duiñenamona, nainomo itino jaca duere sefuitimaci.

49 'Ero, birui omoi duere sefuillamona, cue cominina jai jaidinona uiñoiticue. <sup>50</sup> Guille caimaretallena, sal mare; iadedi ie caimano jai iñenia, iena dane caimaretañedicai. Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

## 10

*Jesús iima ie aina dotaja rafuena llofuia rafue  
(Mt 19.1-12; Lc 16.18)*

<sup>1</sup> Capernaumona ie llofueoicaigano diga, Jesús oni jailanona, Judea railla enirue dine jaide. Jordán railla ille ruica dibeimo jaide. Ailluena comini naimie dine ofillamona, naimie llofueuilla isoi, naimacina llofue. <sup>2</sup> Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

<sup>3</sup> Uai ote:

—¿Niese Moisés micori llote?

<sup>4</sup> Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñaona dotaite”.

<sup>5</sup> Jesús uai ote:

—Jusiñamui uaina raise omoi ñnoñena jira, Moisés micori iima ie aina dotajana rairuiñede; <sup>6</sup> iadedi nano dofoconi iese iñede. Enirue finua facaiseconi Jusiñamuidi come iaímaiaína finode. Imana finode. Riñaona jiaí finode. <sup>7</sup> Ie jira Jusiñamuidi jaie llote: “Ie ai diga illena, iima ie moona fainonocaite. Ie eina jiaí fainonocaite. Ie ai diga illamona, menade comedi daamiéna jai jaide” llote. <sup>8</sup> Menade come jai daamiéna jai ite. <sup>9</sup> Jusiñamui iese iaímaiaína itataja jira, iima ie aina dotajana rairuidicue. Riño ie inina dotajana rairuidicue.

<sup>10</sup> Jofomo ie llofueoicaigano diga, naimie nailli illanona, naimiemo bie rafuena jicanotimaci. <sup>11</sup> Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiaí finode. <sup>12</sup> Ie inina fainonocaillanona, jiaimiena nie riño uamona, naiñaiño jeacino jai finode.

*Jesúdi naimie dine uruiai billana jitaila rafue  
(Mt 19.13-15; Lc 18.15-17)*

<sup>13</sup> Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Ie llofueoicaigano iena rairuidímaci; <sup>14</sup> iadedi iena cacajano, Jesús icirite. Jesús raite:

—Uruiai cue dine billesa. Naimacina rairuiñeno. Cuená bie isoi ñnotinodi Jusiñamui cominidimaci. <sup>15</sup> Bie uruiai abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

16 Naie uruiaí dasarie meni-menioicaída, naimaci ifogimo ie onollina joneta:

—Jusiñamui omoina canoite —llote.

*Ucuberedimie Jesús diga ñaia rafue  
(Mt 19.16-30; Lc 18.18-30)*

17 Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caifíci ifodo rainadate. Raite:

—Maestro, odi maremiedio. Jusiñamui diga íco cue jaca illena, ¿buena finoiticue?

18 Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. 19 Moisés micori llogacinuaina ñnocana jai. Jaie cuete: “Comena meineño. O aiñede riño diga iño. Fíño. Jaiimiena o llogídoia, tainona lloño. O moo uaina ñno. O ei uaina ñno”.

20 Uai ote:

—Maestro, uruena cue illa facaisemona nana bie llogacinuaina ñnoticue.

21 Jesús dinena naimiemo eruailanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuena o ñnuamona, monamo íco jaca iitio. Cue llofuegamiena o illena, mai cue diga bi.

22 Iena cacajano, naimiedi sunaite. Eo aillue ra naimiemo illa jira, iena naimie fecacaiñena jira, sure jaide. 23 Naimie jailla mei, ie llofueoicaiganomo eruailanona, naimacimo llote:

—Ucuberedinodi Jusiñamui cominina jaillena eo sefuiruitimaci.

24 Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. 25 Igído ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

26 Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaídi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

27 Naimacimo eruailanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

28 Pedro dinena llote:

—O llua isoi jai finodicaí. Nana cai rana fainonocaida, o diga jai jaicabidicaí.

<sup>29</sup> Jesús uai ote:

—Uanaicino lloiticue. Cuen a naimie isiruillamona, cue rafuena naimie llumona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, <sup>30</sup> Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuai, ie eitái, ie uruiái, ie enirue birui iite. Monamo naimie ico camare iocire jaca iite. <sup>31</sup> Birui damierimo ailluena ra illamona, Jusiñamuimo eo comecina facañedimaci. Naimacimona jamái bue isoifñedimaci; ia Jusiñamuimona ico jamái bue isoitimaci Jiaínomo ailluena ra birui ifñede; ia Jusiñamuimo comecina facadimaci. Naimacimona jamái bue isoidimaci; ia Jusiñamuimona ico jamái bue isoifñeitimaci.

*Jesús ie fiodaillena dane llua rafue*

*(Mt 20.17-19; Lc 18.31-34)*

<sup>32</sup> Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano raijicaidimaci. Naimaci diga jaidino jaciruiocaida jaidimaci. Naimacina jiaí meiniana jaciruitimaci. Ie llofueoicaigano diga ñaianona, naimiemo suille rafuena llote:

<sup>33</sup> —Ero, Jerusalémo jai jaidicaí. Monamona billanona, iimana jaidicue; iadedi omoi illaicominí cuena gaitaitimaci. Gaitaja mei, cue meinellena lloitimaci. Judíuafñedino illaicominimo cuena fecaitimaci. <sup>34</sup> Cueri jifanoitimaci. Cuen a tuallaitimaci. Cuen a faitimaci. Cuen a meineitimaci; iadedi cue fiodailla mei, darui amani illanona, jilloiticue —llote.

*Jesús dine Jacobo Juan iaímaiaí billa rafue*

*(Mt 20.20-28)*

<sup>35</sup> Naie facaise Jesús dine Jacobo, Juan diga bitiaímaiaí. Iaímaiaí moodi Zebedeo. Raitiaímaiaí:

—Omo coco jicalle rafue cocoena finuana jitaídicoco.

<sup>36</sup> Jesús uai ote:

—¿Nie isoide rafuena jitaídomico?

<sup>37</sup> Uai otiaímaiaí:

—Illaimana o jailla mei, o ecimo coco illena o llua jitaídicoco. Damie o nabeimo. Jiaímie o jarifebeimo. —Jiaíno afemo iaímaiaí illena, iese llotiaímaiaí.

<sup>38</sup> Jesús dinena llote:

—Omico jicanuana raise uifñedomico. Cue eo duere sefuiticue. Llegí cacaiticue. ¿Ie isoi duere sefuiacadomico? ¿Ie isoi llegí cacaiacadomico?



39 Uai otiaimaiaia:

—Jii. Sefuiacadico.

Jesús dinena raite:

—Cue isoi duere sefuitomico. Llegi cacaitomico; 40 iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

41 Iena jiaie llofueoicaigano cacajano, naie iaiaiairi iciritimaci. 42 Jesús nana naimacina uaiduanona, raite:

—Nana illaicomini naimaci anamo itinona ocuicabidimaci; 43 iadedi omoi dine iese iñena. Omoimona bu imiēna iacania, omoi mullaimana naimie jaisoillasa. 44 Omoimona bu imiēna iacania, omoina naimie canocana jaisoillasa. 45 Cuenona fueo. Biñedicue, cominina cue ocuillena; iadedi cominina canuaibidicue. Cue jitailla jira, nana comini facaina fioidaisibiticue. Naimaci jeacinomona naimaci jillobillena, fioidaisibiticue. Ailluena comini cuena inuamona, jilloitimaci. Coninina omoi canua —llote.

*Jesúdi Bartimeona jillotaja rafue*

*(Mt 20.29-34; Lc 18.35-43)*

46 Oni jaillanona, Jericó railla nairaimo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisinidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena. 47 Nazaret ie Jesús jaillana naimie cacajano, ado cuirioide:

—David micori Jitona o illamona, Jusiñamuimona o billa jira, cuena duenai. Cueno cano.

48 Naimie llucaillena, Jesús diga jaidino naimiēna lletade; iadedi eo cuirioide:

—Maestro, David micori Jitona o illamona, cuena duenai.

49 Naimiēna cacajano, Jesús naidadajanona, llote:

—Naimiēna cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

50 Iena cacajano, ie emodomo itiroina duiñuanona, raire naidacaida, Jesús dine bite. 51 Naimiemo Jesús jicanote:

—¿Niēse ona cue nibaiana jitaideo?

Uai ote:

—Maestro, cioacadico.

52 Jesús dinena uai ote:

—Cueno o inua jira, jai jillodio. Mai jai. —Iecon naimie jai ciode. Jesús diga jaidino diga naimie jiaia jai.

## 11

*Jesús illaïma isoi Jerusalémo jailla rafue  
(Mt 21.1-11; Lc 19.28-40; Jn 12.12-19)*

<sup>1</sup> Oni jaillanona, Jerusalémo iaireicaidimacimo, Betfagë railla nairaimo ie llofueoicaigano diga Jesús ride. Betania nainomo jiaï ite. Olivos railla anedumo naga nairai iaïmaïaï ite. Ie llofueoicaiganomona Jesús menamiëna orede. <sup>2</sup> Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. <sup>3</sup> Omicomo: “¿Bue ñellena iena suiñodomico?” bu jicanoïa, lloño: “Coco Nama iena jitaide. Naillï iena raïre abïdo oretaite llote”.

<sup>4</sup> Naimie llua isoi, jaidiaïmaïaï. Naisomo jofo nasemo burritona baillanona, iena suiñodiaïmaïaï. <sup>5</sup> Ie facaise nainomo itino jicanote:

—¿Bue ñellena burritona suiñodomico?

<sup>6</sup> Jesús llua isoi uai otiaïmaïaï. Ie muidona:

—Jee —raitimaci.

<sup>7</sup> Burritona atidiaïmaïaï. Ie emodomo naimie llofueoicaigano naimaci iniroi jobianona, ie emodomo Jesús rainadate. <sup>8</sup> Naimiëna iobitallena, illaïma isoi naimie jaillena, diga comini, imaci iniroi diga, naiso motomo jobedimaci. Jiaïno nai fuemona raforona uanona, naiso motomo jobedimaci. <sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiiriisite:

—¡Cai Jilloitaraïma billa! Jusiñamui mamecido bitimie eo mare. <sup>10</sup> Cai illaïma David micori ifomo caina sedallena, damie billemo birui ocuridicai. Jusiñamui caina jilloitajasa.

<sup>11</sup> Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

*Jesús higuera railla riarana faidua rafue  
(Mt 21.18-19)*

<sup>12</sup> Ie areruido Betaniamona Jerusalémo abïdo ie llofueoicaigano diga Jesús bia, aimetaite. <sup>13</sup> Arena higuera railla riarana cïuanona, iena jibuide. Como firuide; ia naie llisilladi iñede. Ie llisilla facaise nia iñede. <sup>14</sup> Ie jira naie riarana llote:

—Biemona jaca llisiñeite. —Ie llofueoicaigano naimie llua ana cacadimaci.

*Jesúdi Jusiñamui jofomona damieriëna dotaja rafue  
(Mt 21.12-17; Lc 19.45-48; Jn 2.13-22)*

<sup>15</sup> Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaïaïna fecallena, naimiëmo toïca llaudaïaïna fecallena,

nainomo comini jaisoidimaci. Naie cominina ibatajanona, ofomaiana, toica llaudaia digá, damierie fecauidimaci. Iena Jesús cianona, naimaci mesaiana oni caicode. Ucugina fecauidino rairacuai jiai oni caicode. <sup>16</sup> Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. <sup>17</sup> Naimacina llofuate:

—Ie facaina lloraima micori Jusiñamui llogacino jaie cuega: “Cue jofo ite, nainomo nana comini cuemo jüllena” cuega. Ero, ailluena omoi ibataja jira, naimie jofona firiruidino jofona omoi finoca.

<sup>18</sup> Judíuai illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana ebiruillanona, rajjicaidimaci. Ie jira judíuai illaicomini naimiena jaciruillamona, naimiena nia meinenidimaci. <sup>19</sup> Nairui navuida ie llofueoicaigano digá, Jerusalémona Jesús oni jaide.

*Jesús faidoca riana duilla rafue*

(Mt 21.20-22)

<sup>20</sup> Ie are ie llofueoicaigano digá, Jerusalén dine Jesús jailanona, higuera railla riana duillana ciodimaci. Nana ie jainao digá duillana ciodimaci. <sup>21</sup> Jesús navui are lluana Pedro uibiñuanona, naimiemo llote:

—Maestro, ero. O faidoca higuera jai duide.

<sup>22</sup> Jesús uai ote:

—Jusiñamuina ñnocana jai. <sup>23</sup> Uanaicinona omoimo lloiticue. Jusiñamui lluana raise bu ñnoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. <sup>24</sup> Nie isoide rafue Jusiñamuimo omoi jicajia, naimie iena finuana omoi ñnuamona, iena naimie finoite. <sup>25</sup> Jusiñamuimo o jiacania, jiaimie digá o rafue ia iena feita. Ie isoi cai Moo Jusiñamui omoimo ite jeacino jiai feitaite; <sup>26</sup> iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

*Jesúdi ie siño uaina llua rafue*

(Mt 21.23-27; Lc 20.1-8)

<sup>27</sup> Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui digá nanoca ñairaini. Naimacidi Moisés micori llogacino llofuerañi. Naimacidi einamací. Diese billanona, <sup>28</sup> jicanotimaci:

—¿Nie isoide uaido o finoca rafuena finodio? ¿Bu omo iga uai digá o finoca rafuena finodio?

<sup>29</sup> Jesús dinena uai ote:

—Omoimo daje rafuena nano jicanoitice. Raise omoi fairioia, omoimo cue uaido cue finoca rafuena lloiticue. <sup>30</sup> Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuesto llono —llote.

<sup>31</sup> Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llwana ñnoñedomoi?” <sup>32</sup> “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

<sup>33</sup> Ie jira fairiotimaci:

—Uiñoñedicaí.

Jesús dinena raite:

—Ie muidona cuesto nie isoide uai illana omoimo lloñeiticue.

## 12

*Jesúdi marañede maijiraini rafuena llua rafue*  
(Mt 21.33-46; Lc 20.9-19)

<sup>1</sup> Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, enruemo ifona raite. Naie illina raise eruaillena, tidacana finode. Iena sedallena, ibatajanona, jainomo fecade. Ie mei jiaie enruemo jaide. <sup>2</sup> Uvas jai einalla facaise riaraiaina sedaraini dine naie patrón ie mullaimana orede, naie illimona dajerie riará llisilla ollena; <sup>3</sup> iadedi naie sedarainidi ie mullaimana fatimaci. Ie mei naimiemo riará fecaño naimiena abido oredimaci. <sup>4</sup> Ie mei patrón jiaie mullaimana orede. Naimie ifogina bofedimaci. Naimiena jeare finodimaci. <sup>5</sup> Ie mei patrón jiaimiena orede. Naimiena meinetimaci. Ie mei ailluena mullaiana orede. Damieriena fatimaci. Damieriena meinetimaci. <sup>6</sup> Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiena oretaitice” patrón comecina facade. <sup>7</sup> Riaraiaina sedaraini naimiena cianona, coniniri raitimaci: “Bimie mo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. <sup>8</sup> Naimaci dine naimie rilla mei, naimiena meinetimaci. Ie mei ie abina illimona jino dotadimaci. <sup>9</sup> Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jainona ie illina sedataite.

<sup>10-11</sup> Naimacimo Jesús llote:

—Naie illi sedaraini isidomoi. Jusiñamui facaina lloraima micori omoina jaie cuete. Ie ciegafuena raise facañedomoi. Naimie micori ciega:

Jofo finoraini jitaiñena noficidi nana naie jofomo ite nofici  
baifemo jai uaide.

Jusiñamui iena finotate.

Iena cai uiñuamona: “Eo mare” raiticai  
cuega. Jusiñamui cominina damierie jaillana naimie micori  
cuete. Jusiñamui oretagamiena damierie jitaiñenamona,  
naimie cominina jaiñeitimaci; iadedi Jusiñamui oretagamiena  
ailluena ñnuamona, naimie cominina jaitimaci. Ero,  
Jusiñamui facaina lloraima micori caina cuete. Naie jofona  
finoraini isoidomoi. Naie nofici isoidicue. Cue rafuena omoi  
jitaiñena jira, naimie cominina jaiñeitomoi.

<sup>12</sup> Judíuai illaicomini iena cacajanona, Jesús naimacina  
ñaiana naimaci uiñuamona, naimiena gaitacadimaci; ia  
cominina jaciruitimaci. Ie jira naimiemona oni jaidimaci.

*Jesúmo gobiernomo ucubena fecajana jicanua rafue*  
(Mt 22.15-22; Lc 20.20-26)

<sup>13</sup> Judíuai illaicomini jailla mei, dajerie fariseuai cominina  
Jesús dine oredimaci. Illaima Herodes dibeimo itinona  
oredimaci. Naimie raise uai oñenia, naimiena duere finollena,  
Jesúna facaciacadimaci. <sup>14-15</sup> Naimiemo llotimaci:

—Maestro, uanaicinona llofuecabitio. Jusiñamui rafuedo  
cai marena jaillana raise llofuetio. Nana comini dauaido  
llofuetio. Cominina iobitallena llofueñedio. Omo rafuena  
jicanoiacadicaí. Dani Jusiñamuina sedadicaí; iadedi romanuai  
railla nairai anamo birui cai illa jira, ¿naimaci illaima Césarmo  
ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie  
uiñuamona, naimacimo llote:

—¿Bue ñellena cuena facacitomoi? Ucube cuemo acata.

<sup>16</sup> Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiaide bie cuega  
radi?

Uai otimaci:

—César.

<sup>17</sup> Jesús dinena raite:

—César iena itedi, Césarmo ille. Jusiñamui iena itedi,  
Jusiñamuimo ille —raite.

Naimie lluana cacajano, naimie raise uai ua jira, ieri raiji-  
caidimaci. Naimie iese llua jira, naimiena duere finonidimaci.

*Jesús dine saduceuai railla comini billa rafue*  
(Mt 22.23-33; Lc 20.27-40)

<sup>18</sup> Naie facaise saduceuai railla comini naimie dine bitimaci.  
Fiodaillamona jaca buna jilloñellena ñnotimaci. Jesúmo  
llotimaci:

<sup>19</sup> —Maestro, cai facaina Moisés micori jaie cuega: “Fima  
fiodailla meinoconi, naimie urue iñenia, ie ama naie feciño  
olle. Naimiedi uruiaina ie ama facaina comuitaite” cuega.

<sup>20</sup> Bie rafuena uiñoiacadicaí. Siete amatiái ite. Nano doforamie ie aina ote. Naimie nia uruiainide fiodailla. <sup>21</sup> Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide. <sup>22</sup> Uruiaínide nana fiodailla. Ja muidomo naie riño jiaí fiodaite. <sup>23</sup> Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

<sup>24</sup> Jesús uai ote:

—Moisés micori ciegafuiaína raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. <sup>25</sup> Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi naie siete amatiái iitimaci. <sup>26</sup> Fiodaitino ico jilloillena omoi mo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. <sup>27</sup> Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaína jiaí jillotaite. Fiodaillamona jilluana omoi raise uiñoñedomoi —llote.

*Jesús nanoca llogacinona llofuiá rafue*

*(Mt 22.34-40)*

<sup>28</sup> Naie facaise Moisés micori llogacinona llofueraíma Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaímona, ¿nie llogacino ua nanoca llogacinona?

<sup>29</sup> Jesús dinena uai ote:

—Moisés micori jaie cuega: “Israel comini, bie rafuemo cacarei. Cai Nama Jusiñamui jaca dajede. <sup>30</sup> Omoi jitailla jira, nana omoi comeciái diga, cai Nama Jusiñamuina isirui. Naimiemo omoi comeciána eo faca”. <sup>31</sup> Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiaí isirui”. Bie mena llogacino jiaie llogacinuai baifemo faite.

<sup>32</sup> Naie llofueraíma dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede. <sup>33</sup> Cai jitailla jira, nana cai comeciái diga naimiena cai isiruia, naimiemo cai comeciána eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicaí. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

<sup>34</sup> Naimie raise uai ua jira, naimiemo Jesús llote:

—Iese o ñnocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

*Jesús dinena fariseuai cominimo jicanua rafue*

*(Mt 22.41-46; Lc 20.41-44)*

<sup>35</sup> Jusiñamui jofomo Jesús jailla mei, nainomo itinomo jicanote:

—¿Ñiese Moisés micori llogacinona llofueraini Cristona raitimaci? ¿Ñiese naimiedi David micori jitona raitimaci?

<sup>36</sup> Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote: “Illaimana o illamona, cue nabei dine ana rai.

Ona ñnoñedino o anamo itataiticue”.

<sup>37</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

*Jesúdi judíuái illaicominina ñaia rafue*

*(Mt 23.1-36; Lc 11.37-54; 20.45-47)*

<sup>38</sup> Jusiñamui jofomo Jesús nia llofuanona, raite:

—Moisés micori llogacinona llofuerainimona abina rairui. Illaicominina naimaci itimacidenana, naimacina comini cioillena, eo mare iniroina jitaacacabidimaci. Ñine naimaci macaria, naimaci jamai bue isoiñedinona itimacidenana, comini naimacina uaiduana gaidimaci. <sup>39</sup> Comini naimacimo acarillena, ofiracomo uicomo raiacadimaci. Rafue ia: “Jamai bue isoiñedicai” raillamo comecina facajanona, rafue nama ecimo raiacadimaci. <sup>40</sup> Feciñuaimona rana ocabillanona, naiñaiñuaina duere finodimaci. Naimiena eo sedadimacidenana, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

*Jesúdi Jusiñamui jofomo duerede feciño ucube fecajana ciua rafue*

*(Lc 21.1-4)*

<sup>41</sup> Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. <sup>42</sup> Ie facaise eo duerede feciño menaruño jonete. <sup>43</sup> Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete. <sup>44</sup> Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

## 13

*Jesúdi Jerusalémo ite Jusiñamui jofo judaiana llua rafue*  
(Mt 24.1-2; Lc 21.5-6)

<sup>1</sup> Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiai co ebirede. Bico eo ebire cide.

<sup>2</sup> Jesús dinena uai ote:

—Bie jofo birui eo mare; ia nana bie jofomo ite noficiai ico judaisite —llote.

<sup>3</sup> Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

<sup>4</sup> —Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>5</sup> Uai ote:

—Omoína bie rafuena bu jifueñellena, omoi abina rairui.

<sup>6</sup> Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui. <sup>7</sup> Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue. <sup>8</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime guitimaci. Iese suia, omoi duere sefuillifue omoimo suite. <sup>9</sup> Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitomoi. <sup>10</sup> Diga comini cue rafuena nana nairaimo lloitimaci, nana nairai iena cacaillena. Ie mei abido biiticue. <sup>11</sup> Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uiñoitomoi. Dani omoi comeciái icinodo ñañeitomoi; ia Jusiñamui Joreño uaido ñaitomoi. <sup>12</sup> Cuen a ñnotomoi; ia ailluena cuena ñnoñeitimaci. Cuen a omoi ñnua jira, omoína enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruiaidi naimaci moona, naimaci eina meinetallena, naimacina llogidoitimaci. <sup>13</sup> Cue cominina omoi illamona, nana nairai omoína enoitimaci; iadedi cuena fainonocañedimie ja muidomo monamo jaca iite. Naimiena jillotaiticue. <sup>14</sup> Cue lluomo cacarei. Jusiñamui facaina lloraímadi jiaímie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi.



Nainomo ite jearede rafue finuana omoi ciuanona, naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi. <sup>15</sup> Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. <sup>16</sup> Aneduai dine raire rillena, illimo omoi ia, abido jofomo biñeno, omoi iniroi omoi diga uillena. <sup>17</sup> Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. <sup>18</sup> Eo duere sefuiñellena, Jusiñamuimo omoi jicano, rollime facaiseconi bie rafue suiñellena. <sup>19</sup> Naie facaise comini eo duere sefuitimaci. Jusiñamuidi enirue finua facaise-mona iese comini nia duere sefuiñeditimaci. Ico iese eo duere sefuiñeitimaci. <sup>20</sup> Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>21</sup> 'Ie facaise omoimo bu raia: "Jai, Jusiñamui facaina lloraima benomo birui bairede. Naimiedi Cristo", iena inoñeno, Jaiimie raia: "Oni batine Cristo birui bairede", iena inoñeno. <sup>22</sup> Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. <sup>23</sup> Ie jira omoi abina rairui. Ero, bie rafue nia suiñenia, iena omoimo jai lloticue.

### *Jesús abido ie bille rafue*

*(Mt 24.29-35, 42-44; Lc 21.25-36)*

<sup>24</sup> 'Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. <sup>25</sup> Monamona ucuai ana llujite. Nana naie radi jaidisite. <sup>26</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. <sup>27</sup> Cue jaienisaina cue ecimona oretaiticue. Cue fetocano diese naganomona ofitaitimaci.

<sup>28</sup> 'Higuera raila riaromona omoi fueo. Bie eniruemo naie riaru firuillamona, fiemona raire illana uiñotomoi. <sup>29</sup> Ie isoide. Bie rafue ico suia, cue billirui iairei illena uiñoitomoi. <sup>30</sup> Uanaicinona omoimo lloiticue. Nana bie rafue suille facaiseconi bie nairai nia iite. <sup>31</sup> Mona enirue diga fuite; iadedi cue lloga uai jaca suite. <sup>32</sup> Cue abido billirui jaca bu uiñoñede. Jusiñamui jaienisai iena uiñoñeditimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. <sup>33</sup> Abina rairuicana jai. Naimie omoina canollena, Jusiñamuimo jiai jicabi. Cue billirui omoi uiñoñena jira, iemo ocuiri.

<sup>34</sup> 'Iena omoi raise uiñollena, bie rafuena lloiticue. Patrón jiaie eniruemo jaide. Nia jaiñenia, ie mullaiana ie jofona sedatate. Nagamie ie maijille ocuide. Jofo nasena sedadimiemo

naimie billemo raise ocurillena llote. <sup>35</sup> Naie patrón abido billena naimaci uiñoñena jira, naga hora iemo ocuritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. <sup>36</sup> Ebena naimie biite. Inidimacimo naimaci baisaibi raillanona, naimaci jaca ocurilla. <sup>37</sup> Ie isoide. Ebena biiticue. Cue abido billirui omoi uiñoñena jira, iemo jaca omoi ocuri.

## 14

*Judíuai illaicomini Jesúna gaitallena, siadua rafue*  
(Mt 26.1-5; Lc 22.1, 2; Jn 11.45-53)

<sup>1</sup> Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana comecillena, naie rafue ite. Judíuai illaicomini Jesúna jifuiano gaitacadimaci. Naimiena meineiacadimaci. Iena siadua mei, <sup>2</sup> raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuitimaci. Nia sedaiticai.

*Jesúmo riño caimare soride ra totaja rafue*  
(Mt 26.6-13; Jn 12.1-8)

<sup>3</sup> Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. <sup>4</sup> Damierie iena cüanona, iciritimaci. Coniniri dani ñaitimaci:

—Naie ra jamai dotade. Jai faifide. <sup>5</sup> Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiña iese ñaitimaci.

<sup>6</sup> Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiña jeare ñaitomoi? Mare rafuena cuemo finode. <sup>7</sup> Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. <sup>8</sup> Cue facaina naiñaiño finoacana diese jai finode. Nia fiodañedicue; ia cue fiodaillirui facaina naiñaiño iese finode. <sup>9</sup> Omoimo uanaicinona lloiticue. Ninomo cue mare finoca rafuena bu lloia, naiñaiña uibiñollena, nana cominimo naiñaiño finoca rafuena lloite.

*Judas micori raillamie Jesúna gaitataiacana rafue*  
(Mt 26.14-16; Lc 22.3-6)

<sup>10</sup> Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini dine jaide. <sup>11</sup> Iena cacajano, iobidimaci.

—Iena o finoia, omo ucubena fecaiticai —llo timaci. Iemona Jesúsna gaitatalliruimo Judas ocuiride.

*Jesúdi ie fiodaille rafuena llua rafue*

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Llomenico guille rafue illanona, judíuái comini toica llaudaiaína fajarui illanona, Jesúsno ie llofueoicaigano jicanote:

—¿Ninomo pascua railla rafue ie guille finuana jitaídío?

<sup>13</sup> Naimacimona menamiéna oretajanona raite:

—Jerusalémo omico jaillanona, nogodo jinuina uitimiéná cioitomico. Naimiéna raca. <sup>14</sup> Naimié jailla jofó namamo llono: “Coco llofueraíma cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” <sup>15</sup> Ie mei omícomo afebebamo ite aillue cuartona acataite. Na raruiái diga ite. Nainomo cai guille fino.

<sup>16</sup> Jesús llua isoi jaidiaímaiaí. Jerusalémo rilla mei, naimié llua isoi baitiaímaiaí. Pascua rafue guille finodiaímaiaí. <sup>17</sup> Nairui jitoma ana ítemo, ie llofueoicaigano diga, Jesús nainomo guisaide. <sup>18</sup> Mesamo guitimacimo, Jesús llote:

—Omoimona damié cuéna gaitataite. Naimié cue diga bene jai guite.

<sup>19</sup> Iena cacajanona, sunaitimaci. Damierie naimiémo jicanoside:

—¿Cuéna ñaitío?

<sup>20</sup> Uai ote:

—Omoimona damié bie platomo cue diga llomenico diga mutade. <sup>21</sup> Jusiñamui facaina lloraíma micóri cuéga isoi, monamona jai billamona, fiodaiticue; iadedí cuéna gaitataitimie eo duere sefuite. Naimié jeiciñegadena, cuemona mare.

<sup>22</sup> Naimaci nia guitimacimo, llomeniconá Jesús llinuanona, Jusiñamuimo iobillacinona fecaja mei, llomeniconá tairude. Naimacimo fecajano raite:

—Iena llinuano guiño. Bie llomenicodí cue abí facai ie. Cue abímo omói comecina facajano, iéna guiño.

<sup>23</sup> Ie mei naimié jiroracona jiaí llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci. <sup>24</sup> Naimié raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaíe rafue birui itatajamona, naimaci jeacino oni dotajana jai llote. Bie vinodí naie rafue facai ie. <sup>25</sup> Omoína bene dane iése caimare nabaiñeiticue. Cue Moo sedajanomo omói diga cue ía, nainomo omóina dane iése caimare marena nabaiticue.

*Jesúdi Pedro naimiéna januana llua rafue*

*(Mt 26.30-35; Lc 22.31-34; Jn 13.36-38)*

<sup>26</sup> Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. <sup>27</sup> Naimacimo llote:

—Cuená fainonocaitomoi. Jusiñamui facaina lloraima micori iena jaie cuega: “Toica llaudaiaí sedaraimana meinetimaci. Naimie toiniaí uaficaida jaitimaci” cuega. Naimie micori caina cuete. <sup>28</sup> Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

<sup>29</sup> Pedro uai ote:

—Nana jiaíno ona fainonocaia, ona jaca fainonocaiñeiticue.

<sup>30</sup> Jesús dinena raite:

—Uanai omo lloiticue. Ja naio iitava menacaiño nia ñaiñenia, dacaiño amani cuena janoitio.

<sup>31</sup> Pedro dinena riire llote:

—O diga cue fiodaiadedi, ona janoñeiticue.

Nana ie llofueoicaigano daje uaido jiaí raitimaci.

*Jesúdi Getsemanímo Jusiñamuimo jia rafue*

*(Mt 26.36-46; Lc 22.39-46)*

<sup>32</sup> Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana raí. Omoimona oni bai janore jaiticue. Cue Moo diga ñaillena jaiticue.

<sup>33</sup> Naimie diga Pedrona uite. Jacobona uite. Juan jiaí uite. Naimie sunaicaide. Ie comeci uri iñede. <sup>34</sup> Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

<sup>35</sup> Naimie janore bai jaillanona, eniruemo bitadate. Naimie duere sefuiñellena, Jusiñamuimo jide:

<sup>36</sup> —Ore Moo, nana rana finoredio. Cuená llegi cacaitañeno. Cue jitailla isoi cuena finoñeno; iadedi o jitailla isoi cuena fino.

<sup>37</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo.

<sup>38</sup> Iniñeno. Taife ramo omoína fai raillano, iena omoi ñnoñellena, Jusiñamuimo jii. Omoi comeci mare rafuena finoacade; iadedi omoi comeci daní ocuiñoñede. Ie muidona Jusiñamuimo jii, omoína naimie ocuiñotallena —llote.

<sup>39</sup> Ie mei dane jillena jaide. Ailli naimie jia isoi, dane jide. <sup>40</sup> Ie llofueoicaigano dine dane billanona, naimaci uisi lliñoilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. <sup>41</sup> Dane jia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macabaite. Cue fiodaille facaise jai ite. Jusiñamui jitailla jira,

cuena ja gaitajanona, naimiena ñnoñedino anamo ja iiticue.  
 42 A naidacai. Maiña. Cue gaitataitimie jai bite.

*Jesúna gaitalle rafue*

(Mt 26.47-56; Lc 22.47-53; Jn 18.2-11)

43 Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofueraimona bitimaci. Naimaci einamacimona bitimaci. 44 Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

45 Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. 46 Ie jira Jesúna gaitadimaci.

47 Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote. 48 Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, firiraimadicueta cuemo omoi billa. 49 Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoriai cuegafuia suite.

50 Ie facaise nana naimie llofueoicaigano naimiena fainonocaillano, aisidimaci.

*Jesús jinafona conirue racaja rafue*

51 Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci; 52 ia ie iniroina fainonocaillanona, taimiena aicide.

*Jesúdi judíuai illaicomini dine illa rafue*

(Mt 26.57-68; Lc 22.54, 55, 63-71; Jn 18.12-14, 19-24)

53 Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci. 54 Pedro naimaci jinafona aarena racade. Jusiñamui diga nanoca ñairaima nairaibirimo jaide. Jofono sedadino diga nainomo ite iraimo agaide.

55 Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. 56 Diga comini Jesúna llogidotimaci; ia tainona

lloṭimaci. Daje isoi lloñedimaci. <sup>57</sup> Damierie billanona, tainona llogiduanona, raite:

<sup>58</sup> —Bimie llwana cacadica. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaiana, darui amani illanona, jiaie finoiticue. Comini iena finoñeitimaci”. <sup>59</sup> —Iese lloṭimaci; ia daje isoi lloñedimaci.

<sup>60</sup> Naimaci motomo Jusiñamui diga nanoca ñairaima naidadajanona, Jesúmo jicanote:

—¿Ñiese uai oitio? ¿Ñie isoide rafue ona llogidotimaci?

<sup>61</sup> Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

<sup>62</sup> Jesús uai ote:

—Jii, naimiedicue. Monamona jaie cue billamona, imana jaidicue; ia ico jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiai cioitimaci.

<sup>63</sup> Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitañedicai.

<sup>64</sup> Jusiñamuina naimie jeare ñaiana jai cacadomo. ¿Ñiese naimiena raitomoi?

Jiaie illacomini dinena:

—Naimie fiódaillesa —lloṭimaci.

<sup>65</sup> Ie facaise damierie naimiena tuallaitimaci. Ie uiecona ibailla mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

### *Pedrodi Jesúna janua rafue*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Naie facaise Pedro nairaibirimo ite. Naie nanoca ñairaima mullaiñuaimona dañaiño nainomo billanona,

<sup>67</sup> Pedro agaillana ciode. Raite:

—Nazaret ie Jesús cominidio.

<sup>68</sup> Pedro iena januano, raite:

—O llwana uiñoñedicue. Iena raise cacaiñedicue.

Ie mei nase fuedo jaide. Naie facaise itava dacaiño ñaite.

<sup>69</sup> Naie mullaiño naimiena dane ciuanona, nainomo jamai itinomo llote:

—Bimiedi Jesús ie llofueoicaigano imie.

<sup>70</sup> Iena Pedro dane janote. Dallu illanona, nainomo jamai itinomo Pedromo llote:

—Odi Galilea imiedio. Jesús diga jaicabidio.

<sup>71</sup> Uai ote:

—Uanai cue lloñenia, Jusiñamui cuena duere finoite. Uanaicinona cue llwana naimie uiñote. Ero, omoi llogamiena uiñoñedicue.

<sup>72</sup> Ieconí itava dane ñaite. Iena cacajano, Pedro Jesús luana uibiñote. Jaive naio Jesús Pedromo llote: “Itava menacaiño nia ñañenia, dacaiño amani cuena janoitio”. Iena uibiñuamona, Pedro eo eede.

## 15

*Pilato dine Jesús illa rafue*

(Mt 27.1, 2, 11-14; Lc 23.1-5; Jn 18.28-38)

<sup>1</sup> Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. <sup>2</sup> Pilato naimiemo jicanote:

—¿Judíuai comini illaimadio?

Jesús uai ote:

—Jii.

<sup>3</sup> Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llotimaci.

<sup>4</sup> Pilato dinena naimiemo jicanote:

—¿Niese uai oñedio? Ona eo llogidotimaci.

<sup>5</sup> Jesús nia uai oñena jira, Pilato uainicaide.

*Pilatodi Jesús fiodaillana llua rafue*

(Mt 27.15-31; Lc 23.13-25; Jn 18.38-19.16)

<sup>6</sup> Naga año pascua railla rafue facaiseconi cárcelmo itinomona Pilatodi comini jicacamiena jamai jino orede.

<sup>7</sup> Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. <sup>8</sup> Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. <sup>9</sup> Pilato jicanote:

—¿Bu jino cue oretallena jitaidomoi? Omoi judíuai railla illaimana níbai jitaidomoi.

<sup>10</sup> Iese jicanote; iadedi naimiedi Jusiñamui diga nanoca ñairaini Jesúsni uradoillana uñote. Naimaci Jesúsna meini-acanana jiai uñote. <sup>11</sup> Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. <sup>12</sup> Iena cacajano, Pilato naimacimo jicanote:

—¿Niese bimiena cue finuana jitaidomoi? Naimiedi omoi judíuai illaima raillamie.

<sup>13</sup> Ado llotimaci:

—¡Naimiena corai!

<sup>14</sup> Pilato dane jicanote:

—¿Nie isoide maraiñede rafuena finode? —Iena cacajano, ado ibi llonoidimaci:

—¡Naimiena corai!

<sup>15</sup> Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraillena orede.

<sup>16</sup> Soldaduai naimiena gobernador jofo fo uillanona, nana soldaduai nainomo ofidimaci. <sup>17</sup> Jiduirede iniroi naimiemo jitadimaci. Eecuaïmona niga nuiciraina naimie ifogimo jitadimaci. <sup>18</sup> Naimiena jifanoduanona, naimiena uaidotimaci:

—¡Jadi, judíuai illaïma!

<sup>19</sup> Radosi diga ie ifogimo buta-butadimaci. Naimiena tuallaïtimaci. Naimie illaïmana itena, naimiena sedallena, caiñici ifodo raïedimaci. <sup>20</sup> Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitadimaci. Ie mei naimiena coraillena oni uitimaci.

### *Jesúna coraïa rafue*

(Mt 27.32-44; Lc 23.26-43; Jn 19.17-27)

<sup>21</sup> Jerusalémona naimaci jaïllanona, jamai bitimiemo dafaiïfidimaci. Naimiedi Simón. Cirene raïlla enirue imie. Naimie jito iaïmaïaïdi Alejandro iaïmaïaï Rufo diga. Jerusalén onifemona naimie billanona, naimiemo dafaiïfidimaci. Naimiena Jesús uiga cruzna rocatatimaci. <sup>22</sup> Gólgota raïllanomo jaidimaci. Ifocoraïna eruaïlla jira, iese mamecïrede. <sup>23</sup> Nainomo rïllanona, ie abi isirena cacaiñellena, vinomo erïrede rana faïanona, Jesúmo fecadimaci; iadedi naimie iena jiroñede. <sup>24</sup> Ie mei naimie cruzmo coraïa mei, cruzna naidania mei, naie soldaduai naimie iniroi dani coninimo fecasïte. Naie iniroi bu uille raïllanona uïñollena, jifanododimaci.

<sup>25</sup> Jitoma nia fuiri daïdemo, naimiena coraïdimaci. <sup>26</sup> Cruzmo ie llogiduaïfueña jonetimaci. Jai cuela: “Judíuai comini Illaïma”. <sup>27</sup> Ie mei mena fiiriruide iaïmaïaïna coraïdimaci. Damie Jesús nabeïmo coraïca. Jiaïmie Jesús jarifebeïmo coraïca. <sup>28</sup> Iemona Jusiñamui facaina lloraïma micori jaie cuelaïfue suide. Cuela: “Maraiñedïno isoi naimie jai ïte”.

<sup>29</sup> Naisodo jamai jaidino Jesúna mameritïmaci. Mamerilla-mona, ifogaïaïna jaididimaci. Raitimaci:

—Navui raisoidio: “Jusiñamui jofona judaïitïcua. Darui amani illanona, iena dane fïnoitïcua” raisoidio. <sup>30</sup> Ie muidona dama o abina mai jillota. Cruzmona ana bi.



31 Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. 32 Naimiedi Cristodena, naimiedi cai judúuai comini illaíma raillamiedena, dama niadedi cruzmona ana ie billa. Iena cai cioia, naimiena iinoiticaí. —Iese naimiena jifanododimaci. Naimie diga coraicamie iaímaiaí naimiena jiai jeare ñaitiaímaiaí.

*Jesús fiodailla rafue*

(Mt 27.45-56; Lc 23.44-49; Jn 19.28-30)

33 Jitoma naidai itemona, daje amani horas mona jítibicaide. 34 Ie meinomo judúuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaíñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

35 Iena cacajano, nainomo jamai itinomona damierie raitimaci:

—Naimie jaie Jusiñamui facaina lloráíma Elíana uaidote — raitimaci. 36 Naimacimona damie jarire jaillanona, fibecode ramo vinona faite. Radosimo jilillano jirollena, naimiemo a fecade. Raite:

—Dallu sedaiticaí. Elías naimiena jillotajaíbillena uiñoiacadicaí.

37 Ie facaise ado cuirioita fiodaite. 38 Naie facaise Jusiñamui jofomo ie fetaca iniroife ana anaba jillacimo metodo menafe cuararide. 39 Jesúna sedallena, nainomo capitán ite. Jesúsno eruaillanona, Jesús fiodaillana ciode. Raite:

—Uanai bimiedi Jusiñamui Jito.

40 Dajerie riñoniaí naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. 41 Galileamo Jesús navui illa facaise naie riñoniaí naimie diga jaisoidimaci. Naimiena canoidimaci. Jerusalémo Jesús billanona, ailluena riñoniaí naimie diga jiai bitimaci. Ie fiodaillana jiai cioidimaci.

*Jesús raiafomo jonia rafue*

(Mt 27.57-61; Lc 23.50-56; Jn 19.38-42)

42 Jitoma ana itemo, sábado rille jai iaírei illanona, 43 Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñoacada, Pilato dine jaide. Iena raillena, Jesús abina jicade. 44 Iena cacajano, Pilato Jesús fiodaillana raise uiñoiacade. Ie

fiodaillana nia fidiñede. Jesúna sedade capitána uaiduanona, naimiemo Jesús fiodaillana jìcanote.

<sup>45</sup> —Jesús jai fiodaite —capitán railla mei, Pilato Jesús abina Josémo fecallena llote. <sup>46</sup> José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade. <sup>47</sup> María Magdalena, jiaie María diga, naimie raiana ciode. María José ei.

## 16

*Jesús fiodaillamona jillua rafue*

*(Mt 28.1-10; Lc 24.1-12; Jn 20.1-10)*

<sup>1</sup> Sábadoruimo jítoma sojicaidemo, María Magdalena caimare soride rana ibade. Jacobo ei, María jiaí ibade. Salomé jiaí ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade. <sup>2</sup> Domingo jítiramo jítoma como bairedemo, Jesús raiafo dine naiñaiñuai jaide. <sup>3</sup> Jaillanona, coníñuaimo jìcanote:

—¿Bu noficina caina oni ñuitalle raiafomona?

<sup>4</sup> Raiafo dine rillanona, iemo eruailanona, nofici oni ñuitacana ciode. Naie nofici eo aillue. <sup>5</sup> Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jítade. Naimiedi Jusiñamui jaienicí. Naiñaiñuai jacinaite. <sup>6</sup> Nainomo itimie dinena raite:

—Jacinaíñeno. Nazaret ie Jesúna jenodomoí. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda. <sup>7</sup> Naimie llofueoicaiganomo iena lluai. Ua Pedromo llono. Galileamo omoi uicomo naimie jaite. Omoimo naimie llua isoi, naimiena cioitomoí.

<sup>8</sup> Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumolloñede.

*Jesús María Magdalenamo bairia rafue*

*(Jn 20.11-18)*

<sup>9</sup> Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiaí navui oni orede. <sup>10</sup> Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

<sup>11</sup> —Naimie jai jillode. Naimiena jai ciodicue —naimacimo naiñaiño llua mei, iena ñnoñedimaci.

*Mena llofueoicaiganomo Jesús bairia rafue*

*(Lc 24.13-35)*

<sup>12</sup> Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iai<sup>1</sup>maia<sup>1</sup> naisomo macaria, ia<sup>1</sup>maia<sup>1</sup>imo bairede. <sup>13</sup> Jerusalémo abido ia<sup>1</sup>maia<sup>1</sup> rilla mei, jia<sup>1</sup>ie llofueoicaiganomo iena llotia<sup>1</sup>maia<sup>1</sup>; ia ñnoñedimaci.

*Jesús ie once llofueoicaiganomo bairia rafue*

*(Mt 28.16-20; Lc 24.36-49; Jn 20.19-23)*

<sup>14</sup> Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llo<sup>1</sup>te; ia ñnoñedimaci. Naimaci ñnoñena jira, Jesús naimacimo riire llo<sup>1</sup>te. <sup>15</sup> Naimacimo llo<sup>1</sup>te:

—Nana nairaiaimo jai. Nana cominimo cue mare rafue llocana jai. <sup>16</sup> Cuen a ñnuamona, bautizagano diese Jusiñamui mona duere sefuiñeitimaci; iadedi Jusiñamui cuena ñnoñedinona duere finoite. <sup>17</sup> Cuen a ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. <sup>18</sup> Jaiona naimaci llinoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

*Jesús monamo jailla rafue*

*(Lc 24.50-53)*

<sup>19</sup> Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. <sup>20</sup> Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemon a comini dinena Cristomona naimaci rafue illana uiñotimaci. Macaibaite. Cue cuela rafue jai fuite. Marcodicue.

## LUCAS JESUCRISTO ENRUEMO ILLA RAFUE CUIAFUE

*Lucas Teófilomo cartana orede*

1-4 Teófilo, cue isiruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciodimaci. Iena llocana jiai jaidimaci. Naimacimona bie rafue raise uiñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uiñua jira, uanaicinona o raise uiñollena, bie cartana jai cueticue. Iese birui cue comeci jitaide.

*Jusiñamui jaienicí Juan Bautista micorí jeicillena llua rafue.*

5 Jesucristo nia jeiciñenia, Zacarías illa facaise Herodena mamecirede illaimadi. Judea railla enruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijuide. Naimie aidi Elisabet. Naiñaiño jaie ite usumadi Aarón micorí. Aarón micorídi Jusiñamui diga nano ñairaima. 6 Jusiñamuimona iaímaiaí mare, nana naimie lloga uaina raise iaímaiaí inua jira. 7 Naiñaiño oiniñona jira, uruenidiaímaiaí. Jiai jai uaicima iaímaiaí.

8 Zacarías facai ite comini maijia facaise ia, Jusiñamui jofodine naimie maijiaide. 9 Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona daní Jusiñamui diga ñairaini naimiena fetodimaci. Iemei naimie fo jaide. 10 Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci. 11 Ieconí cai Nama Jusiñamui jaienicídi naie ra boano nabeimo Zacaríamo bairede. 12 Naimiena ciuanona, Zacarías jacinaite. 13 Jaienicí naimiemo llote:

—Zacarías, jacinaíñeno. Jusiñamui o jiacinona jai cacade. Iemona o aí uruesite. fimana jocoite. Juan o jitalle naimie mamecidi. 14 Iemona o comeci caimare iite. Iobitio. Ailluena comini naimie jeiciari iobitimaci. 15 Jusiñamuimona naimie jamai bue isoiñeitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite. 16 Cai Nama Jusiñamui dibeimo ailluena Israel cominina naimie itataite. 17 Jusiñamui jitaillacinona finocana jaite. Elíamo Jusiñamui Joreño jaie siño uai illa isoi, naimiemo iite. Jusiñamui rafuena naimie llumona, damierie, naimaci jaigai isoi, Jusiñamuina inoitimaci. Ailluena Jusiñamui uaina jai

¶noñedimaci; ia damierie birui ¶noitimaci. Naimaci comeciai Jusiñamui dibeimo meidoitimaci. Iemona cai Nama Jesucristo bia, naimiena ¶noitimaci.

<sup>18</sup> Zacarías dinena jicanote:

—¿Niese o llua suillena uiñoticue? Jai uaicimadicoco.

<sup>19</sup> Jusiñamui jaienici dinena uai ote:

—Gabrieldicue. Jusiñamuimona biticue. Cuena oretate, bie mare rafuena omo lollena. <sup>20</sup> Ero, cue uaina o ¶noñena jira, uainitio, o jito jeicille dinori. Jiairuido bie rafue suite.

<sup>21</sup> Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci.

<sup>22</sup> Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua uiñotimaci. Naimie ñaiñeno ite. <sup>23</sup> Jusiñamui jofomo naimie maijia facaise fuilla mei, ie jofomo abido jaide. <sup>24</sup> Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona: <sup>25</sup> “Cue uruesilla jira, iena nia buna lloiacaiñedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreñona jai ñaiñeitimaci”.

### *Jusiñamui jaienici Jesús jeicillena llua rafue*

<sup>26-27</sup> Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

<sup>28</sup> Rillanona, naiñaiño omo llote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

<sup>29</sup> Iena cacajanona, naiñaiño jacinaita. Iena naiñaiño raise cacaiñena jira, iemo comecina facade. <sup>30</sup> Gabriel dinena llote:

—Jacinaiñeno. Jusiñamui ona duenaite. <sup>31</sup> Birui uruesitio. Imana jocoitio. Naimie mamecina jitaitio Jesúsna.

<sup>32</sup> Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite. <sup>33</sup> Illaimana illamona, Israel railla nairaina jaca sedaite. Naimie ifomo jiaimie jaca iñeite.

<sup>34</sup> María uai ote:

—Iima diga nia iñedicue. ¿Niese bie nibaille?

<sup>35</sup> Gabriel llote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiai marenite. Naimiedi Jusiñamui Jito. <sup>36</sup> O comini iñaiño, Elisabet, ie uaicitaila facaise jiai jai urueside. Naiñaiño jai jionaide; ia jai seis fivui naiñaiño uruesilla ite. <sup>37</sup> Jusiñamui nana bie isoide rafuena finorede.

<sup>38</sup> María uai ote:

—Jee. Jusiñamui anamo iticue. O llucino cuemona mare. Ie facaise Gabriel naiñaiñomona oni jaide.

*Maríadi Elisabet dine jailla rafue*

<sup>39</sup> Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide. <sup>40</sup> Zacarías jofomo rillano:

—Itio —raillanona, Elisabetna uaidote. <sup>41</sup> Elisabet naiñaiño uaina cacajano, ieconi naiñaiño jeraimo ite urue iena jiai uiñuamona, niraide. Ie facaise Jusiñamui Joreño anamo Elisabet jai ite. <sup>42</sup> Iese illamona, María uruesillana uiñote. Naiñaiño ado llote:

—Jusiñamui ona eo marena canoite. O uruena marena itataite. <sup>43</sup> Jamai bue isoidicue; ia, odi cue Jilloitaraima ei illanona, cue dine bitio. Iena cuemo nia lloñedio; <sup>44</sup> ia, cuena o uaiduanona, iobillamona cue jeraimo ite uruedi niraide. <sup>45</sup> Cai Nama omo llotataga uaina suillana o ñnua jira, Jusiñamui ona eo marena canoite. —Jusiñamui Joreño naiñaiñomo illamona, iena llote.

<sup>46</sup> María dinena uai ote:

Caiñai Nama eo mare. Naimiemo iobillacinona feacaadicue. <sup>47</sup> Naimiedi cue Jilloitaraimana jira, naimieri iobidicue.

<sup>48</sup> Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

<sup>49</sup> Naimiedi siño. Naimiedi mareuidimie. Cue facaina eo mare rafuena finode.

<sup>50</sup> Naimiena ñnotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena ñnotinona duenaite.

<sup>51</sup> Diga siño rafuena finoite. Abi iedotino comeciai facajacinona llicaitaite.

<sup>52</sup> Naimiedi illaicomini ona dotaitaite; ia jamai bue isoidinona jamai bue isoiñedinona itataite.

<sup>53</sup> Dueredinona eo canoite; ia duenidinomo buena fecañeite.

<sup>54</sup> Duenaillamona, cai Israel comini feitañeite.

<sup>55</sup> Cai jaiagaimo naimie jaie llua isoi, birui caina canoite.

Abraham micorimo jaie llote: “Ona duenaiticue. O comini jaca duenaiticue”

María llote. <sup>56</sup> Elisabet diga davui amani naiñaiño fiebide. Ie mei ie jofomo abido jaide.

*Zacarías jito jeicia rafue*

<sup>57</sup> Elisabet jocularui jai ridemo, ñimana jocode. <sup>58</sup> Naiñaiño ecimo ite comini, naiñaiño comini diga, iena fidiamona, cai Nama naiñaiñona eo duenaillana uiñotimaci. Naiñaiño diga iobidimaci. <sup>59</sup> Ocho digarui jeicia mei, naimaci finouilla

isoi, urue abina dia rafuemo bitimaci. Ie moo mamecina jitaacadimaci; <sup>60</sup> iadedi Elisabet lloste:

—Dama ite. Jitaiñedicue. Naimie mamecidi Juan cai jitalle.

<sup>61</sup> Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

<sup>62</sup> Jefona cacaiñena jira Zacaríamo onolli diga jicanotimaci, ie jito mamecina jitalle. <sup>63</sup> Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jítade?” comeciaina facadimaci.

<sup>64</sup> Ieconí Zacarías jai dane ñaite. Ie jira Jusiñamuimo iobillacino fecade. <sup>65</sup> Nana iaimaia ecimo itino rajicaidimaci.

—Jusiñamui muidona naie rafue suide —llostimaci. Bie rafuena fidiano, nana Judea raila aneduaimo itinodi iena ñaioidimaci. <sup>66</sup> Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiena marena jaca canua jira, iese llostimaci.

*Zacarías Jusiñamuimo iobillacinona fecaja rafue*

<sup>67</sup> Ie facaise Jusiñamui Joreño Zacaríana llotatajanona, Zacarías lloste:

<sup>68</sup> Cai Nama Jusiñamuidi mare.

Cai Israel comini dine biite, caina jilloitallena.

<sup>69</sup> David micori Jusiñamuina jaie sedade.

David micori cominimona siño Jilloitaraimana cai dine oretaitaite.

<sup>70</sup> Ie facaina llorainido naimie jaie llua isoi, cai Jilloitaraimana oretaitaite,

<sup>71</sup> Taifemona, Janabamona cai jilloillena.

<sup>72-73</sup> Cai usumatiai micoriaimo: “Omoina duenaiticue” lloste.

Cai usuma Abraham micorimo jaie llogacinona feitañede.

<sup>74-75</sup> Taifemona cai jilloillena, cai Jilloitaraimana oretaitaite.

Nana cai ille dinori Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaraimana oretaitaite.

<sup>76</sup> Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciiai o raise finollena.

<sup>77</sup> Ie cominimo jeacinomona jilluacinona lloiticio.

Iena naimaci ñnoia, Jusiñamui naimaci jeacinona feitaite.

<sup>78-79</sup> Jeacino anamo jai cai illa jira, jitiredinomo iticai isoidicai.

Jusiñamuina cai nia ñnoñenia, fiodaillana jaciruiticai.

Naimie caina duenaillamona, cai Jilloitaraima billena o llofullena, ona oretaitaite.

Naimiena cai ñnoia, jitiredinomo iñeiticai; ia Jusiñamui diga cai comeciiai uri iite.

<sup>80</sup> Zacarías jito sairide. Jusiñamuina ñnocana jaide. Cominimo naimie nia marefodo lloñenia, jofue iñenanomo ite.

## 2

*Jesús jeicia rafue*

*(Mt 1.18-25)*

<sup>1-2</sup> Jesús jeicia facaise César Augusto anamo ailluena nairaiái ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaimo illana naimie uiñollena, nana comini mameciai cuellena ocuide. Jaca bu iese jaie finoñede. <sup>3</sup> Naimaci jaiagai illanomo mameciai cuiana ocuide. <sup>4</sup> Ie jira José Galileamona Nazaretmona jaide. Judeamo Belémo jaide. David micori cominimo naimie jainaiáilla jira, David micori illanomo jaide. <sup>5</sup> Ie ai María diga jaide. Naiñaiño fenai jai eo aillue. <sup>6-7</sup> Belémo iaimaiai rillanona, naie facaise comini jofomo inillino iñena jira, jurareta jofomo ridiaimaiai. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

*Jusiñamui jaienisaí toica llaudaiaí sedaraini dine jailla rafue*

<sup>8</sup> Jesús jeicia facaise naie naió Belén ecimo ite pastomo damierie toica llaudaiaína sedaraini itimaci. Naimaci toiniaína sedadimaci. <sup>9</sup> Ieconí caí Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci. <sup>10</sup> Jaienici llote:

—Jacinaiñeno. Mare rafue lloiacadicue. Nana cominina iobitallena, iena lloiacadicue. <sup>11</sup> David micori illanomo damie como jeiciga. Jusiñamui facaina lloraini micoriai naimie bil-lena jaie lloudimaci. Naimiedi Cristo caí Nama. Naimie omoi Jilloitaraíma. Jeacinomona omoína jillotaite. <sup>12</sup> Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue llwana uanaicinona uiñoitomoi —llote.

<sup>13</sup> Ie facaise naie jaienici dine ailluena jaienisaí bitimaci. Jusiñamuimo iobillacinona fecajano rotimaci:

<sup>14</sup> Monamo Jusiñamui illanona, naimiemo iobillacinona fecaa-cadicaí.

Cominina naimie duenaillamona, naimie diga uri iitimaci rotimaci. Ie mei abido jaidimaci.

<sup>15</sup> Monamo jaienisaí jailla mei, toica llaudaiaí sedaraini coniniri ñaitimaci:

—Belémo mai caí jailli, caí Nama caímo como lloga rafuena caí jibuisaillena.

<sup>16</sup> Ieconí raire jaidimaci. María José diga baitimaci. Iaimaiai urue jurareta ecaranomo biillana cioidimaci. <sup>17</sup> Naimiena ciua



mei, nana naimacimo jaienici lloga rafuena llotimaci. <sup>18</sup> Nana naie rafuena cacadinodi ieri rajicaidimaci. <sup>19-20</sup> Iaimaiaia uruena ciua mei, llaudaiaia sedaraini imaci toiniaia dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

*Jerusalémo Jusiñamui jofomo Jesúna iaimaiaia uilla rafue*

<sup>21</sup> Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

<sup>22-24</sup> Moisés micori jaie llua isoi Jerusalémo Jesúna uitiaiaiaia. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jiaia cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaiaiaia.

<sup>25</sup> Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo ñnocana jaide. Naimie cominina Cristo jilloitallena, Cristo billemo ocuride. Naie facaise Jusiñamui Joreño anamo naimie ite. <sup>26</sup> Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote. <sup>27</sup> Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode. <sup>28</sup> Naimaci dine jaillanona, Jesúna meniñote. Jusiñamuimo iobillacinona fecajano jide:

<sup>29</sup> Nama, o anamo iticue.

Cuomo o lloga uai jai suilla jira, uri fioidaiticue.

<sup>30</sup> O oretaga Jilloitaraimana jai cioidicue.

<sup>31</sup> Naimiena oredio, nana comini jilloillena.

<sup>32</sup> Naimiedi judúuaiñedinona uanaicinona uiñotaite.

O cominina iobitaite

jide. <sup>33</sup> Iena cacajamona, iaimaiaia jitona lloga uairi rajicaidiaiaiaia. <sup>34-35</sup> Simeón iaimaiaimo camaredicinona llote: —Jusiñamui omoina raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comeциаina facajacinona uiñotaite. Naimiemo suille rafuemona o comeci sure iite. Cai cominimona ailluena naimiena jitañeitimaci. Ailluena jitaitimaci.

<sup>36</sup> Nairuido Jusiñamui jofomo Ana railla feciño ite. Jusiñamui naiñaiño lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaisemona ie ini diga siete años illanona, naimie fiodaite. <sup>37</sup> Naiñaiño jai eo uaiñiño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiño naimiena sedauide.

<sup>38</sup> Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocuirilla jira, naiñaiño naimaci Jilloitaraimana nainomo itinomo llocana uite.

### *Nazaretmo abido naimaci jailla rafue*

<sup>39</sup> Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaimaia. <sup>40</sup> Nainomo Jesús sairicana maïricana jaide. Eo abina uiñote. Naimieri iobillamona, Jusiñamui naimiena canouide.

### *Jerusalémo Jusiñamui jofomo Jesús illa rafue*

<sup>41</sup> Naga año Jerusalémo pascua railla rafue dine Jesús moo iaïmaiaï jaisoidiaïmaiaï. Egiptomona naimaci jaiagai jillobillana comecillena, naie rafue ite. <sup>42</sup> Naimiemo doce años illa facaise Jerusalémo iaïmaiaï jaisoilla isoi, jaidiaïmaiaï. Naimie doce años illa jira, Jesúna uitiaïmaiaï. <sup>43-44</sup> Rafue fuilla mei, abido bitiaïmaiaï. Ailluena comini jiaï billa jira, Jesús billana raise uiñoñediaïmaiaï. “Cai comini diga naimie bite” raillanona comecina facadiaïmaiaï; ia Jesús Jerusalémo fiebide. Darui raifi billa mei, iaïmaiaï cominimo naimiena eo jenodiaïmaiaï. <sup>45</sup> Baiñena jira, inia mei, Jerusalémo darui jaillanona, abido jaidiaïmaiaï. <sup>46</sup> Ie are Jusiñamui jofomo naimiena baitiaïmaiaï. Moisés micori llogacinona llofueraïni motomo naimie ite. Naimaci llofuiana cacade. Iena naimaci diga jiaï siadote. <sup>47</sup> Nana cacadino naimie uiñoñogacinori rajicaïdimaci. Naimie raise siadogacinori jiaï rajicaïdimaci. <sup>48</sup> Naimiena iaïmaiaï baia, rajicaïdiaïmaiaï. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

<sup>49</sup> Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Ñiese bene cue illana uiñoñedomico?

<sup>50</sup> Naimie lluana raise cacaiñediaïmaiaï. <sup>51</sup> Iemei iaïmaiaï diga Nazaretmo naimie abido jaide. Iaïmaiaï uai ñnuanona, iaïmaiaï anamo ite. Ie ei María nana naie rafue ie comecimo facauide. <sup>52</sup> Naimie sairicana abina uiñocana jaide. Jusiñamui naimieri iobide. Comini dinena naimiena jiaï gaïdimaci.

## 3

*Jofue iñenanomo Juan Bautista micorì illa rafue  
(Mt 3.1-12; Mr 1.1-8; Jn 1.19-28)*

1-2 Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abilinia railla enirue gobernadori Lisantias. Jusiñamui diga nanoca ñairaima iaimaiaidi Anás, Caifás diga. <sup>3</sup>Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocaida, Jusiñamui dibeimo omoi comeciái iuai meido. Iemona Jusiñamui omoi jeacinona feitaite. Omoi comeciái iuai omoi meidoia, comini iena uiñollena, mai omoi bautizallomoi.

<sup>4</sup>Isaías micorì ie rabemo naimiena jaie cuete: Jofue iñenanomo damie jidai-jidaillana cacadicue. Naimie llote: “Cai Nama biite. Naimie jaillino atona fino.

<sup>5</sup>Nana iconi oruita. Naga aneduai diese eniruena judai. Neicairuai joide naisona atona fino. Naimo itaicuai illa diese eniruena oruita, daje facai illena.

<sup>6</sup>Nana comini Jusiñamui naimacina jillotaiacanana uiñoitimaci” cuete; ia naimaci comeciaina ñaite. Cai Namana iinuana ñaite. Abina iedoñenana ñaite. Jeacino finocana jaiñenana ñaite. Cai Nama Jesús bia, Jesús uaina naimaci feiñollena, naimaci comeciái marena finuana ñaite.

<sup>7</sup>Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jaio nairai isoidomoi. ¿Ñiese jilloitomoi? Cue dine omoi billena, ¿bu omoimo lloga? <sup>8</sup>Omoi comeciái iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciái iuailai meiduana uiñoiticai. Ie mei bautizallomoi. Omoi comeciaina facañeno: “¿Bue ñellena o llua isoi finoiticai? Jusiñamui Abraham micorina jaie eo raise nabaide. Abraham micorì cai moo illamona, Jusiñamui ricacillifuemona jilloiticai”. Ero, omoimo lloiticue: Cue llua isoi omoi finoñenia, naimie ricacillifuemona jilloñeitomoi. Abraham micorì uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micorì facaina uruiaina comuitarede.

<sup>9</sup> Ero, llisiñede riará tiedomoi. Tiia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie riicaillafue anamo jai itomoi. Omoi comeciaí iuai omoi meidoñenia, omoína duere finoite.

<sup>10</sup> Iena cacajanona, comini dinena naimiemo jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

<sup>11</sup> Juan uai ote:

—Ailluena iniroiredimiedi iniroinidimiemo iniroina feca. Guilleredimiedi guillenidimiemo guillena feca.

<sup>12</sup> Naimacina bautizallena, gobierno ucubena oraini jiai bitimaci. Jicanotimaci:

—Llofueraíma, cai bautizaja mei, ¿niese iiticaí? ¿Nie isoide mare rafuena finoiticaí?

<sup>13</sup> Uai ote:

—Gobierno facaina omoi ibataia, cominimona gobierno llua baífemo oñeno.

<sup>14</sup> Naimie dine billanona, soldaduai jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

Uai ote:

—Cominimona rana bairoñeno. Riicinodo rana oñeno. Tainona llogiduamona, cominimona rana oñeno. Omoi ucube illa diese feiño. Ie baífemo ucubena nicidoñeno.

<sup>15</sup> Juan llofuiamona naie facaise cominidi Cristo billemo ocurilla jira, “Juandi nibai Cristo” raillanona, Juanmo comeciaina facauidimaci. <sup>16</sup> Iena fidiano, Juan llote:

—Cristoñedicue. Jusiñamui dibeimo omoi illamona, jinui diga omoína bautizadicue. Cai baífemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciaí iuai omoi meidoñenia, omoína duere finoite. <sup>17</sup> Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciaí iuailai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

<sup>18</sup> Bie isoidicinodo cominimo ie mare rafuena llofueuide.

<sup>19</sup> Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade. <sup>20</sup> Maraiñede rafuena Herodes finocana jaillamona, Juan cárcelmo jonetade.

*Juandi Jesúna bautizaja rafue*

*(Mt 3.13-17; Mr 1.9-11)*

<sup>21</sup> Ailluena cominina Juan bautizaja facaise, Jesúna jiai bautizade. Bautizaja mei, Jesúdi ie Moo diga ñaianona, mona

bojode. <sup>22</sup> Ieconi Jusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

*Jesucristo ie usumatiai*

*(Mt 1.1-17)*

<sup>23</sup> Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeaiina facadimaci. Josédi Elí micori jito. <sup>24</sup> Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. <sup>25</sup> José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. <sup>26</sup> Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. <sup>27</sup> Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. <sup>28</sup> Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. <sup>29</sup> Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. <sup>30</sup> Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. <sup>31</sup> Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. <sup>32</sup> David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. <sup>33</sup> Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. <sup>34</sup> Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. <sup>35</sup> Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. <sup>36</sup> Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. <sup>37</sup> Lamec micori Matusalén micori jito. Matusalén micori Enoc micori jito. Enoc micori Jared micori jito. Jared micori Mahalaleel

mícori jito. Mahalaleel mícori Cainán mícori jito. <sup>38</sup> Cainán mícori Enós mícori jito. Enós mícori Set mícori jito. Set mícori Adán mícori jito. Adándi Jusiñamui comuitagamie.

## 4

*Taife ramo Jesús faia rafue*  
(Mt 4.1-11; Mr 1.12-13)

<sup>1</sup> Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede. <sup>2</sup> Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. <sup>3</sup> Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomenicono jaita”.

<sup>4</sup> Jesús uai ote:

—Iena lloñeiticue. Jusiñamui facaina lloraíma mícori iena jaie cuega: “Jiaie rafuedi llomenico guilla baífemo faite”.

<sup>5</sup> Ie mei a ite anedumo Taife Jesúna uillano, dallu illanona, naimiemo nana nairaíana acatate. <sup>6-7</sup> Llote:

—Nana bie nairaíai cue anamo ite. Iena cue iacagamiemo itataredicue. Cuena o sedajamona, iobillacinona cuemo o fecaia, nana bie nairaíai omo fecaiticue. Bie nairaíai illaimana jaitio.

<sup>8</sup> Jesús uai ote:

—Dama ite. Ona sedañeiticue. Moisés mícori jaie cuega: “Cai Nama Jusiñamuina seda. Dama naimiemo iobillacinona feca”.

<sup>9</sup> Ie mei Jerusalémo Jusiñamui jofo muidomo Taife Jesúna uite. Raite:

—Jusiñamui Jitodiodena, eniruemo mai ana uai. <sup>10-11</sup> David mícori ona jaie cuega:

Ona eenollena Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>12</sup> Jesús uai ote:

—Dama ite. Ana uaiñeiticue. Ero, ie cominimo Moisés mícori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluana finoñeiticue.

<sup>13</sup> Taife naimiena ramo faia mei, naimiemono ie jitaille dinori oni jaide.

*Galileamo Jesús ie rafue lolle jillaci*  
(Mt 4.12-17; Mr 1.14-15)

<sup>14</sup> Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. <sup>15</sup> Ailluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

*Nazaretmo Jesús illa rafue*  
(Mt 13.53-58; Mr 6.1-6)

<sup>16</sup> Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiaina ado facallena, naimie a naidadate. <sup>17</sup> Naie lloraco nama mullaímadi Isaías micori jaie cuegafuiái jai ferinoga rabe naimiemo fecade. Iena oni suiñocaida, bie rafuena baillanona facade: <sup>18-19</sup> Jusiñamui Joreño cuemo ite.

Dueredinomo mare rafuena lollena, cuena fetode. Taife anamo ailluena comini illa jira, Jusiñamui naimacina jillotaiacana uiñoñedimaci. Jusiñamui rafuena ailluena comini uiñoñena jira, naimie illanomo rillena uiñoñedimaci. Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenaillana birui uiñuana jitaide. Naimacimo mare rafue lollena, cuena jai oretate.

<sup>20</sup> Naie rafue facaja fuillamona, cuegafuiái abido fecade. Naimacina llofuellena, dane ana raide. Nana nainomo ite comini naimiemo eo eruaidimaci. <sup>21</sup> Iemei naimie naimacina llofueite. Raite:

—Omoi como cacaja cuegafuiái omoi motomo jai suide. Cuena ñaite.

<sup>22</sup> Naimie lluana comini cacajano, coninina raitimaci:

—Naimie fue mare. Naimie marena llofueite. —Iemona rajicaillamona, coniniri raitimaci—, Naimiedi jamai José jito. ¿Ñiese naie rafue birui suide?

<sup>23</sup> Iena uiñuamona, Jesús dinena llote:

—Cue lluana ñinoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiaí finoia, naimiena ñnoiticai. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi. <sup>24</sup> Uanaicnona omoimo lloiticue. Naimie comini nairaímo Jusiñamui facaina lloraíma ia, ie comini naimie uaina feiñoiacasiñede. Iena jamaisite. Ie isoide. Cue nairaímo cue illa jira, cue uaina ñnoñedomoi. <sup>25</sup> Jaie ie isoide. Elías facaiseconi daje amani años abimo atomonado noci deiñede. Aime guitimaci. Naie facaiseconi bie eniruemo cai comini dine ailluena feciñuai itimaci; iadedi omoi jaiagai Jusiñamui uaina ñnoñedimaci. <sup>26</sup> Jusiñamuidi Elíana cai comini dine oreñede; iadedi jiaie eniruemo ite feciño

dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciñomo orede. <sup>27</sup> Jiaie rafuena lloiticue. Eliseo micoridi Jusiñamui facaina jaie llote. Eliseo micori facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina ñnoñena jira, Eliseo micori duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina ñnoiacañedomoi — llote.

<sup>28</sup> Jesús lluana cacajano, naie ofiracomo itino eo iciritimaci. <sup>29</sup> Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci. <sup>30</sup> Naimiena meineiacadimaci; iadedi naimaci motomo naimie jaillanona, naimacimona naimie jillobillano oni jaide.

*Jesúdi Janaba anamo itimie jillotaja rafue*  
(Mr 1.21-28)

<sup>31</sup> Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofuete. <sup>32</sup> Illaíma uai isoi naimie llofuia jira, nainomo ite comini naimie llofuia mona rajicadimaci. <sup>33</sup> Janaba anamo illamie nainomo ite. Jesús llofuiana cacaita, Janabadi ñimana ado cuirioitate:

<sup>34</sup> —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uñoticue. Odi Jusiñamui ie Mare Fetocamedio.

<sup>35</sup> Jesús naimiena lletade:

—Llñcai. Naimiemona oni jai. —Iena cacajanona, naimaci motomo Janaba ñimana ana dotade; ia naimiedi bofedaiñede. Ie mei Janaba naimiemona oni jaide. <sup>36</sup> Iena cñuanona, nana nainomo itino rajicadimaci. Coniniri siadotimaci:

—¿Ñie isoide Jesús uai? Janabamo naimie llua mei, ñimamona Janabadi oni jaide.

<sup>37</sup> Jesús finoca rafue muidona, naimie mamecidi nana naie eniruemo soride.

*Jesúdi Simón Pedro jifaiñona jillotaja rafue*  
(Mt 8.14-15; Mr 1.29-31)

<sup>38</sup> Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñona jilloitallena, nainomo itino Jesús mo jicanote. <sup>39</sup> Naiñaiño dine Jesús jaillanona, ie uai llumona, naie duicodi oni jaide. Ieconi naiñaiño jillode. Abi cuariñede. Naidacaillanona, guille finuanona, ie jofomo itinona ecade.



*Jesúdi ailluena duidinona jillotaja rafue*

*(Mt 8.16-17; Mr 1.32-34)*

<sup>40</sup> Nairuido jítoma ana ítemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate. <sup>41</sup> Jananiaina jiai oni oretajano, jananiai dinena raite:

—Odi Jusiñamui Jitodio. —Naimiena naimaci uñua jira, Jesús naimaci ñaiana rairuide. Naimiedi Jusiñamui Jitona uñotimaci.

*Judeamo Jesús llofuia rafue*

*(Mr 1.35-39)*

<sup>42</sup> Ie areruido jítiramo jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci. <sup>43</sup> Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lollena, Jusiñamui cuena orede. Oni jaiticue. Omoi diga fiebiñeiticue.

<sup>44</sup> Ie mei Judeamo ite ofiracuaimo Jesús llocana jaide.

## 5

*Jesús muidona, naimaci ailluena lliciaina ua rafue*

*(Mt 4.18-22; Mr 1.16-20)*

<sup>1</sup> Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci. <sup>2</sup> Ie facaise jorai fuemo Jesús mena sijide botena ciode. Naimaci lloijina naimaci jocua jira, naie botemo lloiji fairaini iñede. <sup>3</sup> Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raita, botemona cominina llofujete.

<sup>4</sup> Llofuia mei, Simómo llote:

—Aforedinomo jai. Nainomo omoi lloijina faino.

<sup>5</sup> Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicai. ¿Ñiese ja oiticai? Iadedi o llua jira, lloijina faiticue.

<sup>6</sup> Iena naimaci faia mei, ailluena lliciaina jítatimaci. Ie jira naimaci lloiji cuaranoiacade. <sup>7</sup> Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade. <sup>8</sup> Iena ciuano, Simón Pedro Jesúmo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jecinona finouidimedicue.

<sup>9</sup> Ailluena lliciaina naimaci ua jira, naimaci rajjicaillamona, iena naimie llote. <sup>10</sup> Naimie nabaiñaimona Zebedeo jito iaimaiai ite. Juan diga Jacobo iaimaiai. Simómo Jesús llote:

—Cuen a jaciruiño. Lliciaina birui ocabitomoi; iadedi cue dibeimo naimaci illena, biruimona cominina oitomoi.

<sup>11</sup> Eniruemo sijano, naimaci raruiai fainonocaida, Jesús diga jaidimaci.

*Jesúdi efonaitimiena jillotaja rafue*

*(Mt 8.1-4; Mr 1.40-45)*

<sup>12</sup> Jiairuido Jesúdi jiaie nairaimo ia, efonaitimie naimie dine bite. Naimie eo fodo jaide. Jesúsna naimie ciuano, naimiena raise uaiduamona, ana bitadate. Llote:

—Maestro, o jitaia dedi, cuena jillotaredio.

<sup>13</sup> Jesús ie onolli oni ñuitajanona, naimiena jetade. Raite:

—Ona jillotaiacadicue. Mai o jillo. —Iecon jillode.

<sup>14</sup> Jesús naimiemo llote:

—Omo suide rafue jaca bumo lloño; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jaie lloga rana feca Iemona comini o jilluana uiñoitimaci.

<sup>15</sup> Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie dine bitimaci. <sup>16</sup> Bitimaci; iadedi Jusiñamui diga ñaillena, jofue iñenanomo Jesús jaide.

*Jesúdi tisitaitimiena jillotaja rafue*

*(Mt 9.1-8; Mr 2.1-12)*

<sup>17</sup> Jiairuido naimie llofueia, diga comini naimie illa jofomo bitimaci. Fariseuai raila comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate. <sup>18</sup> Ie facaise ie biramo biide tisitaitimiena Jesús dine damerie atidimaci; <sup>19</sup> iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biramo biide diga, comini motomo Jesús ecimo ana ñuitadimaci. <sup>20</sup> Iena Jesús ciuanona, tisitaitimie jilluana naimaci inuana Jesús uíñote. Tisitaitimiemo llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeticue.

<sup>21</sup> Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui

jeacinona dotarede. Bimie Jusiñamuiñede; ia Jusiñamui ifomo iacade”.<sup>22</sup> Naimaci comeciái facajacinona Jesús uifuanona, naimacimo jicanote:

—¿Bue ñellena omoi comeciaina iese facadomoí?  
<sup>23</sup> Bimiemo: “O jeacinona jai oni dotadicue” cue lloia, cue uai siñonana uifñoñeitomoi; ia bimiemo: “Mai naidacaillanona macari” cue lloia, cue uai siñonana uifñoitomoi.<sup>24</sup> Monamona jaiie cue billanona, imana jaidicue. Ie jira jeacino oni dotaja uai cuemo ite. Iena omoi uifñollena, tisitaitimie lloiticue: “Mai naidacái. O bira ferianona, o jofomo mai jai”.

<sup>25</sup> Iese naimie raillamona, tisitaitimie jillode. Ieconí naimaci motomo naimie naidaide. Ie bira feriano, Jusiñamuimo iobillacino fecajano, ie jofomo jaide.<sup>26</sup> Nana naiena ciolino eo rajicaidimaci. Iemona Jusiñamuimo iobillacinona fecadimaci. Eo rajicaillamona, raitimaci:

—Bie isoide siño comena jaca cioñedicaí.

*Jesúdi Levína fetua rafue*

(Mt 9.9-13; Mr 2.13-17)

<sup>27</sup> Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiena o jaillena, cue diga bi.

<sup>28</sup> Naidacaida, Jesús diga jaillanona, ie maijiana fainonocaide.<sup>29</sup> Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiaí guisaibitimaci. Jesús diga danomo guitimaci.<sup>30</sup> Nainomo fariseuai cominidi, Moisés micori llogacino llofueraini diga, jamai bitimaci. Jesúna ciuanona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci.<sup>31</sup> Jesús iena cacajano, llote:

—Ecairedino médicona jitaiñedimaci; iadedi duidinodi médicona jitaídímaci.<sup>32</sup> Jusiñamui díbeimo mareuidinona uaiñedídicue; iadedi maraiñedinona uaiñedídicue.

*Jesúmo comini guiñenana jicanua rafue*

(Mt 9.14-17; Mr 2.18-22)

<sup>33</sup> Naie facaise fariseuai dinena Jesúmo llote:

—Cai einamací lua isoi, Jusiñamuina cai raise iobitalena, guiñenaruillaí illa facaiseconí guiñedícaí. Jusiñamuimo jicabidícaí. Cai jeacino facaina sunaicabitícaí. Cai einamací rafuedo Juan Bautista llofueoicaigano jaidimaci. Cai

llofuegano iedo jiaí jaidimaci; iadedi o llofueoicaigano jaca guitimaci. ¿Bue ñellena cai einamací rafuedo jaiñedimaci?

<sup>34</sup> Jesús uai ote:

—Jiaíe rafuedo iena lloiticue. Coniruedi ie aina uarui ia iobilla jira, ie nabaiñiaí sunaiñedimaci. Iobillamona guitimaci. <sup>35</sup> Jiaíruído jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. <sup>36</sup> Jiaíe rafuedo iena lloiticue: Nia jocoñega comue iniroidi jacaíe iniroimo jilliñega. Jilliadi jocua mei, comue iniroi jacaíe iniroimona fo llirite. Eo fodo cuararite. Jai maraiñeno cioite. <sup>37</sup> Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiaí faifite. <sup>38</sup> Como finoca vino comogomo jonelle. Iemei iena faifñeite. <sup>39</sup> Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamací rafue ifomo jiaíe rafue birui ite. Iena omoimo llocabiticue. Iedo jaidicai; ia omoi einamací rafuemo omoi fibilla jira, jiaíe rafuedo birui jaiacaiñedomoi —llote.

## 6

### *Sábadoruimo Jesús llofueoicaigano maijia rafue (Mt 12.1-8; Mr 2.23-28)*

<sup>1</sup> Jiaíruído sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijano, golluano, guicana jaidimaci. <sup>2</sup> Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijamona, caimona jai maijidimaci. Caimona jeacinona jai finodimaci.

<sup>3</sup> Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiaí diga Jusiñamui jofomo fo jaide. <sup>4</sup> Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede. <sup>5</sup> Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

*Jesúdi onollina idisarodimiena jillotaja rafue*  
(Mt 12.9-14; Mr 3.1-6)

<sup>6</sup> Jiaie sábadoruimo judíuai ofiracomo Jesús jaillanona, llofujete. Ie facaise nainomo nabellimo idisarodimie ite. <sup>7</sup> Moisés micori llogacinona llofueraini, fariseuai diga, Jesúmo eruidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode. <sup>8</sup> Naimaci comeciaina facajacinona Jesús uíñuamona, onollina idisarodimie mo lloste: —Cue ecimo naidada. —Iemei Jesús ecimo naidadate.

<sup>9</sup> Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuen a birui omoi meineiadedi, birui marañede rafue finodomoi. Sábadoruimo ¿nie isoide rafue finuana rairuidomoi?

<sup>10</sup> Naimacimo eruaillanona, duidimie mo lloste:

—O onolli mai oni ñuita. —Iena ñuitajanona jillode.

<sup>11</sup> Nainomo itino iena cianona, eo iciritimaci.

—¿Niese Jesúna nibaiiticaí? —naimona coniniri siadotimaci.

*Jesúdi ie doce llofueoicaiganona fetua rafue*  
(Mt 10.1-4; Mr 3.13-19)

<sup>12</sup> Nairui aneduaimo Jesús jaide, Jusiñamui diga ñaillena. Namona naio jide. <sup>13</sup> Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode. <sup>14</sup> Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé, <sup>15</sup> Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. <sup>16</sup> Judas; naimiedi Jacobo jito. Judas Iscariote micori; naimiedi Jesúna gaitatatie.

*Jesúdi ailluena cominina llofua rafue*  
(Mt 4.23-25)

<sup>17</sup> Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiai ite. Naimie lluomo cacareillena bitimaci. Naimaci duicomona jiai jilloiacadimaci. <sup>18</sup> Jananiai anamo itinomona Jesús jananiaina oni orede. <sup>19</sup> Nana comini naimiena jetaacadimaci. Naimie mo siño uai illa jira, naimiena jetajamona, naimaci duicomona jillodimaci.

*Jesús lloga rafue*  
(Mt 5.1-12)

<sup>20</sup> Ie llofueganomo eruailanona, Jesús llote:

—Naimie anamo omoi jai illamona, Jusiñamui omoina sedaacana rafuena omoina llofueiticue. Naimiena jitaidomoina, omoina sedaite. Comeciaina facadomoi: “Jusiñamui jitaillacinona daní finonidicai; ia Jusiñamui caina canuamona, iena finoiticaí”. Naimie comini omoi illamona, naimie omoina canoite. Iemona caimare iitomoi. <sup>21</sup> Naimie jitaillacino omoi finuamona, Jusiñamui omoina sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoina sedaite. Ailluena comini jeacino finocana jaidimaci. Iena uiñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoi. <sup>22</sup> Cuemo omoi duia, duere sefuitomoi. Jiaie comini omoina enoitimaci. Omoina oni dotaitimaci. Omoina jeare ñaitimaci. Cuemo omoi duilla jira, omoina jamaitimaci; ia Jusiñamui omoina caimare itataite. <sup>23</sup> Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefua, iocire omoi jai. <sup>24</sup> Iese iitomoi; ia Jusiñamuina jitañedino ico duere sefuitimaci. Comeciaina facadimaci: “Jusiñamuina jitañedicaí. Marena birui iticaí. Nana cai comeciai jitaillacino birui caimo ite”. Iese birui itimaci; ia Jusiñamui naimacina ico duere finoite. <sup>25</sup> Jusiñamuimona buena birui jitañedino ico duere sefuitimaci. “Nana cai comeciai jitailla rafue caimo birui illa jira, Jusiñamuimona buena jitañedicaí” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitañedicaí” damerie birui raitimaci. Naimaci jeacino facaina sunañedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. <sup>26</sup> Naimaciri iobillamona, omoi jaiagaídi Jusiñamui facaina llorainina abi caitadinona marena ñaitimaci. Damerie birui daje isoidimaci. Jusiñamuina iobitaiacañedimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

*Jesúdi iba oñenana llua rafue*  
(Mt 5.38-48; 7.12)

<sup>27</sup> Jesús llote:

—Cue lluaana cacajamona, iena ñino. Finuamona omoina enoidinona isirui. Naimacina cano. <sup>28</sup> Omoi jeare ñaitinona marena ñaino. Omoina jeare finodino facaina Jusiñamuimo

omoi jii. <sup>29</sup> Omoi cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoi iniroina bu bairoiacania, omoimo naimie nia jicañenia, naimie jitailla iniroi baifemo naimiemo feca. <sup>30</sup> Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno. <sup>31</sup> Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino. <sup>32</sup> Naimie cominina omoi illamona, nana comini daje isoi isirui. Omoina isiruitinona omoi isirui, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baifemo faiñedomoi. Naimaci isoi itomoi. <sup>33</sup> Naimie cominina omoi illamona, nana comini daje isoi cano. Omoina canodinona omoi canoia, mare; iadedi omoina canoñedinona omoi canoñenia, Jusiñamui omoina: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baifemo faiñedomoi. Naimaci isoi itomoi. <sup>34</sup> Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoina: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoi fecañenia, maraiñede rafuena finoraini baifemo faiñedomoi. Naimaci isoi itomoi. <sup>35-36</sup> Omoina gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuirñeno; ia Jusiñamui omoi raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uiñoitimaci. Jusiñamuidi cominina duenaila isoi, cominina omoi jiai duenai.

*Jesúdi jiaie cominina mameriñenana llua rafue  
(Mt 7.1-5)*

<sup>37</sup> Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoina duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena

feitañeite. <sup>38</sup> Jiaie rafuedo iena lloiticue. Rana omoi fecaia, iena raise omoi gaieia, ico ibana omoi oia, raise gaiecana feiñoitomoí. Ie isoide. Jiaínomo maraiñede rafuena finoñeno; ia naimacina duenaillamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoí.

<sup>39</sup> Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicinodo omoi jaiñenia, uisinidimie isoi iitomoí. Uisinidimie jiaie uisinidimiena ifonide. Ifo iade, nagamaiaí dafomo uaidiaímaiaí. <sup>40</sup> Fueotimie ie llofueraíma baífemo uaiñede; iadedi naimie raise fueoia, ie llofueraíma isoi jaite. Raise fueollena, cue uaimo cacarei. <sup>41</sup> Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoi mo ailluena ite maraiñedicinomo nano omoi comecina faca. <sup>42</sup> Omoi mo maraiñedicino illamona, ¿niese omoi ecimo itimiena mameritomoí? Omoi mo ite maraiñedicinomo omoi comecina facacaiñena jira, maredinona abi caitadinodomoí. Omoi comeciaina nano raise fino. Iemei omoi ecimo itimiena canorenitomoí. Naimie comecina raise canorenitomoí.

*Jesúdi riará llisilla llilla llua rafue*

*(Mt 7.17-20; 12.34-35)*

<sup>43</sup> Jesús nia llofueite:

—Mare riará maraiñede riará isoi llisiñede. Maraiñede riará mare riará isoi jiaí llisiñede. <sup>44</sup> Llisillamona nie isoide riará illana uiñoticaí. Amena ie llisilla llillamona amena marena uiñoa. Llillamona, amena maraiñenana jiaí uiñoa. Eecuaimona uvas railla riarana oñedicaí. Monaigimona higos railla riarana jiaí oñedicaí. <sup>45</sup> Ie isoide. Naimaci comeciaino iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

*Jesúdi naimiena ñnuana ñaia rafue*

*(Mt 7.24-27)*

<sup>46</sup> Jesús nia llofueite:

—Omoi mona damierie cuena: “Cai Nama” raitomoí; iadedi cue llogacinona finoñedomoí. <sup>47</sup> Diga comini cue dine bitimaci. Cue uaina cacadimaci. <sup>48</sup> Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofa raise finua jira, jofa goiñede. Iena faifiñede. Ie isoide. Cue lluana ñnotimie faifiñeite. <sup>49</sup> Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raíñede. Noci deidemo, eo



jínuidemo, jofomo ille toia, jofu goillamona, jai eo judaisite. Iena faifide. Ie isoide. Cue lluana ñnoñedimie faifite —llote.

## 7

### *Jesúdi capitán mullaïmana jillotaja rafue* (Mt 8.5-13)

<sup>1</sup> Ie llua fuillamona, Jesús Capernaumo jaide. <sup>2</sup> Nainomo romanos railla nairaimo duide illaïma ite. Cien soldaduaina sedauide. Naimiedi capitán. Judúñedimie. Ie mullaïma eo duide. Niade fiodaiacade. Capitán naimiena eo gaide. <sup>3</sup> Capernaumo Jesús illana capitán fidiano, Jesús ñine judúuai einamacina orede. Naimie ñine Jesús billena jitaide. Ie mullaïmana jillotajaïbillena jitaide. <sup>4</sup> Jesús ñine naimaci rillano, capitán ñine naimie billena, naimiemo duere jicanotimaci. Raitimaci:

—Naimiedi caïmona maremiëna jira, naimiëna o canuana jitaïdicaï. <sup>5</sup> Cai nairaina isiruite. Ie ucube ñiga cai ofiracona finotate.

<sup>6</sup> Iena cacajamona, Jesús naimaci ñiga jaide. Capitán jofomo iairei Jesús ria, capitádi Jesús ñine ie nabaiñiaïna orede, Jesúmo llollena:

—Maestro, biñeno. Jamai bue cue isoilla jira, cue jofomo biñeno. <sup>7</sup> Jamai bue cue isoilla jira, o ñine jiaï jaiñedïcúe. O illanomona o uaido cue mullaïma jilloita. <sup>8</sup> Jiaïe illaïcomini anamo iticúe. Naimaci lloga uaina ñnoticúe. Cue anamo jiaïe soldaduai illanona, cue uaina ñnotimaci. Cue anamo cue mullaïma illa jira, naimiedi cue uaina ñnote. O anamo naie ñuico illa jira, o uaina bene o lloia, cue mullaïma jilloite.

<sup>9</sup> Iena cacajano, Jesús raïjicaide. Oni dobaidajano, naimie ñiga jaidinomo llote:

—Bie isoidimie cue uaina ñnotimiena jaca baiñedïcúe. Cai judúuai cominimona bie isoidimiena jaca ññede. Mai abido jai.

<sup>10</sup> Capitámona bitino abido capitán jofomo rillano, mullaïma jai jilluana cïodimaci.

### *Jesúdi feciño jitona jillotaja rafue*

<sup>11</sup> Jiaïruido Naïn railla nairaimo Jesús jaide. Ie llófueoïcaigano jiaï jaidimaci. Ailluena comini jiaï jaidimaci. <sup>12</sup> Naie nairai ie nasemo naimie iaireicaïa, jai fiodaitimiena comini jino atiana cïode. Naie fiodaitimiedi conirue. Ie eidi feciño. Dajede ie jitodi jai fiodaite. Ailluena Naïn itino naie feciño ñiga jaidimaci. <sup>13</sup> Jesús naiñaiñona cïuanona, naiñaiñona duenaite. Naiñaiñona raite:

—Mai eeñeno.

<sup>14</sup> Fiodaitimie ñine Jesús jaïllanona, naimaci ieconi naidadallena, ie uiga rana jetade. Naimiëna uitinodi ieconi naidadatimaci. Fiodaitimie mo Jesús llote:

—Mai a rainada.

<sup>15</sup> Iena Jesús llua mei, naie fiodaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite. <sup>16</sup> Naieri nana jacinaitimaci. Jusiñamuimo iobillacinona fecadimaci. Raitimaci:

—Jusiñamui facaina lloraima cai motomo ite. Naimie uai eo siño. Naimiena Jusiñamui oretaja jira, Jusiñamui cana birui canoacana jira, iobidicai.

<sup>17</sup> Nana Judeamo itino Jesús finoca rafuena fididimaci. Judea enirue fuemo ite nairaiaidi jiai fididimaci.

*Jesús dine Juan Bautista micori ie llofueoicaiganona oretaja rafue*

(Mt 11.2-19)

<sup>18</sup> Juan Bautista micori llofueoicaiganodi nana Jesús finoca rafuena fidiano, iena naimiemo llote. Ie llofueoicaiganomona Juan micoridi menamiena uaidote.

<sup>19</sup> Llote:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuiriticai?” naimiemo jicano.

<sup>20</sup> Jesús dine iaimaiai rillano, Jesúsimo llotiaimaiai:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiena o illana uiñoiacadicaí. Imieñediódona, jiaimie billemo nia ocuiriticai. Cocomo llono.

<sup>21</sup> Jesús dine iaimaiai billa facaiseconi, Jesús diga isoide duicuai illanona jillotate. Jananiai anamo itinomona jananiaina oni jiai orede. Uisnidinona uisina dane ciotate.

<sup>22</sup> Ie jira Jesús iaimaiaimo llote:

—Cue llua cacadomico. Cue finoca rafuena ciodomico. Juan dine abido omico jaillanona, iena naimiemo llono. “Uisnidino jai ciolimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci”. Iese naimiemo llono. <sup>23</sup> Jiai llono: “Ñibai nana cue rafuena raise cacaiñedio; ia cuena jaca nia inocana o jaia, caimare iitio”.

<sup>24</sup> Iaimaiai abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isodimiena ciodomoi? Daje uaido rafuena comequina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide. <sup>25</sup> ¿Bue ñellena naimie dine jaidomoi? Mare

iniroina jítadimiena cioñedomoi. Mare iniroina jítadinona omoi cioacaniadedi, illaicomini dine jaidomoi. Naimacimo ailluena ra ite. <sup>26</sup> Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. <sup>27</sup> Malaquíás micori naimiena jaie cuela: “Jusiñamui raite: ‘Ero, o uicodo cue rafuena lollena, damiena oretaiticue, comini comeciaina marecinona duiñollena’ ” cuela. Malaquíás Juan Bautistana cuete. <sup>28</sup> Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuede; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi.

<sup>29</sup> Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadimaci. Gobierno ucube orainidi jiai fecadimaci; <sup>30</sup> iadedi fariseuai iobillacinona fecañedimaci. Moisés llogacinuaina llofueraini jiai fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. <sup>31</sup> Jesús llote:

—Cuenta ñnoñedinona lloiticue: Ero, omoína ñaiticue. <sup>32</sup> Jifanote uruai isoidomoi. Uruiai jifanoiacania, naimaci nabaiñiaina uaiduanona, raitimaci: “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. <sup>33</sup> Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uarico isoi ite” raitimaci. <sup>34</sup> Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenta jiai gaiñedomoi. Ie jira cuenta jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”. <sup>35</sup> Iese raitomoi; iadedi Jusiñamuina ñnotinodi cue finoca rafuena marenana uñnotimaci.

### *Jesús Simón jofomo illa rafue*

<sup>36</sup> Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite. <sup>37</sup> Jesús guitemo, daje riño fo jaide. Naiñaiñodi marañede rafuena finoraño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga. <sup>38</sup> Judíuai aciaita jaca guisoidimaci. Jinafo dine eilli jonesuidimaci.

Fo jaillano, naie riño Jesús abimo naidaide. Naiñaiño eia-mona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo fracomona soride rana totade. Naimiena naiñaiño isiruillamona, iese naiñaiño finode. <sup>39</sup> Iena çuanona, Simón dama começina facade: “Bimie Jusiñamui facaina lloraimadena, nie isoide naimiena jetade riñona niade uiñote. Naimiedi naiñaiño maraiñede rafuena finorañona uiñote. Iena naimie uiñuamona, naiñaiñona jino raire orede. Naimiedi Jusiñamui facaina lloraimañede”. <sup>40</sup> Jesús naimie começina facajacinona uiñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

<sup>41</sup> Jesús llote:

—Damie menamaiaimo ucubena fecade. Damiemo quinientos diga ucubena fecade. Jiaimiemo cincuenta diga ucubena fecade. <sup>42</sup> Ie iade, naiena abido meidonidiaiamaiai. Ie jira ucubena fecadimiedi raite: “Dama omico meidoñega. Naiena jai feitaticue”. Ero, Simón, çnimieca ucubena fecadimiena eo isiruite?

<sup>43</sup> Simón dinena uai ote:

—Cue começi raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

<sup>44</sup> Iemei Jesúsdi riño dine dobaidajanona, Simómo llote:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote. <sup>45</sup> Naiñaiño cue ecimo fo billanona, cue eillina diga icaiño llibanote. <sup>46</sup> Naiñaiño cue eillimo soride rana totade. <sup>47</sup> Naiñaiño mo eo jeacino ite; ia cuena naiñaiño eo isiruillamona, nana ie jeacinona jai oni dotajana uiñoticaí. “Jeacino cuemo raise iñede” começina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o começina faca.

<sup>48</sup> Naiñaiño mo llote:

—O jeacino jai oni dotaca. Iena jai feitaticue.

<sup>49</sup> Jiaino nainomo guillanona, coniniri ñaitimaci:

—Bimiedi çnie isoidimie? Bimie jeacino oni dotanide.

<sup>50</sup> Jesús dinena riñomo llote:

—Cuen a o ñnua jira, o jeacínomona jai jillodio. Mai uri o jaillano o i.

## 8

### *Dajerie riñoniai Jesúna canua rafue*

<sup>1</sup> Ie facaise diga nairaimo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui ñibeimo naimaci comeciai iuaina meiduanalofuete. Ie doce llofueoicaigano naimie diga jaidimaci.

<sup>2</sup> Dajerie riñoniai jiai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate. <sup>3</sup> Juana ite. Naiñaiño ñinidi Chuza. Herodes railla illaima ecimo naimie maijiuide. Susana ite. Jiaie riñoniai jiai itimaci. Naiñaiñuai ramona Jesúna canouidimaci.

### *Jesúdi trigona judaidimiena llua rafue*

(Mt 13.1-9; Mr 4.1-9)

<sup>4</sup> Diga nairaiaimona ailluena comini Jesús dine billanona, naimacimo llote:

—Jusiñamui omoina sedaacana omoi fueollena, bie rafuena lloiticue. <sup>5</sup> Damiedi trigona judaiaide. Naimie judaiaimona naisomo janore iduai juide. Comini nainomo jaillano, iena saitadimaci. Bai jailla mei, silliniñiai iena jiai guisaibite. Ie jira sicoñede. <sup>6</sup> Nofiemo jiaie iduai juide. Sicode; iadedi jinui raise iñena jira, duide. <sup>7</sup> Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede. <sup>8</sup> Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena ñino.

### *Jesús ie como lloga rafuena llofuia rafue*

(Mt 13.10-23; Mr 4.10-20)

<sup>9</sup> Jesúsimo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

<sup>10</sup> Uai ote:

—Jusiñamuidi omoina ie sedaacana rafuena jai uiñotade. Jiaie iena uiñotedomoi. Jiaie cominina iena ñia uiñotañede. Ie jira bie isoidicínodo naimacimo lloticue. Cue siño finoca rafuena ciodimaci; iadedi iena naimaci ñinoñena jira, uiñoteno jaidimaci. Cue llofuiana jamai cacadimaci; iadedi naimaci ñinoñena jira, raise cacaiñedimaci. Uiñotenedimaci.

<sup>11</sup> Omoina cue como lloga rafuena llofueiticue. Naie iduaidi Jusiñamui uai. <sup>12</sup> Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina inoi raillano, naimaci naiemona jilloi raillanona, Taife naimaci comeciamo cacaja uaina inotañede. <sup>13</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiemmo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci. <sup>14</sup> Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciamo itabiñede. Jusiñamui jitailla rafuena finocana jaiñedimaci. <sup>15</sup> Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciamona inocana jaidimaci. Eo lliside isoidimaci. Jusiñamui jitailla rafuena sefuiruiñeno inocana jaidimaci.

*Jesús ie rafue llocana jailla llua rafue*  
(Mr 4.21-25)

<sup>16</sup> Jesús nia llote:

—Lamparín bu unia meinocni, jiaie ra bide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca. <sup>17</sup> Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie inotimaci. Damierie inoñedimaci. <sup>18</sup> Cue lluamo raise cacarei. Iena omoi inuamona, Jusiñamui omoína canoite. Omoína uiñocana jaitaite. “Jusiñamui rafuena uiñoticue” raitimiedi inoñenia, Jusiñamui naimiena faifitaite.

*Jesús dibeimo itinona ñaia rafue*  
(Mt 12.46-50; Mr 3.31-35)

<sup>19</sup> Cominina Jesús nia llofua, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci. <sup>20</sup> Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

<sup>21</sup> Jesús uai ote:

—Jusiñamui uaina cacajamona, iena inotino ieca cue eidi, cue amatiaidi.

*Jesúdi jorai baguana llucaitaja rafue*  
(Mt 8.23-27; Mr 4.35-41)

<sup>22</sup> Jiairuido botemo Jesús jailla mei, ie llofueoicaiganomo llote:

—Ruica díbeimo mai cai jailli. —Ie mei jaidimaci.

<sup>23</sup> Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. <sup>24</sup> Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llicaitade. Ieconí aifi llicaiide. Bagoñede. <sup>25</sup> Naimacimo jicanote:

—¿Bue ñellena cuena ñnoñedomoi? —Naimiena

jacinaillamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

*Jesúdi Gadara railla eniruemo illa rafue*

(Mt 8.28-34; Mr 5.1-20)

<sup>26</sup> Ruica díbellemo ridemo, Gadara railla eniruemo sijidimaci. Galilea facaisemo ite. <sup>27-29</sup> Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo nofie moto ifuaimo i-isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue ññenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Ñiese cuena nibaiacadio? Cuena duere finoñeno.

Iese raite, Janaba naie ñimamona oni jai oretajana Jesús llua jira. <sup>30</sup> Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. <sup>31</sup> Jesúmo duere jicanoside, iraimo naimacina nia oretañellena. <sup>32</sup> Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite. <sup>33</sup> Ieconí ñimamona jaidemo, chanchuai abimo jaidimaci. Iena suidemo, iconí jillacimo joraimo chanchuai aisidimaci. Dinomo corobaiside.

<sup>34</sup> Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. <sup>35</sup> Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana ciodimaci. Naimie ñinroina jai jitade. Naimie jai uairicoñede. Iena ciuanona, Jesúna jaciruitimaci. <sup>36</sup> Naie rafuena ciodinodi como bitinomo naimie jilluana llotimaci.

<sup>37</sup> Naimiena naimaci jaciruillanona, naimacimona oni jaillena nana naie eniruemo ite nairaidi Jesús mo jicanotimaci. Ie jira botemo Jesús jaide, ruica dibeimo abido jaillena. <sup>38</sup> Ieconi jaive Janaba anamo illamie Jusúmo jicanote, naimie diga jaillena; iadedi Jesús raite:

—Dama ite. <sup>39</sup> Mai o jofomo o jai. Nainomo itinomo nana Jusñamui omo finoca rafuena lloño.

Ie mei jaide. Nana naimie nairaimo Jesús naimiemo finoca rafuena llocana jaide.

*Jesúdi mena duide riñona jillotaja rafue*

*(Mt 9.18-26; Mr 5.21-43)*

<sup>40</sup> Ruica dibeimo Jesús abido ria, naimie abido billemo naimaci ocuirilla jira, ailluena comini naimiena feiñotimaci.

<sup>41</sup> Jairona mameciredimiedi Jesús dine bite. Naimiedi judíuai rafue ofiraco sedaraima. Jesús mo duere jicanollena, ana bitadate. Naimie jofomo Jesús billena duere jicanote.

<sup>42</sup> Dañaiñode ie jisa. Doce años naiñaiñodi ite. Niadedi fiodaia-cade. Ie jira Jesús mo jicanuaibite. Iena cacajano, naimie diga Jesús jaide. Ie llofueoicaigano jai jaidimaci. Jesús jaillano, diga comini naimiemo ñaijisaide.

<sup>43</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiño jaca buna jillotanide. <sup>44</sup> Jinafo dinena billanona, Jesús iniroi fueda jetade. Iemona diailladi fainonocade. Jillode.

<sup>45</sup> Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicaí.

Ie nabaiñai digá Pedro dinena raite:

—Maestro, ailluena comini o ecimo jaidimaci. Omo ñaijidimaci.

<sup>46</sup> Jesús uai ote:

—Damie cuena jetade. Cue abimona cue uai jaillamona, naimie jai jillode.

<sup>47</sup> Jaive duidiñaiñodi Jesús naiñaiño uaiñuana uaiñote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconí jilluana llote. <sup>48</sup> Jesús dinena naiñaiño raite:

—Ñoo, cuena o ñnua jira, jai jillodio. Mai jaillanona, uri o i.

<sup>49</sup> Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoñeno.

<sup>50</sup> Iena Jesús cacajano raite:

—O comeci jarire iñeno; ia cuena nia ñno. Naiñaiño jilloite.



<sup>51</sup> Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. <sup>52</sup> Nana nainomo itino eecuinaidimaci. Failliñaidimaci. Jesús dinena raite:

—Omoi eeñeno. Cuemona naiñaiñodi fioidañedesa. Jamai inide.

<sup>53</sup> Jai fioidaitedi: “¿Bue ñelli inide raitio?” raillanona jaisitimaci. <sup>54</sup> Jesús fo jailla mei, naiñaiño onollina llinocaida, raite:

—Jitaibici, mai naidacai.

<sup>55</sup> Ieconí naiñaiño joreño abido bite. Naidacaide. Jesús llote:

—Guillena naiñaiño eca. <sup>56</sup> —Naiñaiño moo, ie ei diga, rajicaidíiaímaí. Jesús íaímaímo llote:

—Bie rafuena bumó lloñeno.

## 9

### *Jesúdi ie llofueoicaiganona oretaja rafue*

(Mt 10.5-15; Mr 6.7-13)

<sup>1</sup> Ie doce llofueoicaiganona naimie dine Jesús uaidu-anona, naimacimo ie uaina iñonocade, jananiaina anamona cominina jilloitallena. Duicuaina oni oretallena, iena jiai iñonocade. <sup>2</sup> Naimacimo llote:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”. Duidinona jillota. <sup>3</sup> Omoi jaia, buena uiñeno. Omoi abina riidollena, jiguidana uiñeno. Ailluena rana omoi uiñellena, bolsana uiñeno. Llomenicono uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno. <sup>4</sup> Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. <sup>5</sup> Omoína comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uiñollena, omoi eilliaína oni jaidino.

<sup>6</sup> Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

### *Juan Bautista micori fiodailla rafue*

(Mt 14.1-12; Mr 6.14-29)

<sup>7</sup> Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede. <sup>8</sup> Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

<sup>9</sup> Jesúsna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uñollena, Jesúsna cioacade.

*Jesús cinco mil iñiaina ecaja rafue*

*(Mt 14.13-21; Mr 6.30-44; Jn 6.1-14)*

<sup>10</sup> Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide; <sup>11</sup> iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui díbeimo naimaci comeciai iuaina meiduana llofueete. Duidinona jiai jillotate.

<sup>12</sup> Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaiamo, ianori ite jofuemo naimaci inillena, naimaci guille ollena, bie cominina abido oreta.

<sup>13</sup> Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaideo?

<sup>14</sup> Cinco mil iñiaia nainomo illa jira, ailluena guille jitaillana uñotimaci. Naimaci ainiai, imaci uruiai diga, jiai itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

<sup>15</sup> Iena finodimaci. <sup>16</sup> Naie cinco llomeniconona, naie mena lliciai diga Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. <sup>17</sup> Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

*Pedro Jesúsna llua rafue*

*(Mt 16.13-19; Mr 8.27-29)*

<sup>18</sup> Jiairuido Jesús ie Moomo jiaa facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

<sup>19</sup> Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

<sup>20</sup> Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci. Jusiñamui ona orede.

*Jesús ie fiodaillena llofuia rafue*

*(Mt 16.20-28; Mr 8.30-9.1)*

<sup>21</sup> Jesús naimaci como llogacino bumo llwana rairuide.

<sup>22</sup> Llote:

—Cai judíuiai illaicomini cuena eo duere finoitimaci. Cuena jitañellemona, cuena meineitimaci; iadedi darui amani illanona, fiodaillamona jilloiticue.

<sup>23</sup> Nana ie llofueoicaiganomo llote:

—Cue cominina bu jaiacania, ie jitaile rafuedo jaiñena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite. <sup>24</sup> Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruñenamona cue cominina bu jaia, jaca faifiñeite. <sup>25</sup> Cue cominina bu jaiñenia, nibai eo duere sefuiñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite. <sup>26</sup> Cuena bu meirua, cue uaina bu meirua, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisaí siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue. <sup>27</sup> Uanaicinona omoimo lloticue. Omoimona dajerie nia fiodañeitomoi, illaimana cue bairellena cioitomoi.

*Jesús abi meidocaila rafue*

*(Mt 17.1-8; Mr 9.2-8)*

<sup>28</sup> Ocho digarui illanona, Jusiñamuimo jñillena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uñede.

<sup>29</sup> Naimie jñiamona naimie abi meidocaide. Naimie iniroi naie dacaiño eo userecaide. <sup>30</sup> Ieconí menamie bairiano, Jesús diga ñaitiaimaiaí. Moisés micori joreño ite. Elías jiai ite. <sup>31</sup> Ebire bairediaimaiaí. Jesús Jerusalémo fiodaile rafuena ñaitimaci.

<sup>32</sup> Ie facaiseconi Pedro ie nabaiñiaí diga jai inidimaci; ia casillamona, Jesús ebirenana ciodimaci. Jesús ecimo itiaimaiaina jiai ciodimaci. <sup>33</sup> Iaimaiaí jaiacania, Pedro Jesúsomo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie. — Iese raite; ia ie ñaia rafuena raise uñoñeno jamai ebena ñaite.

<sup>34</sup> Iena naimie nia lluanona, uillie billamona, naimacina ibaide. Uillie ibaibillaconi jacinaitimaci. <sup>35</sup> Uilliemona Jusiñamui naimacimo llote:

—Bimiedi cue jito. Naimiena fetodicue, cue jitaille rafue finollena. Naimie lluaana omoi cacareillanona, iena iino — llote.

<sup>36</sup> Jusiñamui llua mei, dama Jesúsna dane cioidimaci. Jesús diga itino naimaci ciua rafuena naie facaiseconi jaca bumo lloñedimaci.

*Jesúdi Janaba anamo itimiena jillotaja rafue*

*(Mt 17.14-21; Mr 9.14-29)*

<sup>37</sup> Ie areruido anedumona ana bitimacimo, ailluena comini naimacimo dafaifide. <sup>38</sup> Cominimona damie ado llote:

—Maestro, cue dajede cue jito duillana jibuisaibi. <sup>39</sup> Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede. <sup>40</sup> Janabana oni oretallena, o llofueoicaiganomo jicanoticue; ia oretanidimaci.

<sup>41</sup> Iena cacajanona, Jesús ie llofueoicaiganomo llote:

—Cue uai siñonana nia iinoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi iinollena, ¿nie dinori omoi diga iiticue? —Naie duidimie moomo llote—, O jito cue dine mai ati.

<sup>42</sup> Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconi naie urue jillode. Iemei Jesús ie moomo naimiena fecade. <sup>43</sup> Comini iena ciuanona, Jusiñamui siño uai naimiemo illari rajicaidimaci.

*Jesús ie fiodaillena dane llofuia rafue*

*(Mt 17.22-23; Mr 9.30-32)*

Naimaci nia rajicaia, Jesús ie llofueoicaiganomo llote:

<sup>44</sup> —Cue lluaana feitaño. Monamona billanona, imana jaidicue; ia Jusiñamui jitailla jira, jiaruido illaicomini cuena meineitimaci.

<sup>45</sup> Jesús lluaana raise cacaiñedimaci. Naimie iena llofueñena jira, iena raise uiñoñedimaci. Naimiemo iena jicanuana jiai meiruitimaci.

*Jesús ie llofueoicaigano moto imiena ille rafue*

*(Mt 18.1-5; Mr 9.33-37)*

<sup>46</sup> Ie facaise Jesús llofueoicaigano conini uaitajanona raitimaci:

—¿Bu cai moto imiena ille?

<sup>47</sup> Jesús naimaci comeciai facajacinona uiñuamona, nainomo ite cominimona daje urue bai jainanocaida, naimaci motomo naimiena jonete. <sup>48</sup> Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiena ille.

*Jesúdi ie dibeimo itinona llua rafue*

(Mr 9.38-40)

<sup>49</sup> Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

<sup>50</sup> Jesús dinena uai ote:

—Naimiena rairuiñeno. Cai dibeimo itimiedi cai facaisena ite. Ie jira naimie isoidinona rairuiñeno.

*Jesús dinena Jacobo, Juan iaimaiai lletaja rafue*

<sup>51</sup> Monamo abido Jesús jaillirui iairei ia, Jerusalémo jaiacanamo naimie comecina facade. <sup>52</sup> Ie jira dajeriena uicodo oretate. Ie inillinona jenollena, Samaria railla nairaimo jaidimaci; <sup>53</sup> iadedi Jerusalémo naimaci jailla jira, judíuaiñedinona samaritanodi gaiñena jira, Jesús llofueoicaiganona feiñoiacaiñedimaci. <sup>54</sup> Iena fidianona, Jacobo, Juan diga, Jesúmo jicanotiiaimaiai:

—Nama, ¿bie comini jobaillena, monamona irai billena Jusiñamuimo coco jicanuana jitaidio?

<sup>55</sup> Iaimaiaimo eruailanona, Jesús dinena iaimaiaimo riire lletade:

—Dama ite. Iena jitaiñedicue.

<sup>56</sup> Ie mei inillena jiaie illanomo jaidimaci.

*Jesús ie llofuegamiena damie jaillena ie rafue*

(Mt 8.19-22)

<sup>57</sup> Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadicue. O llofuegamiena jaiacadicue.

<sup>58</sup> Jesús uai ote:

—Janorede ocainaiaidi joforedimaci. Silliñiai jillainiairedimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

<sup>59</sup> Jiaimiemo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fioidañena jira, o diga nia jaiñeiticue.

<sup>60</sup> Jesús naimiemo dane llote:

—Dama ite. Cue diga mai bi. Cuen a ñnoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie dibeimo naimaci comecia iuaina meiduana llocana cue diga mai o bi.

<sup>61</sup> Jiaimie Jesúmo llote:

—O llofuegamiena jaiacadie: iadedi cue jofomo nano jaiacadie, cue comina facadollena.

<sup>62</sup> Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

## 10

*Ie rafuena lollena, Jesús setenta digamiena oretaja rafue*

<sup>1</sup> Ie llofueganona llofuia mei, naimacimona Jesús setenta digamiena fetode. Naga naimie jaiacana nairaaimo menamieriena oretate. <sup>2</sup> Naimacimo llote:

—Diga comini ite, naimacina Jusiñamui rafuena ñnotallena; iadedi eo janore lloraini ite. Jusiñamui jicano, jiaie llorainina naimie oretallena. <sup>3</sup> Mai jai; iadedi abi rairuicana jai. Toica llaudaia janallari illanomo illa isoi, omoina oredie. <sup>4</sup> Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoimo dafaifa, are ñaiñeno. <sup>5</sup> Bu ie jofomo omoi ria, jofomo itinomo marena uaido. <sup>6</sup> Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimiemo lloñeno. <sup>7</sup> Nie nairaimo omoi ria, daacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno. <sup>8</sup> Nie nairai omoi ria, omoina naimaci feiñoia, omoi ecalle rana uaitañeno guiño. <sup>9</sup> Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comecia iuaina meido”. <sup>10</sup> Nie nairaimo omoi ria, omoina naimaci feiñoñenia, ie naiso motomo jailanona llono: <sup>11</sup> “Omoi naisomo cai eillimo ite jearacuai jai jaidinotica, marañede rafue omoimo illana omoi uiñollena. Jusiñamui omoina sedaacade; ia iena jitañedomoi” llono. <sup>12</sup> Sodoma nairai jaie eo marañede. Jusiñamui iena jaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

*Jesús ie ñnoñedinona llua rafue*

*(Mt 11.20-24)*

<sup>13</sup> Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñnoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci começiai eo isinotaillamona, naimaci começiai iuai meidotimaci. Naimaci começiai iuai meid-uana jiaie comini uiñotallena, ebinide iniroina jítajanona, jusefo naimaci ifogiaimo jonetimaci. <sup>14</sup> Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. <sup>15</sup> Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci. <sup>16</sup> Omoi llua naimaci cacaacania, cuena cacadimaci. Omoi llua naimaci jítaiñenia, cuena jítaiñedimaci. Cuena jítaiñedinodi cuena oretagamiena jiai jítaiñedimaci. —Jesús naie fetocanomo iese llua mei, oni jaidimaci.

*Je setenta fetocano abido billa rafue*

<sup>17</sup> Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

<sup>18</sup> Jesús naimacimo llote:

—Monamona Taife borilla isoi jaie ana dotajana ciodicue. Iemona cue uai naimie uai baifemo faiana uiñoticue. <sup>19</sup> Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedino omoi anamo jai itataticue. Omoina niese nibaiñeitimaci; <sup>20</sup> iadedi omoi uaina jananiiai ñnua jira, iobiñeno; iadedi Jusiñamui cominina omoi illamona, omoi mameçiai monamo Jusiñamui rabenicomo jai cuiamo iobi.

*Jesús ie Moo diga ñaia rafue*

*(Mt 11.25-27; 13.16-17)*

<sup>21</sup> Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

<sup>22</sup> Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaile diese omoina naimiena uiñotadicue. Ie muidona naimiena uiñotomoi.

<sup>23</sup> Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci. <sup>24</sup> Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie iinotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

*Jesús cai ecimo itimiena isiruillana llua rafue*

<sup>25</sup> Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

<sup>26</sup> Jesús uai ote:

—¿Ni ese Moisés micori llogacinuai iena raite?

<sup>27</sup> Uai ote:

—Moisés micori jaie cueba: “O jitailla jira, o comecina facajamona, cai Nama Jusiñamuina nana o comeci jitaillamona naimiema eo isirui. O abina o isiruilla isoi, o ecimo itinona isirui”.

<sup>28</sup> Jesús dinena raite:

—Marena cue uai otio. Iena o finoia, Jusiñamui illanomo jaca iitio.

<sup>29</sup> Naie llofueraima Jesúmo dane jicanote:

—¿Bu cue ecimo itino?

<sup>30</sup> Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiema fatimaci. Niade ie meini-anona ie ecimona jaisite. <sup>31</sup> Dallu illanona, Jusiñamui diga ñairaima naie naisona jaide. Fagamiema cide; iadedi ecido jaide. <sup>32</sup> Dallu illanona, Jusiñamui jofomo maijiraime jiai jaide. Fagamiema ciuanona, ecido jiai jaide. <sup>33</sup> Ja muidomo Samaria nairai imie jaide. Naie nairaina enoídomoi. Fagamiema naimie ciuanona, naimiema duenaite. Iemona naimie canoacade. <sup>34</sup> Naimie dine jaillano, ie bofellañona manode. Jiai maitade. Ie burro emodomo jonecaida, naimiema uite. Inillinomo rilla mei, nainomo naimiema sedade. <sup>35</sup> Ie areruido ie inia jofo namamo janore ucubena fecade. Raite: “Naimiema seda. Naimie facaina jiaie rana o oia, abido cue bia, iena ibaiticue”. Ie mei oni jaide. <sup>36</sup> —Naie llofueraimamo Jesús dinena jicanote— ¿Fagamiema ecimo itimiedi bu?

<sup>37</sup> Uai ote:

—Fagamiema duenaitimie.

Jesús raite:

—Jai raise uiñotio. Mai jai. Ie isoi finocana o jai.

*Jesúdi Marta iaiñuai María jofomo illa rafue*



<sup>38</sup> Nia macaritimacimo, comini illanomo Jesús ie llofueoicaigano diga ridimaci. Marta raillañaño ie jofomo naimiena feiñote. <sup>39</sup> Naiñaño euiñodi María. Jesús ecimo llaribamo María ana raide, naimie llofuiacinona cacareillena; <sup>40</sup> iadedi Martamo maijille eo illa jira, naiñaño naimie llofuiacinona cacarefiñede. Ie jira Jesúsno llofe:

—Nama, cue euiño cuena canoacaiñena jira, daño maijdicue. “O euiñona cano” naiñaño llono.

<sup>41</sup> Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. <sup>42</sup> María iemo comecina jai facade. Naiñaño cue llofuiana nano cacaiacade. Ona canollena naiñaño lloñeiticue.

## 11

*Jusiñamuimo Jesús jia rafue  
(Mt 6.9-15; 7.7-11)*

<sup>1</sup> Jiairuido ie Moo diga Jesús ñaia, ie llofueganomona damie naimiemo llofe:

—Nama, jiana caina llofue, ie llofueoicaiganona Juan Bautista micori llofui aiso.

<sup>2</sup> Jesús uai ote:

—Omoi jia, iese omoi ji:

Ore Moo, comini ori iobidesa.

O illaimana jira, nana cominina o anamo raire itata.

O jaienisa o jitaillacinona finua isoi, cominina o jitaillacinona finota.

<sup>3</sup> Nagarui guille caimo itata.

<sup>4</sup> Caina jeare jaino finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai ñnoñellena.

<sup>5</sup> Iena naimacina nia llofuellena, Jesús jiaie rafuena llofe:

—Naiona mona moto llomenicono jicallena, o nabai dine o jiaia, ado llofitio: “Nabai, daje amani llomenicono jitaidicue.

<sup>6</sup> Jiaie nabai cue jofomo como ride. Jaca cuemo buedi iñede, naimiena cue ecallena”. <sup>7</sup> Ie jofo jeraimona o nabai fairioite:

“Cuena uaidoñeno. Cue nasedi jai cue ibaicasa. Cue uruia jai inidimaci. Jai inidicue. Llomenicono omo fecallena casi-acaiñedicue”.

<sup>8</sup> Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitaillera fecaite.

<sup>9-10</sup> Daje ra omoi faifia, iena jenodomoi. Raise jenoia, iena baitomoi. Damiena omoi jenoia, naimie illanomo jaidomoi. Nainomo naimiena baillamona, omona feiñoite. Ie isoide. Buena omoi jitaia, Jusiñamuimo jica. Iena omoi jicaja

jira, iena naimie cacajamona, omoimo iite.

<sup>11</sup> 'Ero, omoimona ie moomo llomeniconona ie jito jicaia, noficina fecañede. Lliciaina jicaia, jaiona fecañede. <sup>12</sup> Jigina jicaia, acaidona fecañede. <sup>13</sup> Jeacinona finocabidomoi; iadedi omoi uruiaimo mare rana fecacabillana uiñotomoi. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreñona itataite.

*Comini Jesúna jeare ñaia rafue*  
(Mt 12.22-30; Mr 3.19-27)

<sup>14</sup> Jiairuido Janaba anamo illamiemona Jesús Janabana oni orede. Janabana nia oretañenia, Janaba anamo naimie illamona, naie iima ñainide. Janaba oni jailla mei, naimie ñaite. Ie jira comini rajicaidimaci; <sup>15</sup> iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

<sup>16</sup> Jiaino naimiena facaciacasite. Raitimaci:

—Siño uai omo ia, Jusiñamuina siño rafuena finota.

<sup>17</sup> Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. <sup>18</sup> Ie isoide. Beelzebú uaido jananiaina, omoi llua isoi, cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. <sup>19</sup> Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi.

<sup>20-22</sup> 'Jiaie rafuedo iena lloiticue. Ero, ie rana raise riiduamona, maividimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana fiñide; iadedi naimie baifemo maividimie bia, naimiena emodofillamona, ie rana fiñrede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue llua uiñotomoi.

<sup>23</sup> 'Cue dibeimo iñedimie cuena enoide. Cue dibeimo cominina itañedimiedi naie cominina cuena iñotañede.

*Janaba anamo illamie rafue*  
(Mt 12.43-45)

<sup>24</sup> Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comecina facade: “Navui cue anamo illamie dine abido

jaiticue". <sup>25</sup> Abido naimie bia, naie iima comeci namanidena naimie baite. <sup>26</sup> Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiai naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci inoñenia, eo fodo jaitimaci.

*Daje riño Jesús eina marena ñaia rafue*

<sup>27</sup> Cominimo Jesús llotemo, comini motomona dañaiño Jesúsimo llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

<sup>28</sup> Jesús uai ote:

—Marena llotio; ia Jusiñamui uaina naimaci cacajamona, iena inuamona, jiaino eo caimare iitimaci.

*Dajerie Jesús siño rafuena finuana jitailla rafue*  
(Mt 12.38-42; Mr 8.12)

<sup>29</sup> Ie facaise diga comini Jesús dine biñoidimaci. Naimacimo llote:

—Birui ite cominidomoi marañedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. <sup>30</sup> Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Ie isoide. Fiodail-lamona cue jilluamona birui ite cominidi Jusiñamui cuena oretajana uiñoitimaci. <sup>31</sup> Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena inoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena inoñedomoi?” omoina ico ñaite. <sup>32</sup> Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoina rañeiticue. Jonás micori baifemo birui uaidicue; iadedi cuena inoñedomoi.

*Jesús comini illa rafue*  
(Mt 5.15; 6.22-23)

<sup>33</sup> Jesús llote:

—Lamparín bu unia mei, jofó anamo bainino rainañega. Cirigai anamo rainañega. Ie rairanomo rainaca, comini

nainomo bia, jofo jerai lligaiñollena. <sup>34</sup> Omoï uisi diga rana ciodomoi. Omoï uisi maraiñenia, rana raise cioiñedomoi. Ie isoide. Omoï comeci maraiñenia, maraiñedicinona finocana jaidomoi. Jusiñamuina uiñoñedomoi. Ie rafuena jiai uiñoñedomoi. <sup>35</sup> Ie jira omoï comeciaina raise fino, cue rafuena omoï raise ñnollena. <sup>36</sup> Nana omoï comeciaina marena ia, cue rafuena ñnocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

*Jesúdi judíuái illaicomínina ñaia rafue*  
(Mt 23.1-36; Mr 12.38-40; Lc 20.45-47)

<sup>37</sup> Comínina Jesús llofuia mei, dajé fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide. <sup>38</sup> Naimie nia guiñenia, naimaci einamaci llogacínodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comecina facade: “Naimie eo mare llofueraima. ¿Ñiese cai einamaci llogacínodo jaiñede?” <sup>39</sup> Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoï abina finodomoi; iadedi omoï comeciaina finoñedomoi. Rana eo nicidotomoi. Omoï comeciaina jearede. <sup>40</sup> Abi uiñoñedomoi. Jusiñamui omoï abiaina omoï comeciaina diga finode. Omoï finoca rafuena uiñote. Omoï comeciaina facajacínona jiai uiñote. <sup>41</sup> Omoï comeciaina marena ia, jiaie comínina canodomoi. Iemona Jusiñamuimona omoï abi jiai mare. <sup>42</sup> Fariseuai, omoïmo rafuena lloiticue. Nana omoï illimo ite ramona Jusiñamuimo janore jisa fecacacabidomoi; iadedi jiaie comínimo mare rafuena raise finoñedomoi. Jusiñamuina jiai raise isiruiñedomoi. Nana naie isoide rafuena omoï jiai finua. <sup>43</sup> Comíni omoïri acarillena, ofiracomo uicomo raíacadomoi. Níne omoï macaria: “Jamai bue isoíñedicaí” omoï comeciaina facajamona, jiaie comíni omoína uaiduana gaidomoi. Iese omoï jailla jira, Jusiñamui omoína duere finoite. <sup>44</sup> “Bainino ite raírafo emodomo comíni uiñoñeno macarillamona, naimaci abi jai jearede” raitomoi. Bainino ite raírafo isoidomoi. Omoï diga jiaie comínidi omoïmo ite jeacínona uiñoñeno nabairillamona, jeacínona jiai finodimaci. Iese omoï finocana jaiia, Jusiñamui omoína duere finoite.

<sup>45</sup> Naie facaise Moisés llogacínuaína llofueraínimona damie Jesúsimo llote:

—Iese o lloia: “Jeaicino finodomoi” caina jiai llotio.

<sup>46</sup> Jesús uai ote:

—Jusiñamuimona jiai duere sefuitomoi. Omoï einamaci llogacínuaído raise naimaci jaillena, diga rafue comíni finuana

jitaidomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadica” comecina facadomoi. <sup>47</sup> Omoi jaiagaidi Jusiñamui facaina llorainina meinetimaci. Naie lloraini micoriai raiafuai birui marena finodomoi; <sup>48</sup> iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” rait-omoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoina duere finoite. <sup>49</sup> Omoina Jusiñamui abi uiñuamona jai llote: “Cue rafuena llollena, naimaci dine cue facaina llorainina oretaiticue. Cue rafuena eo uiñotinona jiai oretaiticue. Dajeriena meineitimaci. Jiañona duere finoitimaci”. <sup>50</sup> Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite. <sup>51</sup> Abel micori jaie ite. Ie ama naimiena meinete. Naimie facaisemona omoi jaiagaidi diga llorainina meinetimaci. Zacariana jiai meinetimaci. Jusiñamui jofomo Jusiñamuimo toica ocaina jobaisoillano motomo naimiena meinetimaci. Omoimona Jusiñamui birui iba oite. <sup>52</sup> Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaño iena raise uiñuana jitañedomoi. Iese omoi jailla jira, Jusiñamui omoina duere finoite.

<sup>53</sup> Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraini daje isoi uai uaitatimaci. <sup>54</sup> Naimie raise uai oñedena, naimiena duere finoacadimaci.

## 12

### *Jesúdi mareuidinona abi caitadinona llofuiia rafue*

<sup>1</sup> Ie facaiseconi eo ailluena comini Jesús dine ofidimaci. Ailluena illa jira, conini eilliaimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredica” raitimaci; iadedi mareuidinona abi caitadimaci. Naimacimona abina rairui. <sup>2</sup> Naimaci birui finoca rafuena birui bainino finodimaci; ia Jusiñamui naimaci comeciati iticinona ico uiñotaite. <sup>3</sup> Ero, cue rafuena birui anado llocana jaidomoi; ia ico marefodo iena llocana jaitomoi.

### *Jesúdi jaciruiñeno llofuiia rafue*

(Mt 10.28-31)

<sup>4</sup> Ie llofueganomo Jesús llote:

—Cue nabaiñiaidomoi. Omoina meineiacadinona jaciruiñeno. Omoi abina meineredimaci; ie iadedi omoi joreño meinenidimaci. Omoina naimaci meinia, omoi joreño Jusiñamui dine jaite. Iena uiñuamona, omoi

meineiacadinona jaciruiñeno. <sup>5</sup> Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiena jacirui. <sup>6</sup> Ero, dabecuiro janorede sillina fecadomoina, eo janore ibaca. Silliñiaí eo janore raifide; iadedi Jusiñamui naimaci illana uiñote. <sup>7</sup> Ero, niga ifotirai omoimo illana Jusiñamui jiaí uiñote. Naimiedi omoína sedajana jiaí uiñote. Silliñiaí baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

*Jesús naimiena janoñenana llofuia rafue  
(Mt 10.32-33; 12.32; 10.19-20)*

<sup>8</sup> Ie llofueoicaiganomo Jesús nia llote:

—Cue rafuena omoi llumona, jiaíno omoína duere finoitimaci. Cuena birui omoi janoñenia, nana comini Jusiñamui jaienisaí uicomo ico ia, nainomo omoína janoñeiticue. “Cue cominidomoi” omoína raiticue. <sup>9</sup> Cuena birui omoi janoia, nana comini Jusiñamui jaienisaí uicomo ico ia, nainomo omoína janoiticue. “Cue cominiñedomoi” omoína raiticue. <sup>10</sup> Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreñoña jeare ñaitimie jeacinona feitañeite. <sup>11</sup> Cue rafuena omoi llua muidona, duere sefuitomoi. Illaicomini dine omoína llogidollena comini uia, omoi abi riidollicinomo omoi comeciaina jarire facañeno. <sup>12</sup> Naie facaiseconi Jusiñamui Joreño omoi abi riidollicinona uiñotaite.

*Jesúdi raruiá eo uamona abi rairuillana llofuia rafue*

<sup>13</sup> Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

<sup>14</sup> Jesús uai ote:

—Juezñedicue. Bie isoide rafue cuemo duiñede.

<sup>15</sup> Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi. <sup>16</sup> Iena omoi raise uiñollena, jiaíe rafuedo iena lloiticue. Ucuberedimiedi ie illimona ailluena rana ote. <sup>17</sup> Ie jira comecina facade: “Cue illimona ailluena rana oticue; iadedi ¿ninomo iena eenoiticue? <sup>18</sup> Birui cuemo ite eenoracona judaíticue. Ie mei aillue eenoracona finoiticue. Nainomo cue rana eenoiticue”. <sup>19</sup> Ie comecina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caímare iiticue”. <sup>20</sup> Iese comecina facade; iadedi Jusiñamui naimiemo llote: “Abi uiñoñedio. Cue llua jira, ja naiona fiodaitio. Ie mei omo ite ra omo fiebiñeite”.

<sup>21</sup> Dama ramo ie comecina bu facaia, Jusiñamui jitaillacinomo ie comecina bu facañenia, faifite.

*Jesúdi Jusiñamui cai sedajana llua rafue*

*(Mt 6.25-34)*

<sup>22</sup> Ie llofueoicaiganomo Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. <sup>23</sup> Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite. <sup>24</sup> Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite. <sup>25</sup> Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoína a sairitarede. <sup>26</sup> Omoi comeciaina facajamona omoi a sairíñena jira, jiaie ramo omoi comeciaina jarire finoñeno. <sup>27</sup> Safiamo omoi comeciaina faca. ¿Niese sicodimaci? Maijiñedimaci. Iniroina tiforiñedimaci; iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. <sup>28</sup> Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi. <sup>29</sup> Omoi comeciaina jarire icana jaiñeno. “¿Buena guiticaí?” raiñeno. Iemo comeciaina eo facañeno. <sup>30</sup> Jusiñamuina inoñedino iemo comecina facacabidimaci. Nana omoi jitaillacinona omoi Moo Jusiñamuidi uñua jira, naimaci isoi iñeno. <sup>31</sup> Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jiai iite.

*Jesúdi Jusiñamuimo comecina facaja rafue*

*(Mt 6.19-21)*

<sup>32</sup> Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoína itatajamona, omoína sedaite. <sup>33</sup> Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi railano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Fñiriraima nainomo jaiñede. Gñreco nainomo jiai iñede. <sup>34</sup> Aillue ra omoimo ia, Jusiñamuimo

comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

*Jesús ie abido billemo ocurillana llofuia rafue*

<sup>35-38</sup> Jesús nia llofuate:

—Monamona ico cue abido billemo ocuri. Iena omoi raise cacaillena, bie rafuedo iena lloiticue. Damie ie nabai ie ai ua rafue dine naiona jaide. Ie mullaiaia naimie abido billemo ocurillana ocuide. Naimie billemo naimaci raise ocuria, iniroina jitanonona, lamparíniaia unianonona, ocuritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci iniñeno ocuria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uiñoñena jira, jaca ocuricana naimaci illa. <sup>39</sup> Ero, firiraima bille facaiseconi jofo namadi uiñotena, nia caadote, ie ra faifi raillanona. <sup>40</sup> Monamona ico abido biiticue. Omoi ocuriñena facaisemo biiticue. Ie jira cue billemo raise ocuri.

*Jesúdi patrón ie mullaimana ie jofona sedataja llua rafue*  
(Mt 24.45-51)

<sup>41</sup> Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

<sup>42</sup> Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiaie ecade. <sup>43</sup> Ie mei patrón oni jaide. Jofomo abido naimie bia, ie nanoca mullaima raise maijiana fidiia, naimiena raise ibaite. <sup>44</sup> Iobillamona, nana ie raruiaina sedataite; <sup>45</sup> iadedi naie mullaima maraiñenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. <sup>46</sup> Ie ocuriñena facaise ie patrón abido billanona, naimiena meinetaite. Ie uaina iinoñedino isoi, duere finoite. <sup>47</sup> Naie mullaima ie patrón jitailla rafuena finuana uiñote; iadedi iena finoñede. Ie jira eo duere sefuite; <sup>48</sup> iadedi maraiñede rafuena raise uiñoñeno jiaie mullaima finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

*Jesús muidona nana comini uri iñena rafue*  
(Mt 10.34-36)



49 Jesús llote:

—Cuena naimaci ñnollena, eniruemo comini dine biticue. Cuena dajerie ñnuamona, cue cominina jaitimaci. Cuena jiaino ñnoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue. <sup>50</sup> Cue nia eo duere sefuiticue. Iena raire suillena jitaidicue. <sup>51</sup> Nana cominina uri itatallena eniruemo biñedicue. Cuena ñnoñedinodi cuena ñnotinona enoitimaci. Enoillamona, cuena ñnotinona duere finoitimaci. <sup>52</sup> Cue billamona, daje jofomo itino diese danomo iñeitimaci. Dabecuero comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite. <sup>53</sup> Cue lloga rafuena damierie ñnua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

*Jesúdi monamo ite rana llofuia rafue*

(Mt 5.25-26; 16.1-4; Mr 8.11-13)

<sup>54</sup> Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. <sup>55</sup> Bie eniruemo beici dinena aifi bia: “Eo ecasite” raicabitomoi. Iese aifi bia, ua eo ecasite. <sup>56</sup> Abina uiñotinona abi caitadinodomoi. Monamo eruaillamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi. <sup>57</sup> Iemo omoi comeciaina raise facañedomoi. <sup>58</sup> Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina jonetaite. <sup>59</sup> Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

## 13

*Jesúdi comeciaina iuai meiduana dana llua rafue*

<sup>1</sup> Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadordi soldaduaina orede, naie cominina fallena.

<sup>2</sup> Jesús uai ote:

—¿Niese comeciaina facadomoi? “Bie comini iese duere sefuilla jira, jiaie Galilea comini baifemo jeacinona

finodimaci” comeciaina facadomoí. <sup>3</sup> Iese omoí comeciaina facañeno; ia omoí comeciái iuai meiduamo comeciaina faca. Omoí comeciái iuai omoí meidoñenia, omoídi jiaí faifitomoí. <sup>4</sup> Siloé railla tidacana navui ana goillamo, dieciocho digamié saitabidimaci. Iena fididomoí. ¿Niese naimacimo omoí comeciaina facadomoí? “Nana Jerusalémo ite comini baifemo jecinona finodimaci” comeciaina facadomoí. <sup>5</sup> Iese omoí comeciaina facañeno; ia omoí comeciái iuai meiduamo comeciaina faca. Omoí comeciái iuai omoí meidoñenia, omoídi jiaí faifitomoí.

*Jesúdi ie Moo comini comeciái iuai meiduamo fecuise ocurilla llua rafue*

<sup>6</sup> Iena comini raise uñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. <sup>7</sup> Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”. <sup>8</sup> Ie illina sedaraima uai ote: “Dama ite. Daje año nia seda. Riarana abina caigiticue. Eniruena caimaretaiticue. <sup>9</sup> Jiaie año llisia, mare. Llisiñenia, iena tieiticoco”. Ie isoide. Jusiñamui omoí comeciái iuai meiduamo are ocurite; ia meidoñenia, omoína duere finoite.

*Jesúdi jicaidiñaiñona jillotaja rafue*

<sup>10</sup> Jaiaruido sábadoruimo judíuai ofiracomo Jesús llofuate. <sup>11</sup> Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide. <sup>12</sup> Naiñaiñona Jesús cianona, naiñaiñomo llote:

—Ñoo, o duicomona jai jillodio. <sup>13</sup> —Ie mei naiñaiñona jetade. Ieconí naiñaiño atona naidadate. Ie jira Jusiñamuimo iobillacinona fecade. <sup>14</sup> Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite maijillena. Nairuido omoí bi, omoí duicomona omoí jilloillena. Sábadoruimo biñeno. Sábadoruimo maijiñedicaí.

<sup>15</sup> Jesús uai ote:

—Maijiñedinona abi caitadinodomoí. Sábado iruimo maijicabidomoí. Sábado iruimo omoí toiniaina imaci illanomona suiñodomoí, jinui illanomo naimaci jiruaillena. Naie isoide maijia omoímona mare. <sup>16</sup> Ie isoide. Bie riñodi Abraham micori comini. Omoí nairai iñaiño. Dieciocho años Janaba anamo jai illamona, duere sefuide. Naiñaiñona canollena, sábado iruimo naiñaiñona Taife anamona cue jillotaia, cuemona mare.

17 Iena Jesús lluamona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

*Jesúdi mostaza ido llua rafue*  
(Mt 13.31-32; Mr 4.30-32)

18 Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. 19 Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sícode. Ailluena jira, nainomo silliniñai jicaiciaina finodimaci.

*Jesús siritate rana llofuia rafue*  
(Mt 13.33)

20 Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. 21 Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

*Jesúdi Jusiñamui dine rille llua rafue*  
(Mt 7.13-14, 21-23)

22 Jesús diga nairaimo llofuecana jaide. Jerusalén dine jaide.

23 Jesús oni jaillanona, damie naimiemo jicanote:

—Nama, ¿niga comini o uaina iñoitimaci? —Jesús uai ote:

24 —Monamo cue Moo dine jaille nasedi janorede isoide. Naie nasedo llicana o jai. Ailluena comini naiedo jaiacanitimaci; iadedi fo jaitimaci. 25 Naie jofo nama nase ibailla mei, ¿niese fo jaitomoi? Jino naidaimona, nasena tutajanona, raitomoi: “Nama, o nase econo”. Naimie uai oite: “Omoina uiñoñedicue”. 26 Dane lloitomoi: “O diga navui guiticaí. Cai illanomo llofuetio”; 27 iadedi naimie uai oite: “Omoina uiñoñedicue. Cue cominiñedomoi. Jecino omoi comecimo nia illa jira, mai jai”. 28 Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micorina cioitomoi; ia omoi jino illamona, duere sefuillamona, eitomoi. 29 Diga comini Jusiñamui illanomo iitimaci. Ailluena judúaiñedinoga nairaimona Jusiñamui illanomo biitimaci. Nainomo coninina caimare nabaitimaci. 30 Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñeno cuena inocana omoi jailla.

*Jesús Jerusalémo itinomo llua rafue*  
(Mt 23.37-39)

<sup>31</sup> Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacade.

<sup>32</sup> Jesús uai ote:

—Herodedi eo jifueraiíma. Naimie dine jai. Naimiemo llono: “Janaba anamo ite cominimona Janabana oni ore-cabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite.

<sup>33</sup> Nia oni jaiticue. Ailluena Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” llono.

<sup>34</sup> Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadícue. Jusiñamui facaina llorainina jaié meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruiaí sedaja isoi, diga icaíño cue anamo omoína uaidoiacadícue; iadedi omoi dinena cuena jitaiñedomoi. <sup>35</sup> Iemona Jusiñamuidi omoi illanona jai fainonocaide. Cue Moo dine jaiticue. Cue jailla mei, cuena cioiñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

## 14

### *Jesúdi abina siridimiena jillotaja rafue*

<sup>1</sup> Jiaíruido sábadoruimo Jesúdi fariseo imie jofomo guisaide. Naie fariseo imiedi illaicomini. Nainomo itino Jesús mo eo eruaídímaci. <sup>2</sup> Guille facaise naie jofomo duidimie bite. Naimie abina siridimie. <sup>3</sup> Nainomo itinomona damieriedi fariseuai comini. Moisés micori llogacinuaina llofueraini jiai itimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena llote?

<sup>4</sup> Uaina oñedímaci. Ie jira Jesús duidimie onollina llinuamona, naimiena jillotate. Ie mei naimiena jino orede.

<sup>5</sup> Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiena cue jillotaja jira, ¿niese cuena jeare ñaitomoi? <sup>6</sup> Iena cacajanona, uainicadímaci.

### *Jesúdi guillena uaidoganona llua rafue*

<sup>7</sup> Jesúdi naimaci guisaibillana ciode. Jiaíno baífemo illena, jofó nama abimo nana raiacadímaci. Iena ciuamona, naimacimo Jesús rafuena llofuate:

<sup>8</sup> —Rafue dine guillena omoína bu uaidoia, jofu nama abimo raiñeno, omoi baifemo itimie bi raillano. <sup>9</sup> Jofu nama abimo omoi raia, omoi baifemo itimie bia, jofu nama omoimo lloite: “Bimiemo omoi raillanona feca”. Meidaillanona, oni rainadaitomoi. <sup>10</sup> Ie jira rafue dine omoína uaidoia, naie jofomo omoi ria, oni rai. Ie mei jofu nama jitaia, omoimo lloite: “Cue abimo rai”. Ie mei nana naie itino omoi iobillana cioitimaci. <sup>11</sup> Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

<sup>12</sup> Naimiena uaidotimie mo Jesús llote:

—Guille rafuena o finoia, naga icaiño o nabaiñiaina uaidoñeno. Naga icaiño o cominina uaidoñeno. Naga icaiño o ecimo itino ucuberedinona uaidoñeno. Naimacina o uaidotona, jairuido guillena ona uaidoitimaci, naie iba o ol-lena; <sup>13</sup> ia rafuena o finoia, dueredinona uaido. Ñuja-ñujacaida macaritinona uaido. Uisinidinona uaido. <sup>14</sup> Naimacimona iba ico o oñenamona, Jusiñamui ona camare itataite. Jairuido fi-daillamona mareuidino jilloia, monamo Jusiñamui ona ibaite.

*Jesúdi ailluena guille finoca rafuena llua rafue*

<sup>15</sup> Jesús abimo itinomona Jesús llua na damie cacajano, raite:

—Monamo Jusiñamui illanomo itimiedi marena iite.

<sup>16</sup> Jesús uai ote:

—Iena omoi raise uiñollena bie rafuena lloiticue. Damie aillue rafuena finode. Ailluena cominina uaidote. <sup>17</sup> Rafue illaruimo ie mullaïmana orede, cominina dane uaidollena. Raite: “Mai bi. Nana guille finuadi jai fuite”; <sup>18</sup> ia biacaiñedimaci. Damie llote: “Eniruena como ibadicue. Iena jibuisaiacadicue. O rafuemo jaiñeiticue. Ie jira cue joreña icaiñeitia”. <sup>19</sup> Jiaimie llote: “Diez diga juraretana como ibadicue. Naimacina jibuisaiacadicue. O rafuemo jaiñeiticue. Ie jira cue joreña icaiñeitia”. <sup>20</sup> Jiaimie llote: “Riño como oticue. Ie jira o rafuemo jaiñeiticue”. <sup>21</sup> Ie nama dine naie mullaïma abido jaide. Comini biacaiñenana llote. Iena cacajano, rafue namadi icirite. Ie mullaïmamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisinidinona uaido”. <sup>22</sup> Ie mei naie mullaïma jaide. Abido naimie bia, ie namamo llote: “O llua finodicue. Ailluena comini jai bitimaci. O jofomo illino nia ite”. <sup>23</sup> Rafue namadi uai ote: “Naisomo itinona bene atillena, cue jofona oruitallena, cai nairaimona jino jai. <sup>24</sup> Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitaiñedino nainomo ico iñeitimaci.

*Jesúdi naimie llofueganona jaiacadino rafue*

<sup>25</sup> Naie facaise ailluena comini Jesús diga jai jaisoidimaci. Naimacimo llote:

<sup>26</sup> —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiái baifemo isiruilla. Cuena ie amatiái baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide. <sup>27</sup> Cue llofuegamiena bu jaillanona, duere sefuicana jaite. Nibai naiemona fiodaite. Bu iese jaiacaiñenia, cue llofuegamiena naimie raise jainide.

<sup>28</sup> 'Ero, jiaie rafuedo iena lloiticue. Jofona bu finoacania, ie ucubena bailla diese uiñollena: “¿Niga raifite?” comecina nano facade. <sup>29</sup> Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. <sup>30</sup> Raitimaci: “Ie jofo finua tainede; iadedi fuidonide”.

<sup>31</sup> 'Ero, jiaie rafuedo iena lloiticue. Illaíma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?” Comecina facaja mei: “Emodofiñeiticue” naimie comecina facajia, <sup>32</sup> nia are naimie bacuai ia, daguelli uicodo orede, ie fairiconi diga ñaillena. Raite: “Jobairiacañedicue; ia o diga bie rafuena raise finoacadicue”. <sup>33</sup> Biemo comecina omoi faca. Ie raruiaimo bu comecina eo facaia, cue llofuegamiena jainide.

<sup>34</sup> 'Sal mare; iadedi ie caimano jai iñenia, ¿dane niese nibaiamona caimarenite? <sup>35</sup> Jai marañede. Eniruemo jonegadana, jiaí marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluomo cacarei. Iena ñno.

**15***Jesúdi naimiena ñnotinomona damie faifillana jitaiñena rafue (Mt 18.10-14)*

<sup>1</sup> Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiaí ofidimaci. <sup>2</sup> Iena ciuano, fariseuai cominidi, Moisés micori llogacinuaina llofueraini diga, Jesús joreñona ñaitimaci:

—Bimie marañedicinona finorainina feiñote. Naimaci diga jiaí guite.

<sup>3</sup> Naimaci ñaiana uiñuanona, Jesús naimacimo bie rafuena llote:

<sup>4</sup> —Omoimona damiemo cien toica llaudaiaí nibai ite. Naimacimona daje feiraite. Ie noventa y nueve llaudaiaína fainonocaida, iena jenuaite, ie baille dinori. <sup>5</sup> Baillanona, ie

fecanicomo rocanocaida, iobicana biite. <sup>6</sup> Jofomo naimie ria, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue feiraita llaudana jai baiticue”. <sup>7</sup> Ie isoide. Cue rafuena cue llumona, damie ie comeci jeacinona fainonocaillamona, ie comeci iuai meidumona, monamo itino eo iobitimaci; iadedi noventa y nueve comini marena illamona, janore iobitimaci.

*Jesúdi faifide ucubena bailla llua rafue*

<sup>8</sup> Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori. <sup>9</sup> Iena naiñaiño baia, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”. <sup>10</sup> Ie isoide. Cue rafuena cue llumona, damie ie comeci jeacinona fainonocaillamona, ie comeci iuai meidumona, Jusiñamui jaienisaie eo iobidimaci.

*Jesúdi damie ie moo fainonocailla llua rafue*

<sup>11</sup> Jesús llote:

—Jiaie rafuena omoimo lloiticue. Damie mo mena jito ite. <sup>12</sup> Ie moomo jamamie llote: “Moo, o fiodailla mei, o raruaimona janore feiñoiticue. O fiodaillana sedaa-caiñedicue. O raruaiaina cue facaina birui jitaidicue. Cuemo ine”. Ie jira ie moo naimiemo fecade. <sup>13</sup> Ie mei nano nie dinori illamona, nana ie raruaiaie iraianona, jiaie eniruemo jaide. Nainomo ie ucube jamai buruemo faiaide. <sup>14</sup> Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite. <sup>15</sup> Ie jira nainomo ite patrón dine maijaide. Naie patrón ie chanchuaiaina sedallena naimiena orede. <sup>16</sup> Naimiena jaca buna ecarainina jira, chanchuai guillemona guiacade. <sup>17</sup> Iese naimie duere sefuilla jira, ja muidomo abina uiñoocaillamona, comecina facade: “Cue moo jofomo nana naimie mullaiaie raise guitimaci. Guille fiebicabite; iadedi bene aimeri fiodaite. <sup>18</sup> Cue moo dine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiai finodicue. <sup>19</sup> Odi: ‘Cue jito’ cuena raiñeno. O mullaiaie illa isoi, cuena abido feiño”. <sup>20</sup> Ie facaise ie moo dine jai jaide. Nia aare naimie ia, ie moo naimiena cide. Ie jitona duenaillanona, naimie dine aiside. Naimiena caimadote. Jiai llibanote. <sup>21</sup> Ie jito naimiemo llote: “Moo, Jusiñamuimo jeacinona finodicue. Omo jeacino jiai finodicue. Odi: ‘Cue jito’ cuena raiñeno”. <sup>22</sup> Ie moo iena cacajano, ie mullaiaimo llote: “Cue jitona naimie eruaillena, eo mare iniroina ati, naimie jitallena. Cue jitona naimie illa jira,

iena jıtallena, anillona ati. Naimie jıtallena, zapatona jiai ati. <sup>23</sup> Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaı. <sup>24</sup> Navui cuemona cue jito fiodaite isoide. Cajе cuemo dane abıdo rilla. Navui cuemona naimiedi faıfıde; iadedı birui naimiena dane cıodıcue”. Naimie llua isoi, rafuena finodımacı. <sup>25</sup> Naie facaise nano doforamie illimo ite. Jofomo abıdo naimie bia, comını ıraisillana cacade. <sup>26</sup> Daje mullaimana uaiduanona, naie rafuena jıcanote. <sup>27</sup> Naie mullaima uai ote: “O ama abıdo jai bite. O ama ramo jiriıeno abıdo billa jira, o moo ie janoreta farediretana jai fatatate”. <sup>28</sup> Iena cacajano, icırite. Fo jaiacaiıede. Ie jira ie moo jino bite. Naimiena fo uaidote. <sup>29</sup> Ie moomo llote: “Ero, diga aıos o diga maijıdicue. O uaina jaca ınotıcue; iadedı cue nabaiıiaı diga, rafuena cue finollena, chivo cuemo jaca fecaiıedio. <sup>30</sup> O jito jamamie ie ucube calliredııaiııuaimo fuidode; iadedı abıdo naimie billano, naimie facaina janoreta farediretana fatatatio”. <sup>31</sup> Ie moo uai ote: “Moo, nagarui cue diga itio. Nana cue radi oıenite. <sup>32</sup> Cuemona o ama navui fiodaite isoide; iadedı naimiena dane cıodıcue. Naimie navui faıfıde raitıcue; iadedı caje cuemo dane abıdo rilla. Cue iobillanona rafuena finodıcue”. Bie rafuemona omoi fueollena, iena jai llotıcue — Jesús llote.

## 16

### *Jesúdi patrón ie mullaima finoca rafuena llua rafue*

<sup>1</sup> Ie llofueoıcaiganomo Jesús jiaıe rafuena llote:

—Ucuberede patrón ie mullaimana ie rana sedatate. Naie patrón eneno oni illanona, ie mullaima ie rana raise sedaınenana fidide. <sup>2</sup> Naimiena uaiduanona, naimiemo jıcanote: “ıMaraiıede o finoca rafuena niese fidıdicue? Omo ite cuentas cioacadıcue. Cuemo ati. Cue diga jai maijııeıtio”. <sup>3</sup> Iena cacajano, naie mullaima comeına facade: “ıNiese nibaiıııcue? Cue nama cuena jai dotaacade. Maijiana ocuinıdicue. Jiaıe comınımona ucube jamai jıcajana meıruitıcue. <sup>4</sup> Cue finuana jai uiınotıcue. Naimacı jofomo comını cuena ıco feııollena cue dotaja meı, nana cue patrón debedınona uaidoitıcue”. <sup>5</sup> Ie jira naimacına uaidote. Damıemo jıcanote: “ıCue patrómo nıga debedio?” <sup>6</sup> Uai ote: “Cien bidones raıfi aceitunamona oga aceitena debedıcue”. Naie mullaima raite: “O rabemo jarire ja cueno: cincuenta bidones”. <sup>7</sup> Jiaımiemo jıcanote: “ıNıga debedio?” Uai ote: “Cien digagai trigo raıfi debedıcue”. Naie mullaima dınena raite: “O rabemo ochentana cueno”. <sup>8</sup> Iena fidıano, naie mullaimamo ie patrón raite: “Jıairuido marena o illemo



o comecina raise facadio. Eo abina uiñotimiedio” raite. Ero, Jusiñamuina ñnoñedinodi naimiena ñnotino baifemo ra fecajana baitadimaci. <sup>9</sup> Naiemona omoi fueollena, omoimo lloiticue. Omoimo ite ra diga dueredinona cano. Iemona omoi nabaiñiaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoina marena ñaitimaci. <sup>10</sup> Janore ra omoimo illamona, Jusiñamui facaina birui omoi raise majiia, ailluena ra omoimo itedena, Jusiñamui facaina jiai raise majiitomo. Janore ra omoimo illamona, maraiñede rafuena birui omoi finoia, ailluena ra omoimo itedena, maraiñede rafue nia jiai finoitomo. <sup>11</sup> Omoimo birui ite ra diga Jusiñamui facaina omoi raise majiñenia, naimiemona jiaie rana feiñoñeitomo. <sup>12</sup> Omoi anamo ite ra diga Jusiñamui facaina omoi raise majiñenia, Jusiñamui ie rafue omoimo itatañeite. <sup>13</sup> Mena patrones diga daruido buna jaca majiñide. Mena diga bu majiacania, damiena jiaimie baifemo gaite. Ie gaiamie ocuica rana finoite. Jiaimie ocuica rana raise finoñeite. Ie isoide. Rarui ai ollemo comecina omoi eo facaia, Jusiñamui jitaillacinomo comecina raise facañeitomo.

*Jesúdi fariseuai comini diga dane ñaia rafue*

<sup>14</sup> Jesús llofuiana fariseuai comini cacajano, ucubena eo gaia jira, naimie uaina jamaidimaci. <sup>15</sup> Naimacimo Jesús llote: —Omoi finoca rafuemona comini omoina: “Mare” railana jitaidomoi; iadedi Jusiñamui omoi comeciai maraiñenana uiñote. Iese omoi illana Jusiñamui gaiñede. <sup>16</sup> Jusiñamui facaina lloraini micoriai ciegafuiaimona Jusiñamui rafuena cacacabidomoi. Moisés micori ciegafuiaimona iena jiai cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui dibeimo omoi comeciai iuaina meiduana cacadomoi. Iena jiai llocabitue. Iena ailluena ñnuamona, Jusiñamui dibeimo birui duere iacadimaci. <sup>17</sup> Mona enirue diga nia ia, nana Jusiñamui llogacinuai suicana jaite.

*Jesús ñima ie aina dotaja rafuena llofuia rafue  
(Mt 19.1-12; Mr 10.1-12)*

<sup>18</sup> Jesús llote:

—Naga aina dotadimiedi, jiaiñaiño ollena, jeacinona jai finode. Dotacañaiño bu oia, jeacinona jai finode.

*Jesúdi ucuberedimie iaimaia Lázaró ie rafuena llua rafue*

<sup>19</sup> Jesús jiaie rafuena llote:

—Cue llogacinona omoi raise uiñollena, bie rafue lloiticue. Ucuberedimie ite. Eo mare ñiroina jítade. Eo caimare raise guicabite. <sup>20</sup> Naimie nasemo Lázaró raillamie jamai

biide. Naimiedi dueredimie. Efonaitimie. <sup>21</sup> Naimiedi ucuberedimie guiga allamona guiacade; ia guiñede. Jiconiãidi naimie efociana mecabite. <sup>22</sup> Ie mei naimie fiodaite. Jusiñamui cominina naimie illamona, Jusiñamui jaienisai naimie joreño monamo Abraham micori joreño illanomo uitimaci. Ucuberedimie jiai fiodaite. Comini naimiena raitimaci. <sup>23</sup> Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreñoa aarena ciode. Naimie ecimo Lázaro micori ie joreñoa jiai ciode. <sup>24</sup> Abraham joreñoa uaidote: “Cue moo Abraham, cuena duenai. Lázaronã cue dine oreta, ie onocai diga, jinuina cue fuemo llocatallesa, cue fuendo manare jaillena. Bie iraimona jai eo llogi cacadicue”. <sup>25</sup> Abraham joreñodi uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio. <sup>26</sup> O dine jainidicai. O enefebetuemo itio. Cai enefebetuemo jiai iticai. Caimona omoi dine bu jaiñellena, omoi monã cai dine bu biñellena, iese ite”. <sup>27</sup> Ucuberedimie micori joreño dinena uai ote: “Cue moo jofomo Lázaronã oreta. <sup>28</sup> Cuemo cinco amatiai ite. Naimacimo riire llollena, bie iraimo naimaci riñellena, naimiena oreta”. <sup>29</sup> Abraham joreñodi uai ote: “Naimacimo Moisés micori cuegafuiai ite. Jusiñamui facaina jaie lloraini micoriai cuegafuiai jiai ite. Iemo naimaci comeciaina facallesa”. <sup>30</sup> Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jaiã, naimiena iñoitimaci. Naimaci comeciã iuai meidoitimaci”. <sup>31</sup> Abraham joreñodi uai ote: “Moisés micori cuegafuiai, Jusiñamui facaina jaie lloraini micoriai cuegafuiai naimaci iñoñenia, fiodaillamona bu jilloia, naimiena jiai iñoñeitimaci” —Jesús llote.

## 17

*Jesúdi jeacinona fiñoñenana llofuia raufe*  
(Mt 18.6-7, 21-22; Mr 9.42)

<sup>1</sup> Ie llofueoicaiganomo Jesús llote:

—Diga ramo omoi faicana uitinomo riitomoi. Omoi ramo faitimie duere sefuide. Jusiñamui omoi ramo faitimiena duere finoite. <sup>2</sup> Como creyentena jaidimiena ramo bu faia, naimie cimaiomo aillue nofici maianona, joraimo corobaillena naimiena dotacadena, mare. <sup>3</sup> Como creyentena jaidimiena ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoca rafuena feita. <sup>4</sup> Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

*Jesúdi naimiena #nuana llua rafue*

<sup>5</sup> Ie doce llofueoicaigano Jesúmo llote:

—Ona #noticai; ia caina o uaina eo #nota.

<sup>6</sup> Uai ote:

—Jusiñamuina eo janore #notomoidena, bene ite amenamo omoi lloia: “Benomona jai. Joraimo sico”, naie amena omoi uaina #note.

*Jesúdi ie facaina llofueoicaigano maijia llua rafue*

<sup>7</sup> Ie llofueoicaigano Jesúmo llote:

—Bie rafuemono omoi fueollena, iena lloiticue. Illimo ie mullaïma maijiamona, ie toïnïai sedajamona jofomo abido naimïe ria, ie patrón naimïemo lloñeite: “Mai nano guisaïbi”; <sup>8</sup> iadedi naimïemo lloite: “Cueïena guillena nano fino. Cueno eca. Ie mei guitio”. <sup>9</sup> Naie mullaïma ocuica rana finua muidona, mullaïmana naimïe illa jira, ie mullaïmamo patródi iobillacinona fecañeite. <sup>10</sup> Ie isoide. Nana cue llua omoi finodomoina, dani omoi maijadi, cue cominina omoi illa jira, cuemona iobillacinona feiñoñeitomoi.

*Jesúdi diez efonaitinona jillotaja rafue*

<sup>11</sup> Jerusalémo ie llofueoicaigano diga Jesú jaidemo, naimïe nabeimo Samaria enirue ite. Naimïe jarifebeimo Galilea enirue ite. <sup>12</sup> Nairai dine naimïe riacania, diez efonaitinodi naimïemo dafaïfidimaci. Eneno oni naidaidimaci. <sup>13</sup> Naimïena ado uaidotimaci:

—Jesús, Maestro, caina duenai. Caina ja jillota.

<sup>14</sup> Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. <sup>15</sup> Ie abi jilluana ciuano, naimacimona damïe Jesús dine abido bite. Jusiñamuimo iobillacinona ado fecade. <sup>16</sup> Naimïemo iobillacinona jiai fecallena, Jesús uicomo ana bitadate. Naimïedi judíuñedimïe. Samaritano imïe. <sup>17</sup> Jesús llote:

—Diez digamïedomoi. Omoïna jai jillotaticue. ¿Ninomo jiaïnodï nueve digamïe itimaci? <sup>18</sup> ¿Niïese Jusiñamuimo iobillacinona fecaacaiñedimaci? Dama bimïe fecade. Naimïedi judío imïeñedimïe.

<sup>19</sup> Jesús naimïemo llote:

—A naidada. Mai jai. Cueno o #nua jira, jai jillodio.

*Jesúdi Jusiñamui ie cominina sedajana llofuia rafue*

(Mt 24.23-28, 36-41)

<sup>20</sup> Naie facaise fariseuai comini Jesúmo jïcanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoïna sedallena uiñoñeitomoi. <sup>21</sup> Buena ciuamona raiñeitomoi: “Jadi, Jusiñamui bene caina jai sedade”. “Jadi, batine caina

jai sedade”; iadedi omoi motomo itinomona Jusiñamui dibeimo damerie illamona, Jusiñamui omoi motomo jai illana uiñoitomoi.

<sup>22</sup> Ie llofueoicaiganomo llote:

—Jiairuido duere sefuillamona cue diga janore jisa iacanit-  
 omoi; iadedi iese nia iñeitomoi. <sup>23</sup> Damerie raia: “Ero, batine  
 Cristo jai bairede” nainomo jaiñeno. Naimaci raia: “Ero,  
 bene Cristo jai bairede” iena iñoñoeno. <sup>24</sup> Mona borillamona  
 mona jillacidi usere ciode. Ie isoide. Cue abido bia, nana  
 comini iena uiñoitimaci. <sup>25</sup> Birui iese nia suiñeite. Nano  
 duere sefuiticue. Birui ite comini cuena jiai feiñoñeitimaci.  
<sup>26</sup> Abido cue billirui iaiei ia, Noé micori facaiseconi itino isoi,  
 comini iitimaci. Naimaci duere sefuillemo Noé micori facaise  
 itinodi comeciaina facañedimaci. <sup>27</sup> Naie facaiseconi nia eo  
 noci deiñenia, Noé micori ecimo itino naimaci isoilla isoi icana  
 jaidimaci. Jamai guicana jaidimaci. Aina ua mei, inina ua  
 mei, jebuicana jaca jamai jaidimaci. Dani iemo comeciaina  
 facauidimaci. Jusiñamuimo comeciaina facañedimaci. Iese  
 itimaci, Noé micori ie balsamo fo jailla dinori. Nia noci  
 deiñenia, Noé micori lloga uaina iñoñedimaci. Noci deilla  
 mei, ebena nana faifidimaci. Cue abido bia, ie isoite. Ebena  
 biiticue. <sup>28</sup> Lot micori facaiseconi daje isoidimaci. Jamai  
 guicana jaidimaci. Aina ua mei, inina ua mei, jebuicana jaca  
 jamai jaidimaci. Rana ibauidimaci. Iena fecauidimaci. Illimo  
 maijuidimaci. Jofona finouidimaci. Naimaci isoilla isoi icana  
 jaidimaci. <sup>29</sup> Dani iemo comeciaina facadimaci. Jusiñamuimo  
 comeciaina facañedimaci. Iese icana jaidimaci, Sodomamona  
 Lot micori jailla dinori. Nairui monamona boode azufre  
 ebena billanona, nana Sodomamo itino jobaide. Ebena nana  
 faifidimaci. <sup>30</sup> Ie isoide. Abido cue billiruimo comini iitimaci.  
 Cue bia, ebena biiticue. <sup>31</sup> Naie facaise bu ie jofo emodomo ia,  
 ie raruiaina ollena, naimie diga uillena, bu fo jaiñena. Illimo  
 bu ia, ie raruiaina ollena, ie jofomo bu jaiñena. <sup>32</sup> Iemona  
 fueollena, Lot ai micori rafuemo comeciaina faca. Naiñaiño ie  
 raruiaimo daño comeciaina facajamona, na ie abi diga faifide.  
<sup>33</sup> Dama ie raruiaimo ie comeciaina bu facaia, ja muidomo  
 faifite. Cue diga jaca iñeite; iadedi cue jitaillacinona finuamo  
 ie comeciaina bu facaia, monamo cue diga jaca iite. <sup>34</sup> Cue bille  
 facaise menamie daje cuartomo iniano iitiaimaiaia. Damie  
 jaite. Jiaimie fiebite. <sup>35</sup> Mena riño danomo doberillanona  
 iitiaiñuai. Dañaiño jaite. Jiaiñaiño fiebite. <sup>36</sup> Menamie illimo  
 maijiano iitiaimaiaia. Damie jaite. Jiaimie fiebite.

<sup>37</sup> Ie llofueoicaigano jicanotimaci:

—¿Nine jaitimaci?

Uai ote:

—Urujaisai rifaide ramo ofillana uñua isoi, nana cuena ñnotino cue abido billena uñoitimaci. Cuemo duillamona, cue diga jaitimaci.

## 18

### *Jesúdi feciñona llua rafue*

<sup>1</sup> Je llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle ñnori. Raire feiñoñenia, abina jafueño. <sup>2</sup> Iena omoi raise uñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede. <sup>3</sup> Nainomo naimie ñine daje feciño jai-jaicabillanona, raite: “Cuena duere finodimemona cuena cano”. <sup>4</sup> Naimie ñinena raite: “Dama iesede. Ona canoñeiticue”. Je mei ie começina facade: “Jusiñamuina jaciruiñedicue. Cominina jiai isiruiñedicue; <sup>5</sup> ia naiñaiño cuemo sefuire bi-bina jira, naiñaiño canoiticue, cue rairaiñellena”.

<sup>6</sup> Jesús llote:

—Maraiñede juez lluana cacadomoi. Ja muidomo naiñaiño canode. <sup>7</sup> Ero, biemo omoi começina faca. Jusiñamui naie juez isoñede. Nagarui Jusiñamuimo naimaci jicaia, ¿ñiese naimie ie fetocanona canoñeite? Jaca canoite. <sup>8</sup> Raire fairiuanona, naimacina raire canoite; iadedi abido cue bia, ¿ñiga cuena ñnotino iitimaci? Nibai ailluena cuena ñnoñeitimaci.

### *Jesúdi Jusiñamuimo menamie jia llua rafue*

<sup>9</sup> “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

<sup>10</sup> —Jusiñamui jofomo, nainomo jillena, menamie jaidiaimaiai. Damie fariseo imie. Jiaimie gobierno ucubena oraíma. <sup>11</sup> Fariseo imie naidadacaida, dama anado jide: “Jusiñamui, jiaie comini isoñedicue. Fñidimaci. Maraiñedimaci. Naimaci añede riño diga itimaci. Cue ecimo ite ucubena oraíma isoi iñedicue. <sup>12</sup> Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide. <sup>13</sup> Gobierno ucubena oraíma eneno naidadacaida, jide. Monamo eruaiñede; iadedi jamai bue isoillanona, jogobena farode. Raite: “Jusiñamui, jeacinona finoraimadicue. Cuena duenai. Macaibaite” jide. <sup>14</sup> Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite. Je jira gobierno ucubena oraíma ie jofomo Jusiñamuimona jai marebicaillanona jaide; ia fariseo imie iese jaiñede.

*Jesúdi naimie dine uruiai billana jitailla rafue*

*(Mt 19.13-15; Mr 10.13-16)*

<sup>15</sup> Naie facaise Jesús dine comini naimaci eisaiaina atisite. Ie onolli naimacimo naimie joniana jitaiddimaci. “Naimacina raise cano” ie Moomo lollena jitaiddimaci. Iena ciuanona, ie llofueoicaigano cominina Jesús dine billana rairuidimaci; <sup>16</sup> iadedi Jesúdi eisaiaina uaiduano raite:

—Uruiai cue dine billesa. Naimacina rairuiñeno. Cuen a bie isoi iinotiniodi Jusiñamui cominidimaci. <sup>17</sup> Bie uruiai abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

*Ucuberedimie Jesús diga ñaia rafue*

*(Mt 19.16-30; Mr 10.17-31)*

<sup>18</sup> Ie facaise illaicomini mona damie Jesúmo jicanote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

<sup>19</sup> Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano. <sup>20</sup> Moisés micori llogacinuaina inocana jai. Jai e cuete: “O aiñede riño diga iñeno. Comena meineñeno. Rana fiñeno. Jiaimiena o llogidoia, tainona lloñeno. O moo uaina ino. O ei uaina ino”.

<sup>21</sup> Uai ote:

—Cue uruena illa facaisemona nana bie llogacinuaina inotiticue.

<sup>22</sup> Iena cacajano, Jesús raite:

—Daje rana nia finoñedio. O raise marebicaiacania, omo ite raruiaina feca. Naie ucubena dueredinomo feca. Cuen a o inuamona, monamo ico jaca iitio. Cue llofueoicaiganona o illena, mai cue diga bi.

<sup>23</sup> Jesús lluana naimie cacajano, sunaicaide. Naimiemo eo ailluena ra illa jira, iena feacaaiñede. <sup>24</sup> Naimiemo eruailano, Jesús raite:

—Ucuberedinodi Jusiñamui cominina jaillena eo sefuiruite.

<sup>25</sup> Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

<sup>26</sup> Jesús lluana cacadino jicanote:

—¿Iemona buca jillobiti?

<sup>27</sup> Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

<sup>28</sup> Pedro raite:

—Ero, o llua isoi cai jofuena fañonocaida, o diga jaisoidicai.

<sup>29</sup> Uai ote:

—Uanaicinona lloticue: Jusiñamui cominina naimie jaillamona, ie jofona bu fainonocaia, ie aina bu fainonocaia, ie amatiaina bu fainonocaia, ie moonna bu fainonocaia, ie eina bu fainonocaia, ie uruiaina bu fainonocaia, <sup>30</sup> Jusiñamuimona ailluena ibana birui feiñoite. Monamo ico jiai jaca iite.

*Jesúdi ie fiodaillena dane llua rafue*

*(Mt 20.17-19; Mr 10.32-34)*

<sup>31</sup> Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, iimana jaidicue. Jusiñamui facaina lloraini cuena jaie cuetimaci. Nana naie rafue ja suite. <sup>32</sup> Judíuaiñedinomo judíuai illaicomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci. <sup>33</sup> Cuena faitimaci. Cuena meineitimaci; ia darui amani illanona, cue fiodaillamona jilloiticue.

<sup>34</sup> Naimie lluana raise cacaiñedimaci. Naimacina iena Jesús nia raise llofueñena jira, iena raise uiñoñedimaci.

*Jesúdi uisnidimiena jillotaja rafue*

*(Mt 20.29-34; Mr 10.46-52)*

<sup>35</sup> Jericó railla nairaimo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade. <sup>36</sup> Ailluena comini Jesús diga jaillana naimie cacajano, naie cominimo nie isoide rafue illana jicanote.

<sup>37</sup> Uai otimaci:

—Nazaret ie Jesús como bene bite.

<sup>38</sup> Ie jira naimie cuirioide:

—David micori Jitona o illamona, cuena duenai. Cuena cano.

<sup>39</sup> Uicodo jaidino naimiena lletade, naimiena llucaitallena; iadedi naimie eo cuirioide:

—David micori Jitona o illamona, cuena duenai.

<sup>40</sup> Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

<sup>41</sup> —¿Niese ona cue nibaiana jitaideo?

Uai ote:

—Maestro, cioacadicue.

<sup>42</sup> Jesús raite:

—Mai eroda. Cuena o ñnua jira, jai jillodio.

<sup>43</sup> Ieconí naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

## 19

*Jesús Zaqueo diga illa rafue*

<sup>1</sup> Jericómo Jesús rillanona, nainomo macaritemo, <sup>2</sup> naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede. <sup>3</sup> Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúna cionide. <sup>4</sup> Ie jira uicodo aisicana jaide, amenamo a jaillena, naimiena cioillena. <sup>5</sup> Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofu dine jaiticue.

<sup>6</sup> Ie jira raire ana bite. Ie jofomo Jesúna iocire feiñote. <sup>7</sup> Iena jiaie comini ciuanona, Jesús joreñona jeare ñaianona raitimaci:

—Mariñedicinona finoraíma jofomo naimie jaide.

<sup>8</sup> Jesúna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruaína dueredinomo biruimona fecaiticue. Bumona navui cue fiía, cuatro diga ra abido iiticue.

<sup>9</sup> Jesús uai ote:

—Iese o llua jira, o comini diga Jusiñamuina jai o ñnuana uiñoticaí. —Jamai bitinomo llote:

—Zaqueodi Abraham micori jito; ia Jusiñamuina navui ñnoñede. <sup>10</sup> Naimie isoidino jillobitallena, biticue. Monamona billanona, ñimana jaie jaidicue. Jusiñamuina ñnoñedinona jenuaibidicue, naimacina jillobitallena.

*Illaima ie mullaiaimo ucubena fecaja rafue*

<sup>11</sup> Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”. <sup>12</sup> Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaímo jaide. Ie cominina sedallena, nanoca illaimamona ie uaina feiñoiacade. Iemei abido biacade. <sup>13</sup> Nia naimie jaiñenia, diez diga ie mullaiaína uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. <sup>14</sup> Ie comini naimiena enoidimaci. Jiaínona nanoca illaima dine oretajano, raitimaci: “Bimie caina sedajana jitaíñedicaí”; ia nanoca illaima dinena naimaci lluana jaca cacaiñede. Ie jira naie nanoca illaima naie illaima jitomo ie uaina ite. <sup>15</sup> Ie uaina feiñua mei, abido ie eniruemo jaide. Rilla mei, ie mullaiaína uaidote. Nie diese ucubena



ocana naimaci jaillana uiñoiacade. Ie jira naimacina uaidote. <sup>16</sup> Nano bitimie raite: “Nama, o cuemo dabe fecadio. Dabedemona jai cuemo ite diez digabe”. <sup>17</sup> Naie illaïma naimiemo llote: “Eo marena maijidio. Mare mullaïmadio. Janore ra raise o sedaja jira, ona diez nairaiaina sedataiticue”. <sup>18</sup> Ie mei jiaie mullaïma billanona, raite: “Nama, o cuemo fecaca dabedemona jai cuemo ite cinco digabe”. <sup>19</sup> Illaïma llote: “Ona cinco nairaiaina sedataiticue”. <sup>20</sup> Ie mei jiaie mullaïma bite. Raite: “Nama, jadi, o cuemo iga o ucube. Iniroimo tilliano, iena eenoticue. <sup>21</sup> Ona cue jaciruillano, odi eo riimiena jira, iena jamai eenoticue. Jiaie cominimona ie rana bairocabidio. O maijiñena ramona ocabitio”. <sup>22</sup> Illaïma dinena raite: “Eo marañede mullaïmadio. Cuena o llua isoi, ona duere finoiticue. Cue riimienana uiñotio. Jiaie comini ie rana cue bai ruana uiñotio. Cue maijiñena motomora cue uana uiñotio; ia buena maijiñedio. <sup>23</sup> ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feiñoticue”. <sup>24</sup> Nainomo itinomo llote: “Naie ucube naimiemona bai ruano, diez digabe itimiemo feca”. <sup>25</sup> Uai otimaci: “Naimiemo ailluena ucube jai ite. ¿Bue ñellena dane jiaie fecaitio?” <sup>26</sup> Illaïma dinena uai ote: “Ailluena raredimie jiaie rana feiñoite; iadedi janore raredimie ie rana faifite. <sup>27</sup> Cuena enoidinona bene ati. Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoïmo suiñellana, Jusiñamui ie comini sedalliruina omoï uiñoñena jira, cue jitaillacino finocana jai.

### *Jesús Jerusalémo jailla rafue*

*(Mt 21.1-11; Mr 11.1-11; Jn 12.12-19)*

<sup>28</sup> Naie rafuena llofua mei, Jerusalén dine comini uicodo ie llofueoicaigano diga Jesús jaide. <sup>29</sup> Jerusalén iaireicaidemo, mena nairaimo riacade. Betfagémo railla nairaimo ride. Betania nainomo jai ite. Olivos railla anedumo naga nairai iaimaiaï ite. Ie llofueoicaiganomona mena orede. <sup>30</sup> Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. <sup>31</sup> Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

<sup>32</sup> Naimie llua isoi jaidiaïmaiaï. Naimie llua isoi burritona baitiaïmaiaï. <sup>33</sup> Ie facaise ie naniaï iaïmaiaïmo jicanote:

—¿Bue ñellena cai burritona suiñodomico?

<sup>34</sup> Uai otiaïmaiaï:

—Coco Nama iena jitaide.

<sup>35</sup> Ie mei Jesúmo iena atidiiaimaia. Burrito emodomo iniroina jobianona, ie emodomo Jesúdi rainadate. <sup>36</sup> Jesús iese jaidemo, naimiena iobitallena, illaíma isoi naimie jaillena, comini imaci iniroi diga, naiso motomo jobedimaci. <sup>37</sup> Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci. <sup>38</sup> Raitimaci:

—¡Cai Illaíma billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

<sup>39</sup> Naie cominimona dajerie fariseuai raitimaci:

—Maestro, o diga jaidinona llícaillena, naimacina lleta.

<sup>40</sup> Uai ote:

—Naimaci llícaia, biso fuemo ite noficidi cuena marena ñaite.

<sup>41</sup> Jerusalémo Jesús iairei ria, iena ciuano, eede. <sup>42</sup> Raite:

—Jerusalén itino, Jusiñamui diga omoi uri illena jai biticue. Omoína naimie cominina itataiacadicue; iadedi iena jitañedomoi. Iena jitaidomoidena, ico duere sefuiñeitomoi.

<sup>43</sup> Jiiruido omoi bacauai jobaimena finuanona, omoína cirinoitimaci. Omoi ecido llaitimaci. <sup>44</sup> Omoína meineitimaci. Omoi uruiaina meineitimaci. Omoi illanona judaitimaci. Jusiñamui omoi motomo birui illana omoi uiñoñena jira, iese omoimo suite.

*Jesúdi Jusiñamui jofomona damieriena dotaja rafue  
(Mt 21.12-17; Mr 11.15-19; Jn 2.13-22)*

<sup>45</sup> Jerusalémo Jesús rilla mei, Jusiñamui jofomo jaide. Jusiñamuimo ofomaiaína fecallena, naimiemo toica llaudaiaína fecallena, nainomo comini jaisoidimaci. Naie cominina ibatajanona, ofomaiaína, toica llaudaiai diga, damierie fecaudimaci. Iena ciuanona, naimacina jino orede.

<sup>46</sup> Raite:

—Ie facaina lloraima micori Jusiñamui llogacino jaie cueda: “Cue jofo ite nainomo cuemo comini jillena” cueda. Ero, ailluena omoi ibataja jira, naimie jofona firiruidino jofona omoi finoca.

<sup>47</sup> Jusiñamui jofomo nagarui Jesús llofujete. Judíuai illaicominidi Jesúna meineiacadimaci; <sup>48</sup> iadedi niese nibañedimaci, nana comini naimie llofuiana eo jitailla jira.

## 20

*Jesúdi ie siño uaina llua rafue  
(Mt 21.23-27; Mr 11.27-33)*

<sup>1</sup> Jusiñamui jofomo Jesúdi cominina llofujete. Jusiñamui rafuena llofujete. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Dese bilanona, <sup>2</sup> jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

<sup>3</sup> Jesús dinena uai ote:

—Omoimo nano jicanoiticie. <sup>4</sup> Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

<sup>5</sup> Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina ñnoñedomoi? ¿Bue ñellena naimie micori llua isoi bautizañedomoi?” <sup>6</sup> “Comini” cai fairioia, bene itino caina meinitimaci, Juan micoridi Jusiñamui facaina lloraíma naimaci railla jira.

<sup>7</sup> Ie jira Jesús uai otimaci:

—Uiñoñedicaí.

<sup>8</sup> Jesús dinena raite:

—Ie muidona cuemo nie isoide uai illana omoimo lloñeiticie.

*Jesúdi marañede maijiraini rafuena llua rafue*

*(Mt 21.33-44; Mr 12.1-11)*

<sup>9</sup> Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaíno mo fecade, iena sedallena. Ie mei jiaie eniruemo are illena jaide. <sup>10</sup> Uvas jai einaila facaise riaraiaina sedaraini dine daje mullaimana orede, naimie facaise iedinona naimie feñollena; iadedi naie sedaraini naie mullaimana fatimaci. Uvas naimiemo fecaño abido oredimaci. <sup>11</sup> Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecaño abido oredimaci. <sup>12</sup> Naie patrón jiaimiena orede. Naimiena eo bofedaitajanona jino dotadimaci. <sup>13</sup> Iemei patrón comecina facade: “¿Niese nibaiticie? Cue isiruiga jitona oretaiticie. Naimiena nibai jaciruitimaci. Naimie uaina ñnoitimaci”. <sup>14</sup> Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci. <sup>15</sup> Naimiena jino dotajanona, naimiena meinetimaci. Iena fidia mei, ¿niese naie patrón nibaite? <sup>16</sup> Naimie biite, naie sedarainina meinellena. Ie mei jiaíno naie illina sedataite.

Naie rafuena cacadino raitimaci:

—Bie isoide rafue suillana jitañedicaí.

<sup>17</sup> Naimacimo Jesús eruaillano, llote:

—Naie illi sedaraini isoidomoi. Jusiñamui facaina lloraima micori omoina jaie cuete. Ie ciegafuena raise facañedomoi. Naimie micori cuega:

Jofo finoraini jitaiñena nofici nana naie jofomo ite nofici baifemo jai uaide.

cuega. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. <sup>18</sup> Naie noficina nia ñaiticue. Noficimo bu eicaitaia, bofedaite; ia naie nofici bumo ana uaia, naimiena saitaita. Ie isoide. Cue llwana omoi jamaia, duere sefuitomoi. Iena omoi ñnoñenia, ja muidomo faifitomoi — llote.

*Jesúmo gobiernomo ucubena fecajana jicanua rafue*  
(Mt 21.45-46; 22.14-22; Mr 12.12-17)

<sup>19</sup> Jesús como lloga rafuedo naimacina ñaiana uiñotimaci. Ie jira naie facaiseconi judíuai illaicomini naimiena gaitaacadimaci; iadedi cominina jaciruitimaci. <sup>20</sup> Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadormo naimiena llogidoiacadimaci. <sup>21</sup> Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. <sup>22</sup> Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimiaci illaima Césarmo ucubena cai fecajana rairuidio? Caimo llono —llotimaci.

<sup>23</sup> Naimiena naimiaci jifuiana uiñuanona, Jesús dinena uai ote:

<sup>24</sup> —Ucube cuemo acata. ¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

<sup>25</sup> Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

<sup>26</sup> Jesúdi uai raise ua jira naimie llwamona jeare rafuena uiñoñedimaci, naimiena llogidollena. Naimie lluari rajjicail-lamona, llñcaidimaci.

*Jesús dine saduceuai railla comini billa rafue*  
(Mt 22.23-33; Mr 12.18-27)

<sup>27</sup> Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci.  
<sup>28</sup> Jesús mo llotimaci:

—Maestro, cai facaina Moisés micori jaie cuega: “Tima fiodailla meinocni, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. <sup>29</sup> Bie rafuena uiñoiacadicaí. Siete amataí ite. Nano doforamie ie aina ote. Naimie nia uruiainide fiodailla. <sup>30-31</sup> Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide. <sup>32</sup> Ja muidomo naie riño jiaí fiodaite. <sup>33</sup> Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

<sup>34</sup> Jesús uai ote:

—Birui aina otomoi. Inina otomoi; <sup>35</sup> iadedi fiodaillamona, Jusiñamui diga jaca itino jillua mei, ainitimaci. Ininitimaci; <sup>36</sup> ia Jusiñamui jaienisaí isoi illanona, dane fiodaiñeitimaci. <sup>37</sup> Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. <sup>38</sup> Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaia jiaí jillotaite. Naimiemo naimaci duillamona, naimaci abiaí diga jilluanona, naimie diga jaca iitimaci —llote.

<sup>39</sup> Iena cacajano, Moisés micori llogacinuaina llofuerainimona dajerie raite:

—Maestro, raise llotio.

<sup>40</sup> Ie facaise naimiemo nie isoide rafuena dane jicanuana jaciruitimaci.

*Jesús dinena fariseuai cominimo jicanua rafue  
 (Mt 22.41-46; Mr 12.35-37)*

<sup>41</sup> Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci?

<sup>42</sup> Salmos railla cuegafuiaimo David micori jaie cuega:

Jusiñamuidi cue Namamo llote: “Illaimana o illamona, cue nabeimo ana rai.

<sup>43</sup> Ona inoñedino o anamo itataiticue”.

<sup>44</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiaí ie Nama.

*Jesúdi judíuai illaicomina ñaia rafue  
 (Mt 23.1-36; Mr 12.38-40; Lc 11.37-54)*

<sup>45</sup> Nana comini cacajano, ie llofueganomo Jesús llote:

46 —Moisés micori llogacinauaina llofuerainimona abina rairui. Illaicomina naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoiñedinona itimaciden, comini naimacina uaiduana gaidimaci. Comini naimaciri acarillena, ofiracomo uicomo raiacadimaci. Rafue ia, naimaci jamai bue isoiñedinona comecina facajanona, rafue nama ecimo raiacadimaci. 47 Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

## 21

*Jesúdi Jusiñamui jofomo duerede feciño ucube fecajana ciua rafue*

*(Mr 12.41-44)*

1 Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. 2 Eo duerede feciño menaruñu joniana jiai ciode. 3 Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete. 4 Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoite ite ucubena jai jonete. Janore jonete; ia Jusiñamuimona naiñaiñodi jiaino baifemo jonete.

*Jesúdi Jerusalémo ite Jusiñamui jofo judaiana llua rafue*

*(Mt 24.1-28; Mr 13.1-23)*

5 Naie facaise Jesús llofueoicaiganomona dajerie Jusiñamui jofona eruaillanona, raite:

—Mare nofici diga finoca. Eo mare ra nainomo jiai ite.

6 Jesús llote:

—Birui bie rana ciodomoi; iadedi ico jiairuido nana bie jofomo ite nofici ai oni judaisite.

7 Jicanotimaci:

—Jusiñamui jofo judaisillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

8 Uai ote:

—Omoia bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai baireda” raitimaci. Naimaci dibeimo iñeno. 9 Jobaimiai illena fidiitomoi; iadedi jaciruiñeno. Iese suite; iadedi abido nia biñeiticue. 10 Daje nairai jiaie nairai diga jobairite. Daje gobierno jiaie gobierno

diga jobairite. <sup>11</sup> Eo aillena ñuisañuai suite. Diga illanomo cominidi aime guitimaci. Duicuai eo iite. Monamo comini diga jacirede rana cioitimaci. <sup>12</sup> Bie isoide rafue nia suiñenia, cuena ñnoñedino omoína llogidoitimaci. Omoína gaitatajanona, omoína duere finoitimaci. Naimaci ofracomo omoína uitimaci. Cárcelmo omoína jonetimaci. Cuemo omoi duilla jira, omoi duere sefuillena, illaicomini dine omoína uitimaci. <sup>13</sup> Naie facaiseconi cue rafuena naimacimo lloito moi. <sup>14</sup> Omoi abina omoi riidoia, omoi llwana uicodo jarire iñeno. <sup>15</sup> Omoi raise lollena, omoína canoiticue. Uifloracinona omoimo iiticue. Iemona omoi díbeimo iñedino o uaina uaitanitimaci. <sup>16</sup> Cuena ñnotomoi; ia ailluena cuena ñnoñeitimaci. Cuemo omoi duilla jira, omoína enoitimaci. Iemona dajerie mootiai, dajerie eítiai, dajerie amatiai, dajerie nabaiñiai omoína llogidoitimaci. Omoimona dajeriena meineitimaci. <sup>17</sup> Cue cominina omoi illamona, nana nairai omoína enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue. <sup>18</sup> Omoi ille dinori Jusiñamui omoína raise sedaite. <sup>19</sup> Duere omoi sefua, cuena fainonocaiñeno jai. Ja muidomo monamo jaca iitomoi. <sup>20</sup> Jerusalén fuedo ruicabene icaifona soldadauai ia, ie judaille facaiseconi iairei iite. <sup>21</sup> Naiemona omoi jillobillena, duere omoi sefuiñellena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. <sup>22</sup> Ie facaina lloraini micoriai ciegafuai suillanona, naie facaiseconi naimiena ñnoñedinomona Jusiñamui ibana oite. <sup>23</sup> Naie rafuemonna jillobillena, naie facaise urueside riño duere sefuite. Uruena nia jirode riñodi jiai duere sefuite. Naie facaise comini duere sefuitimaci. Llegi cacaitimaci. <sup>24</sup> Lloebi diga meinecana uitimaci. Jiaie nairai dine naimacina jaiidoitimaci. Judíuaiñedino sedalle facaise dinori, naimaci anamo Jerusalémo itino iitimaci.

*Jesús abido ie bille rafue*

(Mt 24.29-35, 42-44; Mr 13.24-37)

<sup>25</sup> Jesús nia llofuate:

—Jitoma nagarui illa isoi iñenamona, fívuí nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monailai eo baguamona, comini comečiai eo jarire iitimaci. <sup>26</sup> Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fioidaitimaci isoi iitimaci. <sup>27</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena,

illaimana biitucue. <sup>28</sup> Bie isoide rafue sua, omoina cue jilloitajaibillirui iairei illa jira, cue billiruimo raise ocuiri.

<sup>29</sup> Iena omoi raise uiñollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca. <sup>30</sup> Bie eniruemo amena firuillamona, fiemona raire illana uiñotomoi. <sup>31</sup> Ie isoide. Bie rafue ico sua, Jusiñamui ie cominina raire sedajana uiñoitomoi. <sup>32</sup> Uanaicinona omoimo lloiticue. Nana bie rafue suille facaiseconi bie nairai nia iite. <sup>33</sup> Mona fuite. Enirue jiai fuite; iadedi cue lloga uai jaca suite. <sup>34</sup> Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuen a ñinoñedinona duere finollena, ebena abido biitucue. <sup>35</sup> Cue bia, illaimana cue illamona, nana cominimo juez isoi lloiticue. <sup>36</sup> Ie jira nagarui abi rairuicana jai. Naie duere sefuille facaise omoi jilloillena, Jusiñamui jii. Ja muidomo monamo cue diga jaca iitomoi —llote.

<sup>37</sup> Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. <sup>38</sup> Nagarui jitiramo naimiena cacareillena, Jusiñamui jofomo comini bisoidimaci.

## 22

*Judíuai illaicomini Jesúna gaitallena siadua rafue*  
(Mt 26.1-5, 14-16; Mr 14.1-2, 10-11; Jn 11.45-53)

<sup>1</sup> Naie facaise pascua railla rafue iairei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egiptomona naimaci jaiagai jillobillana comecillena, naie rafue ite. <sup>2</sup> Judíuai illaicomini Jesúna meineiacadimaci; iadedi cominina jaciruillanona, naimiena nia meineñedimaci.

<sup>3</sup> Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie. <sup>4</sup> Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúna gaitatallena, naimaci diga ñaiaide. <sup>5</sup> Iobillanona, naimiemo ucubena fecaacadimaci. <sup>6</sup> Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

*Jesúdi ie fiodaille rafuena llua rafue*  
(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup> Llomenico guille rafue illanona, judíuai comini toica llauda faullarui ride. <sup>8</sup> Jesúdi Pedro iaiaiaiai Juan diga ore-tajano, raite:

—Cai rafue guille uicodo finollesa omico jai.

<sup>9</sup> Naimiemo jicanotiaiaiaiai:

—¿Ninomo naiena coco finuana jitaideo?



<sup>10</sup> Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca. <sup>11</sup> Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono. <sup>12</sup> Ie mei omicomomo afebebamo ite aillue cuartona acataite. Na raruiaí diga ite. Nainomo cai guille fino.

<sup>13</sup> Jaidiaimaiaí. Naimie llua isoi baitiaimaiaí. Pascua rafue guille finodiaimaiaí.

<sup>14</sup> Guille facaiseconi ia, Jesús ie llofueoicaigano diga nainomo guisaide. <sup>15</sup> Mesamo gutimacimo, ie llofueoicaiganomo llote:

—Nia cue fiodañenia, omoi diga bie rafue guillena eo jitaídicue. <sup>16</sup> Ie cominina cue Moo ico sedalle facaise ia, nana bie rafue fuite.

<sup>17</sup> Jiroracomo jai totaca vino llinocaida, Jusiñamuimo iobilacinona fecaja mei, raite:

—Mai llino. Biemona nana dajena omoi jiro. <sup>18</sup> Omoína bene dane iese caimare nabaiñeiticue. Cue Moo sedajanomo omoi diga ico cue ia, nainomo omoína dane iese caimare marena nabaiticue. —Iena jirodimaci.

<sup>19</sup> Llomenicono llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fiodaiticue. Cue abimo omoi comecina facajano, iena guiño.

<sup>20</sup> Naimaci guilla fuilla mei, jiroracomo vino diga dane oruitajanona, naimacina jirotrate. Raite:

—Cue fodaillamona, dama cue diaillamona, jecino anamona jilloitomoí. Jusiñamuidi omoímo jiaie rafue birui itatajanona, omoi jecino oni dotajana jai llote. Bie vinodi naie rafue facai ie. —Iena jirodimaci.

<sup>21</sup> Jesús llote:

—Ero, cuena gaitataitimie cai diga guite. <sup>22</sup> Monamona billanona imana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

<sup>23</sup> Temei: “¿Nimie Jesúsna gaitatalle?” dani coniniri siadoside.

*Naimaci moto imiena bu ille rafue*

<sup>24</sup> Ie facaise coniniri siaduana raitimaci:

—¿Cai moto imiena bu ille?

<sup>25</sup> Iena cacajanona, Jesús raite:

—Naimaci jitailla ra finollena, judíuaiñedino illaímaiaídi naimaci anamo itinona ocucabide. “Cai anamo itinona canocabidicaí” raitimaci; <sup>26</sup> iadedi omoímo iese iñede. Omoi moto itimie omoi moto imieñedimiena jailla. Omoímona bu imiena iacania, omoi mullaímana naimie jaicabillasa. Omoímona bu imiena iacania, omoína naimie canocana

jaicabillasa. <sup>27</sup> Ero, jiaie rafuedo iena lloiticue. Naimiena ecalena, naimiena canollena, patrón anamo ie mullaiaí itimaci. Naimaci baifemo patrón illamona, naimacina canollena, ie mullaiaí facaina maijiñede. Cue anamo itomoi; ia omoína canollena, omoi mullaíma isoi iticue. <sup>28</sup> Birui duere cue sefuidicue, cuena fainonocaiñedomoi. <sup>29</sup> Cue Moo cuena illaimana jai itatate. Omoína fetodicue, <sup>30</sup> jiairuido cue illaíma illa facaiseconi cue ecimo omoi caimare marena iocire illena. Nainomo omoi judíuai doce nairaíaina sedaitomoi.

*Jesúdi Pedro naimiena januana llua rafue*

*(Mt 26.31-35; Mr 14.27-31; Jn 13.36-38)*

<sup>31</sup> Jesús llote:

—Simón Pedro, ero, Taifedi Jusiñamuimo ona jicanote, o ramo faillena; <sup>32</sup> iadedi ori jai jidicue, cuena nia ñnocana o jaillena. Ico cuena raise o ñnoñena mei, cue dibeimo o comei iuai dane o meidoia, iemona jiaie creyentiaí comeiaína ocuiñotaitio.

<sup>33</sup> Pedro uai ote:

—Nama, cárcelmo o ia, nainomo jiaí iiticue. O fiodaia, jiaí fiodaiticue. Ona fainonocaiñeiticue.

<sup>34</sup> Jesús uai ote:

—Pedro, jitiramo itava nia ñaiñenia, dacaiño amani cuena janoitio.

*Jesús fiodailla facaise iaírei illa rafue*

<sup>35</sup> Ie llofueoicaiganomo Jesús llote:

—Omoímo ite rafuena uiñoiacadicue. Cue rafue lollena, navui omoína oredicue. “Ucubena uiñoeno, bolsa uiñoeno, meidolle zapatos uiñoeno” omoímo lloticue. Naie facaiseconi omoi, ¿bue rana jitaídomoi?

Uai otimaci:

—Cai buena jitaíñedicaí.

<sup>36</sup> Jesús raite:

—Biruimona omoi duere sefuitomoi. Ie jira abina rairuicana jai. Birui ucube omoímo ia, ñine omoi jaia, iena uiño. Bolsa bumo ia, iena uiño. Abina riidollena, omoímo lloebi iñenia, janore iniroina feca, lloebi ollena. <sup>37</sup> Cuena jaie ciegafuiaí ja suite. Isaías micori cuena jaie cueba: “Maraiñede rafue finoraíma isoi naimie duere sefuite”.

<sup>38</sup> Raitimaci:

—Ero, Nama, mena lloebi caímo birui ite.

Jesús uai ote:

—Mena ia, macaibaite.

*Jesúdi Getsemanímo Jusiñamuimo jia rafue*

*(Mt 26.36-46; Mr 14.32-42)*

<sup>39</sup> Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide. <sup>40</sup> Nainomo ria, naimacimo llote:

—Taife omoina ramo fai raillano, iena omoi ñnoñellena, Jusiñamuimo jii —llote.

<sup>41</sup> Naimie janorede nofici bai faia uaila dinori bai jaide. Caiñici ifodo ana raíta, Jusiñamuimo jii de:

<sup>42</sup> —Ore Moo, o jitaia, cue duere sefuillamona cuena jillota. Cue jitailla isoi cuena finoñeno; iadedi o jitailla isoi cuena fino.

<sup>43</sup> Naimie começina ocuiñotallena, ie facaiseconi monamona Jusiñamui jaienici bite. <sup>44</sup> Jesús começi jarire illamona, naimie rioci faitemo, difai diruena eniruemo uaide. <sup>45</sup> Jii mei, ie llofueoicaigano dine abido bite. Ocosinaillamona, jai inidimaci. <sup>46</sup> Naimacimo jicanote:

—¿Bue ñellena inidomoi? Mai casi. Taife ramo omoina fai raillano, iena omoi ñnoñellena, Jusiñamuimo jii.

### *Jesúna gaitalle rafue*

(Mt 26.47-56; Mr 14.43-50; Jn 18.2-11)

<sup>47</sup> Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús dine iairei bite.

<sup>48</sup> Jesús raite:

—Judas, cuena llibanuanona, cuena gaitataiacadio.

<sup>49</sup> Ie llofueoicaigano naie rafuena jai cioidimaci. Jicanotimaci:

—Nama, ¿cai atica lloebi diga ona riidoitici?

<sup>50</sup> Ie facaise naimacimona damiedi Jusiñamui diga nanoca ñairaima ie mullaima ie nabei jefona jaibonote. <sup>51</sup> Jesús dinena raite:

—Dama ite. —Ie jefona naimie jetajamona, naimiena jillotate. <sup>52</sup> Diga illaicomini Judas diga Jesús dine bitimaci. Naimacimo Jesús llote:

—Fiiiraimadicueta cuena omoi gaitajaiBILLA. Omoi lloebina atidomoi. Omoi butaralluna jiai atidomoi. <sup>53</sup> Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja façaise jai ride. Taife anamo jai itomoi.

### *Pedrodi Jesúna janua rafue*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade.

<sup>55</sup> Nairaiçiri motomo irai bonua mei, ana raidimaci. Pedro naimaci diga jiai raide. <sup>56</sup> Nainomo ite mullaifñodi irai bouamona, Pedromo eruailano raite:

—Bimiedi Jesús diga jaisoidimie.

57 Pedro abi janote:

—Naimiena uiñoñedicue.

58 Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

59 Daje hora illanona, jiaimie raite:

—Bimie galileo imiëna jira, bimiedi Jesús diga ua jaisoidimie.

60 Pedro dinena raite:

—O lluana uiñoñedicue. —Iecon naimie ñaitemo, itava ñaite. 61 Jesús dobaidacaida, Pedromo erodacaide. Iemei Pedro Jesús lluana ubiñote. Jesús naimiemo jaive llote: “Itava nia ñaiñenia, dacaiño amani cuena janoitio”. 62 Pedro jino jaillanona, eo sunaillamona, eo eede.

*Jesúna jifanodua rafue*

*(Mt 26.67-68; Mr 14.65)*

63 Ie facaise Jesúna gaitadino naimiëna jifanododimaci. Naimiëna jiai fatimaci. 64 Ie uisina maitimaci. Llotimaci:

—Siño jitodiosa, ¿bu o faja? caimo llono.

65 Iese jifanodocana uitimaci.

*Jesúdi judíuai illaicomini dine illa rafue*

*(Mt 26.59-66; Mr 14.55-64; Jn 18.19-24)*

66 Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofuëraini ofidimaci. Naimaci dine naimiëna gaitadino Jesúna uitimaci. Naie illaicomini dinena raitimaci:

67 —Ua Cristodiona, iëna caimo llono.

Jesús uai ote:

—Omoimo iëna cue lloia, ñnoñeitomoi. 68 Buena omoimo cue jicanoia, cue uaina oñeitomoi. 69 Monamona jaie bilanona, imana jaidicue. Cuëna omoi meiniëmona, illaïma isoi Jusiñamui ecimo raire iiticue.

70 Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

71 Iëna cacajano, raitimaci:

—Naimie lluana jai cacadicaï. Jiaie comini naimiëna llogiduana jai jitaiñedicaï. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

## 23

*Pilato dine Jesús illa rafue*

*(Mt 27.1-2, 11-14; Mr 15.1-5; Jn 18.28-38)*

<sup>1</sup> Judíuái illaicomini naidacaillanona, Pilato dine Jesúsna uitimaci. <sup>2</sup> Naimiena llogidotimaci:

—Cai cominimo marañedifuenalote. Gobiernomoucubena caifecajana rairuide. Naimiejiairaite: “Cristodicue. Illaimadicue”.

<sup>3</sup> Pilato dinena naimiemo jicanote:

—¿Judíuái comini illaimadio?

Uai ote:

—Jii, judíuái illaimadicue.

<sup>4</sup> Jusinamui diga nanoca ñairainimo Pilatolote. Nainomobite cominimo jiaillote:

—Nicinodi naimiemo ñede.

<sup>5</sup> Uai otimaci:

—Gobierno joreño comini comeciaijeare feidocana naimie uite. Nana Judeamo uite. Galileamona tainede. Bene jai caimo ride.

### *Herodes dine Jesús illa rafue*

<sup>6</sup> Iena cacajano, naimie llogidotinomo Pilato jicanote:

—¿Naimiedi Galilea imie?

<sup>7</sup> —Jii —raitimaci. Galilea enirue illaima Herodes. Naie facaiseconi Jerusalémo naimie illajira, naimie dine Pilatodi Jesúsna orede. <sup>8</sup> Jesúsna Herodes cíanona, iobide. Naimie finocarafuena naimie fidiajira, naimiena cioacade. Siño rafuena naimie finuana jiaicioacade. <sup>9</sup> Jesúsnoie finocarafuena are jicanote; iadedi Jesús dinena uaina oñede. <sup>10</sup> Ie facaiseconi judíuái illaicomini Jesúsna riire llogidotimaci. <sup>11</sup> Herodesie soldaduái diga naimiena eo jeare ñaitimaci. Illaima jítaiuga iniroina jítatatimaci. Ie mei Pilato dine naimiena abido orede. <sup>12</sup> Iemona nairuido Herodes Pilato diga nabairite. Jai conimana enoidiaimaia.

### *Pilatodi Jesús fiodaillana llua rafue*

(Mt 27.15-26; Mr 15.6-15; Jn 18.39–19.16)

<sup>13</sup> Pilatodi judíuái illaicomina, nainomote comini diga, uaidote. <sup>14</sup> Raite:

—Bimie cue dine atidomoi. Raitomoi: “Comini comeciaifeidocana naimie uite”. Naimiemo jai jicanoticue; ia naimiemo nicinodi ñede. <sup>15</sup> Herodes cue dine naimiena como abido orede. “Naimiemo nicinodi ñede” jiairaite. Naimiena cue meinellena, naimie jaca nicinona finoñede. <sup>16</sup> Ie jira naimiena cue sechedotajanona, naimiena oni oretaiticue.

<sup>17</sup> Naie rafue facaiseconi naga año cárcelmona damiena jino jamai oretauide. <sup>18</sup> Pilato lluana cacajano, nana comini adocuiridimaci:

—¡Naimiena oni uño, naimiena meinellena! ¡Barrabás cárcelmona jino oreta!

<sup>19</sup> Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. <sup>20</sup> Jesúna naimie jamai oretaiacana jira, comini diga Pilato dane ñaite; <sup>21</sup> iadedi cuiiriidimaci:

—¡Naimiena corai! ¡Naimiena meine!

<sup>22</sup> Pilato dane jicanote:

—¿Nie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

<sup>23</sup> Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite. <sup>24</sup> Naimaci jitailla isoi Pilato fairiote. Jesúna meinellena llote. <sup>25</sup> Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

### *Jesúna coraia rafue*

(Mt 27.32-44; Mr 15.21-32; Jn 19.17-27)

<sup>26</sup> Jesúna soldaduai oni uitemo, Simón raillamie diga dafafidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaoicaida sonotate. <sup>27</sup> Ailluena comini Jesúna racadimaci. Ailluena riñoniai eo eecana jaisite. <sup>28</sup> Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiñaiñuai, cue facaina eeñeno; iadedi omoi facaina mai omoi ee. Omoi uruiaí facaina mai omoi ee. <sup>29</sup> Ero, jiairuido duere sefuillemona comini raitimaci: “Oiniñuai jiaie riñoniai baifemo duere sefuiñena jira, marena itimaci”. <sup>30</sup> Jusiñamui riicaillafuemona jilloiacanamona, comini jiaí raitimaci: “Aneduai caimo jaicorillana jitaidicai”. <sup>31</sup> Marañede rafuena finoñedicue; iadedi jai duere sefuidicue, Marañede rafuena finodimaci. Ie jira cue baifemo eo duere sefuitimaci.

<sup>32</sup> Naie iaímaiaína meinellena, mena marañede imana jiaí uitimaci. Gobierno llogacinona inoñediiaímaiaí. <sup>33</sup> Ifocoraina eruailla illanomo naimaci ria, Jesúna coraidimaci. Naie marañede iaímaiaína jiaí coraidimaci. Damie Jesús nabeimo. Jiaímie Jesús jarifebeimo. <sup>34</sup> Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanano soldaduai facasite.

<sup>35</sup> Ailluena comini eruaidimaci. Judíuai illaicomínidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui ore-tagamiedena, Jusiñamui fetocamiedena, fiodaillamona dama naimie abina jillotarede.

<sup>36</sup> Soldaduai naimiena jiai jifanododimaci. Ie abi isirena cacaiñellena, naimiemo vino fecajanona, <sup>37</sup> raitimaci:

—Judíuai illaimadiodena, fiodaillamona dama o abina jillota. —Naie vino Jesús jiroñede.

<sup>38</sup> Jesús ifogi afeconi rabicimo Pilato cuetatate: “Bimiedi judíuai comini illaima”.

<sup>39</sup> Jesús diga coraica iaímaiaimona damie naimiena taigode:

—Jusiñamuimona bitiodena, nia fiodaiñenamona dama o abina jillota. Cocona jiai jillota.

<sup>40</sup> Jiaimiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadio? Ja fiodaitio. Iemei Jusiñamui uicomo ja iitio. ¿Niese Jusiñamui uicomo o illena jaciruiñedio? <sup>41</sup> Maraiñede rafuena coco finua jira, duere sefuidicoco; iadedi bimie maraiñede rafuena finoñede.

<sup>42</sup> Iemei Jesús mo llote:

—Illaimana o illa facaise cuena comeci.

<sup>43</sup> Jesús uai ote:

—Uanaicino lloticue. Birui cue diga cue Moo illanomo iitio.

### *Jesús fiodailla rafue*

(Mt 27.45-56; Mr 15.33-41; Jn 19.28-30)

<sup>44</sup> Jitoma naidai jai itemo, daje amani horas mona jitibicaide. <sup>45</sup> Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide.

<sup>46</sup> Jesús ado llote:

—Ore Moo, cue joreña feiño. —Ie mei naimie jai fiodaite.

<sup>47</sup> Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

<sup>48</sup> Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci.

<sup>49</sup> Jesús nabaiñiai bie rafuena aarena ciodimaci. Galileamona bite riñoniai bie rafuena aarena jiai ciodimaci.

### *Jesús raiafomo jonia rafue*

(Mt 27.57-61; Mr 15.42-47; Jn 19.38-42)

<sup>50-52</sup> Pilato dine José raillamie jaide, Jesús abina jicallena. Naimiedi illaicomini. Maremie. Inogamie. Jesúsna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuiride. <sup>53</sup> Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raifonafomo jonete. <sup>54</sup> Nairui viernes. Sábadorui rille jai iairei illa jira, Jesús abina raiafomo raire jonete. <sup>55</sup> Galileamona navui bite riñoniai racadimaci. Raiafona ciodimaci. Naimie abi finuana ciodimaci. <sup>56</sup> Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

## 24

*Jesús fiodaillamona jillua rafue*  
(Mt 28.1-10; Mr 16.1-8; Jn 20.1-10)

<sup>1</sup> Domingo jitiramo monaidemo, naie riñoniai raiafomo jaidimaci, iñaiñuái finoca soride rana uillena. <sup>2</sup> Raiafo ibailla nofici oni joillana ciodimaci. <sup>3</sup> Fo jaidemo, Jesús abina cioiñedimaci. <sup>4</sup> Uainicaidimaci. Ieconí menamie naiñaiñuái ecimo bairediaimaiai. Iaimaiai iniroi eo quenirede. <sup>5</sup> Iaimaiaina jacinaillamona, ifogi ana jitadacaidimaci. Naie iaimaiai dinena jicanote:

—¿Bue ñellena fiodaitimie illanomo cajedimiena jenodomoí? <sup>6</sup> Galileamo navui naimie omoimo llogacinona comeciñedomoi. <sup>7</sup> Naimie raite: “Monamona billanona, imana jaidicue. Jusiñamui jitailla jira, marañede rafue finoraini anamo iiticue. Cuená coraitimaci. Darui amani illanona, fiodaillamona jilloiticue” raite.

<sup>8</sup> Iemona ie llogacinona jai comecitimaci. <sup>9</sup> Raiafomona abido jaidimaci. Ie once llofueoicaiganomo naiñaiñuái ciua rafuena llotimaci. Naie llofueoicaigano diga itinomo jai llotimaci. <sup>10</sup> Naie riñoniaimona María Magdalena ite. Juana ite. María ite. Naiñaiñodi Jacobo ei. <sup>11</sup> Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuena ñaitomoi —raitimaci.

<sup>12</sup> Iena cacajano, Pedro aisicana raiafomo jaide. Nainomoria, ana jitadacaida, fo erodate. Useroi joillana ciode. Iemo ie comecina facajano, jofomo abido jaide.

*Mena llofueoicaiganomo Jesús bairia rafue*  
(Mr 16.12-13)

<sup>13</sup> Jesús jilluarui mena llofuega iaimaiai Emaús railla nairaimo jaidiaimaiai. Jerusalémóna nibai once kilómetros ite. <sup>14</sup> Nana Jesúmo suide rafuena ñaiano jaidiaimaiai. <sup>15</sup> Iaimaiai ñaianona, Jesús iaimaiai diga dafaiñanona, iaimaiai diga jaide. <sup>16</sup> Jusiñamuidi iaimaiaina naimiena uiñotañena jira, naimiena uiñoñediaimaiai. <sup>17</sup> Iaimaiaimo Jesús jicanote:



—¿Buena ñaitomico? —Ieconí naidadatiaimaiaí. Sunaitiaimaiaí. <sup>18</sup> Naie iaímaiaimona damiedi Cleofas. Naimie uai ote:

—¿Niese Jerusalémo biruí suide rafuena uiñoñedio? Nibaí como ridio. Nana jiaí comini iena uiñotimaci.

<sup>19</sup> Uai ote:

—¿Nie isoide rafue suide?

Uai otiaimaiaí:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofuate. Jusiñamui mona naimiedi maremie. Cominimona naimie maremie; <sup>20</sup> iadedi cai illaicomini naimiena gaitatatimaci. Naimiena cruzmo coraitatimaci. <sup>21</sup> Jusiñamui naimie cai dine orecamiemo comequina facadicoco. Naimie cai illaimana illemo ocuridicoco; ia naimie jai fiodaite. Naimie fiodaillamona darui amani jai ite. <sup>22</sup> Cai cominimona dajerie riñoniaíbiruí caina jacinaitadimaci. Jitiramo Jesús raiafomo jaidimaci; <sup>23</sup> iadedi naimie abina cioñedimaci. Abido naimaci bia: “Jusiñamui jaienisaina ciodicai” raitimaci. Naie jaienisai naimacimo llote: “Naimiedi caje”. <sup>24</sup> Iemei caimona dajerie raiafomo jaidimaci. Riñoniaí llua isoi ciodimaci. Jesús abina cioñedimaci.

<sup>25</sup> Jesús dinena uai ote:

—Abi uiñoñedomico. Nana Jusiñamui facaina lloraini micoriaí cuegafuiaína iinoiacañedomico. <sup>26</sup> Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

<sup>27</sup> Iemei Jesús iaímaiaína llofuate. Moisés micorií cuegafuiaína llofuate. Jusiñamui facaina lloraini micoriaí cuegafuiaína jiaí llofuate. Nana Cristona cuegafuiaína llofuate.

<sup>28</sup> Emaús dine iaírei naimaci ria, Jesús nia jaiacademo, <sup>29</sup> naimiena caididiaímaiaí. Raitiaímaiaí:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaímaiaí diga fiebillena fo jaide. <sup>30</sup> Nailli guitimacimo, llomenicono Jesús llinuano, Jusiñamui iobillacinona fecade. Iena tairuano, iaímaiaímo fecade. <sup>31</sup> Jusiñamui jitailla jira, ieconí Jesúsna uiñotiaímaiaí. Iemei iaímaiaimona naimiena jai cioicaiñena. <sup>32</sup> Daímaiaí ñaitiaímaiaí:

—Coco diga naimie ñaía, coco comeci caímare ite.

<sup>33</sup> Naie dacaiño Jerusalémo abido jaidiaímaiaí. Jesús llofueoicaigano naimaci nabaiñiaí diga danomo illana baitiaímaiaí. <sup>34</sup> Iaímaiaímo llotimaci:

—Cai Nama fiodaillamona jai jillode. Simón Pedromo jai bairede.

<sup>35</sup> Ie mei naisona iaímaiaí jailla rafuena llotiaímaiaí:

—Cai guiticaímo, naimiena uiñoticoco —llotiaímaiaí.

*Jesús ie llofueoicaiganomo bairia rafue*

*(Mt 28.16-20; Mr 16.14-18; Jn 20.19-23)*

<sup>36</sup>“Jesúna ciodicoco” llotiaimaiaimo, ie llofueoicaigano motomo Jesús bairede. Llote:

—Jai biticue. Uri omoi i.

<sup>37</sup>Naimiena ciuamona, jacinaitimaci. “Joreñoa ciodicaí” comeciaina facajanona, jiai jaciruitimaci. <sup>38</sup>Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana ñnoñedomoi? <sup>39</sup>Cue onollimo eruai. Cue eillimo eruai. Jesúsicue. Cuenajeta, raise uñollena. Cuemo llicisi ite. Cuemo illaici ite. Jamai joreño isoñedicue.

<sup>40</sup>Iena llua mei, coraiafona naimaci cioillena, ie onolli ie eilli diga acatate. <sup>41</sup>Iobiacadimaci; iadedi nia raise ñnoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

<sup>42</sup>Naimiemo janorede jai ruica lliciaina fecadimaci. <sup>43</sup>Iena feiñuanona, rite. Iena ciodimaci. <sup>44</sup>Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

<sup>45</sup>Naie facaiseconi naimacina naie ciegafuiaina raise uñnotade. <sup>46</sup>Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite. <sup>47</sup>Naimie muidona comeciái iuai meiduamona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo biena lloiticue. Cue rafuena lollena, Jerusalémo taineitomoi. <sup>48</sup>Bie rafuena ciodomoi. Iena lloitomoi. <sup>49</sup>Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

*Jesús monamo jailla rafue*

*(Mr 16.19-20)*

<sup>50</sup>Betania raila nairai dine Jesús naimacina ifode. Mareciñona naimacimo llote.

—Jusiñamui omoína raise marena canoite —llote. <sup>51</sup>Iena naimacimo lluanona, monamo jaide. <sup>52</sup>Jerusalémo eo caimare abido jaidimaci. <sup>53</sup>Jusiñamui iobillacino fecajano, Jusiñamui jofomo nagarui itimaci. Mai. Macaibaite. Lucadicue.

## JUAN JESUCRISTO ENIRUEMO ILLA RAFUE CUIAFUE

### *Jesucristo rafue iese tainede*

<sup>1</sup> Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. <sup>2</sup> Jusiñamui diga jaca nano ite. <sup>3</sup> Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. <sup>4</sup> Naimie muidona iticai. Naimiena cai ñnuamona, jaca iiticai. Lligaiñora diga rana cai ciua isoi, caina Jusiñamuina uiñotade. <sup>5</sup> Naimiena ñnoñedino jiti redinomo itimaci isoidimaci. Naimaci comeciai jiti rede. Ie uaido naimaci comeciaina lligaiñote, naimaci comeciaino ite jeacino oni jaillena.

<sup>6-7</sup> Naimaci comeciaina lligaiñotimi ena lollena, Juan micori llucinodo Jusiñamuina nana comini ñnollena, Jusiñamuidi Juan Bautista raillamie micorina oretate. <sup>8</sup> Juan naie lligaiñoñedimie; iadedi Juan naimiena lluaibite. <sup>9</sup> Nanoca lligaiñotimi ena llote. Nanoca lligaiñotimiedi eniruemo billanona, nana comini comeciaina lligaiñote. <sup>10</sup> Naimie muidona comini comuidimaci; iadedi naimie bene billa meinocni, comini dinena naimiena uiñoñedimaci. <sup>11</sup> Ie nairai illanomo naimie ride; iadedi nana cai nairai naimiena feiñoñedimaci. <sup>12</sup> Damierie naimiena feiñotimaci. Naimiena ñnotimaci. Ie uaido naimiedi naimacina Jusiñamui uruiaina itatate. <sup>13</sup> Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

<sup>14</sup> Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai. <sup>15</sup> Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

<sup>16</sup> Jesucristo caina eo duenaillamona, birui caina eo canocabide. <sup>17</sup> Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo lluamona Jusiñamui caina duenaillana jai raise uiñotica. Naimiemona uanaicinona jai raise cacadicai. <sup>18</sup> Jaca buna Jusiñamuina cioiñede; iadedi dajede ie Jito caina

naimiena uiñotade. Ie Moo diga danomo illamona, Jesús naimiena uiñote.

*Juan Bautista micoridi Jesúna llua rafue  
(Mt 3.11-12; Mr 1.7-8; Lc 3.15-17)*

<sup>19</sup> Jerusalémona Juan micorí dine judíuái illaicomínidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraima biite raillamiemo ocuridicai. Cristo raillamie billemo ocuridicai. ¿Odi naimiedío? —raillanona jicanotimaci. <sup>20</sup> Naimie dinena janoñede; ia:

—Imieñedicue —raite.

<sup>21</sup> Dane naimiemo jicanodosite:

—¿Budío? ¿Elías?

Juan micorí dinena uai ote:

—Elíañedicue.

Raitimaci:

—Moisés micorí Jusiñamui facaina lloraima íco billena jaie llote. ¿Odi naimiedío?

Juan dinena raite:

—Ieñedicue.

<sup>22</sup> Dane jicanotimaci:

—¿Budío? Caimo llono, cai oretatinomo cai lollena. ¿Niese naimacimo ona lloiticai?

<sup>23</sup> Juan dinena raite:

—Jofue iñenanomo ado llotimiedicue. Isaías micorí jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciai raise finollena ñaiticue.

<sup>24</sup> Juan dine bitinodi fariseuai comini. <sup>25</sup> Nia jicanoiacadimaci:

—Odi cai Jilloitaraimañenia, o Elíañenia, o Moisés micorí llotimieñenia, ¿bue ñellena cominina bautizadio? ¿Nie isoide uai omo ite? ¿Ninomona o uaina otío?

<sup>26</sup> Juan dinena uai ote:

—Cominina bautizadicue; iadedi omoi motomo omoi uiñoñegamie jai ite. <sup>27</sup> Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimiena canonidicue.

<sup>28</sup> Naie rafuedi Betábaramo suide. Jordán railla ille ruicafebeimo ite. Nainomo Juan bautizauide.

*Juan micorí Jesúna dane llua rafue*

<sup>29</sup> Ie areruido Juan micorí Jesús naimie dine billana ciuano, naimiena raite:

—Ero, Jusiñamui Jito toica llauda mamecido jai bite. Cai jeacino facaina faga llauda ifomo Jusiñamui ie Jitona jai orede. Naimie fallemona comini jeacinona dotaite. <sup>30</sup> Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoifede. Cue nia jeicifñenia, naimiedi jaca ite”. <sup>31</sup> Cue dine naimie nia biñenia, naimiedi cai Jilloitaraimana uiñoñedicue; iadedi cominina bautizallena bene iticue, cai cominimo naimiena lollena.

<sup>32</sup> Juan jiai llote:

—Monamona ucugi isoi Jusiñamui Joreño ana billana ciodicue. Jesúmo baite. <sup>33</sup> Naimiedi cai Jilloitaraimana nia uiñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaitaite”. <sup>34</sup> Naie rafuena ciodicue. Iemona naimiedi Jusiñamui Jitonana lloticue.

*Jesús ie fetoacaga comini ie rafue*

<sup>35</sup> Ie areruido Juan micori llofueoicaiganomona menamie Juan micori diga ia, <sup>36</sup> Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

<sup>37</sup> Juan micori diga itiaimaiai naimana cacajano, Jesús racadiaimaiai. <sup>38</sup> Jinafo dine erodajanona, Jesús iaimaiaina ciode. Iaimaiaimo jicanote:

—¿Buena jitaidomico?

Iaimaiai dinena uai otiaimaiai:

—Rabbí, ¿ni o jofo? ¿Ninomo itio? —uai otiaimaiai. Rabbí oni dobaifñuamona: “Llofueraima raillamie”.

<sup>39</sup> Jesús nai iaimaiai uaina ote:

—Mai. Cue diga bi, omico uiñollena. —Ie jira jaidiaimaiai. Jesús illanona ciodiaimaiai. Jitoma nia a illa jira, nairuido naimie diga fiebidiaimaiai. Jitirecaidemo oni jaidiaimaiai.

<sup>40-41</sup> Naie iaimaiaimona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai cominina Jilloitaraimana baiticue. Cristo raillamiena baiticue.

<sup>42</sup> Ie mei Jesús dine naimiena uite. Jesús naimiena eo eruailanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobaifñuacidi Pedro.

*Jesús menamie uaidua raufe*

<sup>43</sup> Ie areruido Jesús Galileamo jaiacade. Felipena baillanona raite:

—Cue llofuegamiena o jaillena, cue diga coco jaillesa, mai cue diga bi. <sup>44</sup> Felipedi Betsaida nairai imie. Andrés iaimaiai

Pedro diga daje nairai iaímaiaí. <sup>45</sup> Jesús naimiemo llua mei, Felipedi Natanaelna oni jenuaide. Higuera railla riará anamo naimiema baillanona, raite:

—Moisés micori jaie cuedamiema jai baiticue. Jusiñamui lloraini micoriaidi naimiema jaie jiaí cuetimaci. Naimiedi Jesús. Nazaret imie. Ie moodi José.

<sup>46</sup> Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

<sup>47</sup> Jesúmona iaímaiaí iaie ia, Jesús dinena llote:

—Ero, buna jifueñegamie billa. Nanoca Israel imie bite.

<sup>48</sup> Natanael dinena uai ote:

—¿Bu cuena llogao? ¿Ñiese cuena uiñotio?

Jesús uai ote:

—Felipe ona ailli nia baiñenia, higuera railla riará anamo o illana jai uiñoticue.

<sup>49</sup> Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

<sup>50</sup> Jesús dinena uai ote:

—Amena anamo o illana cue uiñua jira, cuena iñotio. Diga siño rafuena ciojitio. Bie rafue baifemo finuana ciojitio.

<sup>51</sup> Jusiñamuimona billanona, imana jaidicue. Uanaicino omo lloticue. Mona ecorillana o cioia, Jusiñamui jaienisaí cue dine billena cioitio. Cuemona abido jaillena jiaí cioitio.

## 2

### *Jinuimona Jesús vino finua rafue*

<sup>1</sup> Menarui illanona, Galileamo Canámo imá ie ai uarafue ite. Rafue nama uaidua jira, nainomo Jesús ei jaide. <sup>2</sup> Jesús jiaí uaidoga. Ie llofueoicaiganodicaí jiaí uaidogacaí. <sup>3</sup> Vino cueillamona, Jesús ei Jesúmo llote:

—Vino jai iñede.

<sup>4</sup> Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

<sup>5</sup> Iemei ie eidi rafue nama mullaiaimo llote:

—Naimie omoimo luana fino.

<sup>6</sup> Jinui nainomo eenollena, nainomo seis noficimona finoca llerodana raisoide. Naiemona jinuína ouidimaci. Marena illena, cai einamací llua isoi, jofomo naimaci ría, naimaci abiaína llereuidimaci. Naga lleroda níbaí cinco latas totaca.

<sup>7</sup> Mullaiaimo Jesús llote:

—Naie llerodaiaína jinuí diga oruita. —Pozomona jinuí atiano, naie llerodamo toidimaci.

Iena finua mei, <sup>8</sup> Jesús naimacimo llote:

—Llerodamona janore jisa uanona, rafue nama dine uiño.

<sup>9</sup> Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaí uiñoñotimaci. Jirua mei, ai otimie uaiduano, <sup>10</sup> raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

<sup>11</sup> Galileamo Canámo Jesúsdi siño rafuena nano finode. Iemona caína ie uai siñona uiñoñotade. Ie muidona naimie siño jitonana ñnoticaí.

<sup>12</sup> Rafue fuilla mei, Capernaumo Jesús ie ei diga, ie amataiaí diga, ie llofueoicaiganodicaí diga jaide. Nano nigarui nainomo iticaí.

*Jusiñamui jofomona Jesúsdi rana fecarainina dotaja rafue  
(Mt 21.12-13; Mr 11.15-18; Lc 19.45-46)*

<sup>13</sup> Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. <sup>14</sup> Rillano, Jusiñamui jofomo diga rana fecarainina cide. Ucube ollena, nainomo juraretaiaí, toica llaudaiaí, ucugiaí fecauidimaci. Ucubena meidorainidi jiaí itimaci. <sup>15</sup> Naimaci ocainaiaí diga naimaci jino jiullena, rao Jesús uanona, iena lleride. Naimaci ucubena judaíde. Mesaiaína oni caitade. <sup>16</sup> Ucugiaína fecarainimo llote:

—Omoi ucugiaína jino uiño. Cue Moo jofomo ra fecafecajana jitaiñedicue —llote.

<sup>17</sup> Iemo Jusiñamuina lloraini micoriaí ciegafuiaína jai comeciticaí. Iese jaie cueba: “O jofona cue riiduamona, jiaíno cuena meinetaitimaci”. <sup>18</sup> Nainomo ite judúuaí illaicomini dinena raitimaci:

—¿Nie isoide uaido naimacina jino oredio? Siño rafuena fino, siño uai omo illana cai uiñoñollena. <sup>19</sup> Jesús uai ote:

—Bicono judaí. Darui amani maijiamona iena dane nillana fuidoiticue.

<sup>20</sup> Dane raitimaci:

—Cuarentiséis años bicomos maijidimaci, iena finollena. ¿Niese iena darui amani illanona, iena dane nillana fuidoitio?

<sup>21</sup> Iese raitimaci; ia Jesúsdi Jusiñamui jofona ñaiñede. Dama ie abina ñaite. Fodaillamona ie jilloillena ñaite. <sup>22</sup> Jesús fodaillamona naimie jillua mei, ie llofueoicaiganodicaí bie lluacinona comeciticaí. Ie jira naie ciegafuena ñnoticaí. Jesús lluacinona jiaí ñnoticaí.

*Jesúsdi comini comeciámo iticino lluaana jitaiñena rafue*

<sup>23</sup> Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina ñnotimaci. Coniniri raitimaci:

—Naimiedi cai Jilloitaraima. <sup>24</sup>—Naganomo comeciaina naimaci facaja jira, naie cominina naimie uiñuamona, Jesús naimaci motomo iacaiñede. <sup>25</sup> Naimaci comeciaino iticinuaína naimie eo raise uiñua jira, comini rafuena naimiemo bu lluaña jitañede.

### 3

#### *Nicodemo Jesús diga ñaia rafue*

<sup>1-2</sup> Judíuai illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

<sup>3</sup> Jesús dinena uai ote:

—Raise llotio; ia daje rafue omo lloticue: Uanai omo lloticue. Dane abido comonori o jeiciñenia, Jusiñamui ie cominina sedajanomo jaca initio.

<sup>4</sup> Nicodemo abido jicanote:

—¿Ñiese eimie ie ei jeraimo dane iite? ¿Ñiese dane comonori jeiciite?

<sup>5</sup> Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeiciñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. <sup>6</sup> Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica. <sup>7</sup> Omo dane lloticue: Comonori jeicia. Ieri rajicaiñeno. <sup>8</sup> Iena o raise cacaillena, jiaie rafuedo iena lloticue. Aifidi ie jitailla dine sairide. Iena cacadio; iadedi ninena billana uiñoñedio. Níne jaillana jiaí uiñoñedio. Ie isoide. Níese Jusiñamui Joreño cominina comuitajana jiaí uiñoñedio.

<sup>9</sup> Nicodemo dane jicanote:

—¿Ñiese biedi dane iite? Raise cacaiñedicue.

<sup>10</sup> Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio. <sup>11</sup> Uanaicinona omo lloticue. Abi uiñuamona omo lloticue. Cue cúa rafuena lloticue; iadedi cue lluaña iñoñedio. <sup>12</sup> Bene ite rafuena cue lloia, iena iñoñediota, monamo ite rafuena cue lloia, iena jiaí raise iñoñeitio. <sup>13</sup> Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue. <sup>14</sup> Monamona biticue; ia amenamo fiodaiticue. Jofue iñenanomo Moisés micori jaio joreño amenamo jaié cuinade. Jaioniaí ainillamona comini fiodaiñellena iena cuinade. Comini ie isoi jilloillena, ie isoi



cuena coraitimaci. <sup>15</sup> Cue fiodaillamona bu cue uaina ñnoia, monamo jaca iite.

*Jusiñamuidi cominina eo isiruilla rafue*

<sup>16</sup> Jusiñamuidi cominina eo isiruilla jira, comini dine ie damiede Jitona orede. Ie Jitona naimaci ñnollena, naimiena orede. Naimiena ñnuamona, monamo jaca iitimaci. Jiai faifiñeitimaci. <sup>17</sup> Naimacina duere finotallena ie Jitona oreñede; iadedi naimaci jeacinomona jilloillena, naimiena orede. <sup>18</sup> Jusiñamuidi Jesús uaina ñnotinona jaca duere finoñeite; iadedi ie dajede Jitona uaina naimaci ñnoñena jira, Jusiñamui duere finollicino anamo jai itimaci. <sup>19</sup> Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuaibite; iadedi naimaci comeciaino jitedinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci. <sup>20</sup> Naimie finoca rafue bai raillano, naga jeacino finoraïma ie comeci lligaiñuana jitañede; <sup>21</sup> ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

*Juan micoridi Jesúna dane ñaia rafue*

<sup>22</sup> Digarui illanona, Jesús ie llofueoicaiganodicai diga, Judea railla eniruemo macaricana jaidicai. Nainomo diga irui fiebidicai. Llofuiamona ñnotinona bautizacana uiticai. <sup>23-24</sup> Nia cárcelmo iñenia, ailluena jinui nainomo illa jira, Enón railla nairaïmo bautizajanomo Juan micori jiai ite. Salim railla nairai iairei ite. <sup>25</sup> Naie facaise Juan micori llofueoicaigano judíuai imie diga bautizajana siadotimaci. <sup>26</sup> Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaïoidimaci. O dine jai raise biñedimaci.

<sup>27</sup> Juan uai ote:

—Jusiñamui ie uai fecañedena, Jusiñamui facaina buna jaca buena finonide. <sup>28</sup> Cue lluaana navui cacadomoi. Lloticue: “Cai comini jilloitaraimañedicue. Cristoñedicue. Naimie billena cue lollena, Jusiñamuidi naimie uicomo cuena orede”. <sup>29</sup> Jiaie rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiai iobide. Ie isoide. Comini cue dine navui biñoidimaci. Birui Jesúmo jaïoidimaci. Naimiemo jai duidimaci. Iena cue cacaïamona, ieri iobidicue. <sup>30</sup> Comini naimie uai siñona uiñuana jitaïdicue. Comini cue jamai bue isoidimiena uiñuana jiai jitaïdicue. <sup>31</sup> Jamai comedie. Ie jira eniruemo ite rafuena

llocabiticue. Jusiñamuimona Jesús billa jira, cai baifemo faite. <sup>32</sup> Ie Moo illanomo ciua rafuena llote. Ie Moo illanomo cacaja rafue jiai llote; iadedi eo janore comini naimiena ñnotimaci. <sup>33</sup> Naimiena ñnotimiedi Jusiñamui uanaicinona llwana raise uñnote. <sup>34</sup> Jusiñamuidi ie Joreño ie Jitomo caidiñeno fecaja jira, naimie Jusiñamui uaina llocabite. <sup>35</sup> Jusiñamuidi ie Jitona isiruite. Ie jira naga rafue naimiemo fecade. <sup>36</sup> Bu Jusiñamui Jitona ñnoia, Jusiñamui illanomo jaca iite; iadedi bu naimiena ñnoñenia, Jusiñamui illanomo jaca iñeite. Jusiñamui ricaillafue anamo jai ite.

## 4

### *Galileamo Jesús jailla rafue*

<sup>1-2</sup> Naie facaise ailluena comini Jesúsmona fueotimaci. Iemei naimie dibeido bautizadimaci. Naimacina naimie bautizalena, janore comini Juan dine jaide. Jesúsdi bautizañede. Dani ie llofueoicaiganodicai bautizadikai. Fariseuai bie rafuena fidiano, iena Jesús uñua jira, <sup>3</sup> Judeamona Galileamo Jesús cai diga dane abido jaide.

### *Samaria iñaiño diga Jesús ñaia rafue*

<sup>4</sup> Galileamo jaillena, Jesúsdi Samaria railla enirue dibeido jaiacade. <sup>5</sup> Samariumo cai ria, Sicar railla nairaimo iairei rillano, daje pozomo ridicai. Naie pozodi Jacob micori jaie finoca. Jacob micori naie pozo illano ie jito José micorimo jaie fecade. <sup>6</sup> Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote. <sup>7-8</sup> Jesús pozomo fiebicailla meinona, Sicarmo jaidicai, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirollasa.

<sup>9</sup> Naiñaiñodi uai ote:

—Judío imiedio. Samaria iñaiñodicue. ¿Ñiese cuemo jinuina jicadio? —Naiñaiño iese raite, judíuai Samaria comini diga ñairainina jira.

<sup>10</sup> Jesús dinena dane uai ote:

—Jusiñamui omo feaacalle ra uñnotiodena, o diga ñaitimiena uñnotiona, cuemo jaca itataite jinuina cuemo jicadio. Iemei omo iena fecadicue.

<sup>11</sup> Naiñaiño uai ote:

—¿Ñiese bie pozomona jinuina oitio? Eo ana ite. ¿Ñinomona jaca itataite jinuina oitio? <sup>12</sup> Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruiái micoriai jiai naiemona jirodimaci. Ie ocainaiái dajemona jiai jirodimaci. Cai usuma micori baifemo faiñedio —raite.

13 Jesús uai ote:

—Nagamiaí bie jinui jirua mei, dane jiroacanite; 14 iadedi cue fecalle jinuína jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

15 Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

16 Jesús dinena uai ote:

—O jofomo mai jai. O ini diga abido bene bi.

17 Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidio. 18 Cinco diga inina jai faicaidio. Birui o diga itimiedi jiaí o iniñede. Uanaicinona ua llotio.

19 Iemona abina uiñocallamona, naiñaiño dinena uai ote:

—Odi Jusiñamui ie lloramadio. Iena uiñoticue. 20 Cai jaiagai bai bene ite anedumo Jusiñamuina sedaudimaci. Ie jira nainomo Jusiñamuina nia sedadicaí; iadedi omoi judíuai dinena raitomoi: “Jerusalémo Jusiñamuina cai sedauilla”.

21 Jesús dinena dane uai ote:

—Cuena ino. Jiairuido bai bene ite anedumo cai Moona sedañeitomoi. Jerusalémo naimiena jiaí sedañeitomoi.

22 Raise uiñoño Jusiñamuina biruido sedadomoi; iadedi cai nairaimona cai Jilloitaraima illa jira, naimiena raise uiñuana sedadicaí. 23 Jiairuido, ua birui, cominidi: “¿Ninomo Jusiñamuina sedaiticaí?” raillamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. 24 Jusiñamui comeñede. Naimiedi jafaici. Omoi comeciái jitaillamona naimiena omoi sedajana jitaide.

25 Riño uai ote:

—Cai Jilloitaraima billena uiñoticue. Naimiedi Cristo. Naimie bia, nana bie isoide rafuena cana raise uiñotaite.

26 Jesús raite:

—Naimiedicue.

27 Ieconí abido ridicaí. Riño diga Jesús ñaia jira, rajicaidicaí; iadedi: “¿Buena naiñaiño jitaide?” raillano jicanoñedicaí. “¿Buena ñaitómico?” raillano jiaí jicanoñedicaí. 28 Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

29 —Ailli pozo fuemo cue jaca cioiraininamie diga dafafidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

<sup>30</sup> Ie jira Jesús dine ailluena comini bitimaci. <sup>31</sup> Naie riño ie nairai dine jailla mei, abido cai dine nia riñenia, Jesúna raiticai:

—Maestro, mai guiño.

<sup>32</sup> Naimie uai ote:

—Cuemo guille illana uiñoñedomoi.

<sup>33</sup> Coniniri siadoticai:

—Jai nibai bu ecajaibiga.

<sup>34</sup> Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guiticue isoidicue.

<sup>35</sup> Comecina facadomoi: “Jusiñamui uaina nia lloñeiticai. Ico iena lloiticai”. Ie isoide. Illimo riará nia llisñenia, comeciaina facadomoi: “Riará einallena, naga amaga fivui fiebite. Naie facaise maijiticai”. Omomoi lloticue: Omomoi ecimo eruai. Riará jai einate isoide. Naimacimo Jusiñamui rafue llollena, iena naimaci inollena, ailluena comini jai itimaci. <sup>36</sup> Naie llisillamo maijitimiedi ie ucubena feiñoite. Ie isoide. Jusiñamui rafuena damerie llocabillamona, comini iena cacadimaci. Jiaino billamona, iena dane cacajamona, iena inotimaci. Naie mare rafue lloraini ibana feiñotimaci. Jusiñamui dibeimo naimaci dajena maijia jira, dajena iobitimaci. <sup>37</sup> Cai comini iena raicabitimaci: “Damie iduaina rite; ia jiaimie llisillana ote”. <sup>38</sup> Ie isoide. Omoina oredicue, comini cue dibeimo itatallena. Naimacimo cue uaina nano lloñedomoi; iadedi nano jiaino naimacimo cue uaina llotimaci. Ie jira nana omoi llofuiamona cue uaina inoitimaci.

<sup>39</sup> Samaria inaiño llumona, nainaiño nairaimona ailluena comini Jesúna inotimaci. “Naimiedi nana cue finoca rafuena cuemo llote” naimacimo nainaiño llote. “Naimiedi cai Jilloitaraima” raillanona Jesúna inotimaci. <sup>40</sup> Jesús dine naimaci rillanona, naimaci diga naimie fiebillena, Jesúsno jicanotimaci. Ie jira Jesús menarui naimaci dinomo fiebide. <sup>41</sup> Naimie llofuiamona, jiaie ailluena comini naimiena inotimaci. <sup>42</sup> Riño mo llotimaci:

—Daño o llumona, navui inoticai; iadedi naimie uaina cai cacajamona, birui raise inoticai. Naimiedi comini ua Jilloitaraima.

<sup>43</sup> Menarui illanona, nainomona Galileamo Jesús cai diga jaide. <sup>44</sup> Caímo llote:

—Jusiñamuina lloraimadi ie nairai illanomo ia, naie comini naimie llumona cacarefiacañedimaci; <sup>45</sup> iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalémo nana naimie finoca rafue navui naimaci cúa jira, naimiena caimare feiñotimaci.

*Jesúdi illaicomini jitona jillotaja rafue*

<sup>46</sup> Galileamo Jesús cai diga macaria, dane Canámo ridicai. Nainomo jinuimona vino navui finode. Nainomo cai ia, Capernaum railla nairaímo itimie jito duide. Duidimie moodi gobierno diga maijuide. <sup>47</sup> Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodaiacana jira, ie jitona jillotallena Jesúmo duere jicanote.

<sup>48</sup> Jesús naimiemo llote:

—Siño rafuena omoi cioiñenia, cuena ñinoñedomoi.

<sup>49</sup> Uai ote:

—Maestro, cue diga bi, cue jito fiodaiñellesa.

<sup>50</sup> Jesús uai ote:

—Mai jai. O jito jai fiodaiñeite —llote. Naie ñima Jesús uaina ñnuano, ie jofomo abido jaide. <sup>51</sup> Naísona naimie jaidemo, ie mullaíai diga afeedo beici dafaífide. Llotimaci:

—O jito jai jillode.

<sup>52</sup> Ie jira naimie jicanote:

—¿Ñino jitoma itemo, jillode?

Uai otimaci:

—Navui are jitoma oni luai caidemo, abi cuarilladi faínonocai.

<sup>53</sup> Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaíai luana cacajamona, naimiedi Jesúsí cai Jilloitaraímana ñnote. Nana naimie jofomo itino jiaí ñnotimaci. <sup>54</sup> Judeamona Galileamo Jesús abido billano, siño rafuena iese jai finode.

## 5

### *Joraíbimo tisitaitimie jillua rafue*

<sup>1</sup> Digarui illa mei, cai judíuai rafue iacana jira, Jerusalémo Jesús abido jaide. <sup>2</sup> Jerusalémo toica llaudaíai jaisoilla nase facaimo joraíbi ite. Cai judíuai uaimona nai joraíbi mamecidi Betesda. Naie jorai fuedo ite cinco jifocotíai. <sup>3</sup> Nainomo diga duidino biidimaci: uisínidimaci, ñuja-ñujacaidino, tisitaitino. Jínuina begollena sedadimaci. <sup>4</sup> Feide isoidemona dacaiño Jusíñamui jaienícidi jínuina begotallena bite. Iemei nai jínuimo nano jaidimie ie duicomona jillode. <sup>5</sup> Duidino motomo tisitaitimie ite. Treintiocho años duide. <sup>6</sup> Naimiena cíuano, naimie are duillana uíñuamona, Jesús naimiemo jicanote:

—¿Jilloiacadio?

<sup>7</sup> Duidimie uai ote:

—Jí; iadedi jínuina begoia, jaca buna ñede cue canoítana. Ie jira jiaímiedi cue uicodo jínuimo jaide. Ie jirari nia jilloñedicue.

<sup>8</sup> Jesús uai ote:

—Mai naidacai. O bíra ferínocaida macari.

<sup>9</sup> Ieconi naimie jillode. Ie biira ferianona oni jai macarite.

*Sábadoruimo duidimie jilloitajana siadua rafue*

Sábadoruimo, judíuai jafaici ouillaruímo, naimie jillode. <sup>10</sup> Ie jira judíuai illaicominidi jillodimie mo llote:

—Birui sábado. O biira abinocaida o uilla jira, Moisés micori rairuica rana jai finodio. Sábadomo maijinídicaí. Birui jafaici uaruimo jaca buena jetanídicaí.

<sup>11</sup> Naimie uai ote:

—Cuená jilloitatimie cuemo llote: “O biira mai ferinocaida macari”.

<sup>12</sup> Judíuai dinena jicanote:

—¿Bu iena omo llote? —Naimie uiñoñena jira, uai oñede.

<sup>13</sup> Jesúdi comini motomo itabilla jira, ailluena comini illa jira, jai jillodimie ie jilloitatimiena uiñoñede. <sup>14</sup> Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoñeno.

<sup>15</sup> Ie mei judíuai illaicominimo jillodimie lluaide. Llote:

—Jesús raillamie cuena jillotate.

<sup>16</sup> Sábadoruimo Jesús bie rafuena finua jira, judíuai illaicominidi naimiena duere finoacasite. <sup>17</sup> Jesúdi abina riiduo mo llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote. <sup>18</sup> Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicominini naimie meinellena eo jitaídimaici.

*Jesús ie Moo isoi finua rafue*

<sup>19</sup> Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. <sup>20</sup> Cue Moo cuena isiruillanona, nana ie finoca rafuena cuena jai uiñotade. Naimie Jitona cue illa jira, bie iimana cue jilloitaja baifemo jiaie siño rafuena finoiticue, omoi raíjicaillena. <sup>21</sup> Fiodaitinona jilloitallena, cue Moomo ie uai ite. Naie uai cuemo jiaí ite. <sup>22</sup> Cue Moo juez isoi naimie iñoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga. <sup>23</sup> Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuená omoi iobitañenia, cue Moona jiaí iobitañedomoi. <sup>24</sup> Uanaicinona lloticue. Cue uaina bu cacaia, cuena oretatimiena bu iñoia, monamo jaca iite. Jearede rafue naimie finua facaina duere sefuíñeite. Faiñeite; ia monamo Jusiñamui diga jaca iite. <sup>25</sup> Uanaicino lloticue. Jusiñamui Jitodicue. Ua birui cuena iñoñedino cue

uaina cacareitimaci. Cuena cacajamona, cuena #nuamona, jaca iitimaci. <sup>26</sup> Cominina jaca itatallena, cue Moomo uai ite. Comini jaca itatallena, cuemo ie uai jiai iga. <sup>27</sup> Cuena #inoñedinomo juez isoi cue llollena, naimiemo cue duillamona, ie uai cuemo jiai iga. <sup>28</sup> Ieri rajicaiñeno. Jiairuido nana jai fioidaitino diese cue lluana cacaitimaci. <sup>29</sup> Fioidaillamona naimaci abiai jilloitimaci. Ie mei cue jitaillacinona finodino jaca illena lloiticue. Cue jitaillacinona finoñedino diese duere sefuillena lloiticue. <sup>30</sup> Naimacimo cuena oretatimie jitailla isoi lloiticue. Dama cue comecimo ite rafuena cue lloñena jira, bie lluacinodi uanaicino.

*Jusiñamui ie Jito uaina comini #inoñena rafue*

31-32 Jesús nia llote:

—Dama cue abina cue lloiadedi, bu cuena jaca #inoñede; iadedi Jusiñamui cue facaina jiai llote. Naimie lluacino uanaicino. Iena uiñoticue. <sup>33</sup> Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo llollena, naimacina oretatomo. Juan lluacinodi uanaicino. <sup>34</sup> Naimie micori cue rafuena llouide; iadedi naimie micori llogacinomo omoi comeci eo facajana birui jitañedicue. Cuena omoi #inollena, naimie mamecina jai llinoticue. <sup>35</sup> Lamparín raise lligaiñua isoi, ie rafuedo Juan micori omoi comeciaino iticinona raise uiñotade. Dallu ieri iobidomo. <sup>36</sup> Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomo. <sup>37</sup> Cue finoca rafue muidona cuena uiñotomo; iadedi naimie lluana jaca cacaiñedomo. Naimiena jiai jaca cioiñedomo. <sup>38</sup> Cuena omoi #inoñena jira, naimie uaina feiñoñedomo. <sup>39</sup> Jusiñamui dine omoi rillena, Jusiñamui facaina lloraini micoriai cuegafuiaina facacabidomo. Naifuiaidi cuena ñaite; <sup>40</sup> iadedi Jusiñamui dine omoi rillena, cue uaina #inoiacaiñedomo. <sup>41</sup> Cuemo iobillacinona omoi fecallena sedañedicue. <sup>42</sup> Jusiñamuina isiruiñedomo. Iena uiñoticue. <sup>43</sup> Cue Moo mamecido cue billanona, cuena feiñoñedomo; iadedi dama ie mamecido jaiimie bia, naimiena feiñoitomo. <sup>44</sup> Jaca #inoiacaiñedomo. Iobillacino coninimo fecadomo; iadedi ua Jusiñamuidi omoina “Mare” raillana jitañedomo. <sup>45</sup> “Cue Moomo omoi marañede finoca rafuena lloiticue” raillanomo comeciaina facañeno. Moisés micori cuegafuiaino omoi llogiduafue jai ite. Moisés micori cuegafuiai muidona Jusiñamui dine omoi jaca illemo ocuridomo. <sup>46</sup> Moisés micori cuegafuiaina #notomoina, cuena naimie micori cuia jira, cuena jiai

ñnoitomoi. <sup>47</sup> Naimie cuegafuiaina ñnoñedomoi. Ie jira cuena jiai ñnoñeitomoi —llote.

## 6

*Jesús cinco llomenicomona ailluena cominina ecaja rafue*  
(Mt 14.13-21; Mr 6.30-44; Lc 9.10-17)

<sup>1</sup> Jiairuido Galilea railla jorai ie ruica ðibeimo Jesús ie llofueoicaiganodicaí ðiga jaide. Naie joraidi jiai Tiberiana mameciredede. <sup>2</sup> Duidinona naimie jillotauillana naimaci ciua jira, ailluena comini naimiena racadimaci. <sup>3-4</sup> Naie facaiseconi pascua railla rafuedi jai iaie ite. Jesús cai ðiga anedumo a jaillanona, ðinomo ana raide. <sup>5</sup> Oni erodatemo, ailluena comini naimie ðine billana ciode. Felipemo jicanote:

—Naimaci guillena, ¿ninomona llomenicona oiticaí?

<sup>6</sup> Naimiena facacillena, iena jicanote; iadedi Jesús ie finolle rana jai uifnote. <sup>7</sup> Felipe uai ote:

—Janore naimaci guillena, doscientos ðigarui ie maijia ucube ðiese llomenico oiticaína, baiñede.

<sup>8</sup> Naie facaise caimona damie iena cacade. Naimiedi Simón Pedro ama. Andréna mameciredede. Naimie raite:

<sup>9</sup> —Cinco cebadamonona finoca jenide llomenico daje uruemo bene ite. Mena lliciaí jiai naimiemo ite; ia ¿niese nibaiticaí? Baiñeite.

<sup>10</sup> Jesús caimo llote:

—Cominimo llono, ana imaci raillesa.

Ie jira raitire illanomo ana raídimaci. Cinco mil iñiaí itimaci. <sup>11</sup> Llomenicona Jesús ua meinoconi, Jusiñamuimo iobillacinona fecajano, Jusiñamuimo jide. Iemei cominimo caína naie llomenicona fecatate. Comini jitailla ðierise lliciaí daje isoi fecatate. <sup>12</sup> Naimaci monillamonona, caimo Jesús llote:

—Buena jaca faifñellena, fiebide guille danomo irai.

<sup>13</sup> Ie jira iena iraidicaí. Naie cinco llomenicomona, comini guigamonona fiebidemonona, doce cirigaiaimo oruitaticaí. <sup>14</sup> Jesús finoca rafuena naie cominidi ciuanona, llotimaci:

—Jusiñamui facaina lloraini micoriaidi cai jilloitaraima ico billena jaie llotimaci. Bimiedi naimie.

<sup>15</sup> Naimaci illaimana naimie illena, naimiena gaitacadimaci. Iena naimie uñua jira, iena naimie jitaiñena jira, aneduaimo naimie oni jaide.

*Capernaumo Jesús abido jailla rafue*  
(Mt 14.22-27; Mr 6.45-52)

<sup>16</sup> Jitoma ana itemo, jai navuidemo, ie llofueoicaiganodicaí joraimo jaidicaí. <sup>17</sup> Cai botemo cai jaillano, ruica Capernaumo jaiacadicaí; iadedi Jesús nia biñede. Jesúsna sedadicaimo, naimie biñena jirari, jai jitirena facaiseconi jai jaidicaí. <sup>18</sup> Raire



aifi illa jira, jorai eo bagode. <sup>19</sup> Nibai cinco, nibai seis kilómetros jaidicaimo, damie cai dine jinui emododo billana ciodicai. Bote dine naimie billana ciuanona, jacinaiticai. <sup>20</sup> Jesús caimo llote:

—Jesúdicuesa. Jacinaiño.

<sup>21</sup> Iena cacajanona, botemo naimiena a billana jitaicai. Ieconu ruica dine cai jaiacananomo ridicai.

*Comini Jesúna jenua rafue*

<sup>22-24</sup> Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimaci. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúna naimaci cioiñena jira, cai jiai iñena jira, naie botiaido Capernaumo Jesúna jenollena, jaidimaci.

*Jesús: “Llomenicodicue” railla rafue*

<sup>25</sup> Ruica dine Jesúna comini baillanona, jicanotimaci:

—¿Niruido bene ridio? <sup>26</sup> Jesús uai ote:

—Navui are omoina cue ecajmona, iemona omoi monillamona, cuena jenodomo. Siño rafuena cue finuana ciodomoi; iadedi cuena nia iñoñedomoi. <sup>27</sup> Guille raire cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iñuamona, Jusiñamui diga jaca iitomo.

<sup>28</sup> Jicanotimaci:

—Nia Jusiñamui dibeimo iticaina, ¿nie isoidifue finodicaina mare?

<sup>29</sup> Jesús uai ote:

—Naimie oretagamie uaina omoi iñuana jitaide.

<sup>30</sup> Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai iñollesa. <sup>31</sup> Cai jaiagai jofue iñenanomo Jusiñamuimona bite guilla ra guisoidimaci. Moisés micori iena jaie cuela: “Jusiñamuimona bite guiga ra naimacimo nagarui fecauide”. Iemo jiai birui ocuiridicai. Naie isoide siño rafuena o finuana jiai cioacadicai —llotimaci.

<sup>32</sup> Jesús uai ote:

—Uanai lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoimo jai fecaacade. <sup>33</sup> Jusiñamui fecaacalle llomenico monamona jai bite. Comini iena guillamona, jaca iitimaci.

<sup>34</sup> Llotimaci:

—Nagarui caimo bie isoide llomeniconona fecu.

<sup>35</sup> Jesús uai ote:

—Llomenico guillamona itícaí. Omoi llomenico isoidícue. Cuena ñnuamona, monamo jaca iitomoi. Cuena ñnotimie dane aimetañeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comeciái jitaillacino naimacimo jaca illena ñaite—. <sup>36</sup> Cuena ciodomoi; iadedi cuena ñnoñedomoi. <sup>37</sup> Nana cue díbeimo cue Moo itatallinodí cuena ñnoitimaci. Cuemona naimacina jaca oni dotañeiticue. <sup>38</sup> Cuena oretatimie ie jitailla rafuena finollena, monamona jai bitícue. Dama cue jitailla rafuena finoitícuena biñedicue. <sup>39</sup> Cuena oretatimíedi cue díbeimo itatallinomona buna faifillana jitañede. Jusiñamui lluaruimo fiodaillamona nana naimaci abiaína cue jilloitajana jiaí jitaide. <sup>40</sup> Jusiñamui Jitona cue illana bu ñnoia, cuena bu ñnoia, monamo jaca iite. Jusiñamui lolliruimo fiodaillamona naimie abina jillotaitícue. Iese cue Moo jitaide.

<sup>41</sup> Jesúsdi: “Monamona bite llomenicodícue” railla jira, judíuai illaicomínidi naimie uaina jamaillano ñnosíñede.

<sup>42</sup> Raitimaci:

—Bimíedi Jesús. José jito. Ie moona uíñotícaí. Ie eina jiaí uíñotícaí. ¿Ñiese naimíedi: “Monamona bitícue” raite?

<sup>43</sup> Jesúsdi uai ote:

—Iese omoi naiñeno. <sup>44</sup> Naimiena cue Moo ñnotañenia, bu cuena ñnonide. Cuena bu ñnoñenia, Jusiñamui lolliruimo fiodaillamona naimie abina jillotaitícue. <sup>45</sup> Jusiñamuina lloraini micoriai jaie iena cuetimaci: “Jusiñamuidi nana comínina íco llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiaí ñnoite. <sup>46</sup> Buna cue Moona jaca cioñede. Naimiemona cue billamona, dama cue ciua. <sup>47</sup> Uanaicínona llotícue. Cue uaina ñnotimie monamo jaca iite.

<sup>48</sup> Jesús dane llote:

—Llomenico guillamona itícaí. Omoi llomenico isoidícue. Cuena ñnuamona, monamo jaca iitomoi. <sup>49</sup> Jofue iñenanomo omoi jaiagai Jusiñamuimona bite rana guisoidimaci; iadedi fiodaitimaci. <sup>50</sup> Birui jiaíe guille ra ite. Monamona ite. Iena bu guia, monamo jaca iite. <sup>51</sup> Bie llomenicodí cue. Monamo comínina jaca itatallena, monamona bitícue. Bu bie isoide llomenicono guia, jaca iite. Bie llomenicodí cue abi. Comíní facaina fiodaitícue.

<sup>52</sup> Iena cacajano, judíuai illaicomíní coníniri naiena siadotimaci. Raitimaci:

—¿Ñiese bimie abina riítícaí?

<sup>53</sup> Ie jira Jesús dinena raite:

—Uanai llotícue. Cue abina omoi riñenia, cue diruena omoi riñenia, cue Moo díga jaca iñeítomoi. <sup>54</sup> Bu cue abina ríia, bu

cue diruena riia, cue Moo diga jaca iite. Fiodaillamona naimie abi irairuimo jillotaiticue. <sup>55</sup> Cue abidi ua rille. Cue diruedi ua rille. <sup>56</sup> Bu cue abina riia, bu cue diruena riia, cuena nabaide. Naimiena jiai nabaidicue. <sup>57</sup> Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiai iite. <sup>58</sup> Bie isoide guille ra monamona jai bite. Omoi jaiagai jai e guiga ra isoifede. Jai e fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini inuamona, Jusiñamui diga naimaci jaca illena ñaite.

<sup>59</sup> Capernaumo judíuai ofiracomo Jesús buena llote.

*Jesús diga jaisoidino naimie llua siadua rafue*

<sup>60</sup> Jesús diga jaisoidino naimie llua cacajano, coniniri siadotimaci:

—Bie llua eo irirede. Bu iena cacaiñede.

<sup>61</sup> Jesúsdi naimaci iese siaduana uiñote. Ie jira llote:

—Cue llua raise inoñedomoi. <sup>62</sup> Jusiñamuimona imana jaillena jai biticue. Monamo abido ico cue jaillena cioitomoina, iena jiai nibai raise inoñeitomoi. <sup>63</sup> Cai joreño caimo illamona, iticai. Dani cai abi diga ifedicaí. Ie isoide. Cue llogacino Jusiñamuimo duide. Iena omoi inuamona, jaca iitomoi; <sup>64</sup> ia omoimona nana inoñedomoi —llote. Nano dofoconimona Jesúsdi naimiena inoñedinona uiñote. Naimiena gaitataitimiena jiai uiñote.

<sup>65</sup> Jesús dane llote:

—Ie jira omoimo lloticue: Cue Moo jitañenia, cuena jaca bu inonide.

<sup>66</sup> Iena cacajano, Jesús diga jaisoidinomona, diga comini naimiena fañonocaidimaci. <sup>67</sup> Ie jira ie doce llofueoicaiganodicaimo Jesús jicanote:

—¿Jiai cuena fañonocaida, abido jaitomoi?

<sup>68</sup> Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi Jillotaraíma ifede. Jaiimemo jaca itatajaracinodi ifede. <sup>69</sup> O llua jai inoticaí. Jusiñamui mare Jitodio. Iena uiñoticaí.

<sup>70</sup> Jesús dane uai ote:

—Doce digamie fetocaomoi; iadedi omoimona damie Taifemo jainaiaide —llote. <sup>71</sup> Caimona Judas Iscariote micorina ñaite. Judas micori Jesúsna gaitataiacadimie.

## 7

*Jesús amatiai naimiena inoñena rafue*

<sup>1</sup> Jaiaruido Galileamo ite nairaiamo Jesús macarite. Judíuai illaicomini naimiena meineiacana jira, Judeamo jaiñede.

<sup>2</sup> Jifocotiaiai railla rafue iaire ite. Judíuai ie rafue. <sup>3</sup> Ie jira Jesús amatiái naimiemo llote:

—O diga jaicabidino o finua rafuena raise cioillena, beno fainonocaida, Judeamo jai. <sup>4</sup> Bu ie mameci are soriacania, bainino maijirainina. Ie isoide. Siño rafuena o finoa, ailluena comini illa motomo iena fino.

<sup>5</sup> Jesús amatiái naimiema ñnoñena jira, iese raite. <sup>6</sup> Jesús dinena uai ote:

—Jerusalémo nia jaiñeticue; iadedi nainomo omoi jaiacalliruido omoi jai. <sup>7</sup> Comini omoína enoiñedimaci. Naimaci finoca jearede rafuena cue llua jira, cuena jaca enoidimaci.

<sup>8</sup> Jerusalémo rafuemo jai. Cue jaillirui nia riñena jira, nia jaiñeticue. <sup>9</sup>—Iese llvano, Galileamo naimie fiebide.

<sup>10</sup> Naimie amatiái rafuemo jailla mei, Jesúsdi naimaci jinafona dama bainino jaide. <sup>11</sup> Nai rafuemo judíuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

<sup>12</sup> Nainomo ailluena comini itimaci. Comini illa motomo naimiema anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifute” raitimaci. <sup>13</sup> Judíuai illaicominina iciana comini jaciruillanona, anado siadoside. Jesúsna marefodo buna ñaiñede.

### *Sábadoruimo Jesús maijia raufe*

<sup>14</sup> Jifocotiaiai railla rafue atuado fuitemo, Jesús Jusiñamui jofomo jaillano, llofute. <sup>15</sup> Illaicomini naimie llofuiamona rajjicaidimaci:

—¿Niese naimie abi uiñote? Eo rafuena uiñotimiemona jaca fueoñede—raitimaci.

<sup>16</sup> Jesús uai ote:

—Dama cuemona oñega cue llofuiacinodi. Cuenaa oretatimie ie. <sup>17</sup> Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuimona cue uana uiñoite. Dama cue comecimona cue oñenana jiai uiñoite. <sup>18</sup> Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Maraiñedicinona finoñede. <sup>19</sup> Moisés micori Jusiñamui uaina jai llote; iadedi birui naie llogacinuaina nia raise ñnoñedomoi. Iena raise ñnotomoidena, cuena niade meineiacaiñedomoi.

<sup>20</sup> Comini dinena uai ote:

—Nibai uairitaidio. ¿Bu ona meineiacade?

<sup>21</sup> Jesús uai ote:

—Dacaiño sábadoruimo damiena jillotaticue. Ie jira cue uaina uaitatomo. <sup>22</sup> Sábadoruimo jiai maijicabidomoi. Moisés

micorí iisaiái abiai diana omoimo jaie llote; iadedi naimie micorí naiena nano lloñede. Naimie micorí usumatiai naiena nano llotimaci. Sábadoruimo iisana abi dellirui ia, detomoi. <sup>23</sup> Moisés micorí llogacinona inollena, sábadoruimo iisaiaina detomoi. Sábadoruimo imana raise jillotaticuemo, ¿bue ñellena cue diga iciritomoi? <sup>24</sup> Cominimo jamai eruaillanona, naimacina jeare ñaiñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

*Jesúna comini siadua rafue*

<sup>25</sup> Ie jira Jerusalémo itino coniniri siadotimaci:

—Illaicomini bimiena meineiacadimaci; <sup>26</sup> iadedi beno marefodo naimie llofuede. Jaca buena lloñedimaci. Illaicominidi: “Bimiedi cai Jilloitaraima” raillano nibai comeciaina facadimaci. <sup>27</sup> Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budi naimie billanona uiñoñeite —siadotimaci.

<sup>28</sup> Ie jira Jesús Jusiñamui jofomo naimie llofuiano llote:

—Cuena uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi. <sup>29</sup> Naimiemona cue billa jira, naimiena uiñoticue. Cuena oretate —llote.

<sup>30</sup> Ie jira illaicomini Jesúna gaitacadimaci; iadedi naimie fiodaille facaise nia riñena jira, buna naimiena gaitañede.

<sup>31</sup> Nairui ailluena comini naimie uaina inotimaci. Raitimaci: —Cai Jilloitaraima bia, ¿ñiese naimiedi bimie baifemo jiaie rafuena finoite?

*Jesúna gaitaiacana rafue*

<sup>32</sup> Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede. <sup>33</sup> Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue. <sup>34</sup> Cuena jenoitomoi; iadedi cuena baiñeitomoi. Cue dine binitomoi.

<sup>35</sup> Ie jira nainomo ite illaicomini dani siadotimaci:

—¿Nine jaite? ¿Ñiese naimiena baiñeiticai? Judíuañedinona llofuellena, jiaie eniruemo cai comini dine nibai jaite. <sup>36</sup> ¿Ñiese naimie raite: “Cuena jenoitomoi; iadedi cuena baiñeitomoi”? ¿Ñiese raite: “Cue dine binitomoi”? —iese siadotimaci.

*Jesúdi Jusiñamui Joreñona ñaia rafue*

<sup>37</sup> Jifocotiaiai railla rafue fuillarui, ua rafue ie nairuimo, Jusiñamui jofomo itinomo Jesús ado llote:

—Bu jiroacania, cue dine bi. <sup>38</sup> Jusiñamui facaina lloraini micoriai jaie cueda: “Naimiena inotimie comecimo jaca itatate jinui isoi iite, torafomona jinui tonooilla isoi”.

<sup>39</sup> Jesúdi iese llote; ia Jusiñamui Joreñona ñaite. Jusúna ñnotinomo Jusiñamuidi ie Joreñona ico illena ñaite. Jesús nia fodaiñena jira, iena nia iñega.

*Comini Jesúna dane siadua rafue*

<sup>40</sup> Jesús lluana comini cacajano, raitimaci:

—Jsiñamui facaina lloraini micoriai Jusiñamui facaina lloraima ico billena jaie llotimaci. “Cristo nia baireñena, naimie biite” llotimaci. Bimiedi naimie.

<sup>41</sup> Jiaino raitimaci:

—Naimiedi cai Jilloitaraïma. Naimiedi Cristo.

Jiaino raitimaci:

—Cai Jilloitaraïma Galileamona biñeite. <sup>42</sup> Jusiñamui facaina lloraima micori cuega: “Cai Jilloitaraïmadi David micori jito. Belémo David micori illanomo jeicille”.

<sup>43</sup> Ie jira daje isoi naimiemo comeciaina facañedimaci.

<sup>44</sup> Jiaino naimiena gaitacadimaci; iadedi buna naimiena jetañede.

*Judúuai illaicomini Jesúna ñnoñena rafue*

<sup>45</sup> Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

<sup>46</sup> Policías dinena uai ote:

—Naimie llofua isoi jaca buna llofueñede. Iena jacinailanona, naimiena atiñedicai.

<sup>47</sup> Fariseuai dane llotimaci:

—Cominina jifua isoi, omoïna jiai jifueite. <sup>48</sup> Cai illaicomini dinena naimiena jaca ñnoñedicai. Moisés micori llogacinodo raise jaidicai; <sup>49</sup> ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimasisa.

<sup>50</sup> Naie illaicomini mona Nicodemo raillamie ite. Naimie naïona Jesús dine navui jaide. Fariseo imie. <sup>51</sup> Jesúna riiduanona, naimie llote:

—Cai einamaci llocabitimaci: “Bu duere cai finoacania, nano naimie lluomo cacarefiticai. Jearede rafue naimie finuana cacareillano, naimiena duere finoiticai”. Iena cai cacaiñena, naimiena duere finoñeiticai.

<sup>52</sup> Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jaie cuegafuiaina raise faca. Jusiñamui facaina lloraini micoriaidi cai nairaina Jilloitaraïma Galileamona billena jaie cueñedimaci. Bie Jesús raillamiedi cai nairaina Jilloitaraïmañedimie.

<sup>53</sup> Ie meinoconi damierie imaci jofomo jaidimaci.

## 8

*Ie iniñede iima diga riñodi rafuetaila ie rafue*

<sup>1</sup> Naie facaise Jesúdi Olivos railla anedumo jaide. <sup>2</sup> Ie are-ruido jitiramo Jusiñamui jofomo abido dane jaide. Ailluena comini naimie dine billa jira, naimie ana raita, naimacina llofuate. <sup>3</sup> Naie facaise Moisés micori llogacinona llo-fuerainimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eida timaci. Comini illa uicomo atiano, <sup>4</sup> Jesúmo llotimaci:

—Llofueraima, biñaiño ie iniñede iima diga eida ticai.

<sup>5</sup> Moisés micori jaie cuela: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

<sup>6</sup> Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jitadacaida, eniruemo ie onocai diga cuete. <sup>7</sup> Naimiemo diga icaiño jica-jicanuano, naimie naidacaida, naimacimo llo te:

—Omoimona jeacino iñedimie naiñaiñomo nano noficina fairino.

<sup>8</sup> Dane ana jitadacaida, eniruemo dane cuete. <sup>9</sup> Naimie llua na cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena.

<sup>10</sup> Eruaillano naiñaiñomo jicanote:

—¿Ni nai o llogidotino?

<sup>11</sup> Naiñaiño uai ote:

—Jaca iñedimaci. Cuen a jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoñeno.

*Jesúdi comini comeciai lligaiñua rafue*

<sup>12</sup> Jesúdi cominina dane llofuianona, raite:

—Jeacino oni jaillena, comini comeciaina lligaiñoticue. Cuen a inotimie jitiredinomo jaca iñeite. Jeacino anamo jai iñedimie Jusiñamui diga ico jaca iite.

<sup>13</sup> Fariseuai dinena uai otimaci:

—Dama o abina ñaitio. Ie jirari uanaicinona lloñedio.

<sup>14</sup> Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñomedomoi. Nine cue jaillinona jiai uiñomedomoi. <sup>15</sup> Abi raise uiñofieno cuena jeare ñaitomoi. Iese omoina ñaiñedicue; <sup>16</sup> iadedi omoina cue ñaia, uanaicinona lloticue. Dama cue uaina omoina lloñedicue. Cuen a oretatimie omoina jiai llo te. <sup>17</sup> Moisés micori iena jiai jaie cuela: “Menamie daje isoi lloia, naie iaiaiaia llucanodi omoi inua” cuela. <sup>18</sup> Cue facaina lollena, menamie jai ite. Cue facaina lloticue. Cue Moo cue facaina jiai llo te.

<sup>19</sup> Fariseuai dinena jicanote:

—¿Ni o moo?

Jesúdi uai ote:

—Cuenta uiñoñedomoi. Cuenta Moona jiai uiñoñedomoi. Cuenta uiñotomoina, cuenta Moona jiai uiñotomoi.

<sup>20</sup> Jusiñamui jofomo ucube eenoracomo bicinona siadotimaci. Jesús fiódaille facaise nia riñena jira, jaca buna naimiena gaitañede.

*Jesúna comini ñnoñenia, naie jeacino diga fiódaille rafue*

<sup>21</sup> Naimacimo Jesús dane llote:

—Ico oni jaiticue. Cuenta jenoitomoi; iadedi cuenta baiñeitomoi. Na omomoi jeacino nia itemo, fiódaitomoi. Cuenta jaillinomo jainitomoi.

<sup>22</sup> Ie jira judíuai illaicomini dinena iena siadotimaci:

—Dama ie abina meineite.

“Cuenta jaillinomo jainitomoi” Jesús railla jira, iese siadotimaci.

<sup>23</sup> Jesúdi uai ote:

—Jusiñamui ite rafuemo duiñedomoi. Naimiemo ite rafuemo duidicue. Naimie díbeimo iñedomoi; ia naimie díbeimo iticue. <sup>24</sup> Cuenta Jusiñamui Jitonana omoi ñnoñena jira, na omoi jeacino diga fiódaitomoi.

<sup>25</sup> Jicanoside:

—¿Budío?

Jesús uai ote:

—Nano omoi motomo cuenta illamona bumiedicuenta omoina raicabiticue. <sup>26</sup> Diga rafue omomoi lloiacadicue. Marañede rafuena omoi finuana omomoi nia lloiacadicue; iadedi omomoi cuenta oretatimie uaina dama lloticue. Nai uaidi uanaicino —llote.

<sup>27</sup> Naimiedi ie Moo Jusiñamuina llote; iadedi cacaiñedimaci. <sup>28</sup> Ie jira Jesús llote:

—Cuenta omoi meinia mei, bumiedicuenta uiñoitomoi. Cuenta uaido dama lloñedicue; iadedi cuenta Moo cuenta llofuia uaido llocabiticue. <sup>29</sup> Cuenta oretatimie cuenta diga ite. Naimie jitaille rafuena cuenta finua jira, cuenta fañonocañede.

<sup>30</sup> Iese Jesús llotemo, diga illaicomini naimie uaina como ñnoiacadimaci.

*Comini Taiñe anamo illa rafue*

<sup>31</sup> Jesúdi naimie uaina como ñnoiacadinomo llote:

—Cuenta llwana ñnocana omoi jaiá, cuenta ua cominidomoi.

<sup>32</sup> Uanaicinona uiñoitomoi. Ie mei jiaimie anamo dane iñeitomoi.

<sup>33</sup> Uai otimaci:

—Abraham micori ie uruiaídicaí. Jiaimie anamo jaca iñedicai. ¿Bue ñellena llotio: “Jiaimie anamo iñeitomoi?”

<sup>34</sup> Jesúdi uai ote:



—Uanai lloticue. Jeacino finocabidomoi. Naga jeacino finoraïma ie jeacino anamo jai ite. Omoi jeacino anamo omoi illana ñaiticue. <sup>35</sup> Jiaie rafuedo iena lloiticue. Ie patrón anamo itimiemo ie patrón rafuedi duiñede; iadedi naie patrón jitomo ie rafuedi duide. <sup>36</sup> Ie isoide. Jusiñamui Jitona cue illamona, naimie rafuemo duidicue. Ie jira omoïmo cue lloia, omoi jeacino anamo ua iñeitomoi. <sup>37</sup> Abraham micori ie uruiaïdomoi. Iena uiñoticue; iadedi cue llua na omoi raise ñnoñena jira, cuena meineiacadomoi. <sup>38</sup> Cue Moo diga jaie cue illamona, cue cïua rafuena llocabiticue. Omoi moomona cacaja rafuena finocabidomoi.

<sup>39</sup> Uai otimaci:

—Cai moodi Abraham micori.

Jesús dane uai ote:

—Abraham micori uruiaïdomoi dena, Abraham micori finoca rafue isoi finodomoi. Abraham micori uruiaïñedomoi. Ie jira Abraham micori finoca rafue isoi finoñedomoi. <sup>40</sup> Uanai cue llua jira, cuena meineiacadomoi; iadedi Abraham micori iese finoacaiñede. Cue llucino Jusiñamuimona oticue. <sup>41</sup> Jusiñamui uruiaï finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaïñedicaï. Cai Moodi Jusiñamui.

<sup>42</sup> Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. <sup>43</sup> ¿Bue ñellena cue llua cacaiñedomoi? Cacareirainidomoi. <sup>44</sup> Omoi moodi Taifena jira, cue llua ñnoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucïnodi comucabide. Naimie isoidomoi. <sup>45</sup> Uanai cue llua jira, cuena ñnoñedomoi. <sup>46</sup> ¿Nie isoide jeacino finodicue? Cuemo llono. Uanai cue lli, ¿bue ñellena cuena ñnoñedomoi? <sup>47</sup> Jusiñamuina mooredimiedi Jusiñamui uaina cacade. Jusiñamui uruiaïñedomoi. Ie jira cue llua cacaiñedomoi.

<sup>48</sup> Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

<sup>49</sup> Jesús uai ote:

—Janaba illamiñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi. <sup>50</sup> Omoïmona iobillacinona feiñollena, cue rafuena finoñedicue; ia cue Moo iena oiacade. Cuena omoi ñnoñena, cuemo iobillacinona omoi fecañena, cue Moo

omoina duere finoite; <sup>51</sup> ia bu cue llwana ua ñnoia, jaca ua fioidañeite.

<sup>52</sup> Naie illaicomini dinena uai otimaci:

—Janaba illamediona jai uñoticaí. Abraham micorí jaie fioidaite. Jusiñamuina lloraini micoríai jiaí jaie fioidaitimaci; iadedi: “Bu cue llwana ñnoiadedi, fioidañeite” raitio. <sup>53</sup> Cai usuma Abraham micorí baífemo fañedio. Jusiñamuina lloraini micoríai baífemo fañedio. ¿Bumiediota?

<sup>54</sup> Jesúsdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabit-omoi; <sup>55</sup> iadedi naimiena uññoñedomoi. Naimiena uñnoticue. “Naimiena uññoñedicue” cue raia, omoi isoi taino lloticue. Naimiena uñnoticue. Naimiena jiaí ñnoticue. <sup>56</sup> Omoi usuma Abraham micorí eniruemo cue ico billena jaie uñnote. Iena uñuamona, naimie iobide.

<sup>57</sup> Illaicomini dinena uai otimaci:

—Odi cincuenta años nia iñedio. ¿Ñiese Abraham micorína ciodio?

<sup>58</sup> Jesús uai ote:

—Abraham micorí nia iñena facaiseconi jaca iticue.

<sup>59</sup> Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

## 9

### *Jesús uisínidimiena jillotaja rafue*

<sup>1</sup> Jiairuido ie llofueoicaiganodicaí diga Jesús macaria, uisínidimiena cide. Iese nanomona jaca naimiedi jeiciga.

<sup>2</sup> Jesúsno jicanoticaí:

—Llofueraíma, ¿bue ñellena naimiedi iese jeiciga? ¿Ñie isoide ra ie moo jetajamona, naimie iese jeiciga? ¿Ñie isoide ra ie ei jetajamona, naimie iese jeiciga? Caimo llono.

<sup>3</sup> Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusiñamui uai siñonana comini uññollena, iese jeiciga. <sup>4</sup> Nia userena jira, cuena oretatimie ie jitailla rafuena finoacadicaí. Raíre jitiñenite. Ie mei bu jaca maíjinite.

<sup>5</sup> Eniruemo cue nia ia, comini comeciaina lligañotícue. —Iese Jesús llote; iadedi jiaíe rafuena ñaíte. Naimie nia fioidañenia, Jusiñamui rafuena llocana naimie jaillana ñaíte. Ie fioidaillirui jai iaíre iacanana ñaíte. Comeciaina lligañuana llote, jeacino oni jaillena.

<sup>6</sup> Iena llwanona eniruena tuajano, enirue idiaí finuanona, uisínidimie uisina naie enirue diga riginote. <sup>7</sup> Raíte:

—Siloé railla joraibimo mai noisai —raite. Siloé oni do baiñuamona: “Oretarabi”.

8 Ie jira naimie noisai. Uisi jai ci demo, abido bite. Billa mei, naimie ecimo itino, jiai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

9 Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisinidimiedicue; iadedi jai ciodicue.

10 Naimiemo jicanotimaci:

—¿Niese jai birui ciodio?

11 Uai ote:

—Jesús raillamie enirue idiai finuano, cue uisina riginote. Cuemo llote: “Siloé railla joraibimo noisai”. Ie jira noisaidicue. Jai ciodicue.

12 Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

*Comini uisinidimie jai jilluana siadua rafue*

13 Navui uisinidimie jai jillua mei, fariseuai dine comini naimiena uitimaci. 14 Sábadoruimo Jesúdi naimiena jillotaja jira, 15 fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

16 Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finouidimiedi uisinidimiena jillotate? — Ie jira daje isoi comeciaina facañedimaci.

17 Ie jira navui uisinidimie dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloraima.

18 Naimie moo, naimie ei iaimaiaimo nia jicanoñenia, judúuai illaicomini nai iima jaca cioñenano ñnosñede. Ie jira iaimaiaina uaiduanona, 19 jicanotimaci:

—¿Bimiedi omico jito? ¿Naimie jaca uisinino jeiciga?

20 Uai otiaimaiai:

—Jii, bimie coco jito. Jaca uisinino jeiciga. Iena uiñoticoco.  
<sup>21</sup> Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaimaiai.

<sup>22</sup> Bie rafue nia suiñenia, judíuai illaicomini navui llotimaci: “Jesúdi cai Jilloitaraima bu lloia, cai ofiracomo naimiena fo billana rairuiticai”. Iena jaciruillanona, <sup>23</sup> llotiaimaiai: “Naimie jai eimiesa. Naimiemo jicano”. <sup>24</sup> Ie jira illaicomini dane naimiena uaiduano, llotimaci:

—Jusiñamui iobillacinona feca. Jesúmo fecañeno. Naimie jearede rafuena finouidimiena uiñoticai.

<sup>25</sup> Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

<sup>26</sup> Jicanotimaci:

—¿Niesede ra diga finuamona odi uisina ciodio? ¿Niese ona jillotate?

<sup>27</sup> Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloticue? ¿Ie llofueganona jaiacadomoi?

<sup>28</sup> Riire uai otimaci:

—Naimie ie llofuegamiedio. Caidi Moisés micori ie llofueganodicai. <sup>29</sup> Jusiñamui Moisés micorimo jaie lluaana uiñoticai; iadedi bimiena uiñoñedicai. Naimie ninena billana jiai uiñoñedicai.

<sup>30</sup> Nai ima uai ote:

—Jadi, naimie ninena billana uiñoñedomoi; iadedi cuena jillotate. <sup>31</sup> Jusiñamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticai; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticai. <sup>32</sup> Enirue finua facaise-mona jaca buna uisinino jeicigamiena jilloitañede. <sup>33</sup> Jesúdi Jusiñamuimona biñedimiedena, jaca buena finonide.

<sup>34</sup> Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

*Jesús uisnidimie diga ñaia rafue*

<sup>35</sup> Uisnidimiena jino dotajana fidianona, Jesús naimiena jenode. Baillano, jicanote:

—¿Omoi cominina Jilloitaraimana inotio?

<sup>36</sup> Uai ote:

—¿Bumai naimie? Cuemo llono, naimiena cue inollesa.

<sup>37</sup> Jesús uai ote:

—Naimiena ciodio. O diga ñaite. Cue.

<sup>38</sup> Caiñici ifodo rainadajanona, iobillacinona fecallena, uai ote:

—Nama, jai o uaina ñnoticue.

<sup>39</sup> Jesús uai ote:

—Uisinidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicaí” raitinona jillotajaibite. Jesús “Jai maredicaí” raitinomo ite jeacino naimaci uiñollena bite.

<sup>40</sup> Naimie ecimo ite fariseuai iena cacajano, jicanotimaci:

—¿Uisinidomoi caina raitio?

<sup>41</sup> Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciodicaí” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiacaiñena jira, iese ñaite. Naimaci jeacino oni dotajana jitañedimaci.

## 10

### *Toica llaudaiaí sedaraima rafue*

<sup>1-2</sup> Jesús dane llofuate:

—Cue rafuena omoi raise uiñollena, toica llaudaiaína ñaiticue. Llaudaiaí jino uicabilla isoi, llaigafomo nasedo fo jaidimiedi naie llaudaiaí sedaraima; ia jinofebeí dinena bitimiedi firiraima. <sup>3</sup> Llaigafo llaudaiaí sedaraima fo jaillena, nase sedaraimadi nase econote. Llaudaiaí naimie uaina uiñotimaci. Imaci mameciaido uaiduamona, llaigafomona jino bitimaci. <sup>4</sup> Nana ie llaudaiaí jino bia, naimacina ifode. Naimie uaina uiñuanona, naimiena racadimaci. <sup>5</sup> Naimaci uiñoñegamiena racañedimaci; iadedi naimie uaina naimaci uiñoñena jira, naimiemona oni aisidimaci.

<sup>6</sup> Bie isoidicinona Jesús llofuate; iadedi naie comini iena cacaiñedimaci. <sup>7</sup> Ie jira Jesús dane llofuate:

—Llaigafo ie nase isoidicue. <sup>8</sup> Damierie firirainina bitimaci. Ie jira llaudaiaí naimaci uaina cacaiñedimaci. —Iese Jesús llofuate; ia naimiena ñnotinona ñaite. Naimiena abi caitadinona ñaite. Naimie ñnotino naimiena abi caitadino llogacinomo cacarefiñena ñaite. <sup>9</sup> Nia llofuate:

—Llaigafo isoidicue. Bu cue nasedo fo bia, jilloite. Llaudaiaí isoi fo biite. Jino jaite. Mare guille baite isoite. —Iese llofuate; ia naimiena ñnotino marena illana ñaite. Naimiemona naimaci jitailla rafuena uana ñaite. <sup>10</sup> Nia llofuate:

—Llaudaiaína fillena, meinellena, faifillena, firiraima bite; iadedi cominina jaca raise itatallena, biticue.

<sup>11</sup> Llaudaiaí marena sedaraimadicue. Mare sedaraimadi

ie toiniái facaina riiduanona ie abina faifite. <sup>12</sup> Janallari bia, llaudaiaí naimie ieñena jira, jamai maijidimiedi, llaudaiaína fainonocaillano, ecimona aiside. Llaudaiaína janallari gaitaacanamona, llaudaiaí tuudimaci. <sup>13</sup> Jamai ucube oiacanano, isiruiñenano, jamai maijidimie aiside. <sup>14</sup> Iese iñedicue. Mare sedaraimadicue. Cue llaudaiaína uiñoticue. <sup>15</sup> Cue Moo diga conimana coco uiñua isoi, naimaci cuena jiaí uiñotimaci. Cue llaudaiaí facaina fiodaiticue. —Iese Jesús llofuate; ia naimiena iñotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiaí fiodaiacade. <sup>16</sup> Nia llofuate:

—Jiaie llaigafomo jiaie llaudaiaí cuemo ite. Naimacina jiaí atiacadicue. Cue uaina cacaitimaci. Ie mei danomo nana cue llaudaiaí iitimaci. Naimacina dama sedaiticue. —Iese Jesús llofuate; ia jiaie nairaiaimo naimiena iñoitinona ñaite. Dajena naimacina sedajana ñaite.

### *Jesús fiodaille rafue*

<sup>17</sup> Jesús nia llofuate:

—Cue jai fiodaiacanamonona, cue Moo cuena isiruite. Fiodaillamonona dane jilloiticue. <sup>18</sup> Cue jitañenia, jaca buna cuena meineñeite. Cue jitailla jira, fiodaiticue. Siño uai cuemo illa jira, cue jitailliruimo fiodaiticue. Cuemo cue Moo siño uaidi jai illa jira, dane jilloiticue.

<sup>19</sup> Jesús iese llofuia jira, judíuai illaicominidi daje isoi comeciaina facañedimaci. <sup>20</sup> Jiaínodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

<sup>21</sup> Jiaíno raitimaci:

—Bie isoidicinona Janaba illamie llofueñede. Janaba illamie uisnidimiena jillotanide.

### *Jesús ie Moo diga daje isoi comeci lloilla rafue*

<sup>22</sup> Rollime facaise Jerusalémo Jesús ite. Naie facaiseconi Jusiñamui jofo ie finua comecia rafue ite. <sup>23</sup> Salomón micori finotaga jofo abi ibirimo Jesús macarite. <sup>24</sup> Naie facaise judíuai illaicomini naimie dine bitimaci. Jicanotimaci:

—¿Niruido caimo ona lloitio? Odi cai Jilloitaraimania, caimo marefodo llono.

<sup>25</sup> Jesús uai ote:

—Omoimo jai lloticue; iadedi iñnoñedomoi. Cue Moo mamecido cue finoca rafuemonona cuena uiñotomoi. <sup>26</sup> Cue toica llaudaiaímo omoi jainaiañena jira, cuena iñnoñedomoi. <sup>27</sup> Cue toica llaudaiaí cue uaina cacadimaci. Naimacina uiñoticue. Cuena racadimaci. <sup>28</sup> Naimaci jaca itataticue. Jaca abina faifñeitimaci. Cue anamonona jaca budi naimacina bairoñeite. <sup>29</sup> Cue Moo naimacina cuemo fecade. Naimacidi jiaíno bai femo faitimaci. Naimiemonona jaca budi naimacina

baironide. <sup>30</sup> Cue Moo diga daje isoi comecina lloidicoco. —Iese llote; ia naimiena ñnotinona ññate. Naie illaicomini naimiemo jainaiañena jira, naimiena ñnoñedimaci. Iena Jesús ññate.

<sup>31</sup> Jesús llofuiana cacajano, naie illaicomini noficina llinotimaci, naimiena meinellena. <sup>32</sup> Iena cianona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

<sup>33</sup> Uai otimaci:

—Mare rafuena o finua muidona, ona meineñeiticai. Jamai ñimadio. “Jusiñamuidicue” o railla jira, ona meineiticai. Jusiñamui Joreñona jiai jeare ññatio.

<sup>34-36</sup> Jesús dinena uai ote:

—Jaie ciegafuiana jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuilladomoi”. Jusiñamui ie uaina cacadinomo jaie iese lloiade, ¿ñiese cuena jeare ññatomo? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ññatio” raitomoi. <sup>37</sup> Cue Moo isoi cue finoñenia, cuena ñnoñeno; <sup>38</sup> iadedi cuena omoi ñnoiacañenia, cue Moo isoi cue finoa, naie rafuena ñno. Iemei cue Moomo cue jainaiaillana uiñoitomoi. Cuemo cue Moo jainaiaillana jiai uiñoitomoi.

<sup>39</sup> Iena cacajano, naimiena dane gaitaacadimaci; iadedi naimacimona jillode.

<sup>40</sup> Ie mei Jesús Jordán railla ille ruica ñibeimo jaide. Nainomo Juan micori cominina nano bautizade. Nainomo rilanona, nainomo Jesús fiebide. <sup>41</sup> Ailluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúsna llucinodi uanaicino.

<sup>42</sup> Nainomo ailluena cominidi Jesús naimaci Jilloitaraimana ñnotimaci.

## 11

### *Betaniamo Jesús abido jailla rafue*

<sup>1</sup> Naie facaise Betaniamo Lázaro raillamiedi duide. Naimie miriñodi Marta, María iaiañuai. <sup>2</sup> Naie Mariadi jairuido Jesús eillimo camare soride rana totade. Ie mei naiañño ie ifotie diga naimie eillina safenaillena dote. <sup>3</sup> Naie iaiañuai Jesús dine uaina orediaññuai, naimie billena. Naimie jibuisaibillena llotatitiaññuai:

—Nama, o isiruigamie duide —llotatitiaññuai.

<sup>4</sup> Jesús naie rafuena fidiano, llote:

—Jamai fiodaillena naimie duiñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

<sup>5</sup> Jesúsdi Lázaron a isiruite. Ie miriño iaiñuaina jiai isiruite; <sup>6</sup> iadedi Lázaro duillana Jesús fidiano, naimie dine jaiñede. Naimie illanomo menarui nia fiebide. <sup>7</sup> Ie mei ie llofueoicaiganodicaimo llote:

—Judeamo abido dane mai cai jailli.

<sup>8</sup> Uai oticai:

—Llofueraima, judíuai illaicomini birui noficina ona fairinoiacadimaci. ¿Niese naimaci dine dane jaitio?

<sup>9</sup> Uai ote:

—Nagarui userede. Userenia bu macaria, raise ciua jira, eicaitañede; <sup>10</sup> iadedi bu naiona macaria, raise cioñena jira, eicaitaide. —Iese llofuate; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

<sup>11</sup> Dane llote:

—Lázaro jai inide; iadedi naimiena casitallena, jaiticue.

<sup>12</sup> Uai oticai:

—Nama, naimie jamai iniia, nia dama casite.

<sup>13</sup> Naimie jafaici uanona iniamo comeciaina facadica; iadedi Jesús naiena lloñede. Lázaro fiodaillana ñaite. <sup>14</sup> Ie jira Jesús caimo marefodo llote:

—Naimie jai fiodaite. <sup>15</sup> Nainomo cue iñena jira, cue siño uai omoi inollena, omoi facaina iobidicue. Naimie dine mai cai jailli.

<sup>16</sup> Caimona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídim. Naimiedi gorasa.

### *Jesús Marta diga ñaia rafue*

<sup>17</sup> Betaniamo cai ria, Lázaro raiafomo jai nagaamagarui illana fididica. <sup>18</sup> Jerusalémona Betaniamo tres kilómetros dinori illa jira, <sup>19</sup> diga judíuai illaicomini eedollena, Marta iaiñuái María dine bitimaci. <sup>20</sup> Jesús billana Marta fidiano, cai dine naisomo bite; iadedi jofomo María fiebide. <sup>21</sup> Jesús mo Marta llote:

—Nama, o bene itiona, cue iio fiodañede; <sup>22</sup> iadedi Jusiñamuimo buena o jicaia, naimie iena finoite. Iena uiñoticue.

<sup>23</sup> Jesús dinena uai ote:

—O iio abido jilloite.

<sup>24</sup> Naiñaiño uai ote:

—Nana comini jilloilliruimo naimie jiai jilloite. Iena uiñoticue.



25 Jesús uai ote:

—Fiodaillamona comini abiaina Jilloitaramadicue. Jusiñamui diga jaca illena, cominina itataraimadicue. Bu cuena inuanona, fiodaiadedi, iemona ico jilloite. 26 Cuenan inotimiena Jusiñamui illanomo jaca illena itataitucue. ¿Ienan inotio?

27 Naiñaiño uai ote:

—Jii, Nama; odi cai Jilloitaramadio. Odi Jusiñamui Jitodio. Jusiñamui dinena o billamo jaie ocuridicai.

28 Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

29 Iena cacajano, raire cai dine María bite. 30 Marta diga ie ñaianomo Betania ecimo Jesús nia ite. 31 Jesús dine María nia jaiñenia, judíuai illaicomini di Mariana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. 32 María Jesús dine rillano, naimiena duenaillano, caiñici ifodo rainadacaida, llote:

—Nama, bene itiona, niadedi cue iodi fiodaiñede.

### *Jesús Lázaronajillotajarafue*

33 María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite. 34 Jicanote:

—¿Ninomo Lázaronaraitomoi?

Uai otimaci:

—Nama, mai jibuisaibi.

35 Lázaronaduenailanona, Jesús eede. 36 Iena ciuanona, judíuai illaicomini dinena llotimaci:

—Ero. Naimiena eo isiruite.

37 Jiaino raitimaci:

—Navui uisinidimiena jillotate. ¿Bue ñellena bimiena jilloitañede, naimie nia fiodaiñenia?

38 Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. 39 Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

40 Jesús uai ote:

—Cuenan o inoia, Jusiñamui uai siñonana uiñoitio.

41 Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. <sup>42</sup> Jaca cuena cacadio. Iena uñoticue; iadedi cue diga bene itino illa muidona, iese ado lloticue. Cuena o oretajana naimaci ñnollena, o diga ado ñaiticue.

<sup>43</sup> Je mei eo ado llote:

—Lázaro, jino bi.

<sup>44</sup> Nai fioidaitimie nia naimie abi nana ferinua ra diga jino bite. Jesúdi cominimo llote:

—Naimie abi ferinua oni suiño. —Ie jira suiñodimaci.

<sup>45</sup> Ie muidona María diga bitinomona ailluena comini Jesúna ñnotimaci. Naimie finoca rafuena ciuanona, ñnotimaci.

*Jesúna meinellena, illaicomini comeciaina facaja rafue  
(Mt 26.1-5; Mr 14.1-2; Lc 22.1-2)*

<sup>46</sup> Jesúna ñnoñedinomona damierie Jesús finoca rafuena fariseuai dine lluidimaci. <sup>47</sup> Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide. <sup>48</sup> Naimiena niese cai nibaiñenia, nana comini naimiena ñnoitimaci. Nana comini naimie dibeimo jaia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñedicai.

<sup>49</sup> Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. <sup>50</sup> Iese cai nairaimo suiñellena, damie cai nairai facaina fioidaitena, mare. Iena nibai nia raise uiñoñedomoi.

<sup>51</sup> Ie comeciina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena bi-ena llotatate:

—Jesúdi cai comini facaina fioidaite.

<sup>52</sup> Cai comini facaina dama fioidañede; iadedi nana Jusiñamuina ñnoitinona facaina fioidaite. Diga nairaiaimo itimaci; iadedi naimiemo dajena nana naimaci duillena, naimie fioidaite. <sup>53</sup> Caifás llua naimaci cacajamona, judíuai illaicomini comeciaina nia facadimaci, naimiena meinellena.

<sup>54</sup> Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. <sup>55</sup> Pascua railla rafue iaire iacana jira, ailluena comini Jerusalémo naimaci nairaiaimona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci. <sup>56-57</sup> Jusiñamui diga nanoca ñairainidi fariseuai diga navui ñaitimaci:

—Bu Jesúna cioia, naimiena cai gaitallena, caimo llono.

Rafuemo bitino illamona, Jesúna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini llua fidiano, naimie biñeite.

## 12

*Betaniamo Lázaro jofomo Jesús guilla rafue*  
(Mt 26.6-13; Mr 14.3-9)

<sup>1</sup> Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaron fodaillamona navui jillotate. <sup>2</sup> Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticaí. <sup>3</sup> Iemei Maríadi nardomona finoca caimare soride ra Jesús eillimo totade. Daje botella raifi totade. Safe-naillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride. <sup>4</sup> Caimona Judas Iscariote micorina mameciredimie ite. Jesúna gaitataitimie. Llote:

<sup>5</sup> —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote.

<sup>6</sup> Dueredinona naimie duenaiñede; iadedi naimie cai ucubena sedade. Naimiedi firiraima. Naie ucubemona fiuilla jira, iese naimie llote.

<sup>7</sup> Jesús uai ote:

—Dama ite. Bie soride ra naiñaiño jai eenoga cue fiodaillirui iena. <sup>8</sup> Dueredino omoi diga jaca itimaci; iadedi omoi diga jaca iñeiticue.

*Ailluena comini Lázaron ciua rafue*

<sup>9</sup> Lázaro jofomo Jesús illana ailluena cai illaicomini fidiano, bitimaci. Navui fodaillamona Lázaron Jesús jillotaja jira, Jesúna dama cioiacaiñedimaci; iadedi Lázaron jiai cioiacadimaci. <sup>10</sup> Ie jira Jusiñamui diga nanoca ñairainidi Lázaron jiai meinellemo comeciaina facadimaci. <sup>11</sup> Lázaro muidona ailluena judíuai illaicomini naimaci illa dibeí faionocaida, Jesúna ñnotimaci.

*Jerusalémo illaíma isoi, Jesús marena jailla rafue*  
(Mt 21.1-11; Mr 11.1-11; Lc 19.28-40)

<sup>12</sup> Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fodaillamona Lázaron Jesús navui jilloitajana diga comini ciodimaci. Iena

llocana uitimaci. Ie jira ailluena comini Jesús dine jaidimaci. <sup>13</sup> Raforona uanona, naimiena feiñollena, naimie uicomo jaidimaci. Ado cuiriisite:

—¡Cai Jilloitaraíma billa! ¡Jusiñamui mamecido bitimie eo mare! ¡Cai Illaíma eo mare! —cuiiriisite.

<sup>14</sup> Jesúsdi ailli baiga burrito emododo jaide. Jusiñamui facaina lloaraíma micori jaie llua isoi jaide. Jaie lloste: <sup>15</sup> “Jerusalén imaci, jacinaiñeno. O Illaíma burrito emododo biite”. <sup>16</sup> Naie facaise bie rafuemo comeciaina facañedicai; iadedi Jesús jillua mei, bie rafuena comecitícaí. <sup>17-18</sup> Lázaron a Jesús jillotaja jira, ailluena comini Jesús dine jaidimaci. <sup>19</sup> Iena ciuano, fariseuai coniniri ñaitimaci:

—Jaca buena birui finoñedicai. Ailluena comini Jesús díbeimo jai jaidimaci.

### *Judúuaiñedino Jesúsna cioiacana rafue*

<sup>20</sup> Judúuaiñedino Jusiñamuina sedallena, pascua railla rafuemo jiai bitimaci. <sup>21</sup> Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadícaí.

<sup>22</sup> Felipe iena Andrémo lloste. Ie mei Jesúsno lluaidiaímaiaí. <sup>23</sup> Jesús uai ote:

—Monamona bitícue; ia jai cue fiodaille facaise ride. Comini cue uaidi siñonana uiñua facaise jai ride. <sup>24</sup> Jiaie rafuedo iena lloitícue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci. <sup>25</sup> Ie abimo ite rafuemo comecina dama bu facaía, ja muidomo faifite; ia cuemo ite rafuemo comecina bu facaía, monamo jaca iite. <sup>26</sup> Cuen a bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite. <sup>27</sup> Cue comeci jai rucaicuerite; iadedi, ¿niese raitícue? Raiñeítícue: “Moo, cue fiodaillemona cuena jillote”. Fiodaillena bitícue. Ie jira raitícue: <sup>28</sup> “Moo, cominina o uai siñonana uiñota”.

Ieconí monamona Jusiñamui lloste:

—Jai iena finodícue. Dane iena finoítícue.

<sup>29</sup> Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaíno raitimaci:

—Naimiemo Jusiñamui jaienicí lloste.

<sup>30</sup> Jesús uai ote:

—Cue facaina naie lluana cacaiñedomoi; iadedi omoi facaina iena cacadomoi. <sup>31</sup> Cuen a uiñoñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite. <sup>32</sup> Cruzmo cue fiodaia, naimacina jilloitallena, ailluena cominina cue dibeimo itataiticue. <sup>33</sup> — Naimie fiodaillana naimaci uiñollena, iese llote.

<sup>34</sup> Naie comini uai otimaci:

—Jusiñamui facaina lloraini micoriai jaie cuela: “Cai Jilloitaraima jaca fiodaiñeite”. ¿Ñiese raitio: “Jusiñamuimona biticue; ia fiodaiticue”?

<sup>35</sup> Jesús dane uai ote:

—Cue llofua dinori omoi comeciaina nia lligaiñoticue. Cue llamo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uiñoñede. Ie isoide. Jeacino anamo itinodi jitiredinomo itimaci isoidimaci. Uanaicinona uiñoñedimaci. <sup>36</sup> Jeacino anamona omoi jilloillena, cue llofua uaido omoi comeciaina birui lligaiñoticue. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

### *Comini Jesús uaina ñnoñena rafue*

<sup>37</sup> Jesús diga siño rafuena finode; iadedi ailluena comini: “Naimiedi cai Jilloitaraima” raillana nia ñnosifede. <sup>38</sup> Iemona Isaías micori jaie cuela rafuena suide. Naimie jaie cuela: Jusiñamui, cai llucinona cacadimaci.

O siño uaido o finoca rafuena jiai ciodimaci; iadedi ñnoñedimaci.

<sup>39-40</sup> Isaías micori dane cuela:

Naimaci cioi raillano, Jusiñamui naimacina uisidino isoi itatate.

Naimaci comeciaina abina uiñoi raillano, naimaci comeciaina feitate.

Naimiena ñnoi raillano, iese naimacina jai itatate.

Ie jira jai ñnonidimaci. <sup>41</sup> Jusiñamui ie ebirede rafuena naimie ciuamona, Isaías micori iena llote. Isaías micori Jesúsna llote. <sup>42</sup> Isaías micori iese llote; iadedi ailluena judiua illaicomini Jesús uaina ñnotimaci. Fariseuaina jaciruillanona, iena janotimaci. Naimaci ofiracomona naimacina jino dotajana jaciruitimaci. <sup>43</sup> Comini naimacina iobitajana naimaci eo jitailla jira, dotajana jitañedimaci. Jusiñamuimo ite iobillacinona raise oiacañedimaci.

### *Jesús ie Moona ñaia rafue*

<sup>44</sup> Naie facaise Jesús eo ado llote:

—Cuen ñnotimie cuena oretatimiena jiai jai ñnote.

<sup>45</sup> Cuen ciodimie cuena oretatimiena jiai ciode isoide.

<sup>46</sup> Comini comeciaina lligaiñollena biticue. Ie muidona naga cuena ñnotimie jitiredinomo jai iñede. Jeacino anamo jai

iñede. <sup>47</sup> Cue uaina cacajano iñoñediemo juez isoí birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; <sup>48</sup> ia cuena bu iñoñenia, cue uaina naimie iñoñenia, ja muidona faifite. Cue uaina naimie iñoñellemona, nana naimiena iñoñedino janafefilliruimo Jusiñamui naimiena íco duere finoite. Cuena jitaiñedimie, cue uaina jitaiñedimie comini janafefilliruimo janafefite. <sup>49</sup> Dama cue comeci facaja uaido lloñedicue. Cue Moo cuena oretaja muidona, cue Moo cuemo lloga uaido lloticue. <sup>50</sup> Cue Moo lloga uaidi naimie díbeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

## 13

### *Jesúdi ie llofueoicaigano eilliaina jocua rafue*

<sup>1</sup> Pascua railla rafue riacana areruido ia, Jesús ie Moo dine abido jaiacanana uiñote. Naimaci díga naimie nia ia, ie cominina jaca eo isiruite. <sup>2</sup> Jesúna gaitatallena, naie facaise Taifedi Judas Iscariote micorí comecina feidote. Judas micorí Simón jito. <sup>3</sup> Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaillena jiai uiñote. <sup>4</sup> Nairuido Jesús cai díga guite. Guilla meinoconi, Jesús a naidacaida ie abimo ite iniroina duiñode. Abi dora díga ie moillina ferinote. <sup>5</sup> Janorede nogomo jinuina totaja mei, cai eilliaina jocode. Safenaillena, ie dora díga dote. <sup>6</sup> Simón Pedro dine naimie ria, Pedro jicanote:

—Nama, ¿cue eillina jiai jocoitio?

<sup>7</sup> Jesús uai ote:

—Cue finoca rafuena birui uiñoñedio; iadedi jiairuido uiñoitio.

<sup>8</sup> Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

<sup>9</sup> Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi díga, jiai joco.

<sup>10</sup> Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciái jiai jai jeanide; iadedi omoimona damie comeci nia jearede.

<sup>11</sup> Naimiena gaitataiacadimiena naimie uiñua jira, iese llote.

<sup>12</sup> Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. 13 Cuenā “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue. 14 Omoi Namadicue. Omoi llofueraimadicue; iadedi omoi mullaïma isoi iticuedena, omoi eilliaïna jai jocodicue. Omoi jamai bue isoidinomona, omoi eilliaïna danirïe jocua. 15 Cuemonā fueo. Abi iedoñeno cue isoi omoi jai. Cue afemo iñedomoi. 16 Uanai omoimo lloticue. Mullaïma ie nama afemo iñede. Oretagamïe ie oretatimïe afemo iñede. Ie isoide. Cue afemo iñedomoi; ia omoi eilliaïna jocodicue. “Jiaimïe afemo iticaï” raillanomo comecina omoi facañeno. 17 Bicino omoi uïñuamona, iese omoi finoïa, caimare iitomoi. 18 Nana omoïna iese ñaiñedicue. Nana cue fetocanona uïñoticue. David micorï jaiïe llote: “Cue diga guitinomona damïe cuena enoidimïe ite”. 19 Bie nia suiñenia, iena jai lloticue. Iena cuemo suilla mei, David micorï llogacino raise iinoitomoi. 20 Uanai lloticue. Cue oretagamïena bu feiñoïa, cuena jiai feiñote. Bu cuena feiñoïa, cuena oretatimïena jiai feiñote.

*Jesúdi ie gaitataitimiēna llua rafue  
(Mt 26.20-25; Mr 14.17-21; Lc 22.21-23)*

21 Jesús iese llua mei, ie comeci sunaite. Llote:

—Uanai lloticue. Omoïmona damïe cuena gaitataite.

22 Caimona ¿nimïe naimïena gaitataite? raillanona, comecina facajano, coninimo eroridicai. 23 Cuenā Jesús eo gaïa jira, Jesús abïmo iticue. 24 Cuenā uaiduanona, Pedro cuemo llote:

—“¿Bu ona gaitataite?” Jesúmo jïcano.

25 Ie jira Jesúmo jïcanoticue:

—Nama, ¿bu ona gaitataite?

26 Jesús uai ote:

—Bie llomeniconā mutajanona, naimïemo fecaiticue —raite. Mutaja mei, Judas micorïmo fecade. Naimïe micorïdi Simón Iscariote jito. 27 Llomeniconā guilla meinocni, Taife anamo Judas micorï illamona, Taife naimïe comecina feidote. Jesús naimïemo llote:

—O finoacaga rana raïre fino.

28 Jesús Judas micorïmo lluaña raise uïñoñedicai. 29 Judas micorï ucubena sedaja jira, jiaïno comecina facade: “ ‘Cai jïtaille guille ïbarisai’ Jesús naimïemo llote”. Iese lloñenia, “ ‘Janore ucube dueredïnomo feca’ nibai naimïemo llote”. 30 Guilla mei, Judas micorï jino jaide. Naïe facaise jai jïreficaide.

*Jesús ie fiodaïllena ñaïa rafue*

31 Judas micorï jailla mei, Jesús llote:

—Jusiñamuimona billanona, iimana jaidicue; ia cue fiodable facaise jai ride. Cue fiodablemona cominidi Jusiñamui uai siñonana uiñoitimaci. <sup>32</sup> Iemona Jusiñamui uai siñonana comini uiñoa, Jusiñamuidi cominina cue siño Jitona jiai uiñotaite. Iese ja finoite. <sup>33</sup> Cue comini, dallu omoi diga bene iticue. Jaiticue. Cue diga iacanitomo. Judíuai illaicominimo navui cue llua isoi, omoimo ja lloiticue. Cue jaillinomo nia jaiñeitomo. <sup>34</sup> Ie jira jiaie rafuena omoimo ja lloiticue. Omoina cue isiruilla isoi, cominina omoi isirui. <sup>35</sup> Coninina omoi isiruillamona, jiaie cominidi cue cominidomoina uiñoitimaci.

*Pedro Jesús diga ñaia rafue*

(Mt 26.31-35; Mr 14.27-31; Lc 22.31-34)

<sup>36</sup> Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio. Jiairuido jaitio.

<sup>37</sup> Pedro uai ote:

—Nama, ¿bue ñellena ja jaiñeticue? O jitaia, o facaina ja fiodableticue.

<sup>38</sup> Jesús dinena uai ote:

—Cue facaina fiodablecadío. Uanai omo lloticue. Nia monañenia, itava nia ñañenia, dacaiño amani cuena janoitiosa.

## 14

*Jesús ie Moo dinomo rille rafue*

<sup>1</sup> Jesús ie llofueoicaiganodicaina nia llofue:

—Rucaicueriñeno uri i. Jusiñamuina iñocana jai. Cuena jiai iñocana jai. <sup>2</sup> Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue. <sup>3</sup> Fuiduanona, dane abido biiticue. Omoina cue dine uillena, cue dine omoi illena, biiticue. <sup>4</sup> Cue jaillinona birui uiñotomo. Nainomo omoi rillena jiai uiñotomo.

<sup>5</sup> Tomás uai ote:

—Nama, o jaillinona uiñoñedica. ¿Ñiese nainomo riitica?

<sup>6</sup> Jesús uai ote:

—Omoi naiso isoidicue. Uanaicinona lloticue. Cue Moo díbeimo cominina jaca itataticue. Cue Moo dine joide naiso isoidicue. Jaca dasode cue Momo duide naidi. Cue Moo dine o ria, cuena iño. <sup>7</sup> Cuena uiñotomoina, cue Moona jiai uiñotomo. Biruidemona naimiena uiñotomo. Naimiena jai ciodomoi.

<sup>8</sup> Felipe uai ote:

—Nama, o Moona caimo acata. Iemo jai macaibaite.

<sup>9</sup> Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciolimie cue Moona jiai jai ciode isoide.



¿Niese llotio: “O Moona caimo acata”? Cue Moona jai ciodio isoidio. <sup>10</sup> Cue Moo diga daajedicoco. Iena nia ñnoñedio. Cue llua di cue Moo uai. Cue llua di cue comeci iuañede. Cue motodo naimie maijide. <sup>11</sup> Cue Moo diga daajedicoco ñno. Cue uaina omoi ñnoñenia, siño rafuena cue finua jira, cuena ñno.

*Jesús ie Moo Joreña llua rafue*

<sup>12</sup> Jesús nia llofue:

—Uanai lloticue. Cuena omoi ñnoia, cue finoca rafuena jiai finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua baifemo finoitomoi. <sup>13</sup> Cue Moo uai siñonana omoi uiñollena, buena cue dibeido cue Moomo omoi jicaia, nana iena finoiticue. <sup>14</sup> Cue dibeido omoi jicaia, iena finoiticue. <sup>15</sup> Cuena omoi isirua, cue llogacinuaina ñnoitomoi. <sup>16</sup> Ie Joreño omoimo fecallena cue Moomo jaiticue. Naie Joreñodi omoína canoite. Omoi diga jaca iite. <sup>17</sup> Uanaicónona llocabite. Naimiena naimaci uiñoñena jira, cuena ñnoñedino naimiena feñonidimaci; iadedi naimie omoi diga illa jira, naimiena uiñotomoi. Omoi diga jaca iite. <sup>18</sup> Omoína fañonocaiñeiticue; ia dane biiticue. <sup>19</sup> Nano ñigarui illanona, cuena ñnoñedino cuena nia cioitimaci. Ie mei cuena cioiñeiticue; iadedi fiodaillamona cue jillua mei, cuena nia cioitomoi. Cue jaca illa jira, jiai jaca iit-omoi. <sup>20</sup> Fiodaillamona cue jillua mei, cue Moomo cue duillana raise uiñoitomoi. Cuemo omoi duillana jiai raise uiñoitomoi. Omoimo cue duillana jiai raise uiñoitomoi. <sup>21</sup> Cue llogacinuaina omoi isirua, cuena isiruitomoi. Ie jira cue Moodi omoína jiai isiruite. Omoína jiai isiruiticue. Omoína cuena uiñotaiticue.

<sup>22</sup> Iscariotena mamecireñede Judas naimie mo jicanote:

—Nama, ¿bue ñellena daní caína ona uiñotaitio; iadedi jiaie cominina ona uiñotañeiticue?

<sup>23</sup> Jesús uai ote:

—Cuena isiruitinona cue rafuena uiñotadicue. Bu cuena isirua, cue llogacinuaina ñnoite. Cue Moo naimiena isiruite. Iemona naimiena nabaiticoco. <sup>24</sup> Bu cuena isiruiñenia, cue llogacinodi cuejeñede. Cue Moo ie. Naimie cuena oretate. <sup>25</sup> Omoi diga nia cue illamona, bie llogacinuai omoimo jai lloticue. <sup>26</sup> Cue Moodi omoína canollena, naga rafuena omoína llofuellena, cue facaina ie Joreña omoimo oretate. Omoína nana omoimo llogacinuaina comecitaite. <sup>27</sup> Cue Moo dine jaiticue; iadedi omoi comeciaina uri itataiticue. Cuena ñnoñedino omoi comeciaina iese itatanidimaci. Jarire iñeno. Jaciruiñeno. <sup>28</sup> Ailli cue llua cacadomoi: “Cue Moo dine jaiticue; iadedi dane biiticue”.

Cue Moo ðine cue jailla jira, cuena omoi isiruia, cueri iobitomoï. Cue Moo cue afemo ite. <sup>29</sup> Bie rafue cuemo nia suiñenia, uicodo omoïmo iena jai lloticue. Naie sua, cuena fainonocaiñeno omoi jaillena jitaïdicue. <sup>30</sup> Omoi ðiga are nia ñaiñeiticue. Cuena ñnoñedino anamo itimie cuena jai duere finoacade. Taifena ñaiticue. Naimie anamo iñedicue; <sup>31</sup> iadedi cue Moona cue isiruillana cuena ñnoñedino uiñollena, cue Moo cuemo llua isoi, finoiticue. Mai cai jailli.

## 15

### *Uvas railla riara ie rafue*

<sup>1</sup> Jesús nia llofueite:

—Cue ðibeimo marena omoi illena omoi raise uiñollena, jiaie rafuedo iena llofueiticue. Uvas railla ua riaradicue. Cue Moodi uvas railla riara sedaraima. <sup>2</sup> Cue amena igailaïdomoï. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. <sup>3</sup> Cue llogacinuaido jaillamona, jai jaigaica isoidomoï. Iemona omoi comeciai jai jeanide. <sup>4</sup> Cuena nabai. Ona jiai nabaiticue. Naie amenamo jai ðuiñena jira, daje ðibegaise jaitaca igaidi jai llisiñede. Ie isoide. Cuena omoi nabaicabiñenia, llisiñede igai isoidomoï. Ie jira cuena nabai. <sup>5</sup> Uvas railla riaradicue. Cue amena igailaïdomoï. Cuemo omoi ðuiadedi, omoïmo cue ðuiadedi, eo lliside isoidomoï; iadedi cuemo omoi ðuiñenia, jaca llisiñede isoidomoï. Cuemo omoi ðuiñenia, cue jitailla isoi mare rafuena jaca finoñeitomoï. <sup>6</sup> Jai ðuide igailaï safenailla mei, maraiñena jira, jobaillena, danomo ofitaticai. Cuemo ðuiñedimie jai ðuide igai isoide. Jusiñamuimona duere sefuite. <sup>7</sup> Cuena omoi nabaia, cue uaina omoi feitañenia, omoi jitailla rana jica. Ie mei feiñoitomoï. <sup>8</sup> Eo lliside omoi isoia, cue Moo iobide. Iese omoi ia, ua cue cominidomoï. —Iese Jesús llofueite; ia naimie ðibeimo naimaci raise illena ñaite. Mare rafuena naimaci finocana jaillena ñaite.

<sup>9</sup> Nia llofueite:

—Cuena cue Moo isiruilla isoi, omoïna isiruiticue. Cuena nabaicabi. <sup>10</sup> Cue Moo llogacinuaina cue ñnuamona, naimie isiruillacino anamo iticue. Cue Moo llogacinuaina omoi ñnuamona, cue isiruillacino anamo itomoï. <sup>11</sup> Cue isoi omoi comeciai eo caimarellena, bicinuai omoïmo lloticue.

<sup>12</sup> Dane bie rafuena lloiticue. Omoïna cue isiruilla isoi, coninina omoi isirui. <sup>13</sup> Naimaci o isiruillamona, o nabaiñiaï facaina o fodaia, naimacina eo ua isiruitio. <sup>14</sup> Cue llogacinuaina omoi ñnoia, cuena nabaidomoï. <sup>15</sup> Omoïna “Cue mullaiaïdomoï” jaca raiñedicue; iadedi omoïna “Cue nabaiñiaïdomoï” birui raiticue. Mullaiaï imaci patrón finoca rafuena uiñoñedimaci. Ie jira nana cue Moomona cue cacaja

rafuena omoimo jai lloticue. Ie jira nana cue rafuena jai uiñotomoi. <sup>16</sup> Cuenafetoñedomoi; iadedi omoína fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia, omoimo fecaite. <sup>17</sup> Coninina omoi isiruillena jai lloticue.

*Comini Jesús enoilla rafue*

<sup>18</sup> Jesús nia llofuate:

—Cuenafetoñedomoi omoína enoia, nano cuena jai enoidimaci. Iena uiñotomoi. Omoína nia enoñenia, cuena jai enoidimaci. <sup>19</sup> Naimacimo jainaiidomoina, omoína isiruitimaci; iadedi naimacimo omoi jainaiñena jira, omoína cue fetua jira, omoína enoidimaci. <sup>20</sup> Omoimo jai lloticue. Illaíma duere sefua, naimie anamo itino jai duere sefuidimaci. Ie isoide. Cuenacomini duere finua isoi, omoína jai duere finoitimaci. Cue llofuiacinona naimaci inua isoi, omoi llofuiacino jai inoitimaci. <sup>21</sup> Cuenaretatimienanaimaci uiñoñena jira, cue muidona iese finoitimaci. <sup>22</sup> Naimacimo ite jeacinona naimacimo lloñedicuena, naimacimo ite jeacinona uiñoñedicuena, naimacimo ite jeacinona jai uiñotimaci. Naimacimo jeacino nia ia, naimaci muidona. <sup>23</sup> Cuenanenoidimiedi cue Moona jai enoide. <sup>24</sup> Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñoñedicuena. Cue siño finoca rafuena jai cidimaci. Ie jira cuena enoidimaci. Cue Moona jai enoidimaci. <sup>25</sup> Naimacina David micori jaie llote: “Naimacimo buena finoñedicue; ia cuena enoidimaci”. Naie ciegafuiaí jai suide.

<sup>26</sup> Cue Moo ie Joreño omoimo oretaitaite. Ie Joreño omoína canoite. Omoína uanaicinona uiñotaite. <sup>27</sup> Cue nano lluaruimona cue diga omoi illa jira, cue facaisena jai raise lloitomoi.

## 16

*Judíuai illacomini Jesús llofueoicaiganona duere finua rafue*

<sup>1</sup> Jesús nia llofuate:

—Danomo abido omoi jaiñellena, cue uaina omoi fainonocaiñellena, bicinuai omoimo ja lloiticue. <sup>2</sup> Omoi ofiracomona illacomini omoína dotaitimaci. Jairuido omoína meiniamona: “Jai Jusiñamuina marena sedadicaí”, comeciaina facaitimaci. <sup>3</sup> Cuenanaimaci inoñena jira, cue Moona jai naimaci inoñena jira, iena finoitimaci. <sup>4</sup> Bie rafue omoimo sua, naie facaise cue lluaña omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

*Jesús Jusiñamui Joreñoña llua rafue*

<sup>5</sup> Jesús nia llofujete:

—Cuenta oretatimie dine ja jaiticue; iadedi omoimona buna: “¿Níne jaitio?” cuemo jaca nia jicanoñede. <sup>6</sup> Omoimo bie rafue cue llua jira, omoi comeciai eo sure ite. Ie jira cue jaillinona jicanoñedomoi. <sup>7</sup> Uanai lloticue. Cue jaia, mare. Cue jaiñenia, omoína canoraíma omoi dine biñeite. Cue jaia, omoi dine naimiena oretaiticue. Jusiñamui Joreñodi omoi canoraíma. <sup>8</sup> Naimie bia, cuenta ñnoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiai uiñotaite. <sup>9</sup> Cuenta naimaci ñnoñenia, naimacina naimacimo jeacino nia illana uiñotaite. <sup>10</sup> Cue Moo dine abido cue jaillinona, cuenta cioiñeitimaci; ia iemona Jusiñamui Joreño cue uaina siñonana uiñotaite. <sup>11</sup> Fiodaillemona jilloiticue. Iemona cuenta ñnoñedino anamo itimiedi cue Moo janafellacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafellemona jilluana uiñotaite. <sup>12</sup> Diga rafue omoimo nia lloiacadicue; iadedi jai rairafaidomoi. <sup>13</sup> Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacinodo llofueite. Jaiiruido sulle rafuena llofueite. <sup>14</sup> Omoína cue rafuena uiñotaite. Ie jira cuenta iobitaite. Nana cue Momo ite uaidi cueje. <sup>15</sup> Ie jira bie rafuena lloticue. Jusiñamui Joreño omoína cue rafuena raise uiñotaite.

*Sunaillamona caimare illa rafue*

<sup>16</sup> Jesús nia llofujete:

—Dallu illanona cuenta cioiñeitomoi. Ie mei dallu illanona, cuenta dane cioitomoi.

<sup>17</sup> Ie llofueoicaiganodicaimona damierie dani coninimo jicanodosite:

—¿Níese caimo llote: “Dallu illanona, cuenta cioiñeitomoi. Ie mei dallu illanona, cuenta dane cioitomoi. Cue Moo dine jaiticue?” <sup>18</sup> ¿Buena caimo llote? Raise cacaiñedicai.

<sup>19</sup> Cai jicanuana Jesús uiñuanona, naimie jicanote:

—¿Cue llua raise uiñoiacadomoi? <sup>20</sup> Cuemo sulle rafue sua, eo eeditomoi; iadedi cuenta ñnoñedino eo iobitimaci. Sunaitomoi; iadedi jaiiruido caimare iitomoi. <sup>21</sup> Jiaie uaido iena lloticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. <sup>22</sup> Ie isoide. Ja sunaitomoi; iadedi dane omoína cioiticue. Fiodaillamona cue jillua mei, dane cuenta cioitomoi. Ie mei caimare iitomoi. Iemona omoína buna sure itatañeite. <sup>23</sup> Nairuimo cuemo buena jicañeno; iadedi cue Momo jica. Ie mei cue muidona naimie omoimo fecaite. <sup>24</sup> Cue mamecido

cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

*Jiairuido Jesús marefodo llua rafue*

<sup>25</sup> Jesús nia llofuede:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moona marefodo lloticue. <sup>26</sup> Nairuimo cue Moomo omoi facaina jicañeiticue. Cue mamecido cue Moomo omoi jitaillacinona daní jicaitomoi. <sup>27</sup> Omoina naimie isiruillamona, omoimo fecajite. Cuen a omoi isiruilla jira, cue Moomona cue billana omoi ñnua jira, cue Moo omoina isiruite. <sup>28</sup> Cue Moomona eniruemo biticue. Naimie dine abido jaiticue.

<sup>29</sup> Lloticai:

—Jai marefodo caimo llotio. O uaina meidocana jai uiñedio. <sup>30</sup> Nana rafuena o uiñuana uiñoticaí. Cai comeciaino iticinona o uiñuamona, caina raise uiñotio. Iemona Jusiñamuimona o billana jai ñnoticaí.

<sup>31</sup> Jesús uai ote:

—Cuen a jai ñnotomoi. <sup>32</sup> Jiairuido, ua birui, oni tuuítomoi. Nagamíai jofomo omoi jailla mei, dama ifoconi fiebiticue; iadedí dama iñeiticue. Cue Moo cue diga iite. <sup>33</sup> Cuen a omoi ñnuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedí omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baífemo faiticue.

## 17

*Jesús ie Moo diga ñaia rafue*

<sup>1</sup> Jesús bicinona llua mei, monamo eruailano, jide:

—Moo, cue fioidaiacanarui jai ride. Cue uai siñonana uiñota. Iemei o uai siñonana jiai uiñotaiticue. <sup>2</sup> Nana comini afemo cuena jai itatatio. Himana cue jaillamona, nana comini afemo cuena jai itatatio. Comini comeciái iuaina o meidotajamona, cue fioidaillamona, ailluena comini o diga jaca iitimaci. <sup>3</sup> Ona nanoca Jusiñamuina uiñoitimaci. Jai cuena o oretajana jiai uiñoitimaci. <sup>4</sup> Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. <sup>5</sup> Ore Moo, enirue nia iñena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa. <sup>6</sup> Comini comeciái iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena ñnocana jaidimaci. <sup>7</sup> Nana cuemo ite rafue omona feiñoticue. Iena jai uiñotimaci. <sup>8</sup> Nana cuemo o llogacinuaina naimacimo jai lloticue. Jai ñnotimaci. Omona cue billana jiai jai ñnotimaci. Cuen a o oretajana jiai ñnotimaci. <sup>9</sup> Naimaci

facaina birui jüdicue. Naimacina cuena ñnotadio. Ie jira omo jai duidimaci. Ona ñnoñedino facaina birui jüñedicue. <sup>10</sup> Nana o dibeimo itinodi cueje. Nana cue dibeimo itinodi oie. Nana naimaciri iobidicue. <sup>11</sup> Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci finoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. <sup>12</sup> Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusifiamui lloraima micori cuegafuiai suillena, naimie ua faifite. <sup>13</sup> O dine ja jaiticue. Cue isoi naimaci comeci ai eo caimare illena, naimacimo ailluena rafuena jai lloticue. <sup>14</sup> O llogacinuaina jai lloticue. Ona ñnoñedinomo naimaci jainaiainñena jira, ona ñnoñedino naimacina enoidimaci. Ona ñnoñedinomo jiai jainaiainñedicue. <sup>15</sup> Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue. <sup>16</sup> Ona ñnoñedinomo jainaiainñedimaci. Ona ñnoñedinomo jiai jainaiainñedicue. <sup>17</sup> O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata. <sup>18</sup> Bene cuena o oretaja isoi, ona ñnoñedino dine naimacina oretaticue. <sup>19</sup> Uanaicinona naimaci uiñuamona, naimaci comeci ai marebicaillena, cuena ñnotino facaina fiodaiacadicue. <sup>20</sup> Bimacina birui dane jüñedicue; iadedi bimaci cue rafuena ico lloia, jiaie comini cuena ñnoitimaci. Cuena ico ñnoitino facaina birui jiai jüdicue. <sup>21</sup> Daajedicoco. Coco illa isoi, naimaci comeciaina daje isoi lloillena, nana naimaci facaina jüdicue. Daje isoi comeci ai lloillamona, cuena nia ñnoñedinodi ñnoitimaci. Iemona cuena o oretajana ñnoitimaci. <sup>22</sup> Cuemo o iga uaidi ebirede. Naimaci comeci ai lloillena, naimacimo o uai jai cue iga. <sup>23</sup> Naimaciri dajedica. O diga daajedicoco. Naimaci comeci ai daje isoi lloillana jitaidicue. Iemona cuena ñnoñedino bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci. <sup>24</sup> Ore Moo, naimaci cue dine illena jitaidicue. Enirue nia ifenia, illaima isoi o ecimo ebire jaie iticue. Dane ie isoi ebire birui cue ia, naimaci cuena ciuana jitaidicue. <sup>25</sup> Ore Moo, mareuidimedio. Jiaie comini ona uiñoñedimaci; iadedi ona uiñoticue. Cue llofueoicaiganodi o cuena oretajana jai uiñoitimaci. <sup>26</sup> Naimacimo ona jai lloticue. O cuena isiruilla isoi coninana naimaci isiruillena, naimacimo nia lloticue —jide.

*Jesúna gaitalle rafue**(Mt 26.47-58; Mr 14.43-54; Lc 22.47-54)*

<sup>1</sup> Jíia mei, Jesús ie llofueoicaiganodicaí diga, Cedrón railla iconi enefebeimo ruica aceituna railla riaraiái illanomo naiona jaide. <sup>2</sup> Jesús cai diga nainomo jaisoilla jira, Judas micori naie illanona jiai uiñote. Jesúna gaitatallena nainomo Judas jaide. <sup>3</sup> Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduidi lamparíniairi bitimaci. Reinaiairi jiai bitimaci. Sidaniairi jiai bitimaci. Judas naimacina ifode. <sup>4</sup> Jesúsdi nana naimiemo sulle rafue uiñuanona, naimaci dine billano, jicanote:

—¿Buna jenodomoí?

<sup>5-6</sup> Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaillamona, abido ñaijillamona, eniruemo uaidimaci. Jesúna gaitatallena, Judas micori naimaci diga ite.

<sup>7</sup> Jesús dane jicanote:

—¿Buna jenodomoí?

Uai otimaci:

—Nazaret ie Jesús.

<sup>8</sup> Jesús uai ote:

—Omoímo jai lloticue: “Imiedicue”. Cuen a omoíjenoia, cue diga itino oni jaillena rairuiño.

<sup>9</sup> Naimie ie Moomo como lloga uai suillena, iese llote. Iese ie Moomo como llote: “Cuen a o ñnotaganomona jaca buna faifiñedicue”. <sup>10</sup> Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaíma jefona jaíbonote. Naie mullaíma mamecidi Malco. <sup>11</sup> Iena cianona, Jesús Pedromo llote:

—O lloebina eeno. Cue Moo jitailla isoi, fiódaiticue.

<sup>12</sup> Ie mei soldaduai, imaci capitán diga, judíuai imaci policías diga, Jesúna gaitajano, naimiena maítimaci. <sup>13</sup> Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. <sup>14</sup> Navui Caifás judíuai illaicomínimo llote: “Damie nana cai comini facaina fiódaitena, mare”.

*Pedro Jesúna nano janua rafue**(Mt 26.69, 70; Mr 14.66-68; Lc 22.55-57)*

<sup>15</sup> Simón Pedro Jesús jinafo racade. Jiai racadicue. Cuen a Jusiñamui diga nanoca ñairaima uiñua jira, ie nairaibirimo Jesús diga jaidicue; <sup>16</sup> iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño jicanoticue. <sup>17</sup> Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

<sup>18</sup> Rosirena jira, naie jofo mullaiaia, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiaite.

*Jesús Anás dine illa rafue*

(Mt 26.59-66; Mr 14.55-64; Lc 22.66-71)

<sup>19</sup> Ie facaise Anás Jesúmo ie llofueoicaiganodicaina jicanote. Ie llofuiacinuaina jiaite jicanote. <sup>20</sup> Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusñamui jofomo jiaite jaca llofuecabiticue. Nainomo nana o comini oficabidomoi. Bainino buena jaca lloñedicue. <sup>21</sup> ¿Bue ñellena birui cuemo jicanotio? Cuena cacadinomo iena jicano. Cue llofuiana uiñotimaci.

<sup>22</sup> Iese Jesús llua jira, daje policia naimie uiecona butade. Jesúmo jicanote:

—¿Bue ñellena iese uai otio?

<sup>23</sup> Jesús dinena naie uai ote:

—Naimie uai jeare oticuena, cuemo llono. Jeare oñedicuemo, ¿bue ñellena cuena butadio?

<sup>24</sup> Jesús uai oñede. Iemei Anásdi Caifás jofomo Jesús maianona orede.

*Pedro Jesúna dane janua rafue*

(Mt 26.71-75; Mr 14.69-72; Lc 22.58-62)

<sup>25</sup> Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

<sup>26</sup> Naie facaise daje mullaimea Pedromo llote:

—Aceitunas railla riaraiia illanomo ona ciodicue —llote. Jusúna soldaduai gaitaja facaiseconi Pedro naie mullaimea ie come jefona ailli jaibonote, soldaduai Jesúna gaitaja ie daacaiño. <sup>27</sup> Pedro dane janote. Ieconi iitava ñaite.

*Jesús Pilato dine illa rafue*

(Mt 27.1-2, 11-14; Mr 15.1-5; Lc 23.1-5)

<sup>28</sup> Ie mei Caifás jofomona gobernador jofomo Jesúna jitiramo uitimaci. Naie facaise gobernadori Pilato. Naimiedi judíuaiñedimie. Naimaci einamaci rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledi guiñega. <sup>29</sup> Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

<sup>30</sup> Uai otimaci:



—Bimie marañede rafue finoñedena, o dine naimiena atiñedicaí.

<sup>31</sup> Pilato llote:

—Naimiena uiño. Omoi einamací llogacínuaído naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —llotimaci. <sup>32</sup> Navui Jesúdi: “Cuena cruzmo coraitimaci” llote. Naie llucino jai suisaide.

<sup>33</sup> Pilato fo abído jaillano, Jesúna uaiduano, naimiemo llote:

—Judíuai illaíma raillamiedio.

<sup>34</sup> Jesús dinena jicanote:

—¿O comecina dama iese facajano llotio? Iese comecina o facañena, jiaimie omo lloga.

<sup>35</sup> Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiaí fecadimaci. ¿Nie isoide marañede rafuena finodio?

<sup>36</sup> Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

<sup>37</sup> Pilato uai ote:

—Ie jira odi illaímadio.

Jesús uai ote:

—Jaca railla. Uanaicino lollena, jeicigacue. Nana uanaicinona jitaídino cue llucino cacadimaci.

<sup>38</sup> Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo ñede.

*Jesúna coraiacana rafue*

*(Mt 27.15-31; Mr 15.6-20; Lc 23.13-25)*

<sup>39</sup> Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaía, omoi illaíma raillamiena marena oretaiticue.

<sup>40</sup> Comini dinena cuiridimaci:

—Dama ite. Bimiena jitaíñedicaí. Barrabásna cárcelmona marena jino oreta. —Iese cuiridimaci. Barrabásdi firiraima.

## 19

<sup>1</sup> Ie mei Pilato Jesúna oni uillanona, naimiena sechedotade.

<sup>2</sup> Jifanodosillena, soldadauí eecuaimona finoca nuiciraina naimie ifogimo jitaídicaí. Jiduirede iniroina jitatajano raitimaci:

<sup>3</sup> —Judíuai illaímadio. —Iemei ie uiecona bucoídicaí.

<sup>4</sup> Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

<sup>5</sup> Ie facaise Jesús jino bite. Eecuaimona finoca nuiciraina jitaca. Jiduirede iniroina jitaca. Pilato naimacimo llote:

—Jadi, naimie.

<sup>6</sup> Jusiñamui diga nanoca ñairainidi, jiaie illaicomini diga, naimiena ciuano, cuiiriidimaci:

—Naimiena corai.

Pilato llote:

—Naimiemo nicinodi iñede; ia oni uillanona, naimiena omoi corai.

<sup>7</sup> Uai otimaci:

—Moisés micori jiaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caimona naimiedi marañede rafue jai finode.

<sup>8</sup> “Naimiedi Jusiñamui Jito” comini raillana Pilato cacajano, eo jacinante. <sup>9</sup> Jesúsna dane fo uite. Jesúsdi Jusiñamui Jitona naimie raise uiñollena, Jesúsno jicanote:

—¿Ninena bitio?

Jesús uai oñede. <sup>10</sup> Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

<sup>11</sup> Jesús uai ote:

—O anamo Jusiñamui cuena itataja jira, o uai ite, cuemo lollena. Ie jira omo cuena fecadino o baifemo jeacino finodimaci.

<sup>12</sup> Ie facaimona Pilato Jesús marena jino oretaiacade; iadedi judíuai illaicomini dinena cuiiriisite:

—Bimie o jino marena oretaia, cai nanoca illaíma ie nabaiñedio. “Illaímadicue” Jesús lluamona, cai nanoca illaíma dibeimo naimiedi iñede. Cai nanoca illaímadí César.

<sup>13</sup> Comini lluana cacajano, Pilato Jesúsna jino atide. Ie cominimo lloranomo raide. Naie illano nofinina mameciredede. Judíuai uaido Gabatana mameciredede. <sup>14</sup> Pascua rafue guilla finoraruijoma naidai illanona, Pilato dinena llote:

—Jadi, omoi illaíma.

<sup>15</sup> Iemona cominidi cuiiriisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaímana coraiticue?

Jusiñamui diga nanoca ñairaini uai otimaci:

—Cai illaímadí César. Jiaie illaímadí caimo iñede. Jaca dallaimade cai illaímadí.

<sup>16</sup> Ie mei Pilato naimacimo naimiena fecade, coraillena.

*Jesúna coraiaicana rafue**(Mt 27.32-56; Mr 15.21-41; Lc 23.26-49)*

Pilato llua jira, Jesúna uitimaci coraillena. <sup>17</sup>Jesúdi ie cruzna rocaicaida sonode. Ifocoraina eruaila mameciredede illanomo jaidimaci. Judíuai uaido naie illano Gólgotana mameciredede. <sup>18</sup>Nainomo naimiena coraidimaci. Naimie abimo menamie coraica. Damie Jesús nabeimo. Jiaimie jarifebeimo. <sup>19</sup>Cruzmo jonellena, Pilato rabricimo cuetatate: “Nazaret ie Jesús. Judíuai Illaíma”. <sup>20</sup>Judíuai uaido cuega. Romanos comini uaido jiai cuega. Griego uaido jiai cuega. Jesús coraiano Jerusalén ianori illa jira, ailluena comini iena cioidimaci.

<sup>21</sup>Iena ciuamona, naie rabricina meidollena, Jusiñamui diga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meiduana jitaídicaí. Bimie dinena raisoide: “Judíuai Illaimadicue” railanona, o cuetatajana jitaídicaí

<sup>22</sup>Pilato uai ote:

—Jai cuetataticue. Jiaie rabricimo dane cuetatañeíticue.

<sup>23</sup>Jesúna coraia mei, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi. <sup>24</sup>Ie jira dani coniniri ñaitimaci:

—Bie camisa cuaranoñeíticaí, dani cai fecallena. Mai. Conima jabomaiticaí, iena ollena. —Iese finuano Jusiñamuina lloaíma micori cuegafuiai suide. Jaiie cuega: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

<sup>25</sup>Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite. <sup>26</sup>Jesús ie eina ciode. Cuena naiñaiño ecimo jiai ciode. Cuena eo gaide. Ie jira ie eimo llote:

—Jadi, o jito isoi itimie anamo iitio.

<sup>27</sup>Cuemo llote:

—Jadi, o ei isoidiñaiño anamo iitio.

Naie dacaiño naiñaiñoona cue jofomo uillanona, naiñaiñoona sedadicue.

<sup>28</sup>Ie mei Jesús nana rafue jai fuillana uiñuano, llote:

—Jiroacadicue. —Iese lluanona, Jusiñamuina lloaíma micori jaiie cuegafuiai jai suide. <sup>29</sup>Nainomo llerojimo vino ite. Radosimo fibecode rana joniano, vinomo faite. Iemei Jesúmo fecade jaronollena. <sup>30</sup>Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitaídacaída, fiodaite.

*Jesús sida diga ducia rafue*

<sup>31</sup>Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano

idaiaina uellullena naimiemo jicanuaidimaci. Sábado rafue ie nairui nia illanona, sábadorui jai raire taineacana jira, coraicano cruzmo sábadoruimo illana jitaiñedimaci. <sup>32</sup> Soldaduai jaillano, Jesús ecimo coraica iaiaiaia idaiaina uellude. <sup>33</sup> Jesús dine billano, naimie jai fiodaillana cioidimaci. Ie jira naimie idaiaina uelluñedimaci; <sup>34</sup> iadedi daje soldado Jesús ciraigiconi sida diga ducide. Naifo diaide. Naifomona jinui jiai bite. <sup>35</sup> Nana iena cioidicue. Uanai lloticue. Omoi ñnollena, iena lloticue. <sup>36</sup> Soldaduai iese finuamona, jaie ciegafuiaia jai suide. Jaie Jesúsna cuela: “Naimie illaicina tainoñeitimaci”. <sup>37</sup> Jiai jaie cuela: “Judíuai dinena naimaci ducitagamiemo ico eruaitimaci”.

*Nofici ifomo Jesús raia rafue*

(Mt 27.57-61; Mr 15.42-47; Lc 23.50-56)

<sup>38</sup> Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicominina naimie jaciruillanona, Jesúsna bainino ñnote. <sup>39</sup> Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. <sup>40</sup> José, Nicodemo diga, Jesús abina useroina ferinotiaiaiaia. Naimaci comini finouilla isoi, naie siorede radi ñniroimo jonega. <sup>41</sup> Amenaiia iaire illanomo Jesúsdi coraica. Nainomo nofici ie raiafoði ite. Nia buna naifomo raiañafo. <sup>42</sup> Naifo iaire illa jira, sábadorui jai riacana jira, jiaie raiafo jenollena abi juanina jira, nainomo naimiena jonetiaiaiaia. Nofici diga raiafo raise ibailla mei, jofomo jaidiaiaiaia.

## 20

*Fiodaillamona, Jesús jillua rafue*

(Mt 28.1-10; Mr 16.1-8; Lc 24.1-12)

<sup>1</sup> Domingo jitiramo nia monañenia, raiafomo María Magdalena jaide. Raiafo ibailla nofici oni joillana cide. Jesús abina cioiñede. <sup>2</sup> Ie jira aisicana Pedrona jenuaide. Cuenajia jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uññoñedicue.

<sup>3</sup> Ie mei raiafomo jaidicoco. <sup>4</sup> Aisicana jaidicoco; iadedi riire cue aisicana jailla jira, nano ridicue. <sup>5</sup> Ana bitadacaida, fo erodaticuemo, useroi joillana cioidicue; iadedi fo jaiñedicue. <sup>6</sup> Ie mei Simón Pedro rillano, fo jaide. Useroi joillana jiai cide. <sup>7</sup> Ie ifogimo ferinoga ñniroi eneno illana cide. Raise nacuana cide. <sup>8</sup> Iemei jiai fo jaidicue. Ñniroina ciuamona, Jesús jai jilluana ñnoticue. <sup>9</sup> Jaie ciegafuiaia llote: “Fiodaillamona

jilloite”. Naie cuegafuiaina como raise #noticoco. <sup>10</sup> Ie mei jofomo jaidicoco.

*María Magdalenamo Jesús bairia rafue*

(Mr 16.9-11)

<sup>11</sup> Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, <sup>12</sup> Jusiñamuimona mena jaienici jai billana ciode. Userede iniroi jitadiaimaiai. Jesúna navui jonianomo ana raidiaimaiai. Damie ifogi dibeimo raide. Jiaimie eilli dibeimo raide. <sup>13</sup> Naiñaiño jicanotiaimaiai:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

<sup>14</sup> Naie facaise jinafo dine erocaillanona, Jesúna ciode; iadedi naimiena uiñoñede. <sup>15</sup> Naiñaiño comequina facade; “Naimiedi bie illano sedaraima”. Jesús naiñaiño jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

<sup>16</sup> Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboni! —Naie uai oni dobaiñuamona: “Llofueraima”.

<sup>17</sup> Jesús uai ote:

—Cuena llinoñoeno cuena faicai. Cue Moo dine nia a jaiñedicue. Cue amatiai dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

<sup>18</sup> Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiño lluana llote.

*Jesús ie llofueoicaiganomo bairia rafue*

(Mt 28.16-20; Mr 16.14-18; Lc 24.36-49)

<sup>19</sup> Domingo naio Jesús llofueoicaiganodicai jofomo ofidicai. Judíuai illaicomínina cai jaciruillamona, nasiai nana cai ibaica. Nase econoñoeno ieconi Jesús cai motomo billanona, caina uaiduano, llote:

—Uri omoi i.

<sup>20</sup> Ie onollina acatate. Ie ciraigina jiai acatate. Cai Namana jai cai ciuari eo iobidicai. <sup>21</sup> Jesús dane llote:

—Uri omoi i. Cue Moo cuena oretaja isoi cue rafuena lollena, omoína oretaiticue.

<sup>22</sup> Ie facaise caina firaiñuanona, raite:

—Jusiñamui Joreñona omoi feiñuana jitaídícue. <sup>23</sup> “O jeacínona jai dotade” bumo omoi lloia, Jusiñamui jai dotaca. “O jeacínona nia dotañede” bumo omoi lloia, Jusiñamui nia dotañega.

<sup>24</sup> Naie naio Tomásna mameciredede llofueoicaigamíe cai díga íñede. Dídimona jiai mameciredede. Naimíedi gorasa.

<sup>25</sup> Naimiemo llotícai:

—Cai Namana ailli ciodícai.

Tomás uai ote:

—Clavo ifona naimíe onolli jeraimo cue cioíñenia, naie ifona cue jetañenia, naimíe ciraigi ifona cue jetañenia, ñnoñeítícue.

### *Jesús ie llofueoicaiganomo dane bairia rafue*

<sup>26</sup> Ocho dígarui illanona, Jesús llofueoicaiganodícai dane ofillano, Tomás cai díga ite. Nana nasíai íbaíca; íadedí nase econoñeno íeconí Jesús cai motomo dane fo billano, uaiduano, llote:

—Uri omoi í.

<sup>27</sup> Íemeí Tomásmo llote:

—Eroda cue onollímo. Naífo jeta. Ciraigi ifona jiai jeta. ñnoñeno jaiñeno. Maí ñno.

<sup>28</sup> Tomás uai ote:

—Cue Namadío. Cue Jusiñamuídío.

<sup>29</sup> Jesús dane uai ote:

—Cuena o cíua jira, cuena ñnotío; íadedí cuena cioíñedíno cuena ñnoía, jiai caímare íítímací.

<sup>30</sup> Jesús díga síño rafuena finode. Iena ciodícai. Nana naie rafuena bie rabenicomo cueñedícue; <sup>31</sup> íadedí dajerie cuetícue. Jesúsdí cai Jilloítaraimana omoi ñnollena, íena cuetícue. Naimíedi Jusiñamui Jítóna omoi ñnollena, íena jiai cuetícue. Naimíena omoi ñnuano, naimíe díga jaca íítómoí.

## 21

### *Jesús ie llofueoicaiganomo ane bairia rafue*

<sup>1</sup> Díga írui illanona, Tiberíana mameciredede jorai fuemo Jesús ie llofueoicaiganodícaímo dane baírede. <sup>2</sup> Nainomo díese ítícai: Simón Pedro, Tomás, Natanael, cue ama Jacobo, cue, jiaíe íaímaíai. Tomás mamecí jiaícídí Dídímo. Natanael Galilea íe Caná nairai ímíe. <sup>3</sup> Simón Pedro caímo llote:

—Llojví faíaitícue.

Naimíe uai otícai:

—O díga jaitícai. —Íese raíllano, botemo jaidícai. Namona naío llojvína faítícai; ía jaca buena oñedícai. <sup>4</sup> Monaiacademo, Jesús jorai fuemo bíte; íadedí naimíena uíñoñedícai. <sup>5</sup> Jesús caímo jícanote:

—Cáímací, ¿níe díese lílícaína jai otómoí?

Uai otícai:

—Jaca oñedicaí.

<sup>6</sup> Naimie dane uai ote:

—Omoi bote nabei dine omoi lloijina faino.

Ie jira faiticaí. Ailluena lliciaí naiemo jilla jira, a aiñonidicaí.

<sup>7</sup> Iena ciuamona, Pedromo lloticue:

—Cai motomo cai Namadi ite.

Pedro iena cacajano, naimie taimiena jira, ie iniroi jitade. Jesús dine naimie raire rillena, joraimo daiade; <sup>8</sup> iadedi botedo biticaí. Enirue iaie illa jira, na lliciaimo sonocana, lloijina atidicaí. Nibai cien metros oni ite. <sup>9</sup> Jorai fuemo cai ria, coocimona bonoca iraina cioidicaí. Lliciaí iraimo ruica jai ite. Llomenico jiaí ite. <sup>10</sup> Jesús caimo llote:

—Omoi oga lliciaimona janore ati.

<sup>11</sup> Ie jira Simón Pedro botemo jaillano, lloijina llinuanona, eniruemo ari sonode. Ciento cincuenta y tres jemierie jitaticaí. Ailluena ite; iadedi lloiji cuarariñede. <sup>12</sup> Jesús llote:

—Mai guisaibi. —Jesúna cai uiñua jira: “¿Budío?” jaca buna raiñena. <sup>13</sup> Jesúdi llomenico diga lliciaína caina ecade.

<sup>14</sup> Fiodaillamona jillua facaisemona dacaiño amani caimo Jesús jai abina bairetate.

*Jesús Pedro diga ñaia rafue*

<sup>15</sup> Guilla mei, Jesús Simón Pedromo llote:

—Simón, odi Juan jitodio. —Jiaí jicanote— ¿Nana o nabaiñiaí baifemo cuena isiruitio?

Simón uai ote:

—Jii, Nama, ona cue isiruillana uiñotio.

Jesús uai ote:

—Toica llaudaiaí uruiaína omoi raise sedaja isoi, cuena inotinona raise seda. Naimacina cue rafuena raise llofue.

<sup>16</sup> Dane llote:

—Simón, odi Juan jitodio. —Dane jicanote — ¿Cuena isiruitio?

Simón uai ote:

—Jii, Nama, ona cue isiruillana uiñotio.

Jesús dinena uai ote:

—Toica llaudaiaí uruiaína omoi raise sedaja isoi, cuena inotinona seda.

<sup>17</sup> Dane jicanote:

—Simón, ¿cuena isiruitio? —Jesús naimiemo dane jicanua jira, “Jesús cue uaina inoñede” raillanona, Pedro comeci sunaite.

Uai ote:

—Nama, naga rafuena uiñotio. Ona cue isiruillana uiñotio.

Jesús uai ote:

—Toica llaudaiaí uruiaína omoi raise sedaja isoi, cuena inotinona seda. <sup>18</sup> Daje rafue omo nia lloticue. O nia conirue facai o iniroi dama jitadio. Ie mei o jitaillanomo jaidio. O

uaiciroma facaiseconi o onolli oni ñuitaitio. Ie mei jiaimie o iniroi ona jítajano, o jítaiñenanomo ona uite. Cue llua ñnocana o jai.

<sup>19</sup> Fiodaillena Pedro uñollena, uicodo Jesús iese llote. Cristo llua isoi, Cristo rafue muidona, illaicomini Pedrona jiaruido meinetimaci. Naimie fiodaillanona, Jusifñamuina iobitade.

*Jesús ie gaia llofueoicaigamiemo llua rafue*

<sup>20</sup> Pedro diga Jesús nia ñaia facaise, Pedro dobaicaillanona, cuena ciode. Iaimaia jinafona racadicue. Jesús gaiamiedicue. Navui cai guia, Jesús nia fiodaiñenia, Jesús abimo cue ia, Jesús mo jicanoticue: “¿Bu gaitatallio?” <sup>21</sup> “Cuena ñnotinona seda” Pedromo Jesús llua mei, Pedro dobaicaillanona, cuena ciuano, Jesús mo jicanote:

—Nama, ¿ñiese naimie fiodaite?

<sup>22</sup> Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue llua ñnocana o jai.

<sup>23</sup> Ie jira creyentia naie llua fidiano cuena raitimaci:

—Naimie fiodaiñeite. —Iese raitimaci; iadedi Jesús iese rañede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

<sup>24</sup> Nana rafuena ciuano lloticue. Iena cueticue. Uanaicinuaina cueticue.

<sup>25</sup> Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.



## JESUCRISTO ORETAGANODI NAIMIE RAFUE LLOCANA UILLA RAFUE

*Jesús Jusiñamui Joreño billena llua rafue*

<sup>1</sup> Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiaie cueticue. <sup>2</sup> Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. <sup>3</sup> Naimie fiodaillamona ie jillua mei, naimacimo bairedede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui díbeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

<sup>4</sup> Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai llotie. Naiena omoi feiñollena, Jerusalémo nia fiebi. <sup>5</sup> Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreña feiñoitomoí —raite.

*Monamo Jesús jailla rafue*

<sup>6</sup> Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micori cai usumatiai micoriai jaie sedaja isoi?

<sup>7</sup> Naimie uai ote:

—Naie rafue suille facaiseconi jaca uiñoñeitomoí. Naimie siñona illamona, dama cue Moo naie rafue suilliruina uiñote; <sup>8</sup> iadedi cue Moo ie Joreña omoi feiñua mei, siño uai omoimo iite. Ie jira Jerusalémo cuena lloitomoí. Judeamo, Samariamo, ua nana enruemo ite nairaimo lloitomoí —raite.

<sup>9</sup> Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede. <sup>10</sup> Monamo nia eruidemo, ieconi naimaci dine Jusiñamui jaienici, mena iima bairia isoi, bairediaimaiai. Naie iaimaiai iniroi userede. <sup>11</sup> Raitiaimaiai:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai cidomoi. Naimie jai jailla isoi, dane abido ico biite —raitiaimaiai.

### *Matiana fetua rafue*

<sup>12</sup> Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. <sup>13</sup> Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Diese nainomo itimaci. <sup>14</sup> Naimaci jitaillamona, Jusiñamuimo jillena, nagarui danomo ofidimaci. Jillena, jiaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

<sup>15</sup> Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

<sup>16</sup> —Amatai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cuega. Iena uiñoticaí. Judas micorina uiñoticaí. Naimie Jesúsna gaitadinona ifode. <sup>17</sup> Naimiedi da cai llofueoicaigano imie. Cai diga maijiuide. <sup>18</sup> Ie marañeno finoca rafuemonona ucubena feiñua mei, ie comeci iuaina meiduanona, naie ucubena oni judaide. Judíuai illaicomini naie ucube diga eniruena ibadimaci. Nainomo Judas micori ie cimaio cuinajanona, ie abina dama meinete. Rifaillamona, ana uaillamona, ie jebegi boficaillamona, nana ie jebegi jino uaide. <sup>19</sup> Nana Jerusalémo itino iena fididimaci. Ie jira cai uaido naie enirue mamecireda Acéldama. Oni dobaiñuamona dirue toillanie. <sup>20</sup> Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jiaimiemo iite.

Iese cuega. <sup>21-22</sup> Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisemona, Jesús monamo caimona jaillarui facaiseconi, naimaci cai diga jiai itimaci. Naimacimona damiena fetoiticaí, Jesús jilluana cai diga llollena. —Iese Pedro raite.

<sup>23</sup> Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías. <sup>24</sup> Ie mei Jusiñamuimo jidimaci:

—Nama, nana comini imaci comeciaina uiñotio. ¿Nie imana jitaidio? Caina uiñota. <sup>25</sup> Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijiana jai fainonocaide —jidimaci. <sup>26</sup> Ie jira conima jabomaside, uiñollena bu ille. Matiamo baite. Iemei jiaie once diga oretagano isoi naimie ite.

## 2

### *Cristo oretagano Jusiñamui Joreñona feiñua rafue*

<sup>1</sup> Pentecostés railla rafue irui ria, nana creyentiai diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. <sup>2</sup> Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiai cacadimaci. <sup>3</sup> Iena naimacimo bairede. Iena cioidimaci. Irai boua isoi eruaide. Nana naimacimo baite. <sup>4</sup> Iese Jusiñamui Joreñona feiñotimaci. Nana naimaci comeciaina namatade. Iemei diga nairai uailaido ñaitimaci, Jusiñamui Joreño naimacina ñaitatajamona. Naimaci ñaia uailaina uiñoñedimaci.

<sup>5</sup> Naie facaiseconi Jerusalémo Jusiñamui rafuedo eo jaide judúuaidi itimaci. Diga nairaiamona bitimaci. <sup>6</sup> Creyentiai ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci. <sup>7</sup> Eo raijicaidimaci. Coninimo jicanotimaci:

—¿Buta ñaite? Nana Galileos imaci. <sup>8</sup> ¿Niese naimacina cacadicaí? Cai uaido dajerie ñaiana cacadicaí —raitimaci. <sup>9</sup> Diga comini imiiai itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, <sup>10</sup> Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiai itimaci. <sup>11</sup> Judúuai itimaci. Judúuaiñedino jiai itimaci. Judúuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci. <sup>12</sup> Nana eo raijicaidimaci. Danirie jicanododimaci:

—¿Bue ite?

<sup>13</sup> Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

<sup>14</sup> Ie facaise ie once nabaiñiai naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluomo cacarei. Naie rafuena lloiticue. <sup>15</sup> Omoí comeciaina omoí facaja isoi, jifaiñedicaí. Jitoma nia fuiri daidemo, bu jaca jifairainina.

<sup>16</sup> Joel micori bie rafuena jaie llote. Joel micori Jusiñamui

rafuena lloraima. Naimie jaie lloga rafue birui caimo jai suide. <sup>17</sup> Llote:

Jusiñamui caimo llote: “Jiairuido bie rafue suite.

Cue Joreñona diga cominimo fecajiticue.

Iedo omoi uruiaí cue llwana lloitimaci.

Iemona omoi coniruiaina nicairitaiticue.

Iemona omoi einamacina jiaí nicairitaiticue.

<sup>18</sup> Ua nana cuena sedadinomo cue Joreñona fecajiticue.

Naimaci cue llwana lloitimaci.

<sup>19</sup> Monamo eo jacirede rafuena ico suiñotaiticue.

Eniruemo eo jacirede rafuena ico jiaí suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

<sup>20</sup> Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

<sup>21</sup> iadedi birui cuemo bu jicaia, ie jeacinomona naimiena jillotaiticue” Jusiñamui llote.

Ie Joreño caimo birui illamona, Joel micori llogacino jai suide.

<sup>22</sup> 'Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi. <sup>23</sup> Jusiñamui começi jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomoi. Jusiñamuina iñoñedinona naimiena meinetadomoi; <sup>24</sup> iadedi fiodaillamona naimiena Jusiñamui jillotajano, legi ie cacajamona naimie jillobide.

Naimie fiodaite; iadedi fiodaillamona nainomo iñoñede.

<sup>25</sup> David micori naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

<sup>26</sup> Ie jira cue começi caimare ite. Eo iobidicue.

Cue marena illemo jai jiaí ocuridicue,

<sup>27</sup> raiafomo cue joreñona naimie fainonocaiñena jira,

ie mare Jito abi rifaillana naimie jitañena jira.

<sup>28</sup> Naimie cuena jilloitallena uiñoticue.

Cue diga naimie illa jira, cue começi caimare iite.

<sup>29</sup> 'Caimaci, cai usuma David micorina marefodo ñaiticue.

David micori ñaia, dama naimie facaina ñaiñede. Jesúsna ñaite.

David micori jaie fiodaite. Raiafomo jonega. Naifo bene nia illamona, naimiedi Jesúsna ñaiana uiñoticaí. <sup>30</sup> Ie ia David micori

Jusiñamui rafuena llote. Naimie micoridi Jusiñamui naimiemo uanaicinona llwana uiñote. Jaie Jusiñamui naimiemo llote:

“O uruiaimona damie illaimana illanona, ie cominina sedajite” llote. <sup>31</sup> Cristona ñaite. David micori nia suiñede rafuena llote. Naimie micori Cristo jilloillena llote: “Raiafo

Jusiñamui fiodaillanomo Cristo Joreño fainonocaiñeite. Cristo

abi rifaiñeite” lloste. <sup>32</sup> Jesúna ñaite. Jusiñamui Jesúna jai jillotate. Nana cai iena ciodicaí. Ie jira iena lloticaí. <sup>33</sup> Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui cúa isoi, omoi birui cacaja isoi. <sup>34</sup> Naimie abi monamo jaiñena jira, David micori dama naimie facaina ñaifede; ia Cristona ñaite. Ero, jaie David micori raite: Jusiñamui Cristomo lloste: “Cue ecimo ana rai.

<sup>35</sup> Ona ñnoñedinona o anamo itataiticue” raite. David micori llua isoi, birui jai suide.

<sup>36</sup> Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuái comini naiena uiñuana jitaidicue.

<sup>37</sup> Pedro lluana cacajano, naimaci comeciáimo riire baite. Pedromo iena jicanotimaci. Ie nabaiñiaimo jiai jicanotimaci:

—Caimaci, o lluana jai cacadicaí. ¿Bue finoiticaí?

<sup>38</sup> Pedro uai ote:

—Omoi comeciáiuaina meido. Iemei Jusiñamui omoi mo ite jeacinuaina dotajite. Jesucristo facaina omoi bautizallomoi. Jusiñamui Joreñoña jiai feiñoitomoi. <sup>39</sup> Omoi mo ie Joreño fecallena navui lloste. Omoi uruiaimo jiai fecaite. Jiaie nairaiái itinomo jiai fecaite. Ua nana Jusiñamui fetocanomo jiai fecaite.

<sup>40</sup> Diga uai naimacimo Pedro lloste. Raite:

—Ailluena comini marañede rafuena birui finocana jaidimaci. Fafitimaci. Naimaci isoi jaiñeno; iadedi cue llua omoi cacajamona, iena ñno.

<sup>41</sup> Diga comini ie lloga uaina feiñuano, bautizadimaci. Nairuido ñibai tres mil comini creyentiaína jaidimaci.

<sup>42</sup> Cristo oretagano llofuiana fueouidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jñuidimaci.

### *Cristona ñnotino illa rafue*

<sup>43</sup> Cristo oretaganodi diga siño rafuena finuamona, nana comini jacinaitimaci. <sup>44</sup> Nana creyentiaí damacina itimaci. Naimaci raruiaí coninimo fecauidimaci. <sup>45</sup> Dueredino ia, naimacina canollena, raruiairedino naimaci raruiaína vendidimaci. Iemei naie ucube dueredinomo fecadimaci.

<sup>46</sup> Jusiñamuina sedallena, nagarui Jusiñamui jofomo ofisoidimaci. Daniríe imaci jofuemo Jusiñamuina jiai sedauidimaci. Nainomo danomo guillanona, Jesús fiodaillana comeciuidimaci. Caimare imaci comeciáí illamona, caidiñeno guisoidimaci. <sup>47</sup> Jusiñamuimo

iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaína jaidimaci.

## 3

*Jusiñamui jofomo Pedro lluacino*

<sup>1</sup> Jusiñamui jofomo jia facaise Pedro iaimaia; Juan diga jaide. Jitoma ana ia, comini jiiuidimaci. <sup>2</sup> Iaimaia; jaillanomo jiaie comini tisitaitimiena atiana ciodiaimaia. Tisitaitimiena naimie jaca jeiciga. Naimiena nagarui atiano, Jusiñamui jofu ie ebiredena railla nase fuemo rainauuidimaci. Nainomo naimiena rainauuidimaci, fo jaidinomona ucube jica-jicallena. <sup>3</sup> Iaimaia; fo jaiacania, ucube jicallena, ie onolli ñuitade. <sup>4</sup> Iaimaia; naimiemo eruailano, Pedro raite:

—Cocomo eruai.

<sup>5</sup> Ie jira iaimaiaimo eruaide. Ra feiñoitena, ocianona sedade.

<sup>6</sup> Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaicue.

<sup>7</sup> Pedro naimie onollido llinuano, a naidanete. Ieconí naimie eillidi jillode. Ie taisicoñuai jia; jillode.

<sup>8</sup> Daiacaillanona naidacaide. Macarillanona, iaimaia; diga fo jaide. Jusiñamuimo iobillacinona fecajano, daiacaillanona macarite. <sup>9</sup> Nana comini naimie macarillana cioidimaci. Naimie iobillacinona fecajana jia; cacadimaci. <sup>10</sup> Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajjicaidimaci. <sup>11</sup> Naimiedi Pedro iaimaia; Juan diga nia llinuano, naimaci dine Salomón micori finotaga jofu abi ibirimo comini aisidimaci. Rajjicaidimaci. <sup>12</sup> Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daimaia; iaimaia; uaido naimiena jilloitate” raillanona cocomo eruaidomoi.

<sup>13</sup> Iena finoñedicoco; iadedi Jusiñamui iena finuano, ie Jito Jesúsna iobitade. Cai usumatia; micoria; Abraham, Isaac, Jacob, ua nana cai usumatia; micoria; bie Jusiñamuina sedadimaci; iadedi Jesúsna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi. <sup>14</sup> Mareuidimiena jitaiñedomoi; iadedi come fatimiena cárcelmona jino billana jitaidomoi. Barrabás raillamiena jitaidomoi. <sup>15</sup> Jusiñamui dibeimo caina itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco.

<sup>16</sup> Tisitaitimie jilluana jai ciodomoi. Naimiena uiñotomoi. Jesúsna naimie ñnua jira, Jesús naimiena mairitate. Naimiena raise jillotate. Iena jai ciodomoi.

<sup>17</sup> Caimaci, ero, omoi finoca rafuena abina uiñoñoeno finodomoi. Omoi illaicomini jia; daje isoi finodimaci. <sup>18</sup> Jaie Jusiñamuidi ie facaina llorainina jia;ruído suille rafuena

lloatatate. Naimacina Cristo legi cacajana lloatatate. Birui naie llogacino suide. <sup>19</sup> Omoï comeciã iuailã meido. Jusiñamui ðibeimo omoï comeciãina meido. Iemei Jusiñamui omoï jeacinona dotaite. Iena jaca feitaite. <sup>20</sup> Omoï uri illa facaise illena, Jusiñamui omoï diga illena, iena fino. Jusiñamui Jesucristona omoï ðine dane oretallena, iena fino. Naimiedi omoï Jilloitarãima. <sup>21</sup> Jusiñamui facaina llorãini micoriai jaie lloga rafue suille ðinori monamo naimie fiebiite. Jaie Jusiñamuidi ie mare llorãini micoriai uaido biena llote. <sup>22</sup> Moisés micoriãraite: “Omoï cominimona naimie rafue llorãimana jaillena, cai Nama Jusiñamui cue isoi ðamiãna fetõite. Nana naimie omoïmo lluaãa cacarei. <sup>23</sup> Bie llorãimana bu cacarefiñena, Jusiñamui naimiãna ðuere finoite. Iemona faifite”. <sup>24</sup> Nana Jusiñamui ie llorãini micoriaidi birui suille rafuena llotimaci. Samuel micori illa facaisemona naimaci biena llotimaci. <sup>25</sup> Jusiñamuidi cai usumatãia micoriaimo rafuena llote; ia bie rafue birui omoïmo jiaï ðuide. Jusiñamui Abraham micorimo jaie llote: “Nana cominidi o uruiaï muidona caïmare iitimaci”. <sup>26</sup> Ie rafue suiñollena, Jusiñamui ie Jitona omoï ðine navui orede. Omoï caïmare illena, nano omoï maraiñedicinona faïnonocaitallena, omoï ðine naimiãna nano jai oretate.

## 4

### *Cristo oretagamaiaï llaicomini motomo illa rafue*

<sup>1</sup> Comini diga Pedro iaïmaiaï Juan diga ñaia facaise, Jusiñamui diga ñairainidi naie iaïmaiaï ðine bitimaci. Jusiñamui jofona sedarãini illaïma diga, saduceuai railla comini diga jiaï bitimaci. <sup>2</sup> Fiodaillamona Jesús jai jilluana llofuetiaïmaiaï. Cominina iaïmaiaï llofuia jira, naie iaïmaiaï diga iciritimaci. <sup>3</sup> Iaïmaiaïna gaïtajanona, jai navuilla jira, cárcelmo jonetimaci, ie jitiramo naie rafuena siadollena. <sup>4</sup> Iese suide; ia Pedro llogacinona cacadinomona ailluena comini naïena ðnotimaci. Cinco mil ðigamiã creyentiãna jai itimaci.

<sup>5</sup> Icoiti Jerusalémo nana judíuaï illaicomini siadollena ofidimaci. <sup>6</sup> Anás jiaï bite. Naimiedi Jusiñamui diga nanoca ñairãima. Caifás bite. Juan bite. Alejandro jiaï bite. Nana Jusiñamui diga nanoca ñairãima cominidi ofidimaci. <sup>7</sup> Naimaci motomo Pedro iaïmaiaï Juan diga atãanona, iaïmaiaïmo jicanotimaci:

—¿Bu uai diga biena finodomico?

<sup>8</sup> Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoïmo lloiticue. <sup>9</sup> Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi. <sup>10</sup> Jesucristo uai diga

jillode. Omoi buena uñuana, ua nana judíuai comini buena uñuana jitaídícue. Jesucristodi Nazaret imíe. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tísitaitímíe jai benoconi naidailana ciodomoi. <sup>11</sup> Omoi jofo finoraini isoidomoi. Omoi jitaíñede noficidi jiaíe nofici baífemo jai jaide. Jesúdi naie nofici isoide. Naimíe rafuena omoi jitaíñena jira, naimiena meinetomoi. <sup>12</sup> Cai jeacinomona jiaímíe caina jillotanide. Nana eníruemo ite cominimona jiaímíe buna jaca jillotanide. Dama Jesús caina jillotarede —llote.

<sup>13</sup> Jacíruiñeno marefodo llofuetíaiamaiai. Nainomo itino iena cacajano, comecina facadímaci: “Abina uññoñediaiamaiai. Jamai bue isoidíaiamaiai”. Ie jira rajicaídímaci; iadedi Jesús llofueoicaigaiaíamaiaína illana uññotímaci. <sup>14</sup> Jilloitagamíe iaímaiai diga naidailana ciodímaci. Ie jira naimaci uai íñede. <sup>15</sup> Naie rafuena siadollena, naie illaícomini iaímaiaína bai oredímaci. <sup>16</sup> Coninimo jicanotímaci:

—¿Níese naie iaímaiaína níbaíticai? Nana Jerusalémo itino iaímaiai síño rafuena finuana jai fidídímaci. Iena janonidícai. <sup>17</sup> Jiaíe comini iena fidíi raillano, Jesús rafuena iaímaiai llofuiana rairuitícai.

<sup>18</sup> Ie mei iaímaiaína naimaci díne dane uaidotímaci. Iaímaiaímo Jesús rafuena llofueñellena riire llotímaci. <sup>19</sup> Pedro iaímaiai Juan diga naimaci uai ote:

—Ie rafuena coco lollena Jusiñamui jitaide. Omoi uaina coco ñnoia, Jusiñamui jitailla rafuena finoñeíticoco. Cocomo llono. ¿Bu uaina ñnoíticoco? ¿Jusiñamui? ¿Omoi? Cocomo íese llono. <sup>20</sup> Daímaiai coco ciua rafuena llotícoco. Daímaiai coco cacaja rafuena llotícoco —raite.

<sup>21</sup> Iaímaiaína jacínaitajamona, iaímaiaína jino oretatímaci. Iaímaiaína duere finoñedímaci, nainomo ite comini icírinaíñellena. Jusiñamuimo nana nainomo itinodi iobillacinona fecadímaci, tísitaitímíe jai jillua jira. <sup>22</sup> Jai jillodímíemo cuarenta años baífemo ite. Síño uaido naimíe jillua jira, comini iobidímaci.

### *Naimacina Jusiñamui canollena, naimíemo jüacino*

<sup>23</sup> Iaímaiai jino jailla mei, iaímaiai nabaiñiai díne jaidíaiamaiai. Illaícomini iaímaiaímo lluaña llotíaiamaiai. <sup>24</sup> Naimaci iena cacajano, Jusiñamuimo damíe llua isoi jüdímaci:

—Ore Moo, mona finodio. Eníruena finodio. Monaillaina finodio. Nana naiemo ite rana jiaí finodio. <sup>25</sup> Cai usuma David micorína raise uññotícai. Naimíedi ona sedadímíe. Naimiena bie rafuena o Joreño jaie llotatajamona, naimíe llote: ¿Bue ñellena Jusiñamui diga judíuaiñedino icírítímaci?



¿Bue ñellena Jusiñamuimo comini tainomo comeciaina facadimaci?

<sup>26</sup> Illaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jiai iñedimaci

llote. <sup>27</sup> Naie rafue birui bene suide. Bie nairaimo Herodedi, Poncio Pilato diga, judíuáiñedino diga, judíuái comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci.

<sup>28</sup> Naimaci ofillamona, nana o jitaille rafuedi, o jaie lloga rafue diga, jai suide.

<sup>29</sup> Nama naimaci jaciruitajacinona jai uiñotio. Cai comeciaina ocuiñota, o rafuena jacitaiñeno cai lollesa. <sup>30</sup> Duidinona jilloita. O mare Jito Jesús uaido caina siño rafuena finota — jiidimaci.

<sup>31</sup> Jusiñamuimo jiiacino fuilla meinoconi, naimaci ofracodi jaidisite. Jusiñamui Joreño nagamiiai comecimo namatade. Iemona Jusiñamui uai jacitaiñeno llocana jaidimaci.

### *Creyentiai damacina illa rafue*

<sup>32</sup> Nana creyentiai damacina itimaci. Naimacimo raruiaia, dajena naimacimo duide. <sup>33</sup> Naie facaise siño uaido naimie oretagano cai Nama Jesús jilluana llofueuidimaci.

Iemona cominidi naimacina: “Mare” raitimaci. Nagarui Jusiñamui naimacina eo canode. <sup>34</sup> Naimaci dine buna buena jaca jitaiñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, <sup>35</sup> Cristo oretaganomo fecadimaci.

Ie mei dueredinomo imaci jitailla isoi fecauidimaci. <sup>36</sup> Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie. <sup>37</sup> Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

## 5

### *Ananías micori ie ai micori diga Jusiñamuina jifuia rafue*

<sup>1</sup> Naie facaise Ananías ie ai diga iaimaiai eniruena jiai fecade. Ie ai mamecidi Safira. <sup>2</sup> Naie iba naimiemo dabeí fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona.

<sup>3</sup> Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreñomo taino llotio, dabeí ucube omo fiebilla jira. <sup>4</sup> Enirue nia fecañenia, nia oie. Fecaja mei, naie ucubedi nia oie. ¿Bue

ñellena o comecina maraiño facadio? Cominimo taino llotio. Jusiñamui tainona jiai llotio.

<sup>5</sup> Ananías bie uaina cacajano ieconi fiodaillamona oni caide. Nana iena ciodio eo jacinaitimaci. <sup>6</sup> Iemei nainomo ite conirueniai naimiena feridimaci. Jino uillano, raiafomo jonetimaci.

<sup>7</sup> Naie rafue daje amani horas illanona, naimie ai ie inimo suide rafuena uiñoño bite. <sup>8</sup> Pedro naiñaiño jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

<sup>9</sup> Pedro jicanote:

—¿Bue ñellena Jusiñamui Joreño jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

<sup>10</sup> Naimie ecimo ieconi naiñaiño fiodaillamona, oni caide. Conirueniai fo billano, naiñaiño fiodaillana cioidimaci. Jino uillano, ie ini abimo dafomo jonetimaci. <sup>11</sup> Iena fidiamona, nana creyetai eo jacinaitimaci. Nana bie rafuena fididinodi jiai eo jacinaitimaci.

*Cristo oretagano ailluena siño rafuena finodimaci*

<sup>12</sup> Comini motomo Cristo oretaganodi ailluena siño rafuena finoidimaci. Naie facaise nana naimacidi Jusiñamui jofomo Salomón micori finotaga jofo abi ibirimo ofisoidimaci. <sup>13</sup> Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

<sup>14</sup> Jaciruitimaci; iadedi creyentiaina ailluena comini jaidimaci. Ailluena iñiai, ailluena riñoniai, diese creyentiaina jaidimaci. <sup>15</sup> Imaci biramo duidinona jonecaida, naisomo atidimaci. Pedro nainomo macarillano, o lloti naimie joreño naimacimo ibaillamona, “Jillobitica” raillano, atidimaci. <sup>16</sup> Jerusalémo ie fuemo ite nairaiamona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoidimaci.

*Cristo oretagano duere sefuilla rafue*

<sup>17</sup> Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci. <sup>18</sup> Eo uradoillamona, Cristo oretaganona gaitajano, cárcelmo jonetimaci. <sup>19</sup> Naiona Jusiñamui jaienicidi cárcel nasena econote. Cristo oretagano jino atiano, naimacina raite:

<sup>20</sup> —Jusiñamui jofomo mai abido jai. Cominimo Jusiñamui dine naimaci ille rafuena llono.

21 Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiana oretate, Cristo oretaganona atillena. 22 Cárcelmo jaidemo, naimacina cioiñedimaci. Abido billanona, llotimaci:

23 —Cárcel ie nase jaca ibaicana ciodicai. Raise llaveca. Nase fuemo jaca soldaduai itimaci; iadedi econoticaimo, jaca buna cioiñedicai.

24 Jusiñamui jofo nanoca sedaraima, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Nie isoide rafue naimacimo jai suide?”

25 Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

26 Iena cacajano, Jusiñamui jofo nanoca sedaraima ie policias diga jibuisaide. Cristo oretaganona atide. Fecuisse atide, comini dinena policiaiana noficiado fairinoi raillano. 27 Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

28 —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabia, “Cai illaicomini Jesúna meinetimaci” llotomoi.

29 Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina inoiacadicai. 30 Cai usumatiai micoriai Jusiñamuina sedauidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei, 31 Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaramana naimiena jiai jai itatate. Cai judíuai comini comeciai iuai meidollena, naimaci jeacinuai dotallena, iese naimiena itatate. 32 Bie rafuena llofuecabiticai. Jusiñamui Joreño uaido iena jiai llofueticai. Jusiñamuina inotonomo Jusiñamuidi ie Joreño jai fecade —raite.

33 Iena cacajano, illaicomini eo iciritimaci. Cristo oretaganona meineiacadimaci; 34 ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina inotimaci. Cristo oretaganona dallu bai oni oretajanona, naimie llote:

35 —Caimaci, omoi bie cominimo omoi finolle rafuemo comeciaina raise faca. 36 Jai Teudas micori illaimana jaiacade. “Jai uaina baitimiedicue” raillano, naimie dibeimo cuatrocientos inñiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. 37 Naimie micori illa mei, comini mameciaina

cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. <sup>38</sup> Ie jira ja omoimo lloiticue: Bie cominina fainonocai. Jamai cominimona naimaci llogacino iade, jamai cominimona naimaci finuacino iade, ieconi duite. <sup>39</sup> Jusiñamuimona bie rafue ia, jaca niese nibaiñeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie lluana feiñuano, <sup>40</sup> Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; <sup>41</sup> iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” railano, caimare jaidimaci. Jusiñamui naie facaise naimacina riidoñena jira, jiai caimare itimaci. <sup>42</sup> Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

## 6

*Creyentiaina canollena, siete digamie diáconuaina illena, fetua rafue*

<sup>1</sup> Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci. <sup>2</sup> Ie jira naie doce oretaganodi creyentia danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai fainonocaiadedi, maraiñede. Ra jamai cai fecaiadedi, jiai maraiñede. <sup>3</sup> Ie jira, amatiai, omoimona siete digamiena fetu. Inoganona fetu. Jusiñamui Joreño nana começimo namatadinona fetu. Eo abi uiñotinona fetu. Ie isoide iñiaina fetu. Bie ra fecarainina maijiritimaci. <sup>4</sup> Ie mei cai abi juarenite, Jusiñamuimo cai jillena, Jusiñamui uaina cai llofuellena.

<sup>5</sup> Nana cominidi:

—Jee —raitimaci. Esteban micorina fetodimaci. Naimie Jusiñamuina eo inote. Jusiñamui Joreño nana naimie começimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina inote. <sup>6</sup> Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

<sup>7</sup> Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

### *Esteban micori ie rafue*

<sup>8</sup> Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. <sup>9</sup> Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; <sup>10</sup> iadedi naimaci uaitalle uaidi iñede. Naimacimo Esteban uai isoidiuidi iñede. Jusiñamui mona ie uaina ua jira, Esteban abina uiñuano ñaite. <sup>11</sup> Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicai. Naimiedi Jusiñamui jinafomo jeare ñaiana jiai cacadicai.

<sup>12</sup> Iese llumona, comini comeciaina feidocana jaidimaci. Illaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci. <sup>13</sup> Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. <sup>14</sup> Naimiedi Jesús bie jofona judaillena llote. Moisés micori caimo llogafuiai fainonocaillena jiai llote. Iena cacadicai.

<sup>15</sup> Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

## 7

### *Esteban micori abi riidua rafue*

<sup>1</sup> Jusiñamui diga nanoca ñairaima Esteban micorimo jicanote:

—¿Ua ie isoi naimaci llucacino ite?

<sup>2</sup> Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano <sup>3</sup> llote: “O eniruemonai mai jai. O cominimona mai jai. Omo cue acatalle eniruemo jaitio”. <sup>4</sup> Ie jira Caldea railla eniruemonai naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa

eniruemō Jusiñamui naimie micorina oretate. <sup>5</sup> Nainomō rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiamo fecajiticue” jiai llote; iadedi naie facaise Abraham micori uruenide. <sup>6</sup> Jusiñamui jiai llote: “O uruiai jiaie comini eniruemō jaianiitimaci. Egiptomō jaianiitimaci. Naimacina duere finoitimaci. Cuatrocientos años legi cacajitimaci. <sup>7</sup> Naimacina maijitaite nairaina duere finoiticue. Ie mei o uruiai naie eniruemona biitimaci. Bie illanomō cuemo iobillacinona fecajitimaci” llote. <sup>8</sup> Ie cominina naimaci jaillena, Jusiñamui Abraham micorimo isaiai diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

<sup>9</sup> 'Caimaci, José micorina Jacob micori uruiai micoriai uradoillamona, Egipto cominimo naimiena fecadimaci; <sup>10</sup> iadedi Jusiñamui naimiena eo sedade. Ie legi ie cacajamona naimiena jillotate. Naimiemo uñoracinona fecade. Ie jira Faraón micori naimiena jiai gaide. Faraón micoridi Egipto illaima. Ie muidona Faraón Joséna fetode, nana Egiptomō itinona sedallena. Ie jofona jiai sedatate. <sup>11</sup> Naie facaiseconi nana Egipto comini aime guitimaci. Canaámo Jacob micori illanona, nana nainomō itino diga aime jiai guite. Eo duere sefuidimaci. Cai usumatiai micoriai naimaci illanomō guillena baiñedimaci. <sup>12</sup> Egiptomō guille illana Jacob micori fidiano, guille ollena, nano facaise ie uruiai micorina nainomō oretate. <sup>13</sup> Ie mei José ie amatiaina naimiena uñotade. Faraón di José comini illana fidide. <sup>14</sup> Ie jira José di ie moonā uaidote. Nana ie cominina uaidote. Setenta y cinco digamie ite. <sup>15</sup> Ie jira Egiptomō Jacob micori jaide. Nainomō fodaite. Ie uruiai micoriai nainomō jiai fodaitimaci. <sup>16</sup> Siquem railla nairai illanomō naimaci comini naimaci micoriaina uillano, nofici ie raiafomō jonetimaci. Siquemmo Abraham micori naifona Emmor uruiai micoriaimona jaie ibade.

<sup>17</sup> 'Caimaci, Jusiñamui Abraham micorimo lloga rafue suille iairei illa facaiseconi, Egiptomō cai comindi eo jebuidimaci. Abraham micorimo: “Egiptomona o uruiai biitimaci” Jusiñamui jaie llote. <sup>18</sup> Naie facaise jiaie illaima Egiptona sedade. José micorina uñoñede. <sup>19</sup> Ie jira cai cominina jifuiano maijitauide. Uruiai fodaillena, naimacina imaci uruiaina fañonocaitate. <sup>20</sup> Ie facaiseconi Moisés micori jeiciga. Jusiñamui naimie micori eo ebire eruaide. Ie moo jofomō daje amani fivui ite. <sup>21</sup> Ie mei naimiedi fañonocaiga.

Faraón jisa micoridi naimie micorina uanona, naiñaiño jito isoi naimie micorina uiucaide. <sup>22</sup> Naimie micori nana Egipto comini uiñuacinona fueote. Illaina uai isoi naimie uaidi ite. Eo abina uiñotimie.

<sup>23</sup> 'Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judíuai comini. <sup>24</sup> Egipto imiemona damie llegi cacajana ciuano, naimiena riidote. Riiduanona, Moisés micoridi Egipto imiena meinete. <sup>25</sup> Moisés micori comecina facade: "Cue muidona Egiptomona Jusiñamuidi cue cominina ore-taite". "Cue comini biena uiñotimaci" raillanona comecina facade; ie iadedi iena uiñoñedimaci. <sup>26</sup> Ie arediruido Moisés micoridi mena come iaimaiái fuirillana ciode. Iaimaiaina marena itataiacade. Raite: "¿Bue ñellena conimana duere finoacadómico? ¿Bue ñellena o come diga fuiridómico?" <sup>27</sup> Duere finoacadimie naimiena oni ñuitade. Jicanote: "¿Bu odi cai illaimana jonegao? ¿Bu caimo ona llotatate juez isoi?" <sup>28</sup> ¿Na are Egipto imie o meinia isoi cuena jiai meineiacadio?" <sup>29</sup> Iena cacajano, come fajana naimie llinua jira, jacinaiñanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

<sup>30</sup> 'Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. <sup>31</sup> Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote: <sup>32</sup> "O usumatiai imaci Jusiñamuidicue. Abraham, Isaac, Jacob, imaci Jusiñamuidicue" llote. Jacinaillanona Moisés micori abi docaide. Jaciruillanona, erodañede. <sup>33</sup> Jusiñamui naimiena raite: "Jamai bue o isoilla jira, o zapatona duiño. Benomo cue illa jira, o naidaillanodi eo mareno. <sup>34</sup> Egiptomo cue comini llegi cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue" llote; <sup>35</sup> iadedi comini dinena Moisés micorina jaie jitaiñenamona, naimiena raitimaci: "¿Bu illaimana odi jonegao? ¿Bu o juezna jonegao?" Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate. <sup>36</sup> Egiptomona Moisés naimacina atide. Egiptomo nia ia, diga siño rafuena finode. Jiairede monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

<sup>37</sup> 'Caimaci, Moisés micoridi cai judíuai cominimo llote: "Omoimona Jusiñamuidi damiena ie rafue lloraimana ico

oretaite, naimie cuena oretaja isoi”. <sup>38</sup> Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote; <sup>39</sup> iadedi cai usumatiai micoriai naimiena inoiacaiñedimaci. Naimiena jitaiñedimaci. Egiptomo abido jaillemo naimaci comeciai facadimaci. <sup>40</sup> Ie jira comini dinena Aarón micorimo llotimaci: “Egipto eniruemono Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruaide jiraraina fino, Egiptomo abido caina ifollena”. <sup>41</sup> Iemo jurareta urue joreñona finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. <sup>42</sup> Ie jira Jusiñamui naimacimona oni jaillanona, naimacina fainonocaide. Iemono jitomana sedaudimaci. Fivuina jiai sedaudimaci. Ucuaina jiai sedaudimaci. Jusiñamui rafue lloraíma ie rabenicomo buena jaie iese cueda:

Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiaí fecañedomoi;

<sup>43</sup> iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baífemo omoína oretaiticue”

cueda. Naie facaise cai usumatiai micoriai Jusiñamuina jitaiñedimaci.

<sup>44</sup> Caimaci, bie rafuena cai fueollena, cai usumatiai micoriai motomo Jusiñamui illana lloticue. Jofue iñenanomo cai usumatiai micoriai motomo daje jofo aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cueda noficidi naicomo eenoga. <sup>45</sup> Josué diga bie eniruemo naimaci billa facaise, cai usumatiai micoriai naicono atidimaci. Bie enirue jiaie nairaiamo jainaiaide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. <sup>46</sup> Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: <sup>47</sup> ia Salomón micoridi jofona Jusiñamui iena finode; <sup>48</sup> iadedi Jusiñamuidi iima finoca jofomo i-iñede. Jusiñamui facaina lloraíma micoridi Jusiñamuina iese cuede:

<sup>49-50</sup> Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.



<sup>51</sup> 'Ero, omoi comeciai jaiãirede. Omoi comeci ñnoñede. Jefonidomoi isoidomoi. Ie jira Jusiñamui Joreño anamo iacañedomoi. Omoi usumatiai micoriai isoi itomoi. <sup>52</sup> Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. <sup>53</sup> Jusiñamui jaienciai mona Moisés micori llogacinona feiñotomoi; iadedi iena ñnoñedomoi.

### *Judúuai Esteban micorina meinia rafue*

<sup>54</sup> Esteban llofuiana naimaci cacajano, eo iciritimaci. Icirillamona, isiduai muru-muru raite. <sup>55</sup> Jusiñamui Joreño nana Esteban micori comecimo namatajamona, monamo eruaillano, naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode. <sup>56</sup> Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

<sup>57</sup> Esteban lluaana cacajano, jefo oroisite. Eo cuiriillano, naimie dine aisicaidimaci. <sup>58</sup> Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside. <sup>59</sup> Estebana nofici diga fairinuano, Estebadi Jusiñamuimo ado jüide:

—Cue Nama Jesús, cue joreño feiño.

<sup>60</sup> Ieconicaiñici ifodo rainadacaida ado jüide:

—Naimaci bie jeacino finua muidona, ibana oñeno.

Iese naimie jüia mei, fiodaite.

## 8

### *Saulo creyentiaina duere finua rafue*

<sup>1-2</sup> Saulo dinena Esteban meiniana jiai jitaide. Cristo rafuena eo ñnotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiai duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jaiñodi Samaria railla eniruemo jaidimaci; iadedi Cristo oretagano nine jaiñedimaci. <sup>3</sup> Ie facaiseconi Saulodi creyentiaina eo duere finode. Diga jofomo jamai jaillano, ññiaina gaitade, cárcelmo jonellena. Riñoniaina jiai gaitade.

### *Felipe Samariamo illa rafue*

<sup>4</sup> Tuficaida jaidino naga illanomo Jesús rafuena llocana uitimaci. <sup>5</sup> Samariamo Felipedi daje nairaimo jaide. Nainomo Cristo rafuena llofueuide. <sup>6</sup> Ailluena cominidi Felipe llofuiana eo raise feiñotimaci, naimie siño rafuena finua jira. <sup>7</sup> Felipedi diga jananiai anamo ite cominimona jananiaina oretate. Raire

cuirioillano, jaidimaci. Ailluena tisitaitinona jillotate. Ailluena ñuja-ñujacaidinona jiai jillotate. <sup>8</sup> Ie jira naie nairaimo ite comini eo iobidimaci.

<sup>9</sup> Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

<sup>10</sup> Nana comini naimiena inotimaci. Abina uiñoñedino inotimaci. Abina uiñotino jiai inotimaci. Raitimaci:

—Naimie uaidi Jusiñamui ie. Naimiedi siño jito —raitimaci.

<sup>11</sup> Iese naimacina are jifuate. Naimaci rajicailla jira, naimaci naimiena cacadimaci. <sup>12</sup> Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llote. Naimaci Felipe llofuiana inotimaci. Inuamona, Felipe naimacina bautizade. Iñiaina bautizade. Riñoniaina jiai bautizade.

<sup>13</sup> —Jiai inoticue —Simón di raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naiena ciuano, rajicaide.

<sup>14</sup> Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiaí Juan diga, batine oredimaci. <sup>15</sup> Iaímaiaí rillano, naimaci Jusiñamui Joreña feiñollena Jusiñamuimo jidiáimaiaí, <sup>16</sup> naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreña nia feiñoñedimaci. <sup>17</sup> Ieconí iaímaiaí onolli naimacimo joniano, Jusiñamui Joreña feiñotimaci.

<sup>18</sup> Naimaci Jusiñamui Joreño feiñuana Simón di ciuano, ucubena iaímaiaímo fecaacade. <sup>19</sup> Raite:

—Cuemo omico uaina ine, bumo cue onollina cue joniamona, naimie Jusiñamui Joreña feiñollena.

<sup>20</sup> Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadío; iadedi Jusiñamui naiena jamai fecade. <sup>21</sup> Bie rafuedi omo duiñede. Jusiñamuimona o comeci nia marañede. <sup>22</sup> O comeci iuai meido. Naimie o comecimo ite marañede facajacinuaina oni dotallena, cai Namamo jica. <sup>23</sup> Omo ailluena marañedicino illana uiñoticue. O comeci eo uradoide. Marañedicinona o comecimo namaredío.

<sup>24</sup> Simón uai ote:

—O llua cuemo suiñellena, o Nama diga cue facaina ñaino.

<sup>25</sup> Cristo rafuena iaímaiaí llua mei, Jerusalémo abido bitiaímaiaí. Abido billano, Samariamo diga comini illanuaimo Jesús ie mare rafuena llocana bitiaímaiaí.

*Etiopía imie creyentena jailla rafue*

<sup>26</sup> Naie facaise Jusiñamui jaienisaimona damie Felipemo llote:

—Beicido joide naído mai jai. Jerusalémona Gazamo joide naisona jai —llote. Naie naiso jofue iñenanodo joide. <sup>27</sup> Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuiude. Naiñaiño mamecidi Candace. Naimiedi nana naiñaiño go-bierno ucubena sedade. <sup>28</sup> Naimie jai abido jaillano, ie carretamo raita, Isaías micori cuega rabenicono ado facade. <sup>29</sup> Jusiñamui Joreño Felipemo llote:

—Naimie dine iaiei jai. Carreta dine jai.

<sup>30</sup> Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uiñotio?

<sup>31</sup> Naimie uai ote:

—¿Niese uiñoiticue, bu cuena canoñenia?

Felipemo jicanote, naimie diga a jaillano danomo raillena.

<sup>32</sup> Naimie facaca cuegafue iese raite:

Toica llauda fallena uilla isoi, naimiena uitimaci.

Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

<sup>33</sup> Maraiñede rafuena naimie finoñede; ia naimiena duere finodimaci.

Naimie uruai iñededí, ¿bu naimie rafuena lloite?

Meinia meinoconi, naimie jai iñede.

<sup>34</sup> Etiopía imie Felipemo jicanote:

—¿Bie lloraíma bu iena llote? ¿Dama naimie iena llote? ¿Jiaimiena iena llote? Cuelo llono.

<sup>35</sup> Iemei Felipedi bie cuegafuiamona naimiemo Jesús ie mare rafuena llote. <sup>36</sup> Naisona jaidiaímaiaímo, jinui illanomo ridiaímaiaí. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

<sup>37</sup> Felipe uai ote:

—O comecimona o ñinoia, cuemona mare.

Naimie uai ote:

—Jesucristodí Jusiñamui Jitonana ñnoticue.

<sup>38</sup> Naimie ie carreta jorodate. Iemei jinui dine jaidiaímaiaí. Felipedi naimiena bautizade. <sup>39</sup> Jinuimona iaímaiaí bia, Jusiñamui Joreño Felipeña oni uite. Etiopía imie Felipeña dane cioñede; iadedí Etiopía imie iobicana jaide. <sup>40</sup> Jusiñamui Joreño Azotomo Felipeña uite. Cesarea dine naimie jaillanona, naga nairaíamo Jesús ie mare rafuena llocana uite. Ie mei Cesareamo ride.

## 9

*Saulo creyentena jailla rafue*  
(Hch 22.6-16; 26.12-18)

<sup>1</sup> Naie facaise Saulo cai Nama Cristona ñnotinona eo duere finoacade. Icirillamona, naimacina meineiacade. Ie jira Jusiñamui diga nanoca ñairaima dine jaide. <sup>2</sup> Judíuai comini naie ñairaima anamo illamona, creyentiaina duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. ñiñiai baia, riñoniai baia, naimacina Jerusalémo atiacade. <sup>3</sup> Cartana ua mei, naimie jaillano, Damascomo iaie ia, ieconi monamona damie naimie abina quetiñote. <sup>4</sup> Eniruemo naimie ana uaillano, monamona damie naimiemo llwana cacade:

—Saulo, Saulo, ¿bue ñellena cuena duere finodio?

<sup>5</sup> Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadío. <sup>6</sup> Naidacai. Damascomo mai jai. Nainomo o finolle rafue omo lloitícue.

<sup>7</sup> Saulo diga jaidinodi ñaiñeno naidaidimaci. Naie uaina cacadimaci; iadedi buna cioiñedimaci. <sup>8</sup> Ieconi Saulo naida-caide. Ie uisi ecoricaillamona, erodatemo, jai buena cioiñede. Ie onollina llinocaida, naimiena Damascomo uitimaci. <sup>9</sup> Darui amani cioiñede. Jusiñamuimo comecina facajamona, guiñede. Jiai jiroñede.

<sup>10</sup> Damascomo Ananíana mameciredimie ite. Naimiedi creyente. ñiñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene itícue.

<sup>11</sup> Cai Nama Cristo naimiemo llote:

—Naidacai. Atona joide railla naisona jai. Judas ie jo-fomo jai. Naicomo Tarso ie Saulona jicano. Naimie cuemo jai jüde. <sup>12</sup> Naimie damiena jai nicairite isoide. Ananíana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

<sup>13</sup> Ananías uai ote:

—Nama, diga cominimona naimiena fididicai. Jerusalémo naimiedi marañede rafuena ona ñnotinomo finode.

<sup>14</sup> Jusiñamui diga nanoca ñairaima uai naimiemo ite, nana bene ite creyentiaina gaitallena.

<sup>15</sup> Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena. <sup>16</sup> Cuena naimie jai inua muidona, naimie nie isoi leggi cacajite. Naimiemo iena lloiticue.

<sup>17</sup> Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

<sup>18</sup> Ieconí Saulo uisimona lliciai ico isoide ra uaide. Dane ciuana, naidaide. Ie mei jai bautizaga. <sup>19</sup> Ie mei jai guite. Dane mairide. Diga irui Damasco ite creyentiai diga naimie ite.

### *Damascomo Saulo illa rafue*

<sup>20</sup> Judíuai ofiracomo naimie jaillanona, Jesús ie rafuena llofue. “Jesúdi Jusiñamui Jito” raillanona llofue.

<sup>21</sup> Nana naimiena cacadinodi rajicaide. Raitimaci:

—Bimie Jerusalémo Jesúsna inotinona duere finouide. Naimicina gaitallena, Jusiñamui diga nanoca ñairainimo uillena, naimie bene bite; ia Jesús dibeimo jai ite.

<sup>22</sup> Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofuia jira, judíuai dinena iena uaitanidimaci.

<sup>23</sup> Digarui illa mei, judíuai comeciaina facadimaci, naimiena meinellena. <sup>24</sup> Naimie aisi raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, <sup>25</sup> naiona creyentiai naimiena oni uitimaci. Naimie jillobillena, llaigafó jinofebeimo cirigaimo rainajanona, naimiena ana ñuitadimaci.

### *Jerusalémo Saulo illa rafue*

<sup>26</sup> Jerusalémo naimie jaide. Naimie ria, creyentiaina nabaicade; ia naimiena jaciruitimaci. Creyentena naimie jaillana inoñedinomaci. <sup>27</sup> Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo llua jiai llote. Damasco naimie ia, Jesúsna jacitaiñeno llofuiana jiai llote. <sup>28</sup> Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. <sup>29</sup> Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci. <sup>30</sup> Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

<sup>31</sup> Judeamo, Galileamo, Samariumo nana creyentiai uri itimaci. Cai Namana inocana jaidimaci. Cai Namana jaciruiocaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaina jaidimaci.

### *Eneas jillua rafue*

<sup>32</sup> Naie facaise diga illanuaimo Pedro macarite. Lidamo ite creyentiai dine ride. <sup>33</sup> Nainomo damie biramo bidenaciode. Naimiedi Eneas. Ocho años tisitailamona bide. <sup>34</sup> Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O bira feri. —Iecon naimiedi naidadate. <sup>35</sup> Nana Lidamo ite comini, nana Sarónmo ite comini diga, naimiena jilluana ciuanona, creyentiaina jaidimaci.

### *Fiodaillamona Dorcas jillua rafue*

<sup>36</sup> Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. <sup>37</sup> Naie facaise naiñaiño duicotaide. Ie mei fiodaite. Naimaci einamací finua isoi, ie nabaiñiai naiñaiño abina jocodimaci. Iemei aneba ie cuartomo naiñaiño na jonetimaci. <sup>38</sup> Lidamona Jope iaie ite. Pedro Lidamo creyentiai illana fidiano, menamie naimie dine oredimaci. Iaimaiaina llotatatimaci:

—Buena sedañoeno cai dine raie bi.

<sup>39</sup> Ie jira Pedro naidacaida, naie iaimaiaia diga jaide. Naimie ria, aneba ie cuartomo naimiena uitimaci. Nana feciñuai Pedro ecimo ecana naidaidimaci. Dorcas finouiga iniroina naimiemo acatatimaci. <sup>40</sup> Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raia, Jusiñamuimo jide. Abido dobaicaida, naiñaiño ero date. Raite:

—Tabita, mai rainaicai.

Iecon naiñaiño uisi oni erodate. Pedrona ciuano, a rainadate. <sup>41</sup> Naiñaiño onolli llinuanona, a naidanete. Ie mei Pedrodi feciñuaina, jiaie creyentiai diga, uaidote, naiñaiño jai cajenana naimaci ciollena. <sup>42</sup> Nana Jopemo ite comini naie rafuena fididimaci. Ie jira ailluena comini cai Namana inotimaci. <sup>43</sup> Jopemo Pedro diga irui Simón jofomo ite. Simóndi ocaina igoina cuidoraíma.

## 10

### *Cornelio comeci iuai meidua rafue*

<sup>1</sup> Cornelio raillamiedi Cesareamo ite. Naimiedi capitán. Italiamona bite soldaduai naimie anamo itimaci. <sup>2</sup> Naimiedi Jusiñamui llogacínodo jaide. Nana ie comini diga Jusiñamuina

¶note. Judíuai cominimo ailluena rana jamai fecauide. Jusiñamuimo jñuide. <sup>3</sup> Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

<sup>4</sup> Naimiena Cornelio jaciruiocaida eruaide. Jicanote:

—Nama, ¿buena jitaidio?

Naimie uai ote:

—Jusiñamui o jñacinuaina jai cacade. Jusiñamuidi duerede cominina o canuana jiai feitañede. <sup>5</sup> Mai, Jopemo damerie o mullaiaimona oreta, Simón raillamiena atillena. Naimie jiaie mamecidi Pedro. <sup>6</sup> Naimiedi igoi cuidoraíma jofomo ite. Naie cuidoraíma mamecidi Simón. Monailai fuemo naimie jofo ite.

<sup>7</sup> Jusiñamui jaienicí jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai ¶note. <sup>8</sup> Nana naimiemo Jusiñamui jaienicí lluana naimacimo llua mei, Jopemo oretate. <sup>9</sup> Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jñillena. <sup>10</sup> Naimie aimetaite. Guiacade. Guillena comini finodemo, naimiemo nicairilla isoi ite. <sup>11</sup> Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite. <sup>12</sup> Naiemo jiaiforie eruaide ocainaiai ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite. <sup>13</sup> Naimiedi monamona damie lluana cacade:

—Pedro, naidacaida, fajano, buena rino.

<sup>14</sup> Pedro uai ote:

—Nama, dama ite. Moisés micori fimaidoga rille rana jaca riñedicue.

<sup>15</sup> Monamona damie lluana dane cacade:

—Jusiñamui jai fimaidoñede. Ie jira iese lloñeno.

<sup>16</sup> Dacaiño amani iese suide. Ie mei naie radi monamo abido jaide.

<sup>17</sup> Pedro ie comecina facade: “¿Ñiese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride. <sup>18</sup> Simón Pedrona naie jofomo illana jicanotimaci. <sup>19</sup> Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode. <sup>20</sup> Naidacaida, ana jai. Naimaci diga buena sedaño mai jai. O dine naimacina oredicue.

<sup>21</sup> Pedrodi comini dine ana jaide. Raite:

—Omoi jenocamedicue. ¿Bue ñiaibitomoi billa?

<sup>22</sup> Uai otimaci:

—Cornelio raillamie anamo iticai. Corneliomo Jusiñamui jaienicí birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina innotimie. Nana judíuai comini dinena naimiedi mareuidimie.

<sup>23</sup> Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiaí naimie diga jiaí jaidimaci. <sup>24</sup> Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiaí jiaí jai uaidote. <sup>25</sup> Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecalena. <sup>26</sup> Pedrodi naimiena a naidanete. Raite:

—Mai a naidada. Cue jiaí jamai imadicue.

<sup>27</sup> Naimie diga ñaiano fo jaidiaímaiaí. Ailluena comini ofillana ciode. <sup>28</sup> Naimacimo llote:

—Moisés micorí judío imie judíuñedimie nabairillana rairuide. Iena uiñotomoi. Judíuñedimie jofomo illana jiaí rairuide. Ie areruido Jusiñamui nicairilla isoidifuenta cuemo acatate. Iemona jai fueoticue. Jiaíe nairai diga cue nabairillena, Jusiñamuimona marenana jai uiñoticue. Jusiñamui omoína cue jearuillana jai jitaíñede. <sup>29</sup> Ie jira buena sedañoeno biticue, cuena o uaidua jira. ¿Bue ñellena cuena uaidotomoi? Cuemo lloño.

<sup>30</sup> Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jidicue. Ieconí Jusiñamui jaienicí cuemo bairede. Naimie iniroí quenirede. <sup>31</sup> Cuena raite: “Jusiñamui o jiaiana cacade. Naimiedi duerede cominina o canuana feitañede. <sup>32</sup> Ie jira Jopemo damieriena oreta, Simón Pedrona uaidollena. Jiaíe Simón jofomo ite. Simóndi igoí cuidoraíma. Ie jofo monaillai fuemo ite”. <sup>33</sup> Iemona ona uaidoticue. O comei marena jira, bene bitío. Jai nana bene iticai. Jusiñamui cai diga jiaí ite. Cai Nama nana omo lluaña cacareillena, bene iticai.

### *Corneliomo Pedro llua rafue*

<sup>34</sup> Pedro uai ote:

—Jusiñamui nana comini naimie inuana jitaillana jai uiñoticue. <sup>35</sup> Naga nairaimona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide. <sup>36</sup> Cai judíuai cominimo Jesucristo llumona, Jusiñamui dibeimo cai illena jai uiñoticai. Iemona Jusiñamui diga cai uri illana jai jiaí uiñoticai. Jesúsdi nana cai Nama. Bie rafuena navui janore fididomoi. <sup>37</sup> Nana Judeamo bie rafue llocana jai jaide. Juan micorí bautizajana llua mei, Galileamo Jesús naimie llofuiana tainede. <sup>38</sup> Jusiñamuidi ie



Joreñona Jesúmo fecade. Jesúdi Nazaret imie. Naimiemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. <sup>39</sup> Judíuai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; <sup>40</sup> iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiai ciodicai. <sup>41</sup> Nana comini naimiena cioiñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uñua jira, Jusiñamui caina fetode, naie rafuena lollena. <sup>42</sup> Cominimo bie rafuena lluaana caimo llote. Jusiñamui Jesúna jai fetode, naimiena ñnoñedinona duere finollena. Nia fiodaiñedinona duere finoite. Jai fiodaitinona jiai duere finoite. Ie jira Jesús rafuena llocana jaidicai. <sup>43</sup> Jesús muidona naga naimiena ñnotimie ie maraiñedicinodi Jusiñamui dotalle. Iena nana Jusiñamui facaina lloraini micoriai jaie llotimaci.

### *Judíuaiñedino Jusiñamui Joreñona feiñua rafue*

<sup>44</sup> Pedro biena nia llofueia, Jusiñamui Joreño nana bie rafuena cacadinomo bite. <sup>45</sup> Iena ciuanona, Pedro diga bite creyentiai rajicaidimaci. Naimacidi judíuai comini. Judíuaiñede cominimo Jusiñamui ie Joreño jai fecaja jira, rajicaidimaci. <sup>46</sup> Jusiñamui Joreño naimacimo illamona, judíuaiñedinodi jiaie nairai uailaido ñaitimaci. Naie ñaia uailaina uñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

<sup>47</sup> —Cai feiñua isoi, Jusiñamui Joreñona jiai feiñotomoi. Omoi bautizallena jaca budi rairuiñeite.

<sup>48</sup> Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

## 11

### *Jerusalémo Pedrodi naimiemo jai suide rafuena llote*

<sup>1</sup> Judeamo ite Cristo oretagano, jiaie creyentiai diga, judíuaiñede comini Jusiñamui uaina feiñuana fididimaci. <sup>2</sup> Pedro Jerusalémo abido ria, judíuai comini naimiena icidimaci. <sup>3</sup> Jicanotimaci:

—¿Bue ñellena judíuaiñedino jofomo jaidio? ¿Bue ñellena naimaci diga guitio?

<sup>4</sup> Pedro uai uanona, naimacimo naie rafuena nagacinuaina llote:

<sup>5</sup> —Jopemo navui cue ia, Jusiñamuimo cue jüia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. <sup>6</sup> Nainomo eruaidicue, diga rana ciodicue: ocainaiaina, eniruemo jorocana jaidinona, nuicinaiaina. Iena ciodicue. <sup>7</sup> Monamona damie cuemo llwana cacadicue. Raite: “Pedro, naidacaillanona, fajanona, rino”. <sup>8</sup> Naie uai oticue: “Nama, dama ite. Moisés micori fimaidoga rille rana jaca riñedicue”. <sup>9</sup> Monamona dane cuemo llote: “Jusiñamui iena jai fimaidoñede. Ie jira iese lloñeno”. <sup>10</sup> Dacaiño amani iese suide. Ie mei monamo nana abido dane jaide. <sup>11</sup> Ieconí daje amani iima cai illa jofomo ridimaci. Cesaremona cue dine damie naimacina orede. <sup>12</sup> Jusiñamui Joreñodi naimaci diga buena sedaño cuo jaillena cuemo llote. Cue diga seis creyentiai jiai jaidimaci. Cuena uaidotimie jofomo jaidicai. <sup>13</sup> Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienicí naimiemo llote: “Jopemo cominina oreta, Simón Pedrona atillena. <sup>14</sup> O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. <sup>15</sup> Nainomo cue llofua facaiseconi, nano dofoconi caimo billa isoi, Jusiñamui Joreño naimacimo bite. <sup>16</sup> Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreña birui feiñoitomo”. <sup>17</sup> Cai Nama Jesucristona cai inuamona, Jusiñamuidi ie Joreña caimo navui fecade. Naimacimo daje isoi birui fecademo, ¿niese Jusiñamui díbeimo iñeiticue?

<sup>18</sup> Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuaiñede comini comeciai iuai meiduana jai jitaide. Naimie díbeimo naimaci illana jai jitaide. Ie jira naimieri iobidicai.

### *Antioquíamo ite creyentiai illa rafue*

<sup>19</sup> Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuai cominimo naimaci rafuena llotimaci; <sup>20</sup> iadedi tuficaidinomona jaino Chripremona billanona, Cirenemona billanona, Antioquíamo rillano, judíuaiñedinomo cai Nama Jesús rafuena llotimaci. <sup>21</sup> Cristo uai naimacimo illamona, ailluena comini inotimaci. Cai Nama díbeimo jaidimaci.

<sup>22</sup> Jerusalémo ite creyentiaí iena fidiano, Antioquíamo Bernabéna oretatimaci. <sup>23</sup> Naimie ria, naimaci marena illamona, naimiedi Jusiñamui naimacina dueruillana uíñote. Ie jira iobide. Imaci comeciái ocuiñocana inocana jaillana naimacimo llote. <sup>24</sup> Naimiedi maremie Jusiñamui Joreño nana naimie comecimo namatadimie. Jusiñamuina eo inotimie. Naie facise ailluena comini creyentiaína jaidimaci.

<sup>25</sup> Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. <sup>26</sup> Daje año creyentiaí diga nabairillanona, naimacina llofuetiaímaiaí. Antioquíamo creyentiaídi cristianona nano mameciredimaci.

<sup>27</sup> Iemei Jerusalémona Antioquíamo damierie Jusiñamui rafuena lloraini bitimaci. <sup>28</sup> Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaímana illa faciseconi iese jai suide. <sup>29</sup> Ie jira Antioquíamo ite creyentiaídi, Judeamo ite creyentiaímo, ucubena oretaiacadimaci. <sup>30</sup> Nagamíai imacimo illa dierise ucubena oredimaci. Creyentiaína llofuerainimo Bernabé diga, iaímaiaí Saulo diga, naie ucubena oredimaci.

## 12

### *Herodes Agripadi creyentiaína duere finua rafue*

<sup>1</sup> Naie facise Herodes railla illaímadí creyentiaímona damieriena gaitatate, naimacina duere finollena. <sup>2</sup> Lloebi diga Jacobo cimaiona jaitatate. Jacobodi Juan ama. <sup>3</sup> Ieri judíuai illaícomini iobidimaci. Iena uíñuamona, Herodes Pedrona jiaí gaitatate. <sup>4</sup> Naie faciseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaína orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaidimaci. Naie llomenico guilla rafue fuilla mei, comini illa uicomo naimiena meineiacade. <sup>5</sup> Ie jira Pedro cárcelmo fiebide; iadedí creyentiaí naimie facaina eo jidimaci. <sup>6</sup> Herodes naimiena meineiacanarui naio Pedro soldaduai motomo inide. Mena lloeo diga maíga. Soldaduai cárcel nasena jiaí sedadimaci. <sup>7</sup> Ieconí caí Nama ie jaienici dí cárcelmo bairede. Cárcelmo lligaiñote. Naimiena casitallena, jaienici Pedro ciraigina jetade. Raite:

—Raíre naidacai.

Ie mei naimie onollimo ite lloeodí oni uaide. <sup>8</sup> Jaienici naimiena raite:

—O iniroina jita. O zapatona jiaí jita— Iena jitaja mei, naie jaienici dane raite—. O iniroi o abimo ferino. Cue diga mai bí.

<sup>9</sup> Naie jaienicí jinafona Pedro jino jaide. Pedrodi naie jaienicí naimiemo finoca rafuena uiñoñede.

—Nicaírilla isoi começina facadicue —raite. <sup>10</sup> Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiiaimaiai. Daje calle jaillanona, jaienicí naimiena faínonocaide. <sup>11</sup> Iemona Pedro naimiemo suide rafuena jai uiñoçaide. Raite:

—Cue Nama ie jaienicina uanai oretate. Herodemonona cuena jillobitade. Judíuai illaicomini cue meinellena cue sedajamona cuena jillobitade.

<sup>12</sup> Iena jai naimie uiñuano, María jofomo jaide. Mariadi Juan Marcos ei. Jusiñamuimo jillena, naicomo ailluena comini ofidimaci. <sup>13</sup> Rillanona calle fuemo ite nasena tute. Daje mullaíño bite. Naiñaiño mameçidi Rode. <sup>14</sup> Naimie uaid-uamona, naiñaiño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote. <sup>15</sup> Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

<sup>16</sup> Pedro nasena nia tua jira, nasena econuaibitimaci. Econuamona naimiena naimaci ciuamona, rajicaidimaci.

<sup>17</sup> Fo jaillano, Pedro ie onolli jaidide, naimaci lluçaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiamo iena jiai llono.

Ie mei Pedro jino jaillano, jiaínomo jaide.

<sup>18</sup> Monaidemo, Pedro nainomo iñena jira, soldaduai rajicaillanona, siadotimaci. <sup>19</sup> Herodes iena fidiano, naimiena jenotate. Naimiena baiñena, soldaduaímo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

### *Herodes micorí fiodailla rafue*

<sup>20</sup> Naie facaise Herodedi Tiro railla nairai ðiga, Sidón railla nairai ðiga, eo icirite. Naimaci uri ille rafuena siadollena, naimie ðine bitimaci. Herodes ecimo maijidiñedi Blasto. Blasto ðiga naie cominidi nabairite, naimaci ðibeimo naimie illena. Herodes eniruemona naimaci guille billa jira, uri illena naimiemo jicanote. <sup>21</sup> Naie cominina Herodes feiñollena, ie ebirede iniroina jítade. Naimacina feiñollena, ie rairabicimo raide. Iemona raita, rafuena are llote. <sup>22</sup> Iena cacajano, comini ado cuiridimaci:

—Jamai imadi ñaiñena. ¡Jusiñamui ñaia!

<sup>23</sup> “Jusiñamuiñedicue” naimie raiñena jira, ieconi cai Nama jaienicí naimiena iracotaitate. Jusiñamui mo iobillacino naimie fecañena jira, aiaí naimiena aite. Iemona naimiedi fiodaite.

<sup>24</sup> Naie facaiseconi Jusiñamui uai llocana jaide. Ailluena comini iena inotimaci.

<sup>25</sup> Iaímaiaí uiga ucube illanona, Bernabé, Saulo diga, Jerusalémona Antioquíamo abido bitiaímaiaí. Juan Marcos jiaí atidiaímaiaí.

## 13

### *Bernabéna, iaímaiaí Saulo diga, fetua rafue*

<sup>1</sup> Antioquíamo creyentiaí motomo Jusiñamui facaina lloraini itimaci. Llofueraini jiaí itimaci: Bernabé, Simón. Simóndi jiaíe mamecí Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enrue gobernador. Saulo jiaí ite. <sup>2</sup> Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaímaiaí Saulo diga fetu, cuejena. Cue rafuena iaímaiaí llolena, iaímaiaína jai fetodicue.

<sup>3</sup> Jusiñamui mo naimaci jiaí mei, Jusiñamui iaímaiaína fetuana naimaci uiñuamona, naimaci onolli iaímaiaímo jonia mei, iaímaiaína naimacimona oni oretatimaci.

### *Pablo, iaímaiaí Bernabé diga, Chipremo illa rafue*

<sup>4</sup> Iaímaiaína Jusiñamui Joreño oretaja jira, Seleuciamo jaidiaímaiaí. Nainomona botedo Chipremo jaidiaímaiaí. Chipredi uiasi. <sup>5</sup> Chipremo ria, Salaminamo judúuai ofiracuaimo Jusiñamui uaina llofuetiaímaiaí. Juan Marcos iaímaiaí diga jiaí jaide. <sup>6</sup> Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloraima. <sup>7</sup> Gobernador diga maijjuide. Gobernadori Sergio Paulo. Gobernadori abina uiñotimie. Jusiñamui uaina cacaacana jira, naimie Bernabé iaímaiaí Saulo diga uaidote. <sup>8</sup> Barjesús ie jiaíe mamecidi Elimas. Naie iaímaiaí llofuiana uaitate. Gobernador inuana jitaiñede. <sup>9</sup> Saulodi jiaíe mamecí Pablo. Pablo dinena naimiena eo eruailano, Jusiñamui Joreño nana Pablo comecimo namatajamona, <sup>10</sup> naimiemo llote:

—¡Eo jifueraimadio! ¡Eo maraiñedio! ¡Taife díbeimo itio! Nana mare rafue díbeimo iñedio. Cai Nama ie mare uanaicinona dobairaidodio. <sup>11</sup> Cai Nama ie uaido ona ja iracotaitaicue. Nano nigarui useredinona cioiñeitio.

Ieconí naimie cioiñede. Cominina jenuaide, ie onollido llinocaida ie uillena. <sup>12</sup> Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

*Jesús rafuena llocana jaidiiaimaiai*

<sup>13</sup> Pafomona botedo Pablo ie nabaiñiai diga jaide. Perge railla nairaimo ride. Perge Panfilia railla eniruemo ite. Juan Marcos iaimaiana fainonocaida, Jerusalémo abido jaide. <sup>14</sup> Pergemona Antioquíamo jaidiiaimaiai. Pisidia railla eniruemo Antioquía ite. Sábadoruimo judíuai ofiracomo jailano, ana raidiiaimaiai. <sup>15</sup> Moisés micorí ciegafuena facaja mei, Jusiñamui facaina lloraini micorí ciegafuena facaja mei, judíuai ofiraco sedadino iaimaiaimo llotimaci:

—Caimaci, cominimo bue omico lloiacania, mai lloño.

<sup>16</sup> Pablo naidadajano, ie onollina jaidide, comini llucaillena. Raite:

—Jusiñamuina sedallena bene itomoi. Omoimona damierie judíuidomoi. Jiaíno judíuaiñedomoi; iadedi judíuai isoi Jusiñamuina sedadomoi. Cue lluomo mai cacarei. <sup>17</sup> Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadicaí. Naimiedi cai jaiagaina jaie fetode. Egiptomona naimaci ia, naimacina eo jebuitate. Nainomona ie siño uai diga naimacina atide. <sup>18</sup> Jofue iñenanomo cuarenta años naimacina canode. <sup>19</sup> Canaán eniruemo siete nairaina cuenode. Cai jaiagaimo, naimaci uruiái diga, naie eniruena fecade, naimaci iena. <sup>20</sup> Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micorí illa facaise juecesna jai jitañedimaci. Samuel micorí Jusiñamui facaina lloraima. <sup>21</sup> Illaimana naimaci jitailla jira, Jusiñamui Saúl micorína fetode. Naimiedi Cis micorí jito. Naimie micorí nairaidi Benjamín. Cuarenta años Saúl micorí cai usumatiaí micoríaina sedade. <sup>22</sup> Naimie ifo meidollena, naimaci illaimana illena, Jusiñamui David micorína fetode. Naimiedi Isaí micorí jito. Jusiñamui naimie micorína llote: “Bimie eo cue comecido jaidimie. Nana cue jitaillie rafuena finoite”. <sup>23</sup> Jusiñamui llua isoi, David micorí uruiaimona Jesúsdi cai judíuai comini Jilloitaraímana jaide. <sup>24</sup> Jesús nia llofueñenia, Juan Bautista micorí llofueuide. Juan micorí cai cominimo llouide: “Omoi jeacinona fainonocaida, Jusiñamui dibeimo omoi comeciaí iuailaí meido. Iena omoi meidoia, comini iena uiñotallena, mai omoi bautizallomoi”. <sup>25</sup> Juan micorí ie llofuia fuillamona, raite: “Omoi comeci facajamieñedicue.

Cue ifomo jiaimiena meidoite. Naimie isoiñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

<sup>26</sup> Caimaci, cai eirue jito Abraham micorimona comuidicai. Jusiñamuina birui sedadicaí. Ie jira cai jeacinomona naimie jilloitalle rafue caimo duide. Jesúna ñaiticue. <sup>27</sup> Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai cuegafuiaina facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai cuegafuiaina jai suitatimaci. <sup>28</sup> Jesús maraiñede rafuena finoñede; iadedi naimiena meinetimaci. Pilatomo jicanotimaci, naimiena meinellena. <sup>29</sup> Nana Jusiñamui facaina lloraini micoriai cuegafuiaina suilla mei, cruzmona naimie ana uano, nofici ie raiafomo naimiena jonetimaci; <sup>30</sup> iadedi fiodaillamona Jusiñamui naimiena jillotate. <sup>31</sup> Galileamona Jerusalémo naimie diga jaidino naimiena diga icaiño cioidimaci. Iemei cominimo naimie rafuena jai llocabitimaci. <sup>32</sup> Jusiñamui cai jaiagaimo jaie lloga rafue jai suide. Iena omoimo ja lloiticoco. <sup>33</sup> Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona Jilloitaraimana itataticue’ ”. <sup>34</sup> Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: “Davidmo cue llogacinona omoi facaina jaca finojiticue”. <sup>35</sup> David micori jiaie salmomo iena cuete: “O mareuidimie jaca rifaillana jitañedio” raite. <sup>36</sup> Jusiñamui David micorina ñaiñede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; <sup>37</sup> iadedi Jusiñamui Jito abidi ie isoi rifaiñede.

<sup>38</sup> Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi maraiñedicinomona omoína jillotañede; <sup>39</sup> iadedi Jesúna birui omoi ñnoia, omoi jeacino anamona jilloitomoi. <sup>40</sup> Abina omoi rairui, Jusiñamui facaina lloraini micoriai jaie cuegafuiái omoimo sui raillano. Jaie cuetimaci: <sup>41</sup> Ero, Jusiñamui uaina jamaidomoi. Ieri rajicaidomoi; iadedi faifidomoi.

Omoi motomo siño mare rafuena birui finodicue. Bu omoimo iena iese lloia, bie rafuena ñnoñeitomoi. Ie isoi omoimo suiñellena, Jesúna birui omoi mai ñno.

<sup>42</sup> Ie mei Pablo lliicaide. Iaimaiaí jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane lloiena. <sup>43</sup> Comini jino jailla mei, ailluena comini Pablo, iaimaiaí Bernabé diga, ñaicana jaidimaci.

Judíuai iese jaidimaci. Judíuaiñedino iese jiai jaidimaci. Naie judíuaiñedinodi judíuai isoi Jusiñamuina ñnotimaci. Pablo, iaímaiai Bernabé diga, ñaicana jaillanona, naimacimo llotiaímaiai:

—Jusiñamui omoína duenaillana omoi jai uíñua jira, Jesús rafuena mai omoi ñno.

<sup>44</sup> Jiaie sábadoruimo ailluena comini ofidimaci, Jusiñamui uaina cacareillena. <sup>45</sup> Ailluena cominina ciuano, judíuai comini dinena eo uradoidimaci. Pablo joreña ñaitimaci. Naimie llofuiacinuaina uaitatimaci; <sup>46</sup> iadedi Pablo, iaímaiai Bernabé diga, jacitaiñeno llofuetiaímaiai:

—Omoimo Jusiñamui uaina nano lloiacadicoco. Iena jitaíñedomoi. Jusiñamui diga omoi jaca illena jitaíñedomoi. Ie jira judíuaiñedino dine jaiticoco. <sup>47</sup> Iese Jusiñamui jaielote:

Judíuaiñedinomo ona oretaiticue, naimacimo cue rafue llo-

lena,

naga eniruemo ite cominimo jeacinomona jilluana lollena.

<sup>48</sup> Iena cacajano, judíuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. <sup>49</sup> Nana bie eniruemo cai Nama Jesús uaina llocana jaide; <sup>50</sup> iadedi judíuai dinena diga cominina fuemo faicana uitimaci. Jusiñamuina sedade riñoniaína fuemo faicana uitimaci. Naie riñoniaí mameciaí are soride. Illaicomini fuemo faicana uitimaci. Ie jira Pablo, iaímaiai Bernabé diga, duere finodimaci. Naimaci illanomona iaímaiaína jino dotadimaci; <sup>51</sup> iadedi jioracuai iaímaiai eillimona jaidinotiaímaiai, naimacimo ite jeacinuaina naimaci uíñollena. Ie mei Iconio railla nairaímo jaidiaímaiai; <sup>52</sup> iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

## 14

### *Iconiomo Pablo, iaímaiai Bernabé diga, illa rafue*

<sup>1</sup> Iconiomo judíuai ofiracomo, iaímaiai Antioquíamo jailla isoi, jaidiaímaiai, Cristo rafuena duere llotiaímaiai. Ie jira ailluena comini creyentiaína jaidimaci. Judíuai cominimona ailluena ñnotimaci. Judíuaiñede cominimona ailluena jiai ñnotimaci; <sup>2</sup> iadedi ñnoñede judíuidi judíuaiñedinona fuemo faitimaci. Naimacimo creyentiaína tainona llotimaci; <sup>3</sup> iadedi nainomo are fiebidiaímaiai. Cai Nama facaisena jacitaiñeno llotiaímaiai. Cai Nama Jesús iaímaiaína siño rafuena finotate. Ie jira cominidi cai Nama Jesús naimacina dueruillana fididimaci; <sup>4</sup> iadedi nana comini naiena ñnoñedinomaci. Comeciána daje isoi lloisíñede. Damierie judíuai facaisena itimaci. Damierie naie iaímaiai facaisena itimaci. <sup>5</sup> Judíuaiñedinodi, judíuai diga, naimaci illaicomini



diga, naie iaímaiaína duere finoacadimaci. Noficina iaímaiaína fairigiacadimaci. <sup>6</sup> Iena fidiano, Licaoniamo ite nairaimo aisicano jaidiaímaiaí. Litra railla nairaimo jaidiaímaiaí. Derbe railla nairaimo jiaí jaidiaímaiaí. Naie nairai ecimo ite eniruemo jiaí jaidiaímaiaí. <sup>7</sup> Nainomo Jesús ie mare rafuena llofuetiaímaiaí.

*Listramo iaímaiaímo suilla rafue*

<sup>8</sup> Listramo damie tisitaite. Nanomona naimie iese jeicia jira, jaca macariñede. <sup>9</sup> Pablo llofuiana naimie raise cacajamona, “Jusiñamui cuena jillotarede” raillanona, tisitaitimie ñnote. Pablo dinena naimiemo eruailano, naimie ñnuana uiñote. <sup>10</sup> Naimiemo ado llote:

—A naidada.

Iemei daiaacida naimie macarite. <sup>11</sup> Ailluena comini Pablo finoca rafuena ciodimaci. Naimaci uaido adu cuiriidimaci:

—Íñiaí isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiaí sedauidimaci. <sup>12</sup> Ie jira Bernabé mamecidi jiaícina jonega Júpiter. Pablo mamecidi jiaícina jonega Mercurio, naimie ñairaimana illa jira. <sup>13</sup> Naie nairai nanoca nase ruica facai Júpiterna sedauilla jofu ite. Iaímaiaína sedallena, safia diga juraretaiaína abina finoduanona, Júpiter facaina ñairaima naimacina atide. Ailluena comini diga bite. Juraretaiaína fallena, “Naie iaímaiaídi cai Jusiñamui” raillano, iaímaiaímo fecacadimaci. <sup>14</sup> Iaímaiaí iena cuanona, “Comini marañede rafuena finoacade” raillano, iaímaiaí iniroina cuaranotiaímaiaí. Comini motomo aisicana jaidiaímaiaí. Ado llotiaímaiaí:

<sup>15</sup> —Nabaiñiaí, ¿bue ñellena cocomo iese finodomoí? Jamai ñimadicoco. Omoí isoidicoco. Jusiñamuina omoí sedallena, jamai rana omoí sedañellena, mare rafuena omoímo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiaí finode. Nana nainomo ite rana jiaí finode. <sup>16</sup> Jaie Jusiñamuidi nana omoí judíuaíñedino omoí jitailla rafuena finuana rairuiñede; <sup>17</sup> iadedi naimie finoca rafuemona naimiena uiñoredomoí. Omoí facaina mare rafue naimie finocabide. Noci deitate. Omoí riarra sicotate. Omoímo guille itatate. Iemona omoí comeciaina caimare itatate. Iemona Jusiñamuina uiñoredomoí.

<sup>18</sup> Iese Pablo llote; iadedi iaímaiaímo juraretaiaína fecajana jaca faínonocaiacaiñedimaci. <sup>19</sup> Nano nigarui illamona, Pisidiamo ite Antioquíamona judíuaí comini bitimaci. Iconiomona jiaí bitimaci. Judíuaí dinena fuemo faíamona, naimaci díbeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiodaitimiena naimie eruaila jira.

<sup>20</sup> Naimiena iese fainonocailla mei, creyentiaí naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. <sup>21</sup> Naie nairaimo Jesús ie mare rafuena llotiaímaiaí. Diga comini creyentiaína jaidimaci. Ie mei Listramo abido jaidiaímaiaí. Iconiomo abido jiaí jaidiaímaiaí. Pisidiamo ite Antioquíamo jiaí abido jaidiaímaiaí. <sup>22</sup> Creyentiaí comeciána ocuiñotadiaímaiaí. Cristona nia inuana llotiaímaiaí. Raitiaímaiaí:

—Jusiñamui dine cai nia riñenia, eo duere sefuiticaí.

<sup>23</sup> Naga creyentiaí illanomo creyentiaína sedarainína fetodiaímaiaí. Guiñeno Jusiñamuimo jiaí mei, guiñena facaise mei, naimiena naimaci jai inua jira, cai Nama illa anamo naimacina fainonocadiaímaiaí.

*Siriamo ite Antioquíamo abido jaidiaímaiaí*

<sup>24</sup> Pisidiamo jaillanona, Panfiliamo ridiaímaiaí. <sup>25</sup> Pergemo Cristo uaina llua mei, Ataliamo jaidiaímaiaí. <sup>26</sup> Nainomona botedo Siriamo ite Antioquíamo abido ridiaímaiaí. Nano naie iaímaiaí illanomo abido ridiaímaiaí. Nainomona iaímaiaí navui nia jaiñenia, creyentiaí dinena Jusiñamui iaímaiaína duenaillana uifnuamona, iaímaiaína oredimaci. Jusiñamui rafuena iaímaiaí lollena, iaímaiaína oredimaci. Naie majia fuilla jira, jai abido bitiaímaiaí. <sup>27</sup> Iaímaiaí rilla mei, creyentiaína ofitatiaímaiaí. Nana Jusiñamui iaímaiaímo finoca rafuena llotiaímaiaí.

—Jusiñamuidi judíuaíñedino naimiena inuana jai jitaide — llotiaímaiaí. <sup>28</sup> Dinomo creyentiaí diga are itiaímaiaí.

## 15

*Jerusalémo Moisés micori llogacínona siadua rafue*

<sup>1</sup> Antioquíamo Jerusalémona janore comini billano, creyentiaína iese llofuetimaci:

—Moisés micori caimo llua isoi, omoi abina omoi detañenia, jeacinomona jillobiñeitomoi.

<sup>2</sup> Ie jira creyentiaí uri iñedimaci. Pablo, iaímaiaí Bernabé diga, Jerusalémona bitino llofuiana eo uaitatiaímaiaí. Ie muidona creyentiaí dinena iaímaiaína, jiaíe creyentiaí diga, Jerusalémo jaillena fetodimaci. Cristo oretagano diga, Jerusalémo ite creyentiaína sedaraini diga, bie rafuena siadoiacasite. <sup>3</sup> Creyentiaí naimacina oretaja mei, Fenicia railla enirue díbeido jaidimaci. Ie mei Samaria railla enirue díbeido jiaí jaidimaci. Creyentiaí illanuaimo llofuecana jaidimaci. Judíuaíñedino creyentiaína jai jaillana naimacimo jiaí llotimaci. Ie jira naie creyentiaí caimare itimaci.

<sup>4</sup> Jerusalémo ria, creyentiaídi naimacina feiñotimaci. Cristo oretagano itimaci. Creyentiaína sedaraini jiaí

itimaci. Naimacimo nana Jusiñamui iaimaiaimo finoca rafuena llotiaimaia. Cristo rafuena iaimaia llofuiamona, judíuaiñedino Cristona inuana llotiaimaia. <sup>5</sup> Iena cacajano, fariseuai dibeimo ite creyentiaimona jiaño naidaita raitimaci:

—Moisés micori llogacinuaina inuamona, judíuaiñede creyentia abina diana jitaídica.

<sup>6</sup> Bie rafuena siadollena, Cristo oretaganodi, creyentia sedaraini diga, danomo ofidimaci. <sup>7</sup> Iena are siadua mei, Pedro naidacaillano, raite:

—Amatiai, judíuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona inotimaci.

<sup>8</sup> Nana comini comeciaina naimie uiñuamona, judíuaiñedino naimiena inuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judíuaiñedinona jitaillana jai uiñotica. <sup>9</sup> Jusiñamuidi naimacina cai isoi jai feiñote. Naimiena naimaci inua jira, naimie naimaci comeciimona jeacinona jai dotade. <sup>10</sup> ¿Bue ñellena Jusiñamuina inoiacaiñedomoi? Jusiñamui jitaillacino omoi finoacaiñena jira, naimie omoina duere finuana jitaídomoi.

Cai jaiagai Moisés micori llogacinodo jaidimaci; iadedi iena raise inoñedimaci. Nana ie llogacinona jaca finonidimaci. Iedo jaie jiai jaidica; iadedi iena jiai finonidica. ¿Bue ñellena iedo birui cai jaillana jitaídomoi? <sup>11</sup> Jesucristo caina duenailla jira, cai jeacinomona jilloitica. Judíuaiñedino cai isoi jilloitimaci.

<sup>12</sup> Iena cacajano, nana ofidino uai llicaidimaci. Iemei Bernabé lluaana cacadimaci. Pablo lluaana jiai cacadimaci.

—Jusiñamui judíuaiñedino motomo cocona siño rafuena finotate —lloitiaimaia.

<sup>13</sup> Iaimaia ñaia mei, Jacobo raite:

<sup>14</sup> —Amatiai, cuemo cacarei. Judíuaiñedinomo Jesús rafue Simón Pedro nano llua rafuena jai cacadica. Creyentiaina naimaci jaillena, Jusiñamui naimacina jai fetode. <sup>15</sup> Jusiñamui facaina lloraini micoria iena jaie cuetimaci:

<sup>16-18</sup> Jusiñamui jaie llote: “David micori illaímana isoi illaímana illena, cue Jitona ico oretaiticue.

David jicori jito illaímana birui iñede; iadedi David micori ifomo illaímana cue Jito iite.

Iemona judíuaiñedino cuena inoitimaci.

Naimaci cue cominina jaillena jiai jitaídicue.

Iena cue llua jira, iena finoiticue” llote.

<sup>19</sup> Ie muidona cue comeci raite: Judíuaiñedinomona creyentiaina jaidinona duere finoñeítica. <sup>20</sup> Naimacimo rabena oreta, dama buena llollena: “Jiraraimo fecaca llicisina riño.

O aiñede riño diga iñeno. O iniñede iima diga iñeno. Llerinoga rana riñeno. Diruena jiai riñeno”.<sup>21</sup> Jaiemona naga sábadu naga judíuai ofiracomo judíuaidi Moisés micori cuela-fuiaimona naie isoide lletarafuena cacadimaci. Ie jira naie isoide rafuedo nia jaiticai: iadedi jiaie Moisés micori lletarafuedo jaiñeiticai.

<sup>22</sup> Ie mei Cristo oretaganodi, creyentiaina sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiai comeciaina facajano: “Jee” raitimaci. Pablo, iaímaiai Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiaímaiai.<sup>23</sup> Rabena cuetimaci, iaímaiai diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoidi cai amatiai. Omoimo jai cueticai. Judíuaiñedi omoi; iadedi cai amatiaid omoi.<sup>24</sup> Cai motomona jiaie comini naimaci llofuiado omoína uri itatañenana fididicai. Omoi jeacinomona omoi jilloillena, Moisés micori llogacinodo omoi jaillana jitaidimaci. Ie jirari omoi comeciariucaicuerite. Naimacina oretañedicai.<sup>25</sup> Danomo cai ofilla mei, menamiéna fetodicai, omoimo oretallena, Bernabé, iaímaiai Pablo diga. Bernabéna isiruiticai. Pablona jiai isiruiticai.<sup>26</sup> Iaímaiai cai Nama Jesucristo muidona navui nadedi fiodaitiaímaiai.<sup>27</sup> Ie jira Judas, iaímaiai Silas diga, oretaiticai. Omoimo bie rabe cuia isoi lloitiaímaiai.<sup>28</sup> Jusiñamui Joreño caimo illamona, bie rafuena omoimo lloiticai. Ailluena rafue omoi finuana lloñeiticai. Dani bie rafuena finojit omoi.<sup>29</sup> Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno. Iese omoi iñenia, marena iit omoi. Macaibaite” cuetimaci.

<sup>30</sup> Ie mei Antioquíamo jaidimaci. Ailluena cominina ofitaja mei, naimacimo cartana fecadimaci.<sup>31</sup> Iena facajano, naie llucacini iobidimaci.<sup>32</sup> Judas Jusiñamui facaina lloraima. Silas daje isoide. Diga rafuena creyentiaimo llofuetiaímaiai. Naimaci comeciaina jiai ocuiñotadiaímaiai.<sup>33</sup> Diga irui nainomo illa mei, iaímaiaina oretatinomo creyentiai iaímaiaina marena abido oretatimaci.

<sup>34</sup> Nainomo Silas comecina facajano, fiebide. Ie jira Judas dama abido jaide.<sup>35</sup> Antioquíamo Pablo, iaímaiai Bernabé diga, cai Nama Jesús rafuena llofuellena fiebidiaímaiai. Diga comini jiai iese llofuetimaci.

*Pablo jiaie eniruemo ite creyentiai dine dane jaiilla rafue*

<sup>36</sup> Diga irui illa mei, Pablo Bernabémo llote: p —Naga navui coco llua nairaimo creyentiaí dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

<sup>37</sup> Bernabédi, naie iaímaiaí diga, Juan Marcos uiacade. <sup>38</sup> Panfliamo iaímaiaína navui Juan faínonocade. Iaímaiaí diga llofuellena jaíñena jira, Pablo naimiena dane uiacaiñede. <sup>39</sup> Riire ñaitiaímaiaí. Comecina daje isoi lloíñediímaiaí. Ie jira dajena jaíñediímaiaí. Bernabé Juan Marcona uillanona, Chipremo aillue botedo jaidiaímaiaí. <sup>40</sup> Ie mei Pablo Silana uite. “Jusiñamui omicono canoite” creyentiaí dinena raillanona, iaímaiaína oredimaci. <sup>41</sup> Siria railla eniruemo Jesús rafuena llocana jaidiaímaiaí. Cilicia railla eniruemo jiaí llocana jaidiaímaiaí. Creyentiaí comeциаína ocuiñotacana jaidiaímaiaí.

## 16

### *Timoteo iaímaiaí diga jailla rafue*

<sup>1</sup> Nano Derbemo Pablo, iaímaiaí Silas diga, ridiaímaiaí. Iemona Listramo ridiaímaiaí. Nainomo Timoteo railla creyente ite. Naimie eidi judía íñaiño. Jiaí creyente. Ie moo micorídi griego imie. <sup>2</sup> Listramo ite creyentiaí, Iconiomo ite creyentiaí diga, naimiena: “Mare” raitimaci. <sup>3</sup> Pablodí Timoteona uiacade, naimie diga jaillena. Timoteo moo micorí griego imiena jira, naimie abina nia detatañede; iadedí nainomo ite judíuai illa jira, Moisés micorí llua isoi, Pablo Timoteo ie abina dete. Judíuñedimie naimaci motomo ia, naimaci motomo inide. <sup>4</sup> Naga nairaimo naimaci jaillanona, Jerusalémo siadogacínona creyentiaímo llote. Jerusalémo Cristo oretagano, creyentiaína sedarainí diga, navui naicínona siadotimaci. Creyentiaí naie lluana ñinollena, iena llocana jaidimaci. <sup>5</sup> Ie jira creyentiaí ñinocana jaidimaci. Nagarui ailluena cominí creyentiaína jaidimaci.

### *Pablo ñicairilla ra isoidena ciua rafue*

<sup>6</sup> Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. <sup>7</sup> Misiamo naimaci rillano, Bitiniamo jaiacade; iadedí Jesús Joreño dane imaci jaillana rairuide. <sup>8</sup> Ie jira Misiamona ecido jaillano, Troas railla nairaimo jaidimaci. <sup>9</sup> Nainomo naie naíona Pablo ñicairilla ra isoidena ciode. Daje Macedonia imiedi uicomo naidaita naimiemo jica-jicanode. Raite: “Macedoniamos ruica o bi. Caina canuaíbi”. <sup>10</sup> Naiena Pablo ciua mei, naie facaise-mona Pablo diga jaidicue. Lucadicue. Ie jira bie rafuena raise uiñoticue, iena omo cuellena. Macedoniamos ruica dine

cai jaille botena jenodicaí. Comecina facadicaí: “Jusiñamuidi caina uaidote, nainomo ie mare rafuena cai llollena”.

### *Filipomo illa rafue*

<sup>11</sup> Ie jira Troamona Samotraciamo monaillaido atona ie mamedo jaidicaí. Ie icoitidiruido Neápolis railla nairaimo ridicaí. <sup>12</sup> Dinomona Filipomo duide naisodo jaidicaí. Macedoniamos ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo iticaí. <sup>13</sup> Sábadoruido naie nairaimona nasedo jino jaidicaí. Comecina facajamona: “Dinomo nibai comini oficabidimaci, Jusiñamuimo jüillena”, ille fuemo jaidicaí. Nainomo dañaiñorie riñoniai billanona, dinomo ana raidicaí, naiñaiñuaimo Cristo rafuena llollena. <sup>14</sup> Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie llwana feiñotade. Naie facaise creyentena jaide. <sup>15</sup> Naiñaiño ie jofomo itino diga bautizaja mei, caimo llote:

—Cuedi cai Namana cue jai ñnuana omoi uñuamona, cue jofomo mai bi, nainomo omoi fiebillesa. —Duere caina uaiuidode.

<sup>16</sup> Jusiñamuimo jiranomo jairuido jaidicaimo, daje jitañomo dafañidicaí. Naiñaiñodi jainomona ibacañaiño. Janaba anamo naiñaiño jai ite. Iemona naiñaiño jairuido suille rafuena llouide. Naie rafuena llwana ibatajano, naiñaiño namaiaidi ailluena ucubena feiñoudimaci. <sup>17</sup> Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jillwana omoimo llocabitimaci.

<sup>18</sup> Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

<sup>19</sup> Naiñaiño llwamona ucubena jai oñenana naiñaiño namaiai jai uñua jira, Pablo, iaimaii Silas diga, gaitadimaci. Iaimaiaina plazamo illaicomini illanomo sonocana uitimaci. <sup>20</sup> Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itañediñaimaii. Iaimaii judiñai comini. <sup>21</sup> Romanuai comina cai illa jira, iaimaii llogacinuaina cai ñnoia, iedo cai jai, marañede.

<sup>22</sup> Iena cacajano, nana comini naie iaimaiaina fanaisitimaci. Illaicominidi naie iaimaii niroina cuaranuanona duiñode. Rasi diga, iaimaiaina diga icaiño fatatatimaci. <sup>23</sup> Iaimaiaina eo faja mei, cárcelmo jonetimaci. Cárcelna sedaraimamo

iaimaiaina raise sedallena llotimaci. <sup>24</sup> Iese llua jira, iaimaiaina llaveracomo fo iaimaiaina uite. Donoramo iaimaiaia eilliaia ñuitajano, raise donode.

<sup>25</sup> Naiona daferui facai Pablo, iaimaiaia Silas diga, Jusiñamuimo ifuerillacinona ro-rodiaimaiaia. Jiaia jiidiaimaiaia. Jiaie llavecano naiena cacadimaci. <sup>26</sup> Jamaia ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie daciaño nana llavecano imaci donua radi oni ecoride. <sup>27</sup> Cárcelna sedaraima casidemo, cárcel ie nasiaia ecocorinaillana ciode. “Llavecano jai aisidimaci” raillamo naimie comecina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona comecina facade; <sup>28</sup> iadedi Pablodi eo riire cuirioide:

—¡O abina dama meineño! Bene nana iticaia.

<sup>29</sup> Lamparina atillena cárcelna sedaraima jicajanona, jarire fo jaide, Pablo iaimaiaia Silas dine. Jacinaillano, naimie abidi docaillamona, iaimaiaia uicomo cañici ifodo ana rainadate. <sup>30</sup> Iaimaiaina jino ua mei, nai iaimaiaimo jicanote:

—¿Buena finojiticue, cue jeacinomona cue jilloillena?

<sup>31</sup> Uai otiaimaiaia:

—Coco Nama Jesúna ñino. Iese na o jofomo ite comini diga o jilloillesa.

<sup>32</sup> Iemei naimiena Jesús ie rafuena llofuetiaimaiaia, nana ie jofomo itino diga. <sup>33</sup> Naie facaise iaimaiaia bofellañoa jocode. Iemei naimiedi, nana ie comini diga, bautizaga. <sup>34</sup> Guillena, ie jofomo naie iaimaiaina uite. Jusiñamuina jai ñnua jira, na ie comini diga, naimie caimare ite.

<sup>35</sup> Ie oni monaidemo, illaicominidi dajerie policiana cárcelmo oretatimaci, nai iaimaiaina jino orellena. <sup>36</sup> Cárcel sedaraimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

<sup>37</sup> Iadedi policiamo Pablodi llote:

—Cocodi romanuai cominidicoco; iadedi cocomo ite rafuena raise uiñoñoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

<sup>38</sup> Illaicominimo policías naiena lluaibitemo, illaicominidi naiena cacajanona, eo jacinainte, romanuai cominina iaimaiaina jira. Cai nanoca illaicominidi romanuai nairaia cominina jamaia ebena duere finuana rairuidimaci. <sup>39</sup> Ie jira naie iaimaiaia dine illaicominidi jaidimaci, iaimaiaina: “Dama dino iesede” raillena. Jino atia mei, nairaiaimona jino iaimaiaia jaillena oredimaci. <sup>40</sup> Cárcelmona jino billano, Lidia jofomo fo jaidiaimaiaia. Creyentiana ciuano, naimaci comeciaina

ocuiñotallena, naimacina dane llofuetiaimaia. Ie mei oni jaidiaimaia.

## 17

*Pablo, iaimaia Silas diga, Tesalónicamo illa rafue*

<sup>1</sup> Anfípolis railla nairaimo macaritiaimaia. Apolonia railla nairaimo macaritiaimaia. Ie mei Tesalónica railla nairaimo ridiaimaia. Dinomo judíuai ofiracodi ite. <sup>2</sup> Pablo fibilla isoi, nainomo fo jaide. Daje amani sábadoruimo Jusiñamuina cuegafuiaimona naimacina llofue. <sup>3</sup> Iese naimacina llofue:

—Cristo llegi cacaite. Fiodaillamona naimie jilloite. Naimiedi Jesús. <sup>4</sup> Naiena cacadinomona ailluena innotimaci. Pablo, Silas iaimaia dibeimo jaidimaci. Jusiñamuina innote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jai jaidimaci; <sup>5</sup> iadedi judíuaidi uradoillano, jamai itinomona eo marañede iñiaina uaiduanona, ailluena cominina ofitatimaci. Ie jira naie nairai uri iñedimaci. Iaimaiaina comini uicomo uillena, Jasón jofomo binaisite. <sup>6</sup> Iaimaiaina baiñenano, Jesúsna, jiaie creyentia diga, illaicomini illanomo aiñoicaida uitimaci. Cuirisite:

—Naga nairaimo cominina uri itatañediaimaia. Benomo jai bitiaimaia. Jai benomo billanona, Jasón ie jofomo iaimaiaina feiñote. <sup>7</sup> Cai nanoca illaima ie llogacinona jai inoñedimaci. Ie anamo jai iacaiñedimaci. Raitimaci: “Jiaie illaima anamo iticai. Jesús raillamie anamo iticai”.

<sup>8</sup> Judíuai iese luamona, cominidi uri iñedimaci. Illaicominidi jai uri iñedimaci. <sup>9</sup> “Naie iaimaia dane biñeitiaimaia” illaicominimo creyentia raillano, illaicominidi Jasón jiaie creyentia diga, jino oretatimaci.

*Bereamo Pablo, iaimaia Silas diga, illa rafue*

<sup>10</sup> Naie naio creyentiaidi Pablona, iaimaia Silas diga, Bereamo raire oretatimaci. Dinomo rillano, judíuai ofiracomo jaidiaimaia. <sup>11</sup> Nainomo ite judíuai eo mare. Tesalónicamo ite judíuai isoñedimaci. Bereamo itinodi Cristo rafuena iocire feiñotimaci. Niedi uanaicinoni raillanona, nagarui Jusiñamuina cuegafuiaina facadimaci. <sup>12</sup> Ie jira naimacimona ailluena innotimaci. Judíuaiñedinomona ailluena nanocañaiñuai innotimaci. Ailluena iñia jai innotimaci; <sup>13</sup> iadedi Bereamo Pablo Jusiñamui ie uaina jai lluana Tesalónicamo ite judíuaidi fidiano, dinomo jaidimaci. Cominina fuemo faillena, jaidimaci. <sup>14</sup> Naie facaise creyentiaidi Pablona oni oretatimaci. Monailai fuemo duide naisona oretatimaci. Silas, iaimaia Timoteo diga, fiebidiaimaia. <sup>15</sup> Pablo uigamací naimie diga Atenamo



jaidimaci. Dane abido Bereamo jaidimacimo, naimacimo Pablo llote:

—“Silas, iaïmaiaï Timoteo diga, raire cue dine billesa” llono.

### *Atenamo Pablo illa rafue*

<sup>16</sup> Atenamo iaïmaiaï rillena Pablo sedademo, naie nairaimo ailluena jiraraïna cïode. Iena cïuanona, Pablo comecidi jeareficaide. <sup>17</sup> Naïena cïua mei, judïuaï ofiracomo judïuaï diga coninïri Jusiñamui rafuena siadote. Jusiñamuina jai ñnote judïuaïñedino diga coninïri iena jiaï siadote. Plazamo nagarui jamai itino diga coninïri iena jiaï siadote. <sup>18</sup> Jamai comecina facadinomona damïerie naimïe diga jiaï ñaitimaci. Epicúreo railla rafuedo jaisoidimaci. Estoico railla rafuedo jiaï jaisoidimaci. Damïerie naimacimona raitimaci:

—¿Buena nai ñaïllareuidimïe caïmo lloiacade?

Jiaïno raite:

—Jiaïe nairai jusiñamuillaïcaïmo lloiacade isoide.

Jesús fiodaïllamona jilluana Pablodï llouilla jira, iese raitimaci. <sup>19</sup> Ie jira naimïena naimaci siadouïllanomo uitimaci. Naie illano Areópagona mamecïrede. Jïcanotimaci:

—¿Ñie isoide o comocinuai? Caïmo llono, caï uïñollena. <sup>20</sup> Eo feiredicïnuaïna cacadïcaï. ¿Buena nai llofuiacïnodï llote? Iena uïñoiacadïcaï.

<sup>21</sup> Nana Atenamo ite comïni, jiaïe illanomona bitino diga, jamai aillï como imaci fidïa rafuena ñai-ñaidimaci. Jamai aillï fidïa rafuena caca-cacadimaci. Jiaïe rafuena fïnoñedimaci.

<sup>22</sup> Jïcanua mei, Areópago railla illanomo Pablo naidacaida llote:

—Atenas imaci, omoïmo rafuena lloiacadïcïe. Omoï jusiñamuillaïna eo sedacabidomoi. <sup>23</sup> Cue macarïllamona, omoï jusiñamuillaïna sedaja jiraraïna cïodicïe. Daje jiraraï abïmo iese cïega: “Uïñoñega Jusiñamuina sedadïcaï” cïega. Uïñoñeno naimïena sedadomoi. Ja omoïmo naimïena lloiticïe. <sup>24</sup> Jusiñamui binïena jaïe finode. Ie emodoconi Jusiñamuidï nana binïemo itinona jiaï finode. Naimïedi mona ie Nama. Enïrue ie Nama. Ie jira ïïma finoca jofomo naimïe iñede. <sup>25</sup> Naga jïtaille rana naimïemo illa jira, naimïena canonidïcaï. Naimïe nana comïnïna comuitate. Jiaï nagarui jafaïcï caï uadï caïmo iga. Uanai nana rana caïmo iga. <sup>26</sup> Damïedemona nana comïnïna jebuitate, nana enïruemo naimaci illena. Naimaci illa dïnori naimïe jonega. Naimaci illanomo naimïe jiaï jonega. <sup>27</sup> Iese jonega, naimaci naimïena jenollena. Jenuano, nibai naimïena baitimaci. Caimona naimïe are iñede. <sup>28</sup> Naimïe jaca illa jira, caï jiaï iticaï. Jiaï cajedïcaï. Ie isoi omoï rafue llorainï jiaï llotimaci: “Naimïe ie uruaïdïcaï”.

29 'Naimie caina comuitaja jira, Jusiñamuidi jirarai isoñedena uiñoticaí. Jusiñamuidi oromona finoca ra isoñede. Platamona finoca ra isoñede. Noficimona finoca ra isoñede. Ñima ie onolli diga finoca ra isoñede. <sup>30</sup> Cominidi abi uiñoño jeacino jaie finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciaí iuai meidollena jitaide. <sup>31</sup> Naimaci comeciaí iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñoticaí.

32 Fiodaillamona Jesús jilluana cacajano, damierie jaisitimaci. Ieconí jiaínodi raite:

—Jiaíruido o lluana dane cacajiticaí.

33 Iemei naimaci motomona Pablo jino jaide. <sup>34</sup> Naie cominimona damierie naimie dibeimo jaidimaci. ñnotimaci. Naimacimona damie Areópogomo siadouidimie. Ie mamecidi Dionisio. Jiaíñaiño ñnote. Naiñaiño mamecidi Dámaris. Daje facaiseconí jiaie cominidi ñnotimaci.

## 18

### *Corintomo Pablo illa rafue*

1 Atenamona Corinto railla nairaimo Pablodi jaide. <sup>2</sup> Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaímaiaí. Romamona Claudio nana judíuai cominina jai oretate. Ie jirari bitiaímaiaí. Roma ie nanoca illaimadi Claudio. <sup>3</sup> Pablo iaímaiaí daje isoi maíjia jira, Pablo iaímaiaí jofomo fiebide. Iaímaiaí conima diga maíjide. Chivos itiraíai ie nilla iniroina tiferisoidimaci, naiemona jofona finollena. <sup>4</sup> Naga sábadoruimo judíuai ofiracomo llofue, judíuaina ñnotallena, judíuaiñedinona iena jiaí ñnotallena. <sup>5</sup> Macedoniamona Silas, iaímaiaí Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai Jilloitaraima” llouide; <sup>6</sup> ia naimie uaina ñnosifedimaci. Jiaí naimie jinafomo jeare ñaitimaci. Naimaci comeciaí jeare ciua jira, Pablo ie iniroina jaidinote, naimacina raillano:

—Dani omoi muidona Jusiñamui omoína duere finojite. Cue muidonañeite. Jai judíuaiñedinó dine jaiticue, naimacina cue llofuellena.

<sup>7</sup> Iese raillano, oni jaide. Justo jofomo jaide. Naimiedi Jusiñamuina ñnouidimie. Ie jofo judíuai ofiraco ecimo ite. <sup>8</sup> Crispodi, nana ie jofomo itino diga, cai Nama Cristona ñnote. Naimiedi judíuai ofiraco ie sedaraima. Ailluena Corintomo ite

comini creyentiaina jaidimaci. Ie mei naimacidi bautizaga. <sup>9</sup>Daje naiona Pablo nicairilla isoidemona, Pablomo cai Nama Jesucristodi llote:

—Mai jaciruiño. Faicaiño cue rafuena llocana jai. <sup>10</sup>O diga iiticue. Budi ona maraiño finoñeite. Bie nairaimo ailluena cominidi cue ñibeimo jaitimaci.

<sup>11</sup>Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

<sup>12</sup>Corinto railla nairaidi Acaya railla eniruemo jainaiade. Naie facaise Acaya ie gobernadori Galión. Naie facaiseconi damerie judíuai comini Pablona faiacadimaci. Galión dine naimiena uitimaci. <sup>13</sup>Raitimaci:

—Cai illaima llogacino isoi bimiedi cominina Jusiñamuina sedallena llofueñede.

<sup>14</sup>Pablo uai oiacademo, judíuaimo Galióndi llote:

—Judíuai, cacarei. Naimie maraiñede rafuena finodena, naimie omoina jifuetena, omoi llamo nia cacarefidicue; <sup>15</sup>iadedi jamai naimie uailai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacinuaina cuemo jiai llotomoi. Iena omoi coninri siadotomoi. Bie isoide rafuena siadoiacaiñedicue.

<sup>16</sup>Iemona naimiedi nainomona naimacina oni orede. <sup>17</sup>Ie mei Sostenena gaitadimaci. Sostenes ofiraco ie sedaraima. Naimiena gobernador uicomo fanaisite; ia naifuena Galión niese nibaiñede.

### *Antioquiamo Pablo abido jailla rafue*

<sup>18</sup>Naifue suilla mei, nainomo Pablo are fiebide. Ie mei creyentiaina facaduano, Priscila iaimaia Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijruda garetate. <sup>19</sup>Efesomo rillanona, iaimaiaina fainonocaide. Judíuai comini Jusiñamui rafuena siadollena, Pablodi judíuai ofiracomo fo jaide. <sup>20</sup>Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue — <sup>21</sup>Naimacina facaduano, llote —. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide. <sup>22</sup>Cesareamo sijiano, Jerusalémo macarite. Creyentiai dine jaide. Ie mei Antioquiamo jiai macarite.

<sup>23</sup>Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiai imaci comeciaina ocuiñotacana jaide.

### *Apolos illa rafue*

<sup>24</sup>Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie.

Naimiedi Jusiñamui facaina lloraini micoriai cuegafuiai raise uiñote. <sup>25</sup> Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede. <sup>26</sup> Judíuai ofiracomo naimie llofuia, jacitaiñeno llofuate. Priscila, iaímaiaí Aquila diga, naiena cacadiímaiaí. Ie jira naimiena oni eneno uitíiaímaiaí. Ie uiñoñega rafuena eo raise naimiena llofuetíiaímaiaí. <sup>27</sup> Acayamo Apolodi jaiacana jira, creyentiaídi naimie comecina ocuiñotajano, naimiena oresite. Acayamo ite creyentiaímo rabemo cuetimaci. Jusiñamui naimacina dueruilla jira, creyentiaína jai jaidimaci. Naimiena marena feiñollena iese cuetimaci. Nainomo naimie rillanona, creyentiaína eo canode. <sup>28</sup> Judíuai diga marefodo jiai eo ñaite. Iemona naimaci uai olinodi iñede. Naimiedi Jusiñamui cuegafuiaímona Jesúsdi cai jilloitaraímana llofuate.

## 19

### *Efesomo Pablo illa rafue*

<sup>1</sup> Corintomo Apolo nia itemo, nairaiaí onifedo joide naído jailla mei, Pablo Efesomo ride. Dinomo rillanona, creyentiaína baite. <sup>2</sup> Naimacimo jicanote:

—¿Cristona omoi ñnuaruimo Jusiñamui Joreña feiñotomoi?

Uai otimaci:

—Jusiñamui Joreña nia jaca cacaiñedícaí.

<sup>3</sup> Dane jicanote:

—¿Nie isoi omoi bautizagaomoi?

Uai otimaci:

—Juan micori lloga rafue facaina bautizagacai.

<sup>4</sup> Pablo uai ote:

—Mare. Juan llote: “Omoi comeciaí iuaina meido. Iemei bautizallomoi”. Ie ifo meidoitimiena comini ñnollena llote. Jesús rafuena omoímo raise lloitícue.

<sup>5</sup> Iena cacajano, cai Nama Jesús dibeido bautizadimaci.

<sup>6</sup> Naimacimo Pablo ie onollina joniamona, Jusiñamui Joreña feiñotimaci. Ie mei naimaci uiñoñega nairaí uaido ñaitimaci. Jusiñamui Joreño naimacimo llua rafuena jiai llotimaci. <sup>7</sup> Nibai nana naimacidi doce iñiaí.

<sup>8</sup> Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui dibeimo naimaci comeciaí iuaina meiduana Pablodi jacitaiñeno eo llouide. Nainomo daje amani fivui fiebide. <sup>9</sup> Naimacimona jiaínodi Pablo uaina uaitatimaci. Jiai ñnoiacaíñedimaci. Naimaci ñnoñena ira, ofiracomo bitinomo: “Cristo rafuedi marañede” llouidimaci. Ie jira Pablodi creyentiaí diga

naimacimona eneno oni jaide. Tiranno ie lloracomo nagarui Pablodi llofueuide. <sup>10</sup> Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

<sup>11</sup> Jusiñamuidi Pablona siño rafuena finotate. <sup>12</sup> Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci. <sup>13</sup> Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

<sup>14</sup> Esceva ie siete jitotiaidi iese finoacadimaci. Escevadi Jusiñamui diga ñairaima. <sup>15</sup> Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

<sup>16</sup> Ieconí Janaba anamo itimie naimaci emodomo daia-caide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai diga jino aisidimaci.

<sup>17</sup> Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. <sup>18</sup> Ie jira ailluena creyentiaidi billano, imaci navui maraiñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. <sup>19</sup> Ailluena icorilla rafuiaí illabiaí atianona, marefodo jobaidimaci. Niga raifi rabiaí jobaillana facadimaci. Cincuenta mil ucube diese facai rabiaina jobaidimaci. <sup>20</sup> Cai Nama Jesús uaina eo llocana jaide. Cominidi naie uai siñonana uiñotimaci.

<sup>21</sup> Naie rafue illa mei, Pablodi comecina facajano raite: “Macedoniamos cue macarillamona, Acayamos cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamos jiai jaiacadicutue”. <sup>22</sup> Naimie nia Asiamos nano nigarui illanona, mena canoraimana Macedoniamos oretate. Timoteona, iaímaiaí Erastos diga, oretate.

### *Efesomos ite comini maraiñede rafue finoacadimaci*

<sup>23</sup> Naie facaiseconi Pablo nia oni jaiñenia, Jesucristo rafue muidona Efesomos ite cominidi maraiñede rafuena comuitatimaci. <sup>24</sup> Demetrio raillamie platamona diga rana finouide. Naimiedi Diana ie jofu joreñuaina finouide. Naimie anamos ailluena maijuidimaci. Dianadi naimaci jusiñamui. <sup>25</sup> Naimie

isoí maijuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi; <sup>26</sup> iadedi Pablo raillamiedi diga cominina jai llofuate: “Comini finoca raniaidi jusiñamuillaiñede”. Naie llofuiamona ailluena comini naimie dibeimo jaidimaci. Dama Efesomo iese suiñede; iadedi ua nana Asiamo iese suide. <sup>27</sup> Ie jira abina rairuiacadicaí, cai maijille faifi raillano, comini Diana jofona jiai sofei raillanona. Cominidi naiñaiñona ebiruillana feittaimaci. Naiñaiñori rajicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuiacadicaí.

<sup>28</sup> Iena cacajano, eo iciritimaci. Raire cuiridimaci:

—¡Efeso ie Diana eo ebirede!

<sup>29</sup> Danirie siadumona, nana comini eo failliñaidimaci. Iemo nana comini dajena naimaci ofiracomo fo raire jaisite. Gayona, iaimaiaí Aristarco diga, gaitajano uitimaci. Naie iaimaiaidi Pablo ie nabai iaimaiaí. Iaimaiaí comuillanodi Macedonia. <sup>30</sup> Pablo ofiracomo jiai fo jaiacade; iadedi creyentiaídi naimie fo jaillana rairuidimaci. <sup>31</sup> Illaicominimona damierie nabaiñiaí naimiemo fo jaillana jiai rairuidimaci. <sup>32</sup> Fo itinomona damierie daje rafuena ebena cuiridimaci. Jiaino jiaifuena ebena cuiridimaci. Eo failliñaidimaci; ie iadedi bue ñellena naimaci ofillana raise uiñoñedimaci. <sup>33</sup> Comini motomona judíuai dinena damie uicomo oredimaci. Ie mamecidi Alejandro. Cominina llícaitallena, ie onolli jaidianona, cominimo lloiacade; <sup>34</sup> iadedi naimie judío imiēna naimaci uiñuanona, nana daacaiño cuiridimaci. Mena horas raifi cuiri-cuiridimaci:

—¡Efeso ie Diana eo ebirede!

<sup>35</sup> Iemei naie nairai rabe cueraimadi cominina llícaitatate. Naimaci llícailla meinoconi, naimie lluacinona cacadimaci. Raite:

—¡Cacareí! Cai nairaidi Dianana sedacabidicaí. Naiñaiño ebirediñaiño. Naiñaiñona eruaide jiraraidi monamona jaie uaide. Iena jiai sedacabidicaí. Nana bie eniruemo ite comini iena uiñotimaci. Bu naiena uiñoñediēna jaca iñede. <sup>36</sup> Bu cue lluana jaca uaitañeite. Ie jira omoi llícaí. Comeciaí facañeno buena finoñeno. <sup>37</sup> ¿Bue ñellena Gayo iaimaiaí Aristarco diga, benomo atidomoi? Iaimaiaidi cai jusiñamui joreñona ñaiñediāimaiaí. Naiñaiñona jeare finoñediāimaiaí. <sup>38</sup> Demetrio, ie maijiraini diga, iaimaiaina llogidoraco ite. Diga jueces jiai ite. Coniniri nainomo iena siado; <sup>39</sup> iadedi jiai nicino omoimo ia, cai illaicomini ofia, biena siaduno, caimo lloitimaci. <sup>40</sup> Birui bie rafue cai

finua jira, illaicomini nibai caina duere finoitimaci. ¿Niese cai nibaille? Illaicomini caimo buena jicanoia, ¿niese raiticai?

<sup>41</sup> Naie llua mei, ofidinona jino orede. Iemei jai jono tuudimaci.

## 20

### *Macedoniamo Pablo dane jailla rafue*

<sup>1</sup> Efesomo ite rafue suilla mei, Pablodi creyentiaina uaidote. Naimaci comeciaina ocuiñotafuena llote. Iemei naimacina naimie facaduano, Macedonia railla eniruemo jaide.

<sup>2</sup> Nainomo ite nairaiaimo macarite. Comecina ocuiñotallena, naimacina llofuecana jaide. Iese Macedoniamona Grecia railla eniruemo risaide. <sup>3</sup> Nainomo daje amani fivui illa mei, Siriamo botedo abido jaiacade; iadedi judíuaidi naimiena meineiacanana Pablo fidiano, Macedoniamo abido macarite.

<sup>4</sup> Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaimaiai Segundo diga, jaide. Tesalónica nairai imie iaimaiai. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaimaiai Trófimo diga, jiai jaidiaimaiai. Asia imie iaimaiai. <sup>5</sup> Coco uicodo naimaci jaillano, Troamo cocona sedadimaci. <sup>6</sup> Llomenico guillaruillai railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

### *Troamo Pablo illa rafue*

<sup>7</sup> Domingoruimo Jesús fiodaillana comecillena, danomo ofidicaimo, Pablodi caina llofujete. Icoiti naimie jaiacana jira, Pablo are ñaite. Naiona jitoma daferui illa facai nia ñaite.

<sup>8</sup> Cai ofillanomo ailluena lamparíniai ite. <sup>9</sup> Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana cidimaci. <sup>10</sup> Ie jira Pablo ana jaide. Naimie emodomo jitadacaida, naimiena meniñote. Cominimo llote:

—Omoi rucaicueriñeno. Naimie cajede. Jafaicina nia faite.

<sup>11</sup> Abido a jaidimaci. Jesús fiodaillana comecillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. <sup>12</sup> Nainomona conirue jai cajede uitimaci. Ie jira nana naimaci naimieri eo iobidimaci.

### *Mileto railla nairaimo Pablo jailla rafue*

13 Pablodí Troamona Asón railla nairaímo arído jaiacana jira, botedo jaidicái. Iese uicomo Asónmo jaidicái. Nainomona Pablona botedo uiacadicái. 14 Ie jira Asónmo naimiena caí baillanona, caí díga botemo bite. Ie mei Mitilene railla nairaímo jaidicái. 15 Nainomona dane monaillaido caí jaillano, ie areruido Quío railla nairaímo ruicafebellemo jaidicái. Dane ie areruido Samos railla nairaí mamedo atona jaidicái. Ie areruido dane caí jaillano, Miletomo síjidicái. 16 Abí juarena, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta dígarui illanona bie rafue ite. Asia railla eniruemo naimie are iacaíñena jira, Pablo comecina facade: “Efeso ecído monaillaido jaiticái”.

*Efesomo ite creyentíai sedarainímo Pablo llua rafue*

17 Creyentíaina sedarainína uaidollena, Miletomona Efesomo Pablo cartana orede. 18 Naimie díne naimací rillanona, Pablo naimacímo llote:

—Asiamo nano cue rillaruímona, níese omoí díga nagarui cue illana uíñotomoí. 19 Caí Nama díga abína íedoñeno maíjuídícue. Eecana sure maíjidícue. Judíuái cuena duere uíñodosia jira, ie facaiseconi dueredícue. 20 Cuemo ite marecínona omoímo jaca janoñedícue. Nana Jusíñamui rafuena omoímo jai llotícue. Omoí ofillanomo omoína llofueuidícue. Omoí jofuemo omoína jiaí llofueuidícue. 21 Judíuáína llofuetícue. Judíuáiñedínona daje isoi llofuetícue. Jusíñamui díbeímo omoí comecíai íuáína meíduana llotícue. Caí Nama Jesúna omoí íinuana jiaí llotícue. 22 Jusíñamui Joreñodí cuena jai jaicaitaja jira, Jerusalémo biruí jaitícue. Nainomo ramo cue jirille rafuena uíñoñedícue; 23 íadedí Jusíñamui Joreño naga nairaímo cuemo llote: “Llaveracomo ona gaitajano ona jonesíite. Duere sefuitio”. 24 Cue ille dínorí are illemo comecina facañedícue. Dama cue ille dínorí fuidoiacadícue. Caí Nama Jesúmona cue feíñoaga maíjiana fuidoacadícue. Mare rafuena omoímo lloíacadícue. Jusíñamui omoína duenaillana jiaí llotícue. 25 Jusíñamui anamo omoí illa rafuena omoímo jai llotícue. Jai dane cue uiecona cioíñeitomoí. Iena uíñotícue. 26-27 Cue uána jaca janoñedícue; ía nana Jusíñamui uai omoímo llotícue. Ie jira cuemona omoí díga cue comecí mare. Jusíñamui uaido omoí jaiñenia, cue muidonañeíte. 28 Maí omoí abí rairuí. Jusíñamui Joreñodí omoína creyentíaina sedatate. Naimacína raise seda. Jusíñamui díbeímo ítinona llofue. Naimie Jito fiodaílla muidona, naimacína ote, naimie íena. 29 Naimacídí toíca llaudaíai ísoídímací. Nía abína raise uíñoñedímací. Cue jaílla meinoconi, táino llorainídí, janallari isoi, omoímo



biite. Naimaci nana omoi sedaca cominina ramo faite, danomo abido naimaci jaillena, jiconiai laudaiai gaitaja isoi. <sup>30</sup> Omoimona uanañedicinona llorainidi iite. Creyentiaina ramo faitimaci, omoi llucinona fainonocaillena, naimaci dibeimo illena. <sup>31</sup> Ie jira abina rairui. Bie rafuena feitañeno. Daje amani fiemona nana omoina jai llofueticue. Naiona omoina llofueticue. Aremona omoina jiai llofueticue. Omoina cue duenaillamona, eianona omoina llofueticue. <sup>32</sup> Mai. Cai Nama illa anamo omoina fainonocaiticue. Naimie uaimona naimie omoina duenaillana jai uiñotomoi. Naie uaidi omoina jiai ocuiñotaite. Iemona Cristona inocana jaitomoi. Nana naimie fetocano diga naimie illanomo ico jaca iitomoi. <sup>33</sup> Jiaño ie ucubena jaca nicidoñedicue. Bu ie iniroillaina jaca jiai oiacañedicue. <sup>34</sup> Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoidi uiñotomoi. <sup>35</sup> Iese cue illamona omoina llofueticue. Iese maijiano duerede cominina canocana jaiacadicaí. Cai Nama Jesús ie llogacinona uiñoticaí. Naimie raite: “Raruiaina cai feiñoia, iobidicaí; iadedi cai eo iobiacania, jainomo raruiaina fecadicaí”. <sup>36</sup> Naie llua meino, naimaci diga caiñici ifodo rainadajano, Jusiñamuimo jüide. <sup>37</sup> Nana naimacidi eo eedimaci. Pablona caimaduanona, naimiena llibanotimaci. <sup>38</sup> “Cuenana cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

## 21

### *Jerusalémo Pablo jailla rafue*

<sup>1</sup> Naimacina cai facadua meinoconi, suiñodicaí. Cos railla nairaimo atona jaidicaí. Ie are Rodas railla uiasimo ridicaí. Iemei Pátara railla nairaimo ridicaí. <sup>2</sup> Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí. <sup>3</sup> Chipre railla uiasina cai ciojia, cai nabei dibeimo ite. Iemei Siria railla eniruemo jaidicaí. Tiro railla nairaimo sijidicaí. Botedo uiga raruiaina nainomo joneacadimaci. <sup>4</sup> Tiromo ite creyentiai cai baillanona, siete digarui naimaci diga iticaí. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate. <sup>5</sup> Digarui illa meinomo oni jaidicaí. Naie nairaimona nana naimaci cai diga jaidimaci. Riñoniai, naimaci uruiaí diga, jaidimaci. Caiñici ifodo monaillai fuemo ana rainadajano Jusiñamuimo jüidicaí. <sup>6</sup> Naimaci facadua meinoconi, botemo jaidicaí. Naimaci imaci jofuemo abido jaidimaci. <sup>7</sup> Tiromona Tolemaida railla nairaimo jaidicaí. Creyentiaina uaiduano, darui naimaci diga iticaí. <sup>8</sup> Ie are jaillano, Cesareamo cai ria, Felipe jofomo jaidicaí. Felipedí Jesucristo ie rafuena

lloraima. Jerusalémo diáconuaina creyentiaia jaie fetua facaise, Felipena fetodimaci. <sup>9</sup> Naimie dinomo fiebidicai. Naimiemo cuatro jisa ite. Naiñaiñuiai nia iima abina uiñoñede. Jusiñamui naiñaiñuaimo llucacinona llocabitimaci.

<sup>10</sup> Digarui nainomo cai illamo Judeamona damie bite. Naimie mameci Agabo. Jusiñamui facaina lloraima. <sup>11</sup> Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite: “Jerusalémo judúuai illaicomini bie cinturón jainaoide imana daje isoi maitimaci. Judúuaiñedinomo naimiena fecajitimaci” raite.

<sup>12</sup> Naiena cai cacajano, naie comini diga, Pablona caididicai, naimie Jerusalémo jaiñellena. <sup>13</sup> Pablo uai ote:

—¿Bue ñellena eedomoi? ¿Bue ñellena cue comequina ocuiñotañedomoi? Cue maiana jaca jitaidicue. Ua cue fiodaillana jaca jiai jitaidicue. Cue Nama Jesús muidona cue fiodaiadedi, damamai fiodaiticue.

<sup>14</sup> Cai lloga uai naimie inoñena muidona, raiticai:

—Cai Nama jitaille rafuena finuana jitaidicai. —Iemei lliicaidicai.

<sup>15</sup> Nano nigarui illanona, cai raruiaina finuano, Jerusalémo jaidicai. <sup>16</sup> Cesareamo ite creyentiaimona jiaino cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

### *Jacobo diga Pablo ñaia rafue*

<sup>17</sup> Jerusalémo cai ria, creyentiaidi caina caimare uaidotimaci. <sup>18</sup> Ie are Pablo, cai diga, Jacobo dine jaide. Nana creyentiaina sedaraini nainomo jai ofidimaci. <sup>19</sup> Uaidua mei, Pablo nagacinuaido Jusiñamui judúuaiñedinomo finoca rafuena llote:

—Cue llofuiamona ailluena judúuaiñedino creyentiaina jaidimaci —llote.

<sup>20</sup> Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judúuaimona ailluena comini jai creyentiaina jaidimaci; ia nana naimaci Moisés micori llogacinodo eo jaidimaci. <sup>21</sup> O finoca rafuena jai fididimaci. Ona comini ñaiana jai fididicai. Jiaie nairai motomo ite judúuaina Moisés micori llogacinona fainonocailana llofuetio. Naimaci uruiai abina deñenana llofuetio. Moisés micori llogacinuaido jaiñellena llofuetio. <sup>22</sup> Ie jira ¿ñiese nibaiticai? O rillana jai fididimaci. <sup>23</sup> Ie jira omo cai llwana fino. Cai ecimo cuatro iima jai ite. Nie isoide rafuena Jusiñamuimo jai llotimaci. <sup>24</sup> Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena,

Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareit-omoi. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicaí. <sup>25</sup> Judíuaiñedino Moisés micori llogacinodo jaillena lloñeiticaí. Naimacimona creyentaina jaidinomo navui cueticaí: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticaí.

<sup>26</sup> Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamiai rana fecajaruina jai llote. Siete digarui illanona, Moisés micori llua isoi, naie rafuena fuidoiacadimaci.

### *Pablona gaitaja rafue*

<sup>27</sup> Naie siete iruillai fuiacanaruillaimo Asiamona damierie judíuaídi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona, <sup>28</sup> cuiridimaci:

—Caimaci, caina cano. Bimie naga illanomo llofuiamona, cominina raise itatañede. Moisés micori llogacinuaído jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

<sup>29</sup> Iese ite: Jerusalémo Trófimo diga Pablona ciodimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana marañede. <sup>30</sup> Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. <sup>31</sup> Pablona meineiacania, soldaduai ie comandantedi nana comini ieillana fidide. <sup>32</sup> Ieconí naimiedi, ie soldaduai diga, nana ie illacomini diga, comini dine aisicana bitimaci. Ie jira cominidi naimacina ciuano, Pablona fajana faínonocaidimaci. <sup>33</sup> Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

<sup>34</sup> Nana iedinodi jiaíforie llotimaci. Ie jira naie rafuena naimie jaca uiñoñede. Ie muidona cuatelmó naimiena uillena llote.

<sup>35</sup> Cuartel tidabacuimo naimaci ria, comini jarire jailla jira, soldaduai Pablona uitimaci. <sup>36</sup> Ailluena comini racadimaci. Ocuioisite:

—¡Naimiena meine!

*Pablo ie abi riidua llua rafue*

<sup>37</sup> Cuartelmo jaiacania, Pablo comandantemo llote:

—O diga ñaiacadicue.

Raijicaillamona, naimie uai ote:

—Griego uaido ñaitio — <sup>38</sup> Jiai llote —. Egipto imieñedio.

Navui jobaime finodio. Jofue iñenanomo, cuatro mil cominina meinetinona uitio.

<sup>39</sup> Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue lollena, omo jicanoiacadicue.

<sup>40</sup> —Jee —raite. Pablo tidabacui muidomo naidaide. Cominina llícaitallena, ie onollina jaidide. Comini llícailla mei, Pablo judíuai uaido naimacimo llote:

## 22

<sup>1</sup> —Caímaci, einamaci, cue abi riiduacinomo mai omoí cacarei.

<sup>2</sup> Naimie judíuai uaido llua naimaci cacajano, llícaidimaci. Ie jira Pablo llote:

<sup>3</sup> —Judío imiedicue. Ciliciamo ite Tarso railla nairaimo jeicigacue. Bene omoí nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoí isoi jaidicue. <sup>4</sup> Jesucristo ñnotinona jaie eo duere finodicue. Diga creyentiaína maianona, cárcelmo joneticue. fiñiaina duere finodicue. Riñoniaina jiai duere finodicue. <sup>5</sup> Jusiñamui diga nanoca ñairaima cuena uiñote. Nana omoí illaicomini cuena uiñotimaci. Creyentiaína duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidicue, nainomo ite creyentiaína maiano, Jerusalémo atianona, naimacina duere finollena.

*Pablodi Jesúsna ñnuana llua rafue*

*(Hch 9.1-19; 26.12-18)*

<sup>6</sup> 'Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma naidai iacania, ieconi monamona damie cue abina eo quetiñote.

<sup>7</sup> Eniruemo ana uaidicue. Monamona damie cuemo llua cacadicue: “Saulo, Saulo, ¿bue ñellena cuena duere finodio?”

<sup>8</sup> Jicanoticue: “¿Budío?” Monamona damie uai ote: “Nazaret ie Jesúsdicue. Cuena duere finodio”.

<sup>9</sup> Cue diga itinodi cue quetiñua rana ciodimaci; iadedi cue diga ñaitimiena cacaiñedimaci. <sup>10</sup> Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

<sup>11</sup> 'Cuena eo quetiñua jira, cioñedicue. Cue diga itino cue onollido llínocaida, Damascomo cuena uitimaci. <sup>12</sup> Nainomo

Ananías raillamiedi ite. Jusiñamuina eo ñnote. Moisés micorí llogacínuaído eo jaisoide. Nainomo ite judíuaidi naimiēna: “Mare” raitimaci. <sup>13</sup> Naimie cuemo bite. Cuemo llote: “Saulo, ama, mai oni eroda”. Ieconí dane erodajanona, naimiēna ciodicue. <sup>14</sup> Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareillena. <sup>15</sup> Nana cominimo naimiēna lloitio. Nana o ciua rafuena lloitio. Nana o cacaja rafuena jiai lloitio. <sup>16</sup> Mai cue lluana ñno. Naidadajanona, o jeacino oni dotallena, Jusiñamuimo jica. Ie mei bautiza” raite.

### *Judíuaiñedinomo Pablo jailla llua rafue*

<sup>17</sup> Te mei Jerusalémo abido cue billa mei, Jusiñamui jofomo Jusiñamuimo cue jiiia, nicairiticue isoidicue. <sup>18</sup> Cai Namana ciodicue. Cuemo llote: “Jerusalémona raire mai jai. Cominidi o cuena lluana feiñoñeitimaci”. <sup>19</sup> Uai oticue: “Nama, naga judíuai ofiracomo ona ñnotinona fauidicue. Cárcelmo naimacina joneuidicue. Nama, Jerusalémo itino iēna uiñotimaci. <sup>20</sup> Esteban micorí fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiēna meinético ñiroina sedadicue”; <sup>21</sup> iadedi cue Nama cuemo llote: “Mai jai. Judíuaiñedinomo ona are oretaiacadicue”.

### *Comandante anamo Pablo illa rafue*

<sup>22</sup> Bie lloga dinori cominí Pablo lluana cacadimaci. Iemei cuiriidimaci:

—Bie isoide ñima illana benomo jitaiñedicaí. ¡Naimiēna meine!

<sup>23</sup> Cuirillamona naimaci ñiroina jaidisite. Icirisiano eniruena jiai fadosite. <sup>24</sup> Judíuai uaido cominimo Pablo llua jira, comandante iēna cacaiñede; iadedi cominí icirillana cianona, naimie llote:

—Naimiēna cuartelmo uiño. Naimiēna fano. Naimiēmo ite rafuena caimo naimie llollena, naimiēna duere fino.

<sup>25</sup> Naimiēna maiano naimiēna fallena, Pablodi nainomo ite capitámo jicanote:

—¿Juez nia lloñenia, romano nairai imiēna fajana mare? Romano nairai imiedicue.

<sup>26</sup> Capitán iēna cacajano, comandante dine jaide. Iēna llote. Jicanote:

—¿Ñiese nibaiticaí? Bimie romanuai nairai imie.

<sup>27</sup> Iēna cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

<sup>28</sup> Comandante dinena raite:

—Romanuai nairai imiēna cue jaillena, eo ibadicue.

Pablo uai ote:

—Romanuai nairai imiēna jeicigacue.

<sup>29</sup> Ieconī naimiēna duere finoacadino naimiēmona raire onī jaidimaci. Pablo romanuai nairai imiēna jira, naimiēna jai ebena maia jira, comandante jiai jacinaite. Comecina nibai facade: “Iese naimiēmo cue finua jira, ie ibana ollena, cue illaimamo cuena jiai llogidoite”.

*Illaicomini motomo Pablo illa rafue*

<sup>30</sup> Comandantedi judíuai Pablona llogiduana ua raise uiñoiacade. Ie jira ie are Pablona suiñoollena llote. Jusiñamui diga nanoca ñairaini, nana judíuai illaicomini diga, ofillena llote. Pablona atiano, naimaci motomo uillanona, naimiēna naidanete.

## 23

<sup>1</sup> Ie abina riidollena, Pablo naie judíuai illaicomini motomo ite. Naimacimo eruaillano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiēmona cue começi mare.

<sup>2</sup> Ananíadi Jusiñamui diga nanoca ñairaima. Pablo llwana naimie gaiñenamona, Pablo ecimo itinona Pablo fuena farotate. <sup>3</sup> Pablo dinena naimiēmo llote:

—Jusiñamui o fuena faroite. Mareuidimiēna abina caitadio. Moisés micori llogacinuai muidona benomo itio, cuemo lollena; iadedi cue finoca rafuena raise o uiñoñoeno cue fue ebena farollena llotio.

<sup>4</sup> Nainomo itino raite:

—Jusiñamui diga nanoca ñairaimamo jeare ñaitio.

<sup>5</sup> Pablo uai ote:

—Moisés micori iena jaie cuiana uiñoticue. “Illaicominiēna jeare ñaiñoeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiēmo iena lloñedicue.

<sup>6</sup> Cominimo Pablo eruaillamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacinomo ocuriticue. Ie jira bene cuena llogidoiacadomoi.

<sup>7</sup> Naimie iena lloia, naimaci comeciāi daje isoi lloñedimaci.

<sup>8</sup> Saduceuai cominidi fariseuai comini isoi ñnoñedimaci. “Fiodaillamona jilloñeiticai” saduceuai comini raillana ñnoside. “Jusiñamui jaienisai ññede. Comini joreñuai ññede” raillana ñnoside; iadedi fariseuai comini dinena nana naie rafue illana ñnotimaci. <sup>9</sup> Ie jira eo failliñaidimaci. Fariseuai motomona jaiino naidadajanona, llote:

—Bimiēmo jeacino ññede. Jusiñamui jaienicī naimiēmo nibai jaie llwamona, bie rafue naimiēmo ite.

<sup>10</sup> Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena llote.

<sup>11</sup> Je are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

*Pablona meineiacana rafue*

<sup>12</sup> Monaidemo, judíuaimona jiaíno comeciaina facadimaci: “Pablona nia cai meineñenia guiñeiticai. Jiroñeiticai”.

<sup>13</sup> Cuarenta baifemo ite comini iese comeciaina facadimaci.

<sup>14</sup> Naimaci judíuai illaicomini dine jaillano, raitimaci:

—Dani comeciaina facadicaí: Pablona nia cai meineñenia, jaca buena guiñeiticai. <sup>15</sup> Omoi dine Pablona atillena, naimiemo eo raise jicanua isoi, comandantemo jicano. Pablo iaírei bia, naimiena cai meinellena, ocuidoiticaí.

<sup>16</sup> Pablo enaise naie rafuena fidiano, cuartelmo jaide, Pablomo lollena. <sup>17</sup> Iena cacajano, Pablodi capitána uaidote. Raite:

—Bie coniruenta comandante dine uiño. Naimie diga ñaiacade.

<sup>18</sup> Je jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

<sup>19</sup> Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

<sup>20</sup> Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci. <sup>21</sup> Naimaci jitailla isoi finoñeno. Cuarenta digamie baifemo naimiena reiduanos sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

<sup>22</sup> Comandante coniruenta facaduano raite:

—Jaca bumo cuemo o llua lloñeno.

*Félix dine Pablo oretaja rafue*

<sup>23</sup> Comandante mena capitána uaidote. Llote:

—Doscientos soldaduaina uaido, imaci raruiái finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiai uaido. <sup>24</sup> Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote. <sup>25</sup> Cartana jiai cuete. Iese cuete: <sup>26</sup> “Félix, omo cueticue. Claudio Lisiasdicue. Cai mare gobernardio. ¿Nigacino? Cue uai o dine oredicue. <sup>27</sup> Damie o dine oredicue. Judíuai naimiena meineiacana jira, soldaduái

diga naimiēna gaitataticue. Naimiēna gaitataja mei, naimiedi romanuai nairai imienana fididicue. <sup>28</sup> Judíuai illaicomini dine naimiēna uiticue, naimaci llogiduacinona raise cue uiñollena. <sup>29</sup> Naimaci einamací llogacinuai muidona naimiēna llogidotimaci. Iena fididicue. Naimie jaca buena finoñede. Naimiēna meinellena, naimie cárcelmo jonellena lloiacañedicue. <sup>30</sup> Jiaíno naimiēna dane meineiacanana fididicue. Ie jira o dine naimiēna oretaticue. Ie llogidotino o dine jaillena jiaí lloiticue. Naimaci naimiēna omo lloitimaci” cuete.

<sup>31</sup> Comandante llua isoi, soldaduai naiona Pablona Antípatrismo uitimaci. <sup>32</sup> Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide. <sup>33</sup> Cesareamo railla nairaimo rillanona, gobernadormo cartana fecadimaci. Naimie dine Pablona jiaí uitimaci. <sup>34</sup> Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

<sup>35</sup> Gobernador dinena raite:

—O llogidotino bia, o rafuena cacajiticue.

Soldaduaímo jiaí llote:

—Omoi anamo Herodes railla illaíma micori jofomo naimiēna seda.

## 24

### *Félix dine Pablo riidua rafue*

<sup>1</sup> Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiaí bite. Naimiedi llogidoraima. Gobernadormo Pablona llogiduaíbitimaci. <sup>2</sup> Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio. <sup>3</sup> Iobillamona, nana cai iena feiñoticaí.

<sup>4</sup> Ona iciacañedicue; iadedi o fue maria jira, cue lluomo dallu cacarei. <sup>5</sup> Bimiedi eo cai abina aruire finode. Nana eniruemo ite judíuaina uri itañede. Naimiedi Jesús raillamie rafuedo jaidino illaíma. <sup>6</sup> Jusiñamui jofona jeare naimie finoiacana jira, naimiēna gaitadicaí. Moisés micori llogacinuaido naimiēna duere finoacadicaí; <sup>7</sup> iadedi comandante Lisias ride. Caimona naimiēna riire bairode. Naimiēna cai llogidollena, o dine cai billena caimo llote. <sup>8</sup> Pablomo o jicanoiacania, naimiemona bie rafuena uiñoitio. Nana naimiēna cai llogiduacinona uiñoitio.

<sup>9</sup> Judíuai illaicomini, Tértulo llua isoi, dacinodo llotimaci.

<sup>10</sup> Iemei gobernador dinena Pablomo llote:

—Mai o facaina o ñaino.



Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue. <sup>11</sup> Doce digarui illanona, Jerusalémo como birui ridicue. Iena uifoiacadiosa jiaie cominimo jicano. Jusiñamuina sedallena, Jerusalémo iticue. <sup>12</sup> Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue. <sup>13</sup> Nie isoide rafuena cue finuana cioñedimaci. Ie jira cuena raise llogidonidimaci; <sup>14</sup> iadedi jiaie rafuena lloiticue. Cai usumatiái Jusiñamuina sedadimaci. Naimiena jiai sedadimaci. Nana Moisés llogacinuaina ñnoticue. Nana Jusiñamuina lloraini micriái ciegafuiaina ñnoticue. Bimacimona jiaie llogacinuaido jai jaidicue. Bimacimona uanaiñedicinodo jaidicue. <sup>15</sup> Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiai jilloitimaci. Beno itino iena jiai ñnotimaci. <sup>16</sup> Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. <sup>17</sup> Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue. <sup>18</sup> Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. <sup>19</sup> Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? <sup>20</sup> Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. <sup>21</sup> Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

<sup>22</sup> Félixdi Jesús dibeimo itino rafuena raise uifua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite. <sup>23</sup> Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairuiñede.

<sup>24</sup> Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiamaiai. Jesúna ñnuana cacadiiamaiai. <sup>25</sup> Jeacino finoñellena, dama ie jitailla rafuena finoñellena, jairuido Jusiñamui ricaiñellafue anamo iñellena cacadiiamaiai. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

<sup>26</sup> Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena. <sup>27</sup> Mena años illa mei, Porcio Festodi Félix ifo meidote. Félixdi judúuaina iobitaacana jira, cárcelmo Pablona fainonocaide.

## 25

### *Festomo Pablo llua rafue*

<sup>1</sup> Naie provinciamo darui amani rilla mei, Cesareamona Jerusalémo Festo jaide. <sup>2</sup> Nainomo Jusiñamui diga nanoca ñairainidi, jiaie judúuai illaicomini diga, Festomo Pablona llogidotimaci. <sup>3</sup> Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. <sup>4</sup> Festo uai ote:

—Pablo Cesareamo fiebiite. Raire nainomo abido jaiticue. <sup>5</sup> Omoi illaicominimona damierie cue diga jaitimaci, nicino naimiemo ia, naimiena llogidollena.

<sup>6</sup> Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote. <sup>7</sup> Pablo billa mei, Jerusalémona bite judúuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci. <sup>8</sup> Pablo uai ote:

—Judúuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

<sup>9</sup> Iena cacade; iadedi Festo judúuaina iobitaacana jira, Pablomo jicanote:

—¿Jerusalémo cue diga jaiacadío? Nainomo nana bie rafuena siadoiticue.

<sup>10</sup> Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue lolle. Judúuaimo jaca buena finoñedicue. Iena raise uiñotio. <sup>11</sup> Romanuai railla nairai illaicomini llogacinona cue ñinoñenia, damamei jearede rafuena cue finoa, cue fiadaillemo jaca ocuridicue; iadedi cuemo nicino iñenia, cuena meinellena bu cuena judúuaimo fecañeite. Cue rafue naimie siadollena, Romamo cai nanoca illaima dine jaiacadicue.

<sup>12</sup> Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

### *Agripamo Pablo llua rafue*

<sup>13</sup> Diga irui illa mei, Agripadi Festo dine, ie miriño Berenice diga, Cesareamo bitiaimaiai. Agripadi naie enirue illaima. <sup>14</sup> Diga irui nainomo itiaimaiai. Naimiemo Festodi Pablo ie rafuena llote:

—Félix Pablona cárcelmo bene fainonocaide. <sup>15</sup> Jerusalémo navui cue ia, Jusiñamui diga nanoca ñairaimadi, judíuai einamací diga, naimiena llogídote. Naimiena duere finollena cuemo jicanotimaci. <sup>16</sup> Naimaci uai oticue: “Cai Romanos cominidi llogídogamiena jamai tainomo duere finoñedicai; iadedi llogídogamiedi ie llogídotino uai nano cacareiticaí. Ie mei ie abi riidollicinomo jiai cacareiticaí”.

<sup>17</sup> Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue. <sup>18</sup> Naimiena llogídotinodi lloia, naimiena marañede finoca rafue cue facaja isoi, llogídoñedimaci. <sup>19</sup> Dani naimaci ñnuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. <sup>20</sup> Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; <sup>21</sup> iadedi Pablo nainomo jaiacañede. Cai nanoca illaíma dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaíma dine naimiena cue nia oretañenia.

<sup>22</sup> Agripadi Festomo llote:

—Naimie ñaiana cacaacadícue.

Festo uai ote:

—Ico are naimie ñaiana cacareitio.

<sup>23</sup> Ie jira ie are Agripa, iaímaiaí Berenice diga, gobernador ofiracomo bitiaímaiaí. Finobillano ebire bitiaímaiaí. Soldaduaí imaci illaicomini jiai bitimaci. Naie nairaimo íte nanoca comini jiai bitimaci. Ofilla mei, Festo Pablona atillena llote. <sup>24</sup> Festo llote:

—Agripa, nana beno itino, bimiena ciodomoi. Jerusalémo ailluena judíuai naimiena llogídotimaci. Bene cue dine jiai bitimaci. Naimie meiniana eo jitaídímaci; <sup>25</sup> iadedi naimiemo nicinodi iñenana jai uiñoticue. Naimiena meinellena cue llollena, nicinodi naimiemo iñede. Augusto dine naimie jaillena naimie jicanua jira, naimiena oretaiticue. <sup>26</sup> Nicinodi nia iñede, cai illaímamo cue cuellena. Ie muidona omoi dine naimiena jai atidícue. Agripa, naimie ñaíamo raise cacarei. Naimiemo cai jicanua mei, nibai nicino naimiemo illana uiñoiticaí. Iemona Augustomo cueiticaí. <sup>27</sup> Augusto dine llavecamié cue oretaia, naimiemo nicino iñenia, cuemona marañede.

## 26

*Pablo ie abina dane riidua rafue*

<sup>1</sup> Naie facaise Agripa Pablomo llote:

—Mai llono. O abi riiduacinona cacaacadícue.

Pablo: “Jh” raillanona, ie onolli a ñuitade. Raite:

<sup>2</sup> —Agripa, bene o illa jira, cuemona mare. Cue fue bailafuedo o uicommo cue abina riidoiticue. Judíuai cominidi diga rafuena cuena llogidotimaci. <sup>3</sup> Nana cai judíuai rafuena raise uñotio. Nana cai einamací rafuena jiaí uñotio. Cuemo raise cacarei. <sup>4</sup> Jerusalémo naimaci motomo cue illa jira, diga judíuai cue coniruenamona cuena uñotimaci. <sup>5</sup> Cuenanaimaci lloiacania, fariseo imiena cue illana are uñotimaci. Jiaie comini baifemo fariseuaidi cai einamací llogacinuaina ñnotimaci. <sup>6</sup> Jusiñamuidi cai usumatiaí micoriaímo fiodaillamona comini íco jilloillena jaie llote. Ie suillemo jai ocuridicue. Ie jira llogidoracomo birui jai iticue. <sup>7</sup> Nagarui Jusiñamuina naimaci eo sedajamona, cai doce nairaidi naie llogacino suillemo jiaí nia ocuridimaci. Ore illaíma, bie ocurillacino muidona judíuai illaícomini cuena llogidotimaci.

<sup>8</sup> ¿Bue ñellena Jusiñamuidi comini fiodaillamona jillotajana ñnoiacaíñedomoi? <sup>9</sup> Jaie ie isoidicue. Nazaret ie Jesúsna ñnotinona diga jearede rafuena jaie finoacadicue. <sup>10</sup> Jerusalémo iena finodicue. Cárcelmo ailluena Jesúsna ñnotinona joneticue. Jusiñamui diga nanoca ñairaini uaido iena finodicue. Naimacina meinelle cai illaícomini raia: “Jee” raisoidicue. <sup>11</sup> Diga judíuai ofiracomo, diga icaiño, naimacina duere finodicue. Naimaci Jesúsna jeare ñaiana jitaidicue. Naimaci diga cue eo icirilla jira, jiaie eniruemo ite nairaimo jiaí jaidicue, naimacina duere finollena.

*Pabloti Jesúsna ñnuana llua rafue  
(Hch 9.1-19; 22.6-16)*

<sup>12</sup> Ie jira Damascomo jaidicue. Jusiñamui diga nanoca ñairaini uaido jaidicue. <sup>13</sup> Ore illaíma, jitoma naidai ia, monamona quetiñotena cidicue. Naidi jitoma baifemo quetiñote. Cue abina quetiñote. Cue diga itino abina jiaí quetiñote. <sup>14</sup> Eniruemo cue ana uaia, damie lluaana cacadicue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maíga jurareta suiñoacana isoi. Ie isodio. Riicaillamona, cuena duere finoacadio”. <sup>15</sup> Uai oticue: “¿Budiotá?” Cai Nama cuemo llote: “Jesúdicue. Cuenaduere finodio. <sup>16</sup> Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uñotalle rafuena jiaí lloitio. <sup>17</sup> Naimaci ona duere finoia, omoi cominimona ona jillotaiticue. Judíuaiñedinomona ona jiaí jillotaiticue; iadedi judíuaiñedino dine ona oretaiticue, <sup>18</sup> naimaci comeciá tainomo ñhellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiredinomo jai itimaci isoidimaci. Jusiñamuina uñuamona, useredinomo

iitimaci isoidimaci. Iemei Jusiñamui naimaci jeacinona dota-  
jite. Cuen a naimaci ñnuamona, nana cuena ñnotino diga cue  
illano ico jaca iitimaci”.

<sup>19</sup> Ore Agripa, monamona cue cacaja rafuena ñnoticue.  
Jesúdi Jusiñamui Jitona ñnoticue. <sup>20</sup> Damascomo itinomo iena  
nano lloticue. Ie mei Jerusalémo itinomo iena jiai lloticue.  
Diga Judeamo itinomo iena jiai lloticue. Judíuaiñedinomo  
iena jiai lloticue. Lloticue: “Omoi comeciaino iticinona  
meido, Jusiñamui ñbeimo omoi illena. Omoi comeciaino  
iticinona omoi meidua mei, mare rafuena finocana jai”. <sup>21</sup> Ie  
jira judíuai illaicomini Jusiñamui jofomo cuena gaitadimaci.  
Cuen a meineiacadimaci; <sup>22</sup> iadedi Jusiñamui cuena canode.  
Ie jira birui bene iticue. Illaicominimo beno nia lloticue.  
Illaicominiñedinomo jiai nia lloticue. Dama Jusiñamui facaina  
lloraini micoriai ico suille cuegafuena birui lloticue. Dama  
Moisés micori ico suite cuegafuena jiai birui lloticue. Jiaie  
rafuena lloñedicue. <sup>23</sup> Jiaie cuetimaci: “Cristo legi cacajite.  
Fiodaillamona jilloite. Naimiedi nano dofoconi jilloitimie.  
Iemona cai judíuai comini jeacinomona jilloillena uñnoitimaci.  
Iemona judíuaiñedinomo jeacinomona jilloillena uñnoitimaci”. Ie  
jira bie rafuena llocana jaidicue.

*Creyentena Agripa jaillena Pablo jitaila rafue*

<sup>24</sup> Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

<sup>25</sup> Pablo uai ote:

—Uairicoñedicue. Festo, odi cue illaimadio. Cue llucinodi  
uanaicino. Ebona ñai-ñaiacaiñedicue. <sup>26</sup> Agripa cue lloga  
rafuena raise uñnote. Nana bie rafuena naimie jai uñua jira,  
naimie diga marefodo ñaiticue. Bainino suiñede. <sup>27</sup> Ore Agripa  
¿Jusiñamui lloraini cuegafuiaina ñnotio? omo jicanoticue. Iena  
o ñnuana jai uñnoticue.

<sup>28</sup> Agripa dinena uai ote:

—Dallu o ñaiamona, cuena creyentena nibai itataiacadio.

<sup>29</sup> Pablo uai ote:

—Nibai dallu ñaiticue. Nibai are ñaiticue; iadedi cue isoi o  
jaillana jitaidicue. Ua nana cue ñaiana cacadino cue isoi jail-  
lana jitaidicue; iadedi omoi bie lloeo diga maiana jitaiñedicue.

<sup>30</sup> Iemona Agripa naidacaide, Festo diga, Berenice diga.  
Nana raidino jiai naidacaidimaci. <sup>31</sup> Jino jaillano, Pablo  
joreña siadotimaci:

—Bimie jaca buena finoñede, naimiena cai meiniana llo-  
lena. Buena finoñede, cárcelmo illena.

<sup>32</sup> Agripa Festomo llote:

—Naimie cai nanoca illaima ñine jaillana jicanoñedena, ni-  
adedi naimie jino marena oreca.

## 27

*Romamo Pablo jailla rafue*

<sup>1</sup> Italiamo Augusto dine Pablo oretajana Festo llua mei, Pablona jiaie llavecano diga capitámo fecade. Naie capitádi Julio. Augustona mamecirede batallómo jainaiáide.

<sup>2</sup> Adramitiomona bite botemo jaidícaí. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodícaí.

<sup>3</sup> Ie areruido Sidón railla nairaimo ridícaí. Nainomo Julodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote.

<sup>4</sup> Iemei nainomona suiñodícaí. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidícaí.

<sup>5</sup> Cilicia railla enirue ecido jiai jaidícaí. Panfilia railla enirue ecido jiai jaidícaí. Mira railla nairaimo ridícaí. Naie provincia mameci Licia.

<sup>6</sup> Naie bote Roma dine jaiñena jira, capitádi jiaie botena jenode. Capitádi Alejandríamona bite botena baite. Naie bote Italiamo jaiacade. Ie jira naie botemo cai jonecaida, caina uite.

<sup>7</sup> Diga irui fecuise sefuire jaillano, Gnido railla nairai iaireise ridícaí. Aifidi abido caina ati-atina jira, Creta railla uiasimo jaidícaí. Aifi raise iñenanodo Salmón railla nairai dine jaidícaí.

<sup>8</sup> Uiasi iaireise iese sefuicana jaillanona, Maregobe railla illanomo ridícaí. Lasea railla nairai jiai ianori ite.

<sup>9</sup> Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijidinomo Pablo llote:

<sup>10</sup> —Nabaiñiai, cai jaillena eo jacirenana uiñoticue. Eo maraiñeno caimo sefuitícaí. Cai raruiaina nibai faifitícaí. Botena jiai nibai faifitícaí. Cai nibai jiai faifitícaí —llote.

<sup>11</sup> Iese llote; iadedi naie bote piloto oni jaiacade. Naie bote nama jiai oni jaiacade. Capitán iaímaiai llua Pablo llua baifemo ñnote.

<sup>12</sup> Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riitícaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruáide.

<sup>13</sup> Beici dinena aifidi bia, “cai jitailla aifidi bite” raillanona, suiñodícaí. Creta iairei monaillai fuemo jaidícaí.

<sup>14</sup> Ie mei raire cai dine eo riire aifi bite. Naie aifi noci deisoilla dinena bite.

<sup>15</sup> Botena oni uite. Botena atona eronenidícaí. Ie muidona jamai ebena jaidícaí. Aifidi caina iese uite.

<sup>16</sup> Janorede uiasi fuemo aifi raise iñenanomo jaidícaí. Nai uiasi mameci Clauda. Faifiñellena bote ie janorede nocae sefuire a aiñodícaí.

<sup>17</sup> A aiñua mei, rao diga botena ruica maítícaí. Sirte railla conillie illanomo cai joodai raillano, velaiaina duiñodícaí. Iemei aifi jamai uigacai.

<sup>18</sup> Je areruido aifi riire illa jira, cargana oni dotadicaí. <sup>19</sup> Dane ie are bote ie raruaí, cai onollí díga, oni dotadicaí. <sup>20</sup> Díga irui jítoma bainide. Díga irui ucuai jiaí bainide. Aifi eo riire nia ite. Cai jillobiñellemo jai ocuiriñedicaí.

<sup>21</sup> Díga irui cai guiñena mei, Pablo naimacimo llote:

—Nabaiñiaí, cue uaina navui ñnotiomoidena, niadedí bie isoi sefuiñedicaí. Cretamo cai fiebidicaína, bie isoi sefuiñedicaí. <sup>22</sup> Omoi comeciaina ocuiño. Bie botedí faifite; iadedí caimona jaca buna faifiñeite. <sup>23</sup> Jaive naiona Jusiñamui jaienici dí cuemo bairede. Jusiñamuimo jainaíadícue. Naimiena sedadicue. <sup>24</sup> Naie jaienici cuemo llote: “Pablo, jaciruiñeno. Romamo o nanoca illaíma díne iitío. Jusiñamui ona duenaila jira, nana o díga jaidino jilloitímaci”. <sup>25</sup> Je jira omoi comeciaina ocuiño. Cuemo llua isoi, naimiedí bie rafuena suitate. Jusiñamui iena finuana ñnoticue. <sup>26</sup> Nibai uiasimo jutadaiticaí.

<sup>27</sup> Catorce dígarui naío illamona, Adria railla monailaimo jamai cai jaia, naiona daferui facai marineruaidí: “Enirue iaíre ite” raillanona comeciaina facadímaci. <sup>28</sup> Je jira ie afoředinona facadímaci. Veinte brazas aforede. Iemei nano nie dínorí illamona, dane facadímaci. Quince brazas aforede. <sup>29</sup> Nofici illanomo naimaci bai raillano, fairillaíllena, ie jillacimona cuatro lloelluna faitímaci. Mona monaille sedadímaci. <sup>30</sup> Naie facaise marineruai botemona aisiacadímaci. Je jira botemo ite nocaena ana monaillaimo dotadímaci, bote jillacimona lloelluna faia isoi.

<sup>31</sup> Iena ciuano, Pablo capitámo llote. Soldaduaímo jiaí llote:

—Botemo bimaci fiebiñeniadedí, jilloñeitomoi.

<sup>32</sup> Je jira soldaduaídí nocae maía raona jaitadímaci. Jai dínomo nocaena faínonocaidímaci. <sup>33</sup> Nia monaiñenia, Pablo nana caímo llote:

—Guiño. Catorce dígarui illanona, jai guiñedomoi. <sup>34</sup> Je jira guiño, omoi mairillesa. Ua faifiñeitomoi.

<sup>35</sup> Iese naimie raillanona, Jusiñamuimo iobillacinona fecade, nana comíni illa uicomo. Llomenicono tairuano, guite. <sup>36</sup> Nana naimaci comeciái ocuiñocaida, jiaí guitímaci. <sup>37</sup> Botemo doscientos setenta y seis diese iticaí. <sup>38</sup> Cai monillamona, fiebide trigona monaillaimo oni fadodicaí, bote meenaiñellena.

<sup>39</sup> Je oni monaidemo, erodatemo, naie eniruena uiñoñedicaí. Igebemo conillici illana cidicaí. Nainomo jamai ebena sijaicadicaí. <sup>40</sup> Je jira lloelluna nainomo oni faínonocaidicaí. Datarabe maiana suiñodicaí. Vela aífimo sebiñoticaí. Monaillai fuemo enirue díne jai jaidicaí. <sup>41</sup> Iemei jaiciridífomo ridicaí. Eniruemo jodate. Bote muido eniruemo jaiaíre jodate. Eo baguamona jillaci taicosite.

<sup>42</sup> Naimaci iamona jillobi raillano, soldaduai llavecana meineacadimaci. <sup>43</sup> Pablona jillotaiacana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai. <sup>44</sup> Jiaino bote ie rabiçido juicaida icana jai. Jiaino bote ie raruiado juicaida icana jai. —Iese eniruemo nana marena ridicai.

## 28

### *Maltamo naimaci illa rafue*

<sup>1</sup> Jai cai jillua mei, Malta railla uiasimo cai illana uiñotica. <sup>2</sup> Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. <sup>3</sup> Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. <sup>4</sup> Jaio naimie onollido llillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

<sup>5</sup> Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. <sup>6</sup> Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusiñamui.

<sup>7</sup> Naie illanomona uiasi illaima enirue iaie ite. Naimie mamecidi Publio. Caina marena feiñote. Darui amani ie jofomo caina marena itatate. <sup>8</sup> Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate. <sup>9</sup> Bie rafue suilla jira, naimie dine nana uiasimo ite duidino bi-bidimaci. Naimacina jillotate. <sup>10</sup> Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

### *Romamo Pablo rilla rafue*

<sup>11</sup> Daje amani fivui illa mei, Alejandriamona bite botedo jaidicai. Naie uiasimo nana rollime facaiseconi naie bote ite. Mena jusiñamui iaimaiai joreño bote muidomo ite. Damie Cástorna mameciredede. Jiaimie Póluxna mameciredede. <sup>12</sup> Naie botedo oni cai jaillanona, Siracusamo sijidicai. Darui amani nainomo iticai. <sup>13</sup> Nainomona jaillano Regiomo sijidicai. Darui illa mei, aifi beici dinena billa jira, ie areruido Puteolimo ridicai. <sup>14</sup> Sijia mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma dine jaidicai. <sup>15</sup> Romamo nia cai riñenia, nainomo ite creyentiai cai billana fididimaci. Cai dine bitimaci. Foro de Apio



railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiai ocuiñote. Cai diga Romamo jaidimaci. <sup>16</sup> Romamo cai ria, capitán llavecana ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisiñ raillano, daje soldado nainomo naimiena sedade.

*Romamo Pablo llofuia rafue*

<sup>17</sup> Darui amani illa mei, Pablo Romamo ite nanoca judíuaina uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamaci llogacinuaina jaca ñnoticue; <sup>18</sup> iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo ññena jira; <sup>19</sup> iadedi judíuai: “Dama ite” railla jira, cai nanoca illaima dine jaillena jicanoticue; iadedi cue nairai diga jaca iciriñedicue. <sup>20</sup> Omoi diga ññaillena, omoína cioacadicue. Fiodaillamona ico comini jillollena cue llofuecabilla jira, bie lloeo diga maigacue.

<sup>21</sup> Uai otimaci:

—Judeamona jiaino ona cuega cartana jaca feiñoñedicaí. Caimo o rafuena lollena, jaca buna biñede. Bene jaca bu ona jeare ññañede. <sup>22</sup> Ie jira omona naie rafuena cacaacadicaí. Naga illanomo comini o llofuiana uaitajana uiñoticaí. Creyentiaina jeare ññaitimaci. Iena fididicaí. Ie jira caimo iena raise llono.

<sup>23</sup> Naimie dine dane billiruina llotimaci. Ie mei ailuena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui dibeimo naimaci comeciaí iuaina meiduana llofuate. Moisés micori llogacinuaimona, Jusiñamui facaina lloraini micoriaí cuegafuaimona, Jesúna llofuate. <sup>24</sup> Jiaino naimie llofuiana ñnotimaci. Jiaino ñnoñedimaci. <sup>25</sup> Nana naimaci comeciaina daje isoi lloñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatiamo raise llotatate. Omoi usumatiaí micoriaí illa isoi nia itomoi. Isaías micoridi omoína jai cuega rafue jai suide. Naimie micori cuete:

<sup>26</sup> Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>27</sup> Omoi comeciaí jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisñidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona' ”.

<sup>28</sup> Jusiñamui rafuena omoi ñnoñena muidona, judíuainedí nodí Jusiñamui naimacina jilloitaiacanana jai fidídimaci. Naimaci iena cacareitimaci.

<sup>29</sup> Iese naimie llua mei, judíuaidí coniniri siadocana abido jaidimaci.

<sup>30</sup> Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote. <sup>31</sup> Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llofujete. Marefodo llofujete. Naimiedi cai Nama Jesucristo rafuena llofujete. Jaca budi naimie llofuiana rairuiñede. Teofilo, jaca digacino omo jai llotícue. Mai. Lucadicue.

## ROMAMO ITE CRISTONA HNOTINOMO PABLO ORETAGA RABE

### *Romamo ite creyentiaimo Pablo cartana orede*

<sup>1</sup> Romamo ite creyentiai, omoi dine cartana oredicue. Pablodicue. ¿Nigacino? Jesucristo dibeimo maijidicue. Jusiñamui fetocamiedicue. Ie mare rafuena cue llollena, cuena orede.

<sup>2</sup> Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiai cueda. Iemona birui facacabidicai. <sup>3</sup> Bie rafuedi Jusiñamui Jitona llote. Naimie jaie ite usumadi cai illaima David micori. <sup>4</sup> Naimie Jusiñamui Jitonana uiñotacai. Jusiñamui Joreñodi siño rafuedo caina iena uiñotade. Jusiñamui Jito fodaillamona, Jusiñamuidi ie Jitona jillotate. Jusiñamui Jitodi Jesucristo. Cai Nama. <sup>5</sup> Caina duenaillanona, caina oretate, naga nairaiaina naimiena inotallena, naimiena naimaci iobitallena. <sup>6</sup> Naimacimona it-  
omoi. Naimiemo omoi duillena, Jesucristo omoina jai fetode.

<sup>7</sup> Romamo ite creyentiai, Jusiñamui isiruiganodomo. Naimie isoi mareuidinona omoi illena, fetocanodomo. Cai Moo Jusiñamui, cai Nama Jesucristo diga, omoina duenaite. Iena uiñocana mai omoi jai. Iaimaia omoina uri jai itatatiamaia. Iena omoi uiñocana mai omoi jai.

### *Roma dine Pablo jaiacade*

<sup>8</sup> Diga comini, diga illanuaimo, Jesucristona omoi inuana jai fididimaci. Ie jira nano dofoconi omoi facaina Jesucristomo iobillacinona fecaadicue, Jusiñamuimo iena naimie fecallena. <sup>9</sup> Jusiñamuimo cue jia, omoiri jidicue. Jusiñamui iena uiñote. Naimie Jito rafuena cue lluanona, cue comecimona naimiena sedadicue. <sup>10</sup> Jusiñamuimo cue jia, naimiemo jicadicue, cuena canollena. Naimie jitaia, omoi dine ja muidomo cue riiticue. Iena jicadicue. <sup>11</sup> Omoina eo cioadicue. Jusiñamui Joreño uai cuemo illamona, omoi comeciaina ocuiñotaiadicue. <sup>12</sup> Jesucristona omoi inuamona, naimiena cue inuamona, coninina cai comeciaina ocuiñotaiticai.

<sup>13</sup> Cue amatiai, diga icaiño omoi dine jaiacadicue. Iena omoi uiñuana jitaidicue. Jaiacadicue; iadedi nia jainidicue. Cueda Jesucristo rafuena cacajamona, dajerie jiaie nairaijai inotimaci. Omoi dine Jesucristo rafuena lluaiacadicue, iena omoimona dajerie inollena. <sup>14</sup> Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñañedinomo iena jiai lloiacadicue.

Abina uiñotinomo iena lloiacadicue. Abina uiñoñedinomo iena jiaí lloiacadicue. <sup>15</sup> Ie jira omoimo Jesucristo rafuena eo lloiacadicue.

*Jesucristo rafue siño*

<sup>16</sup> Jesucristo rafueri iobidicue. Naie rafuedi siño. Jusiñamuidi naga iena iñotinona naimaci jeacinomona jillotate. Judíuaidino nano iena cacadimaci. Ie mei judíuaiñedino iena jai cacadimaci. <sup>17</sup> Naie rafuemoni Jusiñamui caina feiñuana uiñoticaí. Jusiñamui caina marebicaitajana uiñoticaí. Naimiena cai iñnuamona iena uiñoticaí. Jusiñamui facaina lloraima micori jaie cueda: “Jusiñamuina iñnuamona marebicaidimiedi Jusiñamui díbeimo íco jaca iite” cueda.

*Comini jeacinona fínoiadedi, daní naimaci muidona*

<sup>18</sup> Nana Jusiñamuina jítaiñedinodi naimie duere finollifue anamo jai ítimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. <sup>19</sup> Jusiñamui naimacina naimiena uiñotaja muidona, imaci comeciainona Jusiñamui illana uiñotimaci. <sup>20</sup> Enirue finua facaisemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoí raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicaí” rainidimaci. <sup>21</sup> Jusiñamui uiñotimaci; iadedi naimie uaina iñoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificaiñedimaci. <sup>22</sup> “Abina uiñoticaí” raitimaci; iadedi abina uiñoñedimaci. Jamai ebe isoidimaci. <sup>23</sup> Jusiñamui jaca ite. Naimie uai siño. Naimiena sedaacaiñedimaci; iadedi jiaíe rana sedaacadimaci. Fiodairuide imana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

<sup>24</sup> Ie jira Jusiñamui naimacina fainonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci. <sup>25</sup> Jusiñamui ie uanaicinona jítaiñedimaci. Uanaíñedinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, daní Jusiñamuimo iobillacinona jaca cai fecacabillasa. Uanaicinona lloticue.

<sup>26</sup> Iese naimaci illa jira, naimaci jitailla meirede rafuena finollena, Jusiñamui naimacina fainonocaide. Coniñona aífuedotimaci. <sup>27</sup> Naimaci jitailla jira, conimana

aifuedotimaci. Naimaci marañede finoca rafuemonu duere sefueillemona ibana feiñoitimaci.

<sup>28</sup> Jusiñamuina naimaci uiñoiacañena jira, marañede rafuemo naimaci comeciái facallena, Jusiñamui naimacina fainonocaide. Naimaci finorainiga rafuiaina finocana jaidimaci. <sup>29</sup> Naga isoide marañedicinona finouidimaci. Naga isoide jearedicinona finouidimaci. Jiaie comini rana nicidouidimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci. <sup>30</sup> Jiaie comini joreña ñaïoidimaci. Jusiñamuina jaca gaiñedimaci. Cominina jeare ñaïoidimaci. Abina iedouidimaci. Abina biruidimaci. Diga jearede rafuemo comeciaina facauidimaci. Naimaci moo uaina ñnorainidimaci. Naimaci ei uaina ñnorainidimaci. <sup>31</sup> Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiaï dueruirainidimaci. Iese jaisoidimaci. Iese nia jaicabidimaci. <sup>32</sup> Jusiñamuidi jiaie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui lluna uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

## 2

### *Jusiñamuidi marañede rafuena finodinona duere finoite*

<sup>1</sup> Ero, omoi judíuaimona damie comecina nibai facade: “Bie isoide marañede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide marañede rafuena naimie finua jira, Jusiñamui naimiena jiaï duere finoite. <sup>2</sup> Jusiñamuidi uanaicinona uiñuamona, marañede rafuena finodimiena duere finoite. Iena uiñoticaï. <sup>3</sup> “Jusiñamui duere finollicino anamona jilloñeitimaci” comecina facade. Naimacimo o comecina o facaja isoi, naimaci isoi o finua jira, Jusiñamui ona jiaï duere finoite. <sup>4</sup> Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie díbeimo o illana naimie jitaide. Naiena jamaiño. <sup>5</sup> O comeci jiaïarena jira, o comeci Jusiñamui díbeimo meidoiacañedio. Ie jira íco eo duere sefuitio. Ie ricailifuemona Jusiñamuidi nana naimiena ñnoñedinona duere finoite. Iena Jusiñamui finoa, Jusiñamuimona mare. <sup>6</sup> Nagamíai imaci finua ille dinori Jusiñamui naimacina duere finoite. <sup>7</sup> “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania,

naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. <sup>8</sup> Maraiñede rafuedo jaidino Jusiñamui duere finollicino anamo iitimaci. Dani imaci abina isirutimaci. Uanaicinona inoñedimaci. <sup>9</sup> Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinom cominina jiai duere finoite; <sup>10</sup> iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite, <sup>11</sup> naga nairaina daje isoi naimie finua jira.

<sup>12</sup> Judíuaiñedinodi Moisés micori llogacino anamo inedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci inoñena jira, jiai jaca daje isoi duere sefuitimaci. <sup>13</sup> Moisés micori llogacinona cacajamona, Jusiñamuimona jaca buna marebicaiñede; iadedi iena inuamona marebicaide. <sup>14</sup> Judíuaiñedinodi Moisés micori llogacino anamo inedimaci; iadedi naimaci comeciai facajamona, marecinona finuana uiñotimaci. Marecinodo jaillana jiai uiñotimaci. <sup>15</sup> Moisés micori llogacino anamo naimaci illa isoi, naimaci comeciainona marecinona naimaci finoiadedi, iena uiñotimaci. Ie jira maraiñedicinona naimaci finoiadedi, iena jiai uiñotimaci. <sup>16</sup> Biena llofuecabiticue. Ico Jusiñamui llua jira, Jesucristodi cominimo imaci comeciaino iticinona juez isoi lloite. Maraiñedicinona finouidinomo duere finollicinona lloite. Marecinona finouidinomo duere finollicinona lloñeite.

*Moisés micori llogacinodo judíuai comini raise jaiñedimaci*

<sup>17</sup> Abina iedumona, omoimona damierie raitomoi: “Judíuai imacidicai. Moisés micori llogacino anamo cai illa jira, duere finollicinomona jilloiticai. Jusiñamui cai diga ite” raitomoi. Iena omoi raillamona, abina iedotomoi. <sup>18</sup> Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi. <sup>19</sup> Jusiñamuina uiñoñedinona llofueiacadomoi. Naimiena naimaci uiñoñena jira, jitiñedinomo itimaci isoidimaci. Uanaicinona naimacimo omoi luamona, naimaci comeciaina lligaiñoiacadomoi. Naimacina uanaicinona uiñotaiacadomoi. <sup>20</sup> Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi. <sup>21</sup> Jiaie cominina llofueiacadomoi; iadedi ¿niese omoi comeciaino fueoiacaiñedomoi? “Rana fiñeno” llotomoi; iadedi fiñdomoi. <sup>22</sup> Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi

naie ra illanuaimona naie jiraraina fiidomoi. <sup>23</sup> Moisés micori llogacinori abina iedotomoi; iadedi iena omoi inoñena jira, Jusiñamuina jeare finodomo. <sup>24</sup> Iena Isaías micori jaie cuete: “Omoi muidona judíuaiñedinodi Jusiñamuina jeare ñaitimaci” cuete.

<sup>25</sup> Jusiñamui dibeimo jai omoi illana jiaie comini uiñollena, omoi abina detatatomoi. Moisés micori llogacinona omoi inoiadedi, omoi abina detatajadi mare; iadedi naicinona omoi inoñenia, abina detatañedino isoi jai itomoi. Jusiñamui dibeimo inedomoi. <sup>26</sup> Moisés micori llogacinona judíuaiñedino inoiadedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci. <sup>27</sup> Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judíuaiñedinodi inua jira, Moisés micori llogacinuai omoi inoñena jira, Jusiñamuimona omoi baifemo uaidimaci. <sup>28</sup> Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi; <sup>29</sup> iadedi omoi comeciai marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciai marena illa jira, Jusiñamui cominidomoi. Raise naimiena inotinodi cominimona iobillacinona feiñuana jitaiñedimaci; iadedi Jusiñamuimona iobillacinona jitaiddimaci.

### 3

<sup>1</sup> Bie cartana omoi feiñuanona, iena facallemona, damierie comecina facaite: “Judíuaidicai; ia naiemona, ¿niese jiaie comini baifemo faiticai? Cai abiaina detataticai; ia naiemona jaca buena oñedicai”. <sup>2</sup> Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena lloite. Jiaie cominimo lloñede. <sup>3</sup> Cai cominimona dajerie Jusiñamui rafuena inoñedimaci; iadedi Jusiñamuidi ie lloga rafuena jaca finode. <sup>4</sup> Comini tainona llotimaci; iadedi Jusiñamuidi uanaicinona jaca lloite. David micori iena jaie lloite:

O lloga uaimona uanaicinona o louillana uiñotícaí.

O finoca rafuena jiaie comini uaitaia, o dinena jaca anafenodio.

Iena uiñotícaí.

<sup>5</sup> Dane damierie comecina facaite: “Jusiñamuidi mareuidimie. Cai baifemo uaide. Cai marañediciona cai finuamona caina Jusiñamui jitaia, jiaie cominidi Jusiñamui jaca mareuillana uiñoitimaci. Cai illa muidona Jusiñamuina iese uiñoitimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci; <sup>6</sup> iadedi

iese iñede. Cai jeacino facaina caina duere finoñeniadedi, Jusiñamuidi jiaie cominina jiaie duere finonite.

<sup>7</sup> Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. <sup>8</sup> Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, maraiñedicinona finocana cai jailla’”. Iese cue lloñena jira, Jusiñamui naimacina duere finoa, cuemona mare.

*Jeacinona nana cai finodicaí*

<sup>9</sup> Judúuaidicaí; iadedi jeacinona nana comini finua jira, jiaie nairai baifemo faiñedicai. Judúuaidicaí; iadedi jeacinona finodicaí. Judúuaiñedinodi jeacinona jiaí finodimaci.

<sup>10</sup> Jusiñamui facaina lloraini micoriai iena jaie cuete: Marebicaidino jaca iñede. Nana comini maraiñedimaci.

<sup>11</sup> Jaca buna Jusiñamuina raise uiñoñedimaci. Naimiena raise uiñoiacaiñedimaci.

<sup>12</sup> Mare rafuedo nana jaiñedimaci. Maraiñedicinona finooidimaci.

Jaca buna marecinona finoñedimaci.

<sup>13</sup> Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

<sup>14</sup> Naimaci fuaí eo borede.

<sup>15</sup> Icirillamona jiaie cominina raire meinetimaci.

<sup>16</sup> Níne naimaci jaia, diga maraiñede rafuena comuitatimaci.

<sup>17</sup> Uri illana uiñoñedimaci.

<sup>18</sup> Jusiñamuina jaciruiñedimaci

jaie iese cuete. <sup>19</sup> Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, daní abí imaci riidolle uai iñede. Nana comini Jusiñamui duere finollicino anamo itimaci. Iena uiñoticaí. <sup>20</sup> Moisés micorí lloga uaina iñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

*Jesucristona cai iñnuamona jillobidicaí*

<sup>21</sup> Jusiñamuidi birui caina marebitatajana jai uiñotade. Moisés micorí lloga rafuedo iena birui uiñoñedicai; iadedi Moisés micorí iena jaie llote. Jusiñamui facaina lloraini micoriai iena jiaí llotimaci. <sup>22</sup> Jesucristona cai iñnuamona, Jusiñamuidi caina marebicaitate. Nana Jesucristona iñnotinona marebicaitate. Nie isoide cominina cai ia, caina marebicaitallena, caina daje isoi feiñoite. <sup>23</sup> Nana caidi jeacinona finodicaí. Jusiñamui caina jitailla isoi, marena iñedicai. <sup>24</sup> Caina naimie duenaillamona, naimie jitailla jira, Cristo Jesúna cai iñnuamona, caina marebicaitate.



25 Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiena uiñoticaí.

26 Naimiena iese oretajamona, Jesúsna ñnotimiena Jusiñamuidi marebicaitaja jira, Jusiñamuina mareuidimiena uiñoticaí.

27 Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai ñnuamona, jillobidicaí. Ie jira cai finoca rafueri abina iedoñedicaí. 28 Moisés micori lloga uaina cai ñnuamona, marebicaiñedicaí; iadedi Jesucristona cai ñnuamona marebicaidicaí.

29 Jusiñamuidi dani judúuai imaci Mooñede; iadedi naimiedi nana comini imaci Moo. 30 Cai Moodi jaca damiena jira, naimiena naimaci ñnua jira, judúuaina marebicaitate. Naimiena naimaci ñnua jira, judúuaiñedinona jiai marebicaitate. 31 Cai ñnuamona cai marebicailla jira, Jusiñamui facaina lloraini micoriai jaiie lloga uaina caitañedicaí; iadedi iena ua ñnocana jaidicaí.

## 4

### *Abraham micorimona fueoticaí*

1 Abraham micori rafuena ja ñaiacadieue. Naimie marebicaillafuena omoimo lloiacadieue. 2 Ie finoca rafuemono naimie micori marebicaidena, naimie micori abina iedote; iadedi ie finoca rafuemono naimie micori marebicaiñede. Ie jira Jusiñamuimono naimie micori abina iedoiacaiñede.

3 Iena Moisés micori jaiie cuega: “Jusiñamuina Abraham micori ñnua jira, Jusiñamuidi naimie micorina jeacinona jaca finoñedimiena isoitate. Naimie micorina marebicaitate” cuega. 4 Maijillena buna damie ocuiadedi, ibajana jamaí fecañeite; iadedi maijia facaina fecaite. 5 Ero, ie maijiamona jaca bu jeacinona jaca finoñedimiena isoicaiñede. Jusiñamuina naimaci ñnua jira, Jusiñamuidi maraiñedinona marebicaitate.

6 Bie rafuena David micori jiai jaiie cuega: Ie maijiamona bu marebicaiñena jira, Jusiñamui marebicaitagamiEDI iocire iite.

7 Naimaci maraiñedinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

8 Naie jeacino Jusiñamuidi comecina dane facañeite.

Naimiedi jai feitaite.

Ie jira iocire iitimaci.

9 Dani abina detatatino iocire illena lloñede; ia abina detatañedinomo iena jiai lloite. Jusiñamuina Abraham micori

ñnua jira, Jusiñamui naimiena marebicaitate. <sup>10</sup> Naimie micori abina nia detatañenia, naimie micori marebicaide. <sup>11</sup> Naimie micori marebicailla mei, Jusiñamui dinena Abraham micorimo abi detatajana llote. Abraham micori ie abina detatajamona, Jusiñamuina naimie micori ñnuana uiñoticaí. Ie abina detatajamona, judío imiena jai jaide; iadedi Jusiñamuina ñnuamona, naimie micori marebicaide. Ie jira Abraham micoridi nana Jusiñamuina ñnotino moo. Nana comini abiaina detatañedimaci; iadedi naimaci ñnua jira, Jusiñamui naimacina marebicaitate. <sup>12</sup> Cai comini abiaina detatatimaci; iadedi cai moo Abraham micori isoi naimaci ñnua jira, Abraham micori isoi marebicaidimaci. Ie jira Abraham micori nana naimaci moo.

*Abraham micori ñnuamona, Jusiñamui lloga uaidi suide*

<sup>13</sup> Abraham micorimo Jusiñamuidi: “Nana enirue omo iiticue” llote. “O uruiaimo iena jiai iiticue” llote. Moisés micori llogacinona Abraham micori ñnua jira, iese Jusiñamui lloñede; iadedi Jusiñamui lloga uaina Abraham micori ñnua jira, iese Jusiñamui llote. Abraham micori ñnua jira, Jusiñamuidi naimiena marebicaitate. <sup>14</sup> Moisés micori lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiena ñnotinomo: “Nana eniruena omoimo iiticue” llote. <sup>15</sup> Moisés micori lloga uaina naimaci raise ñnoñenia, Moisés micori lloga uaido jaidino Jusiñamui ricacillifue anamo itimaci; iadedi Moisés micori lloga uai iñedena, Jusiñamuimona buna duere sefuiñeite.

<sup>16</sup> “Eniruena omoimo iiticue” naimiena ñnotinomo Jusiñamuidi llote. Duenaillamona llote. Nana Abraham uruai micoriaimo iena llote. Dani Moisés micori lloga uaido jaidinomo lloñede; iadedi Abraham isoi ñnotinomo jiai llote. Abraham micori isoi cai jailla jira, naimiedi cai moo. <sup>17</sup> Jusiñamui iena jaie llote: “Ona diga nairai imaci moona jai itataiticue” llote. Jusiñamui fiódaitinona jilloitarede. Nia iñede rana ie uaido jiai comuitate. Ie jira Jusiñamui Abraham micorimo llua isoi, suide. Jai fiódaitino illa isoi Abraham micori abi illa jira, Jusiñamui naimie abina mairitate. Ie ai oiniñomo urue comuillena llote.

<sup>18</sup> Jusiñamui Abraham micorimo jiai llote: “Ailluena uruai omo iite. Diga nairai omona jebuite” llote. Abraham micoridi naie ñnorainiga rafuena ñnote. <sup>19</sup> Jaca ñnote; iadedi cien años naimie micorimo illamona, naimie jai eeiroma. Naimie micori aidi, Sara micoridi, oiniñona jira, naiñaiño uruedi comuiñede. <sup>20</sup> Abraham micoridi Jusiñamui llua ñnote. ñnocana jaillano, iobillacinona Jusiñamuimo fecade.

<sup>21</sup> Abraham micoridi Jusiñamui lloga uaina finuana eo ñnote.  
<sup>22</sup> Ie jira Jusiñamui naimiena marebicaitate.

<sup>23</sup> Naie rafue jaie cuela; iadedi dama Abraham micorimo duiñede; <sup>24-25</sup> iadedi caimo jiai duide. Jusiñamuina ñnotinona marebicaitate. Cai Nama Jesús fodaillamona, Jusiñamuidi naimiena jillotate. Cai jeacino facaina fodaite. Caina marebicaitallena, naimiena jai jillotate.

## 5

### *Jai cai marebicaidicai*

<sup>1</sup> Jusiñamuina cai ñnuamona cai marebicailla jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. <sup>2</sup> Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicai; <sup>3</sup> iadedi duere cai sefuiadedi, jiai iobidicai. Duere sefuillamona, cai comeciai ocuiñocana cai jaillana uiñoticai. <sup>4</sup> Cai comeciai ocuiñuamona facacifidicai. Facacifillamona, Jusiñamuimo ocuridicai. <sup>5</sup> Jusiñamui caina isiruilla jira, tainomo ocuriñeiticai. Ie Joreñona caimo fecade. Ie Joreño cai comeciaino illa jira, ie Joreñodo Jusiñamuidi caina naimie caina isiruillana uiñotade.

<sup>6</sup> Cai jeacinomona dani jillonidicaino, Cristo cairi fodaite. Maraiñedicai; iadedi naie facaiseconi cairi fodaite. <sup>7</sup> Maraiñedimie facaina caimona jaca buna fodaiaicaiñede. Caimona nibai damie maremie facaina fodaite; iadedi nana comini iese fodaiaicaiñedimaci. Maraiñedimie facaina jaca buna fodaiaicaiñede; <sup>8</sup> iadedi nia maraiñedicaino, Jusiñamui caina isiruillamona, Cristo cairi fodaite. <sup>9</sup> Cristo cairi fodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. <sup>10</sup> Cai dinena Jusiñamuina cai enoilla facaiseconi naimie Jito cairi fodailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñoticai. <sup>11</sup> Cai Nama Jesucristo muidona, Jusiñamuidi iobidicai. Cristo muidona Jusiñamui diga uri iticai.

### *Adán micori finoca rafue*

<sup>12</sup> Bie rafue jai suide. Adán micori jeacinona finuamona, nana caimo jeacinodi jai comuide. Jeacino caimo illa muidona, cai jeacino ite diga nana fodaicana jaidicai. <sup>13</sup> Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede. <sup>14</sup> Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fodaicana jaidimaci. Adán micori isoi jeacinona finoñedimaci; iadedi fodaicana

jaidimaci. Adán micoridi Cristo isoiñede. Adán micori finoca rafuemonajacino comuide. Cristo finoca rafuemonajusiñamui caijeacinona oni dotade.

15 Adán micori finoca rafuedi Jusiñamui finoca rafue isoiñede. Adán finoca rafuemonajacino ite diga nana caifiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, caidine Jesucristona orede, nana caijilloillena. 16 Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicai; iadedi marebicaidicai. 17 Dama Adán micori jeacinona finuamona, caijeacino ite diga nana caifiodaicana jaidicai. Jusiñamui caina eoduenailamona, Jusiñamui caina marebicaillamona, dama Jesucristo muidona, Jusiñamui diga jaca iitica.

18 Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemonajusiñamui diga naimiaci jaca illena, nana comini marebicairedimaci. 19 Adán micori Jusiñamuina ñnoñenamona, nana comini jeacinona finodimaci. Jesucristo Jusiñamuina ñnuamona, ailluena comini marebicaitimaci.

20 Jusiñamui Moisés micorimo rafuena lloste. Iena comini ñnoñenamona, diga jeacinona naimiaci finuana uiñotimaci. Jeacinona finocana jaidimaci; iadedi Jusiñamuidi naimacina eoduenaitate. 21 Jeacino anamo jaie nana cailla jira, caijeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira caimarebicaillamona, ca>Nama Jesucristo muidona, Jusiñamui diga jaca iitica.

## 6

### *Jesucristomo caiduillamona, jeacino anamo jai iñedicai*

1 Jeacino anamo jai iñedicai; iadedi omoimona damierie comequina facaite: “Naga icaiño jeacino caifinoia, caina Jusiñamui duenaillamona, caijeacinona oni dotade. Naimie caina duenaicabillana raise caiuñollena, jeacino eofinocana jaiticai. Iemona caijeacinona oni dotajamona, naimie caina duenaillana eoraise uiñoitica”. 2 Iese comequina facañeno. Jeacino anamo jai caañena jira, jeacinona finocana caijañena. 3 Biena uiñotomoi. Cristo Jesús dibeimo caillamona, nana caidi bautizagacai. Cristo fiodailla jira, caicomeciamos ite jearedicino anamo jai iñedicai. 4 Cristo fiodailla jira, raiafomo naimiena jonetimaci. Cristo fiodaillamona ie Moo

uaido jillode. Naimie díbeimo cai illamona, cai jeacino anamona jillodícai. Cai comeciáimo jáie rafue birui illa jira, jáie rafuedo jai jaidícai.

<sup>5</sup> Cristo fiodaite; iadedí naiemona jillode. Naimie díbeimo cai illanona, cai comeciáimo ite jearedicino anamona cai jillua jira, Cristo ie mare rafue anamo birui itícai. <sup>6</sup> Cristo fiodailla jira, cai comeciáimo ite jearedicino anamo jai iñedícai. Caimo jai jáinaiaíñena jira, jeacino finocana cai jáiñena. <sup>7</sup> Jeacino anamo jai cai iñena jira, jeacinona finocana cai jáiñena. <sup>8</sup> Cristo fiodaite; iadedí jillode. Naimie fiodailla jira, cai jearedicino anamo jai iñedícai. Naimie jillua jira, jáie rafuedo birui jaidícai. <sup>9</sup> Fiodaillamona Cristo jillua jira, naimiedí dane fiodaiñeite. Naimie fiodaitemo, cai jeacino facaina naimiedí jai fiodaite. Jai dane fiodaiñeite. <sup>10</sup> Jeacino facaina jeacinona oni dotallena, naimie dacaiño fiodaite; iadedí ie Moona jaca iobitajanona, naimie ie Moo díbeimo jaca iite. <sup>11</sup> Ie jira jeacino anamo iñenanomo omoi comeciáina faca. Cristo Jesús díbeimo jai omoi illanona, Jusiñamui jitailla rafuena finollemo omoi comeciáina faca.

<sup>12</sup> Jeacinona finocana jáiñeno. Omoi comeciáí jeacinona finoacania, iena ñinoñeno. <sup>13</sup> Jeacinona omoi finoñellena, omoi comeciáina ocuiño. Mare naimie jitaillacinona omoi finollena, Jusiñamuina ñino. Jeacino anamo jáie omoi illa jira, naimiemo omoi nia duiñena jira, Jusiñamuimona fiodaitino isidomoi; iadedí jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodíno isidomoi. Jáie naimiemo duiñedomoi; ia birui naimiemo jai duidomoi. <sup>14</sup> Moisés llogacínuaí anamo omoi jai iñena jira, jeacino anamo jai iñedomoi. Jeacinona finocana omoi jáiñellena, Moisés micorí llogacínodo jáiñedomoi; iadedí jeacino omoi finoñellena, omoína Jusiñamui duenaillamona, naimie omoína birui canocabide.

### *Patrón anamo itinomona cai fueolle*

<sup>15</sup> Moisés micorí llogacino anamo jai iñedícai; iadedí omoimona damierie comecina facade: “Moisés micorí llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jáiñena. <sup>16</sup> Biena uiñotícai. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. <sup>17</sup> Jeacino anamo jáie itomoi. Iemei omoimo jáie comíni Jesucristo rafuena

jai llotimaci. Iena cacajanona, iena raise inotomoi. Ie jira Jusiñamui iobillacinona fecadicue. <sup>18</sup> Jeacino anamona jai jillobillamona, marecinona finocana jai jaidomoi.

<sup>19</sup> Cue llwana omoi raise cacaillena, bie isoide rafuena lloticue. Omoi comeciai railla jira, jeacinona navui finodomoi. Marañedicinona finocana navui jaidomoi. Cristo dibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoi.

<sup>20</sup> Jeacino anamo navui omoi ia, Jusiñamui jitailla isoi, marecinona finoñedomoi. <sup>21</sup> Jeacinona navui omoi finuamona mare rafuena oñedomoi. Ie jira iena birui meiruitomoi. Jeacinona finocabidino fodaillamona, Jusiñamui illanomo ico iñeitimaci. <sup>22</sup> Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi. <sup>23</sup> Jeacinona finocana omoi jaia, omoi jeacino ite diga fodaitemoi. Jusiñamui illanomo ico iñeitomoi; iadedi cai Nama Jesucristona omoi inuamona, Jusiñamuidi omoina jaca itataite. Naimie illanomo ico iitomoi.

## 7

### *Inirede riñomona cai fueolle*

<sup>1</sup> Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fodailla mei, jaca buna Moisés micori llogacinuai anamo iñede. Ie fodailla mei, jai iñena jira, nainomo duiñede. <sup>2</sup> Ie isoide. Nana naimie ille dinori, inirede riño ie inimo duide. Iese Moisés micori jaie llote. Ie ini fodailla mei, ie inimo jai duiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuimona mare. <sup>3</sup> Ie ini nia fodañenia, jiaimie diga naiñaiño ia, ie ini abimo jeacinona jai finode, Moisés micori lloga uai naiñaiño inoñena jira. Ie ini fodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

<sup>4</sup> Ie isoide. Cristo fodailla jira, Moisés micori llogacinuai anamo jai iñedicaí. Iemo jai duiñedicaí. Ie jira Cristomo jai duidicaí. Jusiñamui jitailla rafuena finocana cai jaillena, fodaillamona Cristo jai jillode. <sup>5</sup> Jusiñamuina nia cai inoñenia, cai jitailla rafuena finocana jaidicaí. Moisés micori llogacinona uiñoticaí; ia cai marañede jitailla rafuena finocana jaidicaí. Cai jeacino ite diga fodaicana jaidicaí; <sup>6</sup> ia Moisés micori llogacino jai saide. Caímo jai duiñede. Navui ie anamo iticaí; iadedi birui ie anamo jai iñedicaí. Jusiñamuina cai

sedajamona, Jusiñamui Joreño rafuedo jai jaidicai. Moisés micori ciegafuiaido jai jaiñedicai.

*Cue comecimo ite maraiñedicino*

<sup>7</sup> “Moisés micori llogacino maraiñede” lloñeticai; iadedi naie llogacino iñedena, jeacinona uiñoñedicue. Jai miemo ite rana cue niciduana maraiñenana jaie uiñoñedicue. Moisés micori jaie llote: “Jai miemo ite rana nicidoñeno” llote. Ie jira naiemona niciduanana maraiñenana uiñoticue. <sup>8</sup> Naie llogacino muidona cue comeci jeacinona finoacade. Ie muidona rana nicidotiecue. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai. <sup>9</sup> Moisés micori llogacinona nia cue uiñoñenia, caimare uri itiecue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. <sup>10</sup> Nano cue comecina facadicue: “Naiedo cue jaillamona, Jusiñamui diga ico jaca iitiecue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede. <sup>11</sup> Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona otiecue. Naimie dibeimo Moisés micori llogacino cuena itatañede; ia naimie dibeimona cuena itatate.

<sup>12</sup> Iese ite; iadedi Moisés micori llogacinodi mare. Jusiñamuimona ite. <sup>13</sup> Naie llogacino mare. Naie rafue muidona fioidañeticue; ia jeacino muidona fioidatiecue. Jeacinona cue finua jira, Jusiñamui illanomo ico jaca iñeticue. Naie mare llogacinomona jeacino cue finuana eo maraiñenana uiñoticue.

<sup>14</sup> Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana itiecue. <sup>15</sup> Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidiecue. <sup>16</sup> Cue maraiñede finoacaiñega rafuena cue finoiade, Moisés micori llogacino marenana uiñoticue. <sup>17</sup> Cue comeci iena dama finoñede; iadedi cue comecimo ite jeacino cuena finotate. <sup>18</sup> Cue comecimo marecino iñede. Mare rafuena finoacadiecue; iadedi iena finonidiecue. <sup>19</sup> Cue mare finoacaga rafuena finoñedicue; iadedi cue maraiñede finoacaiñega rafuena finodiecue. <sup>20</sup> Cue finoacaiñega rafue cue finoiade, cue comeci iena dama finoñede; iadedi cue comecimo ite jeacino cuena iena finotate. <sup>21</sup> Biese cuemo suicabide. Mare rafuena cue finoacaniadedi, jeacinona finocabidiecue. <sup>22</sup> Cue comeci Jusiñamui lloga uaina gaide;

23 iadedi cue comecimo maraiñede rafuena illana uiñoticue. Cue comecina namataacade. Cuen a jeacinona finotaiacade.

24-25 Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabilasa.

## 8

### *Jusiñamui Joreño cai comeciaina namatacana cai jailla*

1 Cristo Jesús mo duidinodicai. Ie jira Jusiñamuidi caina duere finoñeite. 2 Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi naiemona Jusiñamui Joreño caina jai jillotate. Jesucristomo cai duillanona, caina jaca itataite. 3 Moisés micori llogacinona cai raise ñnoñena jira, jeacinomona dan jillonidicai. Ie jira Jusiñamuidi ie Jitona orede, ñmana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fiodaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate. 4 Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

5 Cai comecimo ite maraiñede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai. 6 Maraiñede jitaillacinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. 7 Jiaño Jusiñamuina enoidimaci. Jusiñamui lloga uaina jitañeidimaci. Iena ñnonidimaci. 8 Iese itino Jusiñamuina iobitanidimaci.

9 Iese iñedomoi; iadedi Jusiñamui Joreño mo jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede. 10 Jeacinona omoi finua jira, fiodaítomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. 11 Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodaíade, Jusiñamuidi ie Joreño uaido omoi abiaina jiai jillotaite.



<sup>12</sup> Cue amatiai, iese caimo suite. Ie jira cai comeciaino ite marañedicinodo cai jaiñelli. <sup>13</sup> Naicinodo cai jaia, Jusiñamui illanomo ico jaca iñeiticai; iadedi Jusiñamui Joreño di caina canuamona, naicino anamona cai jilluanona, Jusiñamui illanomo ico jaca iiticai.

<sup>14</sup> Nana Jusiñamui Joreño namatadinodi Jusiñamui uruiai. <sup>15</sup> Jusiñamui Joreño na feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruñedomoi. <sup>16</sup> Cai comeciaina Jusiñamui Joreño uiñotajamona, cai comeciainona Jusiñamui uruiaidicaina jai uiñoticai. <sup>17</sup> Naimie uruiaidicaina jira, ie uruiaimo feacaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticai.

<sup>18</sup> Biena uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira. <sup>19</sup> Iese cai illemo nana Jusiñamui finoca radi iocire birui ocuridimaci. <sup>20</sup> Nana enruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci, <sup>21</sup> naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fioidañeitimaci. <sup>22</sup> Biena uiñoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci. <sup>23</sup> Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uiñoticai. Monamo Jusiñamui uruiaina ico cai illemo ocuridicai. Cai fioidaia, fioidaillamona cai abiaina jillotaite. Jiaifo eruaite cai abiaimo meidollemo ocuridicai. Ie mei cai abiai dane fioidañeitimaci. <sup>24</sup> Naiemo cai ocurillamona, cai jeacinomona navui jillobidicai. Bumo ie jitaile ra ia, iemo naimie ocuriñede. Ie feiñoñega ramo ocuride. Ie isoidemo ocuridicai. <sup>25</sup> Caimo suiñede rafuemo cai ocurilla jira, iemo fecuise ocuridicai.

<sup>26</sup> Birui duere cai sefuia, ico marena cai illemo ocuridicai. Jusiñamui Joreño caina jiai canode. Jusiñamuimo cai jiaa, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote. <sup>27</sup> Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

*Jusiñamui caina isiruite*

<sup>28</sup> Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uifnoticai. <sup>29</sup> Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena. <sup>30</sup> Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iiticai.

<sup>31</sup> Iese caina itataja jira, Jusiñamuidi cai facaina illa jira, bu cai facaina iñellena, damamai iesedicai. <sup>32</sup> Jusiñamuidi ie Jitona duere sefuillamona jillotañede; iadedi namie jitailla jira, cai facaina ie Jitona orede, cairi fiodaillena. Ie muidona naimie dibeimo marena cai ille rafuena caimo jiaie iite. <sup>33</sup> Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. <sup>34</sup> Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. <sup>35</sup> Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meineia, Cristo caina nia isiruite. <sup>36</sup> Iena Jusiñamui facaina lloraima micori jaie cuega:

Jusiñamui muidona caina jaca meinetimaci, mercadomo toica llaudaia fallena illa isoi cuega. <sup>37</sup> Cristo caina isiruilla jira, caina naimie canuamona, naga bie isoide rafue caimo sua, cai comeciai ocuiñocana cai jailla. <sup>38</sup> Jusiñamui caina isiruite. Naimiemona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaide, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomona caina baironide. <sup>39</sup> Monamo ite radi Jusiñamui isiruillacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai Nama Cristo Jesúmo cai duilla jira, Jusiñamui caina isiruillana uifnoticai.

## 9

*Jusiñamuidi judíuai raila cominina fetode*

1-2 Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñoticue. Cue cominiri sunaiticue. <sup>3</sup> Cue comini Cristo rafuena ñinoiacañedimaci. Ie muidona Jusiñamui riicailifue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiai. <sup>4</sup> Israel railla cominidimaci. Jiaicidi judiua railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodimaci. Iena naimaci ñinollena, Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote. <sup>5</sup> Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

<sup>6</sup> Cai cominimo Jusiñamuidi ie uaina llote; iadedi nana cai comini iena ñinoñena jira: “Jusiñamui ie lloga uaina finoñede” raiñeiticai. Jusiñamuina naimaci raise ñinoñena muidona, nana Israel micorimona comuide cominidi Jusiñamuimo duiñedimaci. <sup>7</sup> Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruiai”. <sup>8</sup> Naie llumona nana Abraham micorimona comuidinona ie uruiañenana uiñotica. Jusiñamui lloga uaina ñnotinodi naimie ua uruiai. <sup>9</sup> Jusiñamuidi Abraham micorimo jaie llote: “Jiaie año bie facaiseconi o dine abido biiticue. Naie facaiseconi o ai Saradi jitona jocoite” llote. Ie mei iese suide.

<sup>10</sup> Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaimaiai micorina jocode. Nano doforamiedi Esaú micori. Jiaimiedi Jacob micori. <sup>11-13</sup> Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraïma micori Jusiñamui llumona jiai cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaimaiai micori nia jeicñenia, iaimaiai micori marecinona nia finoñenia, iaimaiai micori marañedicinona nia finoñenia, Jusiñamuidi iaimaiai micorina iese llote. Ie finoca rafuemona Jacob micorina fetode; iadedi Jusiñamui jitailla jira, Jacob micorina fetode.

<sup>14</sup> “Jusiñamuidi dama Jacob micorina fetuana marañede” raiñeiticai. Jusiñamuidi marañedicinona jaca finoñede. <sup>15</sup> Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote. <sup>16</sup> Comini naimiena

jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite. <sup>17</sup> Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uiñollena, nana cominido cue mameci sorillena”.

<sup>18</sup> Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiema ñnotañede.

<sup>19</sup> Nibai comeciaina facadomoi: “Cominina iese Jusiñamui itataia, ¿bue ñellena naimacina duere finoacade?” <sup>20-21</sup> Iese comeciaina facañeno. ¿Niese nainona naimiemo ducañtomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. <sup>22</sup> Ie isoide. Nana comini dajena eruaiñedicaí. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaí uiñotaacade; iadedi naimacina nia duere finoñede. <sup>23</sup> Cominina Jusiñamuidi jiaí duenailla jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate. <sup>24</sup> Jusiñamui caina iese itatate. Da judíuaina iese itatañede; ie iadedi judíuaiñedinona jiaí iese itatate. <sup>25</sup> Jusiñamui iena jaie lluana Oseas micori jaie cuete:

Cue cominiñedinodi cue cominina jaitimaci. Isiruiñeganona isiruiticue.

<sup>26</sup> Dane jiaí cuete:

Navui cue cominiñedomoi; iadedi jiaie comini omoina icolloitimaci: “Naimacidi jaca cajede cai Jusiñamui ie uruiaidimaci” lloitimaci

cuete. <sup>27</sup> Isaías micori railla lloraíma jaie cuete: “Monailai fuemo conillie eo ite. Ie isoi Israel micori uruiái eo jebuitimaci; iadedi Jusiñamuidi nana naimacina jillobitañeite. Dajeriena jillotajanona, <sup>28</sup> jiaínomo ie lloga uaina raire finoite. Naimacina duere finoite” cuete. <sup>29</sup> Isaías micori jiaí cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiaí jaie cuenode.

Naimaci micoriái isoi iñedicaí, nana cai cominina naimiedi duere finoñena jira.

### *Judíuidi Cristo rafuena jitañedimaci*

<sup>30</sup> Biemo comeciaina faca. Judíuaiñedinodi Jusiñamui jitailla isoi, marena illana navui uiñoiacaiñedimaci; iadedi iena jai uiñotimaci. Jesucristona naimaci ñnuamona, marena illana

jai uñotimaci. <sup>31</sup> Jusiñamui jitailla isoi marena naimaci illena, judúuaidi Moisés micori llogacinodo jaidimaci; iadedi Moisés micori llogacinona naimaci raise ñnoñena jira, marena illana jaca uñnoñedimaci. <sup>32</sup> Naimaci finoca rafuemona marena iacadimaci. Marena naimaci illena, Jesucristona ñnoiacañedimaci. Naimie muidona marena ñneitimaci. <sup>33</sup> Isaías micori iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiena naimaci ñnoñenia, faifitimaci;

iadedi naimiena ñnotinodi tainona ñnoñeitimaci.

Suubicaiñeitimaci” llote.

## 10

<sup>1</sup> Cue amatiai, judúuai comini jilluana eo jitaidicue. Jusiñamui diga cue ñaia, iena jicadicue. <sup>2</sup> Jusiñamui jitaillacinona eo finoacadimaci. Iena uñnoticue. Iena finoacadimaci; iadedi iena finuana raise uñnoñedimaci.

<sup>3</sup> Jusiñamui naimacina marena itatallena uñnoñedimaci. Naimaci finoca rafuemona marena iacadimaci. Jusiñamui llua isoi jaiacañedimaci. <sup>4</sup> Nana Cristona ñnotimiedi Moisés micori llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

<sup>5</sup> Moisés micori jaie cuete: “Naimie marena illena, cue lluado jaidimiedi jaca iite, cue lluana naimie raise ñnoia” cuete. <sup>6</sup> Iese jaie cuete; iadedi jaca buna iese ñnoñede. Cristona ñnuamona, marena Jusiñamui jitailla isoi, birui iticai. Jusiñamui uai llote: “Omoi comeaiña facañeno: ‘Cristona cai baillena, naimiena bene cai atillena, monamo jaiticai.

<sup>7</sup> Fiodaitino ñne jaiticai, Cristona cai jillotallena’. Iese comeaiña facañeno” llote. Cristodi enñruemo jaie bite. Fiodaite; ia naiemona jai jillode. <sup>8</sup> Jusiñamui uai llote: “Naie rafue cai ñne jai ite. Iena jai uñnoticai”. Cai jilloillena Cristona cai ñnuana birui lloticai. <sup>9</sup> Jiaie cominimo: “Cristodi cai Nama” omoi lloia, Cristo fodaillamona Jusiñamui naimie jillotajana omoi ñnoia, jilloitomo. <sup>10</sup> Cai comeaimona cai ñnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

<sup>11</sup> Isaías micori iena jaie cuete: “Cristona ñnotinodi tainona ñnoñeitimaci. Suubicaiñeitimaci” cuela. <sup>12</sup> Naie rafuedi nana cominina ñaite. Judúuaina ñaite. Judúuainedonona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite. <sup>13</sup> Cristodi naga naimiemo jicanotimiena jillotaite; <sup>14</sup> iadedi Cristona naimaci ñnoñenia, naimiemo jicanonidimaci. Cristo naimaci facaina fodailla rafuena naimaci ñnoñenia, naimiena

ñnonidimaci. Naimacimo naie rafuena jiaie comini lloñenia, iena cacaiñeitimaci. <sup>15</sup> Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicai” cuete.

<sup>16</sup> Iese cuete; iadedi ailluena comini naie rafuena nia jitañedimaci. Isaías micori iena jiai jaie cuete: “Jusiñamui, ailluena comini cai llwana ñnoiacañedimaci” cuete. <sup>17</sup> Cai llumona Cristo rafuena cacadimaci. Cristo rafuena cacajamona, damierie naimiena ñnotimaci.

<sup>18</sup> Judíuai comini naie rafuena jai cacadimaci. Jusiñamui facaina lloraima micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci

cuete. <sup>19</sup> Judíuai comini naie rafuena cacadimaci; iadedi iena ñnoñedimaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judíuaiñedino diga uradoitomoí.

‘Naimaci abina uiñoñedimaci’ raitomoí;

iadedi cue rafuena naimaci feiñua jira, naimaci diga iciritomoí” llote.

<sup>20</sup> Isaías micori marefodo jiai cuete:

Jusiñamui llote: “Cuena jenoñedino cuena jai baitimaci.

Naimacina cue jilloitallena cuena jicanoñedinomo jai bairedicue” llote.

<sup>21</sup> Jusiñamui judíuai cominina jiai llote: “Naimacina cue dine jaca uaidoticue; iadedi ñnoiacañedimaci. Cuena jitañedimaci” llote.

## 11

### *Judíuai cominimona dajerie ñnoitimaci*

<sup>1</sup> Jusiñamuidi judíuaina faionocaillamo omoi comeciaina facañeno. Judío imiedicue. Abraham uruai micoriaimona comuidicue. Benjamín railla nairai imiedicue. <sup>2</sup> Naimacina jaie naimie fetua jira, Jusiñamui judíuaina faionocaiñede. Elíamo jaie ite rafuena uiñotomoí. Jusiñamui naimiedi judíuaina llote: <sup>3</sup> “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jiai meineiacadimaci”. <sup>4</sup> Jusiñamui dinena uai ote: “Dama iñedio. Siete mil iñiai cue dibeimo nia eenoticue. Baal railla jiraraina jaca sedañedimaci. Cuena nia sedadimaci” llote. <sup>5</sup> Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci. <sup>6</sup> Naimacina duenaillamona, naimacina fetode. Naimaci finoca rafue muidona naimacina fetofede. Naimaci finoca rafue muidona naimacina fetodena, naimacina duenaillamona naimacina fetofede.

7 Ie jira iena iese lloiticue. Ailluena judúuaidi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena ñinoiacañedimaci. 8 Jusiñamui facaina lloraini micoriai iena jaie cuega: “Jusiñamuidi naimacina abina uiñotañede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacañedimaci. Birui iese nia itimaci” cuega. 9 David micori iena jiai lloite: Naimacimo aillue ra illamona, Jusiñamui naimacina duere finoite.

10 Naimaci comeciai Jusiñamui rafuena uiñoñeitimaci. Naimaci finoca rafue anamo duere sefuicana jaca jaitimaci.

### *Judúuaiñedinomona dajerie ñnoitimaci*

11 Naimie rafuena judúuai comini jitañena jira, Jusiñamui naimacina duere finode; iadedi naimacina sofeñede. Jusiñamuina judúuai ñnoñena jira, Jusiñamuidi judúuaiñedinona jai jillotate. Naimacina jai jillotate, judúuai ñnena judúuaiñedinona uradoillena. Uradoillamona Jusiñamuidi naimaci naimiena ñnollena jitaide. 12 Cristona judúuai jitañena jira, Jusiñamuimona judúuaiñedinodi diga marecinona birui feiñotimaci. Cristo ñibeimo ico judúuai ia, Jusiñamuimona judúuaiñedino ailluena feiñoitimaci.

13 Judúuaiñedino, omoimo rafuena lloiacadicue. Omoi ñne Jusiñamuidi cuena orede. Cue maijari eo marena ñaiticue, 14 cue comini cuena uradoillena, Cristona dajerie ñnotallena. 15 Cristona naimaci nia ñnoñena jira, judúuaiñedino jai ñnotimaci. Cristona ico judúuai ñnoia, Jusiñamui diga jaca iitimaci. 16 Janore jisa juilliruñu mareña, nana juilliruaidi mare. Riara ie jainauai mareña, nana ie igaillai mare. Judúuaidi ie isoidimaci. Naimaci jaiagai micoriai jainauai isoidimaci. Naimaci jaiagai mareña, naimacidi jiai mare. Birui ite judúuaidi igaillai isoidimaci.

17 Taide igaillai ñie amenamo jai ñuiñede. Ie isoidimaci. Naimacimona Cristona jaino ñnoñena jira, Cristomo jai ñuiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feiñocabitomoi. 18 Naimaci ifomo omoi illa jira, abina uradoiñeno. Igaillamona jainao cajellena, ie ijina oñede; iadedi iemo duilla jira, jainaomona igaillai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feiñocabitomoi.

19 Comeciaina facadomoi: “Taide igaillai ifomo iticai isoidicai. Jusiñamui judúuaina oni dotade, caina fetollena”. 20 Unaicinona comeciaina facadomoi. Naimaci ñnoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoiñeno; iadedi

Jusiñamuina omoi jacirui. <sup>21</sup> Naimiēna naimaci ñnoñena jira, judúuaina duere finode. Naimiēna omoi ñnoñenia, daje isoi omoīna duere finoite. <sup>22</sup> Biemo comeciaina faca. Naimiēna ñnoñedinona jai duere finode; iadedi omoīna duenaite. Naimiēna ñnocana omoi jai, naimie omoīna nia duenaite. Iese omoi jaiñenia, naimie omoīna dotaite. <sup>23</sup> Judúuai Cristona ñnoñeno navui jaidimaci: iadedi Cristona naimaci birui ñnoia, naimie dibeimo Jusiñamui naimacina itatarede, igai riaramo sotaja isoi. <sup>24</sup> Ailli riarana cueticue. Naie amenamo nano duiñedomoi. Judúuai nainomo nano duidimaci. Jusiñamui jitailla jira, sotaca igai isoi, naimaci ifomo omoīna jai itatate. Ie jira Jusiñamui jitaia, nainomo nano naimaci duilla jira, naimiedi judúuaina abido oite.

*Eo ailluena judúuai jilloitimaci*

<sup>25</sup> Bie rafuena omoi uiñuana jitaidicue. Iena navui uiñoñedicai. “Judúuai baifemo faiticai” omoi raiñellena, buena omoimo lloticue. Diga judúuai Cristona birui ñnoiacaiñedimaci. Jusiñamui jitailla diese judúuaiñedino jillua facaisena, iese iitimaci. <sup>26</sup> Ie mei eo ailluena judúuai jilloitimaci. Jusiñamui facaina lloraīni micoriai iena cuetimaci: Jerusalémona cai Jilloitaraima biite.

Jacob micori uruiaimona jeacinona dotaite.

<sup>27</sup> Naimaci jeacinona oni dotajanona, Jusiñamui jaie lloga uai suite.

<sup>28</sup> Cristona birui ñnoiacaiñedimaci. Jusiñamuina enoidimaci. Jusiñamuina naimaci jitañena jira, naimie omoīna fetode. Ie jira jillodomo; iadedi Jusiñamuidi judúuaina nano jaie fetode. Naimaci jaiagai micoriaimo ie lloga uaina jira, naimacina nia isiruite. <sup>29</sup> Jusiñamui ie lloga uaina saiñede. Naimacina fetua jira, naimacina fañonocaiñeite.

<sup>30</sup> Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoīna jai duenaite. <sup>31</sup> Jusiñamuina jai ñnoñedimaci; iadedi omoīna naimie duenaila isoi, Jusiñamuidi naimacina ico jiai duenaite. <sup>32</sup> Jusiñamui nana cominina naimiēna ñnoñenana uiñotade, naimacina naimie duenailena. <sup>33</sup> Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicai. Naimie finoca rafuena raise jiai uiñoñedicai.

<sup>34</sup> Jusiñamui facaina lloraīma micori iena jaie cuete: “Jaca buna cai Nama Jusiñamui comeci facajacinona uiñoñede. Jaca buna naimiemo ie finoca rafuena lloñede. <sup>35</sup> Jaiaruido ibana feiñollena, jaca buna naimiemo rana fecañede” cuete.

<sup>36</sup> Naga ra naimiemo illa jira, naga ra naimiemono bite. Naga rana finode. Naimiemo iobillacinona cai fecacabillasa. Iena jitaidicue.



## 12

*Jusiñamui anamo raise omoi i*

<sup>1</sup> Cue amatiai, omoimo bie rafuena lloiticue. Jusiñamui caina duenailla jira, omoi jeanide comeciámona, naimie jitailla rafuena omoi finuamona naimie anamo raise omoi i. Naimie jitailla isoi omoi i. Naimiedi omoi iese illana gaide. Omoi comeciámona naimiēna raise omoi seda. <sup>2</sup> Cristona uiñoñedino isoi omoi iñeno; iadedi omoi comeciai iuaina meiduanona, jiaie rafuedo mai omoi jai. Ie mei Jusiñamui jitailla rafuena finuana uiñoitomoī. Mare rafuena finuana uiñoitomoī. Naimiēna iobitajacinona jiai uiñoitomoī. Eo mare rafuedo jaillana uiñoitomoī.

<sup>3</sup> Jusiñamui cuena duenaillamona, bie rafuena omoimo cue lollena, naimie uai cuemo ite. “Jiaie comini baifemo faiticue” raillamo o comecina facañeno; iadedi: “Nie isoidimedicue” o raillamo o comecina raise faca. Jusiñamui o feiñoga diese iñuacinomo o comecina faca. <sup>4</sup> Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiáide. <sup>5</sup> Ie isoide. Cristona jai iñoticaī. Aillosiedicaī; iadedi daajena naimiemo jainaiáidicaī. Dani caimo jiai jainaiáidicaī.

<sup>6</sup> Jusiñamuidi daje isoide uaina naimie dibeimo cai maijillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maiji. Rafuena omoimo Jusiñamui lloia, iena raise lloño. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue. <sup>7</sup> Roracomo maijiacinona uiñotimiedi nainomo raise maijia. Llofuiacinona uiñotimiedi raise llofua. <sup>8</sup> Comeci ocuiñotajacinona uiñotimiedi comini comeciaina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiáillamona, iese coninina canocana jaiticaī.

*Cristo rafuedo cai jailla*

<sup>9</sup> Omoi comeciámona nana cominina isirui. Marañedicinona gaiñeno; iadedi mare rafuedo omoi jai. <sup>10</sup> Coninina isirui, omoi cominina omoi isiruilla isoi. Omoīna jiaimie nia iobitañenia, naimiēna raire omoi iobita.

<sup>11</sup> Cristo rafuena sefuiruiñeno finocana omoi jai. Cai Nana iocire seda.

<sup>12</sup> Naimie dine omoi illemo iocire omoi ocuiri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

<sup>13</sup> Jiaie creyentiai rania, naimacina cano. Omoi jofuemo creyentiai ria, naimacina nafue.

<sup>14</sup> Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoño.

<sup>15</sup> Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

<sup>16</sup> Daje isoi omoi comeciai lloillamona uri omoi i. Abina birioicaiño. Jamai bue isoidino diga nabairi. “Jiaie comini baifemo uiñoticaí” raiño.

<sup>17</sup> Jiaie comini omoina jeare finoia, naimacina daje isoi jeare finoño. Ibana oño. Omoi marena illana jiaie comini uiñollena, marena omoi i. <sup>18</sup> Omoimona rafuena suiñoño. Nana comini diga uri omoi i. <sup>19</sup> Cue isiruigano, bu omoina jeare finoia, ibana oño. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodicue. Ibana oitícue’ ” cuete. <sup>20</sup> Ibana oño. Jusiñamui facaina lloraima iena jaie jiai cuega: “Omoi enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaite. <sup>21</sup> Jiaie comini omoina jeare finoia, iciriño; iadedi naimacimo mare rafuena fino. Iese omoi finoia, naimacina omoi dibeimo itataitomi.

## 13

<sup>1</sup> Nana illaicominina naimaci ifomo Jusiñamuidi itataja jira, illaicomini lloga uaina nana cai inua. <sup>2</sup> Illaicomini uaina bu inoñenia, Jusiñamuina jiai inoñede. Ie mei Jusiñamui naimiena duere finoite. <sup>3</sup> Mare rafuena finodinodi illaicominina jaciruiñedimaci; iadedi marañede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaia, omoina marena ñaitimaci. <sup>4</sup> Jusiñamui facaina omoina canodimaci. Marañede rafuena omoi finoia, naimacina jacirui. Omoina duere finollena, naimacimo uai ite. Marañede rafuena finodimiena Jusiñamui facaina duere finoitimaci. <sup>5</sup> Ie jira naimaci uaina ino, Jusiñamuimona omoi duere sefuiñellena. Omoina: “Mare” jiai raitimaci. <sup>6</sup> Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

<sup>7</sup> Gobierno omoina ibataia, iena iba. Illaicominimo iobilacinona feca. <sup>8</sup> Ra omoi oia, ibaño jaiño; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode. <sup>9</sup> Moisés micori diga lletarafuena jaie cuete: “O añede riño diga iño. O iniñede ima diga iño. Jiaimiena meineño. Rana fiño. Jiaimie mo ite rana nicidoño”

cuete. Jiai lletarafue ite: “Dani omoi abiaina omoi isiruilla isoi, jiaie cominina omoi isiruilla”. Bie lletarafuena omoi inoia, nana lletarafuena jai inotomoi. <sup>10</sup> Jiaie cominina omoi isiruia, naimacina jeare jai finoñedomoi. Jiaie cominina omoi isiruia, nana Jusiñamui lloga uaina jai inotomoi.

<sup>11</sup> Iena birui cai finua. Jesucristo billiruidi iairei jai ite. Naimiena cai nano inua facaiseconi, naimie billiruimo cai comeciaina facadica; iadedi nagarui naimie billirui iairei inoicaide. <sup>12</sup> Jesucristo nia dane biñena jira, eniruemo cai illa jira, jitiredinomo iticai isoidicai. Naimie bia, naimie diga cai illemona, useredinomo raire ja iticai isoitica. Ie jira jeacinona finocana cai jaillana mai cai faionocailli. Jesucristo rafue anamo raise cai illesa. <sup>13</sup> Cai marena illana nana comini uinollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai fuiriñena. Cai abina uradoiñena. <sup>14</sup> Iese cai iñena; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

## 14

### *Jiaie creyentena jeare ñaiñeno*

<sup>1</sup> Cristona inotimiena omoi dine biade, naimiena raise feiño. Naimie Cristona nia raise inoñenia, naimiena nafue; iadedi omoi isoi naimie inoñenia, conima uina caitañeno. <sup>2</sup> Dajerie naga rana gutimaci; iadedi jiaimie difai guiga rana guite. Naimie riñede. Ie comecina facade: “Cue riia, jeacinona jai finoiticue”. <sup>3</sup> Naga rana guiñedimiena miñeno. Naga rana gutimiena miñeno. Jusiñamuidi naimacina jai feiñote. Ie jira miñeno. <sup>4</sup> Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi railanona, Jusiñamuidi naimacina canoite.

<sup>5</sup> Dajerie creyentia comeciaina facadimaci: “Judúuai rafue finuaruilla; Jesuñamuina sedajitica, nairuilla; jairuilla; baifemo ualla jira”. Jiaino raitimaci: “Nagarui daje isoide” raitimaci. Nagamie ie comecina raise facajamona, <sup>6</sup> cai Namana iobitallena, nagamie ie jitaillaruimo cai Namana sedaite. Naga rana gutimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

<sup>7</sup> Cristomo cai duilla jira, dani cai jitailla rafuena finonidicai. Cai fiodailliruina jiai llonidicai. <sup>8</sup> Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticai. <sup>9</sup> Cristodi fiodaite. Ie mei jillode. Ie

jira naimie anamo iticai. Cai cajenia, naimie anamo iticai. Cai fiodaia, naimie anamo jiai iiticai.

<sup>10</sup> Naimie baifemo omoi iñena jira, jiaie creyentena miñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iiticai. Jusiñamuidi marañenedinona duere finoite. Maredinona duere finoñeite. <sup>11</sup> Isaías micori jiaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

<sup>12</sup> Nainomo Jusiñamuimo nana cai finouiga rafuena lloiticai. Ie jira jiaie creyentiai diga marena omoi i.

*Jiaie creyentena jeacino finoi raillano, mare rafuedo cai jailla*

<sup>13</sup> Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. <sup>14</sup> Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue ría, jeacinona finoñedicue. Iena uiñoticue; iadedi jiaimie comecina facade: “Biena cue ría, jeacinona jai finodicue”. Naimie comecina iese facajamona, iena naimie ría, naimiemona jeacinona jai finode. <sup>15</sup> O riga ra muidona jiaie creyente comeci marañeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. <sup>16</sup> Ie jira o jitailla rana finoñeno. Jiaie comini ona miñellena, naie rana riñeno. <sup>17</sup> Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. <sup>18</sup> Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiai ñaitimaci.

<sup>19</sup> Ie jira uri icana cai jailla. Dani cai comeciaina ocuiñocana cai jailla. <sup>20</sup> Omoi ríacaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ría muidona, jiaimie Jusiñamuina fainonocai, jeacinona jai finodomoi. <sup>21</sup> Bue isoide omoi ría muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide. <sup>22</sup> Mare ra omoi finoia, omoi comeciaimona iena uiñotomoi. Jusiñamuidi omoi comeciaina uiñua jira, iena marefodo lloñeno. Omoi comeciaimona jeacinona omoi finoñenana

uiñotomoi. Ie jira iocire itomoi. <sup>23</sup> “Nie isoide ra cue riia, jeacinona finodicue” raillanomo bu iese comecina facaia, iena naimie riñena. Iena naimie riia, Cristona naimie raise ñnoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

## 15

### *Jiaie creyentena cai canua*

<sup>1</sup> Cristo rafuedo raise jaidicai; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitaille rafuena finoñeiticai; <sup>2</sup> iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. <sup>3</sup> Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete. <sup>4</sup> Naiemona cai fueollena, naiemona cai comeciai ocuiñotallena, Jusiñamuina jaie cuegafuaidi caimo ite. Naiemona Jusiñamui illanomo cai illemo ocuridicai. <sup>5</sup> Jusiñamui cai comeciaina ocuiñotade. Naimie coniniri omoia uri itatajana jitaidicue. Cristo Jesús llua isoi, omoi uri illana jitaidicue, <sup>6</sup> daje isoi omoi comeciai lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

### *Judúuaiñedinodi Cristo rafuena jiai cacadimaci*

<sup>7</sup> Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. <sup>8</sup> Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico sulle rafuena jaie llote. Eniruemo billanona, Cristo iena fuiduaibite. <sup>9</sup> Judúuaiñedino Jusiñamuina iobitallena, Jusiñamui naimacina duenaila jira, Cristodi bite. David micori Cristo llua jaie cuete:

Judúuaiñedino motomo cue illamona ona iobitaitimaci.

Ruamona cue muidona ona jiai iobitaitimaci.

<sup>10</sup> Moisés micori jiai cuete:

Judúuaiñedino, Jusiñamuimo duide comini diga iobi.

<sup>11</sup> David micori jiai cuete:

Nana judúuaiñedino, Jusiñamuimo iobillacinona fecu.

Nana comini naimiemo iobillacinona fecacabillasa.

<sup>12</sup> Isaías micori cuete:

Isai micori uruiaimona damie comuitajamona, naimiedi judúuaiñedinona sedaite.

Naimie naimacina jillobitallena, naimiemo ocuriritimaci.

13 Jusiñamui iemo omoína ocuiritate. Naimiena omoi ñnuanona, naimie omoína caimare itatajana jitaídícue. Uri itatajana jiaí jitaídícue. Iemei Jusiñamui Joreño naimie siño uai díga omoi jilluamo omoína ocuiritate.

14 Cue amatiaí, omoína uiñotícue. Eo maredomoi. Cue lloga rafuena eo uiñotomoi. Coninina llofueredomoi. 15 Iena omoi comecillena, dafuerie rafuena omoímo marefodo cueticue. Jusiñamui cuena fetuanona, ie rafuena cue llollena, cuena orede. 16 Judíuaiñedínomo Jusiñamui ie mare rafuena cue llollena, Cristo Jesús facaina maijídícue. Jusiñamui díbeimo naimacina cue itatajanona, Jusiñamui naimacina feiñollena, naimacimo llotícue. Jusiñamui Joreñodí naimacina jiaí maretaite.

17 Jusiñamui díbeimo cue maijia jira, Cristo Jesús muidona cue maijari iobidícue. 18 Cue maijiana marefodo llotícue. Judíuaiñedínona Jusiñamuina ñnotallena, Cristodí cuena canode. Cue lluaña cacadímaci. Cue illana ciódimaci. 19 Cristodí cuena siño rafuena finotate. Jusiñamui Joreño uaido cuena finotate. Iemei Cristona jai ñnotímaci. Jerusalémona Ilríco railla enirue dínomo Cristo ie mare rafuena ailluena comínimo raise jai llotícue. 20 Nainomo Cristona nia uiñoñedíno díne navui cue jaiacana jira, nainomo Cristo rafuena lluidícue. Jai cacadíno illanomo cue jaiacaiñena jira, nainomo lluaiñedícue. 21 Isaías micorí biena jaie cuete:

Cristo rafuena nia cacaiñedínodí iena cacaitímaci.  
Naimiena uiñoitímaci  
cuete.

### *Romamo Pablo jaiacade*

22 Nainomo cue maijiacana jira, Romamo omoi díne nia jaiñedícue. 23 Díga nairaimo Cristo rafuena bene jai cue llua jira, cue maijille bene jai iñede. Díga años omoi díne cue jaiacana jira. 24 Españamo cue jaia, omoi díne jaitícue. Omoi díga nano nigarui caimare ñaitícue. Ie mei Españamo cue jaillena, cuena canoitomoi. 25 Omoi díne jaitícue; iadedí Jerusalémo ite creyentiaína cue canollena, nainomo nano jaitícue. 26 Macedoniamoi ite creyentiaídí ucubena ofitatímaci. Acayamo ite creyentiaídí ucubena jiaí ofitatímaci. Jerusalémo ite duerede creyentiaína canoacadímaci. Jerusalémo ite creyentiaína canollena, iena birui uitícue. 27 Iena feaacadímaci. Judíuaiñedímaci; iadedí judíuaina canoacadímaci, naimacimo Cristo rafuena navui judíuai llua jira. Ie jira naimacina birui canodímaci. 28 Naimacimo bie ucubena raise cue fecaja mei, Españamo cue jaillemona, omoi díne nano jaitícue. 29 Omoi díne cue ria, naimie rafuena cue llollena, Cristo cuena raise canoite.

<sup>30</sup> Cue amatiai, cai Nama Jesucristomo omoi duilla muidona, Jusiñamui Joreño coniniña omoina isiruitaja muidona, Jusiñamui omoi jiiia, cue facaina jiai omoi jii. <sup>31</sup> Judeamo ite creyenteñedinomona cue jillobillena, Jerusalémo ite creyentiamo cue feaacalle ucubena naimaci raise feñollena, cue facaina omoi jii. <sup>32</sup> Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue. <sup>33</sup> Jusiñamui omoina uri itatajana jitaidicue.

## 16

### *Romamo itinomo Pablodi ie uaina orede*

<sup>1</sup> Febe raillañaiño omoi dine jaite. Naiñaiñoona omoi uiñuana jitaidicue. Naiñaiñodi creyente. Cencrea railla nairai iñaiño. Cristo dibeimo maijiano, nainomo ite creyentiaina canocabide. <sup>2</sup> Cristomo omoi duilla muidona, jiaie creyentiaina cai feñoiacacabilla isoi, naiñaiñoona raise feño. Diga cominina naiñaiño canua jira, naiñaiño jitaile diese cano. Curna jiai canode.

<sup>3</sup> Priscila dine cue uaina oredicue. Naiñaiño ini Aquila dine cue uaina jiai oredicue. Cristo Jesús facaina cue diga maijidiiaimaiai. <sup>4</sup> Cue facaina niadedi fiadaitiaimaiai. Ie jira iaimaiairi iobidicue. Diga nairaimo judiañede creyentiaí itimaci. Cuemona Cristo rafuena cacadimaci. Cue facaina iaimaiai niadedi fiadailla jira, iaimaiairi jiai iobidimaci. <sup>5</sup> Iaimaiai jofomo rollena bitino dine cue uaina oredicue. Epeneto dine cue uaina jiai oredicue. Cue isiruigamie. Asia railla eniruemo itinomona naimiedi Cristona nano inotimie.

<sup>6</sup> María dine cue uaina oredicue. Omoina canollena, omoi motomo maijide. <sup>7</sup> Andrónico dine cue uaina oredicue. Junias dine cue uaina oredicue. Naie iaimaiaidi cue comini. Cárcelmo danomo navui iticai. Jesucristo oretaganodi iaimaiaina mareñañaitimaci. Naimiena nia cue inoñena facaise Cristona inotiaimaiai.

<sup>8</sup> Amplias dine cue uaina oredicue. Cristomo naimie duilla jira, naimiedi cue isiruigamie. <sup>9</sup> Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie. <sup>10</sup> Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue. <sup>11</sup> Herodión dine cue uaina oredicue. Naimiedi cue comini. Narciso cominimona dajerie inotimaci. Naimaci dine cue uaina oredicue. <sup>12</sup> Trifena dine cue uaina oredicue. Trifosa dine cue uaina oredicue. Cai Nama facaina maijidiiañuui. Pérsida dine cue uaina oredicue. Cue isiruigañaiño. Cai Nama facaina eo maijide. <sup>13</sup> Rufo dine cue uaina oredicue. Cai Namana eo raise inote. Naimie ei dine cue uaina jiai

oredicue. Naiñaiñodi cue ei isoide. <sup>14</sup> Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue. <sup>15</sup> Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpás dine cue uaina oredicue. Nana naimaci illanomo ite creyentiai dine cue uaina oredicue.

<sup>16</sup> Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

<sup>17</sup> Cue amatiai, daje rafuena nia lloiticue. Omoi comeciai daje isoi lloitañedino diga nabairiñeno. Uai uaitacabidino diga nabairiñeno. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiñeno. <sup>18</sup> Cai Nama Jesucristo facaina maijiñedimaci; iadedi daní naimaci jitailla rana maijicabidimaci. Mare isoide llumona abina raise uiñoñedinona jifuetimaci. <sup>19</sup> Ailluena cominidi Cristona omoi ñnuana uiñotimaci. Ieri iobidicue. Marecinona finuana raise omoi uiñuana jitaídicue. Maraiñedicinona omoi finuana jitaíñedicue. <sup>20</sup> Jusiñamuidi omoína uri itatate. Naimie omoína canoite, Taifena anafetitallena. Cai Nama Jesucristo omoína duenaillesa.

<sup>21</sup> Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

<sup>22</sup> Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

<sup>23</sup> Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

<sup>24</sup> Erasto ie uaina orede. Naimiedi bie nairai ie ucube enoraíma. Cuarto ie uaina orede. Naimiedi jiai creyente.

### *Jusiñamuimo iobillacinona jaca cai fecajasa*

<sup>25</sup> Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede; <sup>26</sup> iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini ñnollena, nana cominido bie rafuena llocana birui jaide. Jusiñamuidi jaca ite.

<sup>27</sup> Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.



## **CORINTOMO ITE CRISTONA HNOTINOMO PABLO NANO ORETAGA RABE**

*Corintomo ite creyentiaimo Pablo cartana orede*

1-2 Corinto railla nairaimo ite creyentiai, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoina jai marebi-caitate. Jusiñamui omoina fetode, naimie iena. Ua nana cai Nama Jesucristona sedadinodicaidi Jusiñamui iena. <sup>3</sup> Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaiai omoina uri jai itatatiiaimai. Iena omoi uiñocana mai omoi jai.

*Cristo muidona Jusiñamuimona ailluena feiñotica*

<sup>4</sup> Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoina jai duenaite. Ie jira naimiemo omoi facaina iobillacinona jaca fecadicue. <sup>5</sup> Jusiñamui omoina duenaillamona, ie rafuena omoi lollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoina eo canode. Omoina naimiemo ite rafuena raise uiñotade. <sup>6</sup> Ie muidona Cristo rafuena raise innotomoi. Cristo rafuena cai jino llumona, naimiemo raise inofidomoi. <sup>7</sup> Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocuirillanona, Jusiñamuimona ailluena rafuena feiñotomoi. <sup>8</sup> Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoina duere finoñeite. Naimie bia, naimacimo jeacino nia illa jira, naimiena innoñedinona duere finoite. <sup>9</sup> Jusiñamui ie lloga uaina jaca finoite. Naimie inogamie. Naimie Jitona omoi nabaillena omoina fetode. Naimie Jitodi cai Nama Jesucristo.

*Naimaci comeciai daje isoi lloñedimaci*

<sup>10</sup> Cue amatiaia, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciai daje isoi lloillana jitaidicue. Daje isoi omoi comeciai facajana

jitaidicue. <sup>11</sup> Cloé raillamie cominimona bie rafuena cue fidia jira, iese omoimo lloticue. “Omoi comeciai daje isoi iñedomoi” naimie llote. <sup>12</sup> Omoimona damierie raitomoi: “Dani Pablo llofuia dibecinodo jai jaidicai”. Damierie raitomoi: “Dani Apolos raillamie llofuia dibecinodo jai jaidicai”. Damierie raitomoi: “Dani Pedro llofuia dibecinodo jai jaidicai”. Damierie raitomoi: “Dani Cristo llofuia dibecinodo jai jaidicai” raitomoi. Nana iese itomoi. Iemona omoi comeciai daje isoi iñedomoi. Cloé cominimona iese fididicue. <sup>13</sup> Ero, diga omoi Jilloitaraini iñede. Omoi jeacinomona omoi jillobilena, dama Cristo illa. Omoi facaina cruzmo cuedi fioldañedicue. Cue dibeimo omoi illena cue bautizañegaomoi. <sup>14</sup> Omoina cue bautizañena jira, omoimo ite rafue cuemona comuiñena jira, iobidicue. Dama Crispona bautizadicue. Gayona jiai bautizadicue. <sup>15-16</sup> Estéfnas jofomo ite cominina bautizadicue. Jiaie cominina cue bautizajana comeciñedicue. Ie muidona: “Pablo facaina bautizadicaí” llonidomoi. Daje isoi omoi comeciai lloiñenia, cue muidonañede. <sup>17</sup> Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraíma isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uiñoraíma isoi omoimo llofueñedicue. Cristo fiodaillamona, omoi jeacinomona naimie omoína jillotate. Iena omoi feitañenana jitaidicue.

*Cristo finoca rafuemonajusiñamui uai siñonana uiñoticaí*

<sup>18</sup> Cristona iñoñedinomona cruzmo Cristo fiodailla rafuedi jamaifue. Naimacidi faificana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciai meidorede. Caidi naie rafuena iñotidicai. <sup>19</sup> Ero, Jusiñamui facaina lloraíma micori Cristona iñoñedinona jaie cuete: Jusiñamui llote: “Abina uiñoraíni imaci uiñuacinona saítaiticue.

Abina baitadino imaci baitajacinona saítaiticue” llote. Ie muidona naie isoide comini jilloñenana jai uiñoticaí.

<sup>20</sup> Naie isoide comini uiñuacinomona jaca jillonidicai. Abi uiñoraíma uiñuacinodi Cristo fiodailla rafue baifemo fañede. Moisés micori ciegafuena uiñoraíma uiñuacinodi Cristo fiodailla rafue baifemo fañede. Uaina uaitatimie birui ite uiñuacinodi Cristo fiodailla rafue baifemo fañede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñoticaí. <sup>21</sup> Ie jitaillacino diese Jusiñamui finua jira, naimaci abi uiñuacinomona naimiena iñoñedimaci. Ie jira naimie mare jitaillacinomona, naimiena iñotinona jai

jillotate. Naimaci jeacinomona naimacina jai jillotate. Cristo rafuena cai llumona ñnotimaci. Jusiñamuina ñnoñedinodi naie rafuena: “Jamaifue” raitimaci.

<sup>22</sup> Siño rafuena naimaci cioacana jira, judíuái railla cominidi iese raitimaci: “Siño rafuena Jusiñamui finoia, omoi lloga rafuena ñnoitícaí” raitimaci. Grieguái railla comini dinena raitimaci: “Omoi lloga rafuena cai abina uiñuacino ie isoi itena, iena ñnoitícaí” raitimaci; <sup>23</sup> iadedi Cristo rafuena llocana jaidicai. Cruzmo naimie jai fodaillana lloticai. Ie jira judíuáidi cai lloga rafue muidona iciritimaci. Naiena oiacañenano iciritimaci. Damie naimaci illaimana jaillemo ocuridimaci. Naimaci ocurillamie fodaillamo naimaci comeciaina facañedimaci. Cristo fodailla jira, raitimaci: “Naimiedi cai ocuriñenamie” raitimaci. Judíuáiñedinodina raitimaci: “Omoi lloga rafuedi jamaifue” raitimaci. Ailluena comini cai lloga rafuena jitaiñedimaci; <sup>24</sup> iadedi Jusiñamui damierie judíuaina jai fetode. Dajerie judíuáiñedinona jiai jai fetode. Cruzmo Cristo fodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci. <sup>25</sup> Jusiñamui Cristona orede, cai jeacino facaina naimie fodaillena. Jusiñamuina ñnoñedinomona Cristo finoca rafuedi jamaifue. Ebinidifue. Caímona Cristo finoca rafuedi Jusiñamui ñnoñedinodino uiñuacino baifemo faite. <sup>26</sup> Cue amatiai, Jusiñamui omoína navui fetode; iadedi ¿nie isoidomoi? Jamai bue isoidomoi. Omoi comeciaina iemo faca. Jusiñamuina ñnoñedinomona abina uiñoñedomoi. Omoi creyentiai díbeimo eo abi uiñotino raise iñedimaci. Omoi creyentiai díbeimo illaicomini raise iñedimaci. Omoi creyentiai díbeimo ucuberedino raise iñedimaci. Jusiñamui ie isoidinona eo fetoñede; <sup>27</sup> iadedi abina uiñoñedinodino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. <sup>28</sup> Jamai bue isoidinona fetode, jamai bue isoiñedinodino baifemo faillena. Jusiñamuimona jamai bue isoiñedinodino jamai comini. <sup>29</sup> Ie muidona jaca buna Jusiñamui uicomo abina iedoñena. <sup>30</sup> Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñotícaí. Cristo fodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate. <sup>31</sup> Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue díga naimie abina iedua” cuete.

## 2

*Pablodi cruzmo Cristo fiodailla rafuena llocabite*

<sup>1</sup> Cue amatai, omoi dine navui cue rillamona, Jusiñamui mona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue. <sup>2</sup> Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue. <sup>3</sup> Omoi motomo navui cue ia, meiruioicaillamona jacinaioidicue. Jusiñamui facaina cue raise jino lloñeni raillano jaciruioidicue. <sup>4</sup> Comini abi uiñuacinodo omoimo llofueñedicue; iadedi omoi jecinomona omoi jilluamona, Jusiñamui Joreñodi omoina cue lloga rafue siñonana uiñotade. <sup>5</sup> Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoina jillotaja jira, jai ñnotomoi.

*Jusiñamui Joreñodo bie rafuena uiñotica*

<sup>6</sup> Comini abi uiñuacinodo llofuecabiñedicue; iadedi Jusiñamui mona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue isoi jiai llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiai uainicaitimaci. Ie jira naimaci uiñogacinodo llofueñedicai; <sup>7</sup> iadedi Jusiñamui mona abi uiñuacinona cai feiñuamona, iedo llofueticai. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede. <sup>8</sup> Birui ite illaicomini Jusiñamui ite rafuena nia uiñoñedimaci. Iena uiñotimaciden, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade. <sup>9</sup> Jusiñamui facaina lloraïma micori iena jaie cueda: Jaca buna naimiena ñnotino facaina Jusiñamui finoca rafuena cioñede.

Jaca buna iena cacaiñede.

Jaca buna iemo comecina facañede

cueda. Jusiñamui rafuena uiñoñedin naie rafuena jaca uiñoñeitimaci; iadedi naimiena isiruitino naie rafuena uiñotimaci. <sup>10</sup> Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

<sup>11</sup> Jaca budi jaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote.

<sup>12</sup> Jusiñamuimona ie Joreñona jai feiñoticaí. Jiaie cominimona naie Joreñona feiñoñedicaí. Jusiñamui Joreñodi caina Jusiñamui caimo caidiñeno fecaca rafuena uiñotade. <sup>13</sup> Omoimo naie rafuena llofuecabiticaí. Cominimona fueoga uaido llofueñedicaí; iadedi Jusiñamui Joreño caimo llofuaia uaido llofueticaí. Ie jira Jusiñamui Joreño ite cominimo naie rafuena llofuecabiticaí. <sup>14</sup> Jusiñamuina ñnoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. <sup>15</sup> Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci. <sup>16</sup> Jusiñamui facaina lloiraíma micori iena jaiie cueda: “Jaca buna Jusiñamui comecimo iticinona uiñoñede. Budi naimiena jiai llofuenide” cueda. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

### 3

#### *Danomo Jusiñamui dibeimo maijidimaci*

<sup>1</sup> Cue amatiai, Jusiñamui Joreño anamo itinona omoi raise itomoidena, omoína llofueñedicue. Omoi jitaillacinodo nia omoi jailla jira, omoína llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaína omoi jailla mei, Cristo rafuedo eo jaiñedomoi. <sup>2</sup> Feinide rafuena navui llofueticue. Eo feirede rafuena omoimo llofueñedicue. Omoína iena nia llofueñedicue. Omoi uruiái janore moonailla mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiñena jira, Jusiñamuimona nia moonaiñedino isoidomoi. <sup>3</sup> Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñedomoi. Jusiñamuina ñnoñedino isoi nia itomoi. Jamai ebe isoi nia itomoi. <sup>4</sup> Omoimona damierie: “Pablo llofuaia dibecinodo jaidicaí” raitomoi. Jiaíno: “Apolos raillamie llofuaia dibecinodo jaidicaí” raitomoi. Iese omoi raia, Jusiñamuina ñnoñedino isoi itomoi. Ie jira iese raiñeno.

<sup>5</sup> Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena lloticoco. <sup>6</sup> Naie rafuena cue llofuiamona nano ñnotomoi. Ie mei Apolos iena dane llofue. Iese llofueuidicoco; iadedi dama Jusiñamui omoína naie rafuena

ñnotacana jaide. <sup>7</sup> Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina ñnocana jaitate. <sup>8</sup> Daje uaina Apolos diga maijidicue. Coco maijia diese Jusiñamuimona coco ibana feiñotícoco. <sup>9</sup> Jusiñamui facaina maijidicoco; iadedi naimiedi omoina ñnocana jaitate. Naimiedi omoi comeciaina marena itatacana jaitate. <sup>10</sup> Jusiñamui cuemo llua isoi, naimie cuena canua diese, Cristo rafuena llofuetícue. Cristo rafuena eo cue uiñuamona, Cristo rafuena omoimo navui llofuetícue. Cue lluamona Cristona ñnotomoi. Birui jiaimie omoina naie rafuena jai llofue. Omoi comeciaino naie rafue raise itabillena, omoina llofue. Bu omoina llofueia, omoi comeci marena illacinomo naimie comecina facajanona, omoina naimie llofuecabilla. <sup>11</sup> Omoi jeacinomona omoi jilloillena, jaca daje rafue ite. Jiaie rafuedi iñede. Iena omoimo jai llofuetícue. Naie rafuedi Jesucristona ñaite. <sup>12</sup> Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciaino raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comecimo raise itabiñede. <sup>13</sup> Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidiño llua lloite. Naimaci llogacinona eo facacite. <sup>14</sup> Ie mei Cristo rafuena raise atona llotinodi Jusiñamuimona ibana feiñoitimaci. <sup>15</sup> Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifñeitimaci. Jusiñamui diga jaca iitimaci; iadedi tainomo maijidimaci.

<sup>16</sup> Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentiai. <sup>17</sup> Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatiñiena duere finoite.

<sup>18</sup> Bie rafuedo omoi raise jaillena, dani omoi abiaina jifueñeno. Creyenteñedinu uiñuacinodo jaiñeno. Omoimona bu iedo jaiacania, naimiemo llono: “Naie isoide rafuedo o jaiñeno”. Iedo naimie jai, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedinu uiñuacinodo omoi jaiñeno. <sup>19</sup> Jusiñamuimona naimiena ñnoñedinu uiñuacinodi jamaifue. Jusiñamui facaina lloraima micori jaiie cueda: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”. <sup>20</sup> Jiai cueda: “Jusiñamuidi abi uiñotino railla comini imaci comeciaino

facajacino jamaifuena uiñote”. <sup>21</sup> Ie jira omoi llofuerañiri abi iedoño. Jusiñamuimona nana rafue omoimo jai illa jira, naimaci abi uiñuacinodo abina iedoño. <sup>22</sup> Marena omoi comeciai illacino jitai raillano, Cristo omoi dine caina oretate. Cuena oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jiaruido nana omoimo iite rafuedi suite. Nia omoi fiodañenia, Cristo omoina canoite. Omoi fiodaia, naimie dine jaitomoi. Naiemona marena omoi comeciai illacino jitai raillano, ua nana rafue omoimo jai ite. <sup>23</sup> Cristomo omoi jainaiailla jira, naimie anamo itomoi. Jusiñamuimo Cristo jainaiailla jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

## 4

### *Cristo fetocano naimie dibeimo maijide*

<sup>1</sup> Caïmo omoi comeciaina faca. Cristo dibeimo maijidicai. Jusiñamui rafuena llocana jaidicai. Iena jaie uiñoñedicai; iadedi naimie caina uiñotaga rafuena birui llofueticai. <sup>2</sup> Ero, naga patródi naimie dibeimo maijidino naimie lloga uaina ñnuana jitaide. Ie isoide. Jusiñamuidi ie facaina lloraini naimiena naimaci ñnuamona naimie rafuena raise lluaña jitaide. <sup>3</sup> Cue uaina omoi uaitañenia, iena omoi uaitaia, jiaño iena uaitaia, iemo comecina facañedicue. <sup>4</sup> Cuemo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite. <sup>5</sup> Ie jira: “O llucino mare” cuemo lloño. “O llucino marañede” cuemo jiai lloño. Cai Nama nia abido biñenia, iena cuemo omoi lloño. Naimie bia, nana comini comeciaino ite rafuena uiñotaite. Naimaci comeciaino ite jitaillacinona uiñotaite. Iemona naimaci maijia dinori Jusiñamuimona iobillacinona feiñoitimaci. Naie facaise cuemo ite rafuena lloite. Ie jira nia cuemo lloño.

<sup>6</sup> Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cufue llua isoi, omoi illana jitaide. Omoi llorainiri tainomo iobiño. Omoi Cristo facaina llorainimona damie jiaie lloraima baifemo faiamo omoi comeciaina facañeno. <sup>7</sup> Nana omoi llofuerañidi daje isoidimaci. Jusiñamuimona nana naimacimo ite uaina feiñoitimaci. Dani naimaci comeciainona iena naimaci ofena jira, ie diga abina iedoño.

<sup>8</sup> “Nana Jusiñamuimona iticinona jai feiñoticaï. Jusiñamuimona nana cai jitaillacinona caïmo jai ite. Jusiñamui sedajanomo illainina isoi jai iticaï” omoi comeciaina

facadomoi; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue. <sup>9</sup> Jusiñamuidi nana omoina cue bai femo faitatate raillanomo cue comecina facadicue. Cristo rafuena llorainidicai; iadedi cue bai femo omoi faiamo cue comecina facadicue. Omoimona jamai bue isoidicai. Nana comini duere cai illamo raise eruaidimaci. Jusiñamui jaienisaidi duere cai illamo jiai eruaidimaci. <sup>10</sup> Cristo rafuena cai llua muidona, omoimona ebe isoidicai. “Cristo rafuena raise ñnuanona, iedo raise jaidicai” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi. <sup>11</sup> Cai guille buedi jaca iñede. Iniroinidicai. Jiaie comini caina duere finodimaci. Jofonidicai. <sup>12</sup> Cai ra ollena, cai onolli diga duere maijidicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai. <sup>13</sup> Cai joreña jeare ñaitimaci; iadedi cai dinena naimaci diga marena ñaiticai. Naimacimona jamai bue isoidicai. Iese caimo naimaci comeciaina facadimaci; ia Cristo dibeimo ie rafuena nia llocana jaiacadicai.

<sup>14</sup> Bie carta cue cuiamona, omoina meiruitaiacaiñedicue; ia omoina nia llofueiacadicue. Isiruiga uruaidomoi isoidomoi. Ie jira bie rafuena omoi raise uiñuana jitaidicue. <sup>15</sup> Omoina Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruaina jai jaidomoi isoidomoi. <sup>16</sup> Ie jira omoimo cue llogacinodo mai omoi jai.

<sup>17</sup> Iedo omoi jaillena, omoina canollena, omoi dine Timoteona jai oredicue. Naimiena isiruiticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoide. Creyentia illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoina llofuede. <sup>18</sup> “Pablo caina jaciruilla jira, naimie cai dine biñeite” raillanomo omoi comeciaina facajamona, omoimona damierie jai abina biridomoi. <sup>19</sup> Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uiñoiticue. Naimaci ñaiacinodo iena uiñoñeiticue; iadedi naimaci finoca rafuemona iena uiñoiticue. <sup>20</sup> Ero, jamai ñaiamona, Jusiñamui anamo naimie



jitailla isoi iñedica; iadedi naimie finoca rafuedo cai jaillamona, naimie jitailla isoi iticai. <sup>21</sup> Omoi dine ico cue ria, ¿niese omoi diga ñaiticue? Cuemo llono. Cue llwana omoi ñnoñenia, omoimo riire lloiticue. Cue llwana omoi ñnoia, omoina cue isiruillamona, omoimo fecuise lloiticue. Ie jira cuemo llono.

## 5

### *Pablo eo jearede rafuena finodimiena riire llote*

<sup>1</sup> Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina ñnoñedino naie isoide rafuena finoñedimaci; iadedi omoimona damie ie eicañona ote, ie aina. <sup>2</sup> Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunaiñedomoi? Omoi rocabillacomo naimie bia, naimie fo billana rairui. <sup>3</sup> Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uiñoticue. <sup>4</sup> Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. <sup>5</sup> Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoñeite.

<sup>6</sup> Jearede rafue omoi motomo illa jira, ¿buena abina iedotomoi? Janorede siritate ra juilliruai mo faiamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. <sup>7</sup> Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeci mo ite jeacinona fañonocai. Jeacino anamo omoi jai illa jira, iena fañonocai. Pascua rafue facaiseconi judíuai cominidi toica llaudaiai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno. <sup>8</sup> Cai facaina Cristo fiodailla jira, cai jeacinona fañonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicnodo mai cai jailli.

<sup>9</sup> Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai

iniñede iññiai diga itiñaiñuai diga nabairiñellena lloticue. <sup>10</sup> Nibai iena raise cacaiñedomoi. Ie jira iena dane lloiticue. Cristona iñoñedinona ñaiñedicue. Naimaci aiñede riñoniai diga ia, naiñaiñuai iniñede iññiai diga ia, naimaci rana nicidoia, rana naimaci fiia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusiñamuina uiñoñedino illa jira, ¿ninomo niadedi iticai? <sup>11</sup> “Cristona iñnoticai” raitinona ñaiticue. Naimaci aiñede riñoniai diga naimaci ia, naiñaiñuai iniñede iññiai diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci fiicabia, naimaci diga nabairiñeno. Naie isoidino omoi jofuemo feiñoño. <sup>12-13</sup> Cristona iñoñedinona ñaiñedicue. Naimaci rafue cuemo duiñede; iadedi maraiñedicinona naimaci finoia, Jusiñamui naimacina duere finoite; iadedi Cristona iñnotino maraiñedicinona finoia, naimacimo riire llono. Omoi motomo ite jearede rafuena finodimiena omoi rocabillacombia, naimie fo billana rairui.

## 6

### *Cristona iñoñede juezmo jiaie creyentena llogidoño*

<sup>1</sup> Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiai dine jaiñedomoi, naicinona siadollena? ¿Bue ñellena Cristona iñoñede juez dine naimiena meiruiñeno llogidotomoi? <sup>2-3</sup> Jesucristo abido bille mei, Cristona iñnotinodicaidi Cristona iñoñedinona duere sefuillena lloticai. Taife comini duere sefuillicinona ico jiai lloticai. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi? <sup>4</sup> Nicino omoimo ia, ¿bue ñellena Cristona iñoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. <sup>5</sup> Omoi meidallena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. <sup>6</sup> Iese finocabiñedomoi; iadedi nicino omoi creyentiamo ia, Cristona iñoñedimie mo jiaie creyentena llogidocabitomoi.

<sup>7</sup> Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oño anamo ee. Naimiemona omoi duere sefuia, dama ite. <sup>8</sup> Iese iñedomoi; iadedi dani conini jiaie creyentaina duere finocabidomoi. Naimaci rana fiidomoi. Omoi amana duere finodomoi.

<sup>9</sup> Jusiñamui sedajanomo naimiena iñoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo

omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conioño aifiedotino, <sup>10</sup> rana bainino fiicabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci. <sup>11</sup> Omoimona dajerie iese jaie it-omoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai featate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

### *Jearede rafuemona abina rairui*

<sup>12</sup> Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi. <sup>13</sup> Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. <sup>14</sup> Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

<sup>15</sup> Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. <sup>16</sup> Ie aiñede riño diga bu ia, ie ai illa isoi, jai dajena jaidiaimaiai. Ie jira Jusiñamui jaie llote: “Riño diga iima illa jira, jai dajena jaidiaimaiai” llote. <sup>17</sup> Cai Nama Cristomo bu duia, dajena jai jaidiaimaiai. Jusiñamui Joreño iaimaiaimo illa jira, iaimaiai comeci daje isoi jai lloide.

<sup>18</sup> Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie marañede rafue bu finoia, naimie abimo jearede rafue finoñede. <sup>19</sup> Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentiai. Jusiñamuimo jai jainaiaidomoi. Ie muidona omoi

jitaillacinodo jaiñeno. <sup>20</sup> Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemonu Jusiñamuina eo iobita.

## 7

### *Pablodi iima ie aina ua rafuena ñaite*

<sup>1</sup> Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare; <sup>2</sup> iadedi jeacino omoi finoi raillano, nagamie ie aina otena, jiai mare. Nagañaiño ie inina otena, jiai mare. <sup>3</sup> Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena. <sup>4</sup> Naiñaiño abi dañone; iadedi daño ie ini abimo jiai duide. Naimie abi damañede; iadedi dama ie ai abimo jiai duide. <sup>5</sup> Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico começi daje isoi lloillamona, diga irui illamona danomo omico iniacañenia, jiai mare. Naie facaise fuilla meinomo riño diga o iacanamona, dane danomo ini, Taife omicomu ramo fai raillano.

<sup>6</sup> Dane lloiticue. Jeacinona omoi finoi raillano, nagamie ie aina otena, mare. Nagañaiño ie inina otena, jiai mare. Iese omoimo lloiticue; iadedi iese ocuiñedicue. <sup>7</sup> Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie airedimaci. Dajerie ininidimaci. Dajerie iniredimaci.

<sup>8</sup> Nia ainidinomu lloiticue. Nia ininidinomu lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; <sup>9</sup> iadedi omoi ocuiñeniadedi, aina ono. Jiaie riño diga illemo o comecina facañellena, daje riño ona ono, o aina. Jiaie imamo o comecina facañellena, daje imana ono, o inina.

<sup>10</sup> Creyentaimo nia lloiticue. Airedinomu lloiticue. Iniredinomu jiai lloiticue. Cue uaido lloñedicue; iadedi cai Nama jaie llote: “Riño ie inina sofeño. <sup>11</sup> Iima ie aina sofeño” llote. Iese llote; iadedi nie riño ie inina sofeia, jiaie imana naiñaiño oñena. Imana naiñaiño oiacania, ie ini diga dane abido illasa.

<sup>12</sup> Nia lloiticue. Cai Nama biena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiño ona dotaño” naimiemo llono. <sup>13</sup> Omoi nairaimona creyentena dañaiño

jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiena dotaño” naiñaiño lloño. <sup>14</sup> Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaímaiaí uruiaina, jiaie creyente iaímaiaí uruiái isoi, omoí roracomo feiño. <sup>15</sup> Ie inina creyenteñede ai sofeiacania: “Naiñaiñoña dotaño” naimiemo lloño. “Naiñaiño jaillena rairuiño” naimiemo lloño. Ie aina creyenteñede ini sofeiacania: “Naimiena dotaño” naiñaiño lloño. “Naimie jaillena rairuiño” naiñaiño lloño. Sofeia mei, jai dajemo duiñediaímaiaí. Jusiñamui naga creyente uri illana jitaide; <sup>16</sup> iadedi ie ini diga ie ai fiebia, ie ini creyentenamona, naiñaiño nibai creyentena jaite. Ie ai diga ie ini fiebia, ie ai creyentenamona, naimie nibai creyentena jaite.

<sup>17</sup> Iena lloticue; iadedi Jusiñamuimona ie feiñoğa uaido nagamie jailla. Creyentiaína omoí jailla facaiseconi, omoí maijuilla ramo nia raise omoí maiji. Naga creyentiaí illanomo biena llofuecabiticue. <sup>18</sup> Nia creyentiaína omoí jaiñenia, judíuai isoi omoímona dajerie omoí abiaína detatatoí. Naie detatafuemo omoí comeciaina birui facañeno. Omoímona dajerie omoí abiaína nia detatañedomoí. Iemo omoí comeciaina birui facañeno; <sup>19</sup> iadedi Jusiñamui uaina omoí ñnuamo omoí comeciaina birui faca. Jiaie rafue baifemo faite. <sup>20</sup> Creyentiaína omoí jailla facaiseconi, omoí maijuilla ramo nia raise omoí maiji. <sup>21</sup> Creyentiaína omoí jailla facaise omoímona dajerie patrón anamo itinodomoí. Nia patrón anamo itino isoi omoí jai. Iemo omoí comeciaina jarire facañeno. Jiairuido omoí patrón: “Cue anamo iñedomoí” raia, naimie anamona oni omoí jai; iadedi Cristo rafuedo jaca omoí jai. <sup>22</sup> Cristona omoí ñnua facaise, patrón anamo omoímona damerie navui itomoí; iadedi Jusiñamui omoína fetode. Naimiena omoí ñnuamona, omoí jeacino anamo jai iñedomoí. Patrón anamo omoímona damerie navui iñedomoí; iadedi Jusiñamui omoína fetode. Ie jira naimie anamo jai itomoí. <sup>23</sup> Omoí jeacino facaina Jesucristo fiodailla jira, Jusiñamui omoí jeacinona oni dotade. Iena jai faitate. Naimie cominina jai jaidomoí. Ie jira comini jitaillacino anamo iñoño; iadedi Jusiñamui jitaillacino anamo i. <sup>24</sup> Cue amataí, creyentiaína omoí jailla facaiseconi omoí maijuilla ramo nia raise omoí maiji. Jusiñamui omoína canuanona, jearede rana omoí maijiñenia, nie isoide rana omoí maijia, Jusiñamuimona mare.

<sup>25</sup> Navui cuemo cartana oredomoí. Faidaiñuai illa ra-

fuenta uñoiacadomoi. Cai Nama naie rafuenta jaie lloñena jira, iena birui lloiticue. Naimie cuena duenailla jira, naimie uaina ñnoticue. Ie muidona comini ñnogamiedicue. <sup>26</sup> Birui duere omoi sefuilla facaise illa jira, omoi illa isoi omoi i. <sup>27</sup> Omoimona bu airenia, naiñaiñoña dotañena. Bu ainia, dama ainide. Riñoña oñena; <sup>28</sup> iadedi o aina illena ininide riñoña o otiodena, jeacinona finoñedio. Omoimona o inina illena ainide imana o otiodena, jeacinona finoñedio; iadedi aina bu ua mei, inina bu ua mei, eo duere maijite. Iese omoi duere sefuiñellena, omoimo iena lloticue.

<sup>29</sup> Cue amatiai, biemo omoi comeciaina faca. Jesucristo abido dane billirui iairei ite. Naimie jitailla rafuenta omoi raise finollena, omoi ainiaimo ite rafuemo omoi comeciaina facaja; iadedi Cristo rafuemo omoi comeciai eo facaja. <sup>30</sup> Omoimona damierie sunaia, damierie caimare ia, iemo omoi comeciaina eo facañeno. Damierie raruaiana ibaia, naieri eo iobiñeno. <sup>31</sup> Omoimona damierie bene ite rana ebiruitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuenta omoi finollena. Cristo rafue nano finuamo omoi comeciaina eo faca.

<sup>32</sup> Omoi comeciai jarire iñenana jitaidicue. Nia ainidimie abi juarede, dama Cristo rafuenta maijillena. Naimiena iobitaiacade; <sup>33</sup> iadedi airedimie bene ite rafuemo ie comecina facade. Ie aina iobitaiacade. Naiñaiñoimo ite rafuemo naimie comecina facade. Cristo rafuemo ie comecina jiai facade; <sup>34</sup> iadedi mena rafuemo ie comecina eo facallemo abi juanide. Ininidiñaiño abi juarede, daño Cristo rafuenta maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

<sup>35</sup> Aina uana rairuiñedicue. Inina uana jiai rairuiñedicue; iadedi omoi raise illena, naie rafuenta lloticue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

<sup>36</sup> Ero, omoimona naiñaiño oiacaga imamo ie moo, ie jisa caidiñeno fecaca. Naiñaiño jai moonailla jira, naiñaiño jitailla jira, naiñaiñoña feca. Fecaia, ie moo jeacinona finoñede; <sup>37</sup> iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacaiñenia, jiai mare. <sup>38</sup> Ie jisana fecaia, mare. Cristo rafuenta naiñaiño eo maijillena, ie jisa fecañenia, jiai mare.

<sup>39</sup> Jiaie rafuenta lloiticue. Riño ie ini nia fiodañenia, naiñaiño naimiemo jaca duide. Ie ini fiodaille mei, jiaie imana ie ini ifomo naiñaiño oiacania, mare; iadedi creyentedimiena naiñaiño ua. <sup>40</sup> Naie feciñodi imana ie inina oñenia, naiñaiño

abi juarenite, Cristo rafuena eo maijillena. Ie muidona inirediñaiño bai femo caimare iite.

## 8

### *Jusiñamuina eruaide jiraraimo llicisi fecaja rafue*

<sup>1</sup> Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damierie naie isoide llicisi riana: “Maraiñede” raitimaci. Creyentiaimona Jusiñamuina eruaide jirarai jamai rana illa jira, damierie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie rii, jiaie creyentiaimo comecina facañede. Jiaie creyentiaina bu isirua, naimacimo ie comecina facade. Cristo rafuedo jiaie creyentiai raise jaillana jitaide. <sup>2</sup> “Eo abina uiñoticue” ie comecina bu facaia, nia eo raise abina uiñoñede; <sup>3</sup> iadedi Jusiñamuina ua cai isiruillamona, jiaie creyentiaina cai isirua, jai abina uiñoticaí. Jusiñamui dinena caina jiai uiñotaacade.

<sup>4</sup> ¿Niese Jusiñamuina eruaide jiraraimo fecaca llicisina ñaiticaí? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca dajede. Iena uiñoticaí” raitomoi; <sup>5</sup> iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. <sup>6</sup> Iena sedacabidimaci; iadedi cai dani Jusiñamuina sedacabidicaí. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

<sup>7</sup> Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci rii: “Naie jirarai sedadicaí” naimaci comeciaina facadimaci. Naie rafue naimaci raise uiñoñena jira: “Jecinona finodicaí” raitimaci. <sup>8</sup> Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai ñnuamona caina feiñote. Buena cai riñenia, buena cai rii, jecinona finoñedicaí. Naiemona marecinona jiai finoñedicaí. <sup>9</sup> Naie llicisina riredomoi; iadedi omoi ama nibai Cristo díbeimo raise iñede. Naie llicisi omoi rii, naimiemona jecinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo díbeimo raise jaiñeite. Abido danomo naimie dane jaite. <sup>10</sup> Nibai abina uiñotomoi;

iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaiite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”. <sup>11</sup> Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite. <sup>12</sup> Iese omoi finoia, omoi amana jeacinona finotatomo. Naimie comecina ocuiñotañedomoi. Ie muidona Cristomo jeacinona jiai finodomo. <sup>13</sup> Cristomo jeacino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

## 9

### *Cristo facaina llorainidi naimaci jitailla rana jamai feiñua*

<sup>1</sup> Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuenajaie fetua facaise cai Nama Jesúna ciodicue. Creyentiaina omoi jailla jira, cai Nama facaina cue maijiana uiñotomo. <sup>2</sup> Jiaie comini Jesucristo oretagamiedicuen nibai uiñotañedimaci; iadedi omoi iena uiñotomo. Cristona omoi iinua jira, Jesucristo cuena oretajana uiñotomo.

<sup>3</sup> Cue llofuiacinona bu uaitaia, iese cue llofuiacinona riidoticue. <sup>4</sup> Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa. <sup>5</sup> Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiai macaria, omoi dine Pedro macaria, naimaci jitailla rana naimacimo jamai fecavidomo. Ie jira, ¿niese cue jitailla rana cuemo jamai fecañeitomo? <sup>6</sup> Jiaie llorainimo naimaci jitailla rana jamai fecacabidomo; iadedi cue onolli diga cue maijiana nibai nia jitaidomo. Bernabé ie onolli diga naimie maijiana nibai nia jitaidomo. <sup>7</sup> Ero, soldadodi ie guille ibañede. Iena jamai feiñote. Naga illimo maijiuidimie ie illimo maijide, naiemona naimie guillena. Naga toiniaina sedavidimiedi naimacina sedade, naimacimona ucube ie ol-lena. Omoi motomo cue maijia jira, cuena omoi nafuia, omoimo Cristo rafuena llocabiticue. <sup>8</sup> Jamai comini uaido naiena llofueñedicue; iadedi Moisés micori ciegafuiaimona iena fueoticue. <sup>9</sup> Naimie micori jaie cueba: “Jusiñamui lote: ‘Jurareta trigo oni juillena saisiia, iemona ie guillesa, ie fuena maiñeno. Maiñenia, ie maijia fueмона guite’ lote”. Ie isoide. Omoi motomo cue maijia fueмона cue jitailla rana cuemo



jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade. <sup>10</sup> Cristo rafuena cue llofuecabilla jira, cue llua fuemona cue jitailla rana jamai cue feiñua. Iemo ocuridicue. Ie isoide. Ie illimo bu maijia, naiemona riana ollena, nainomo maijide. Iemo ocuride. <sup>11</sup> Omoi motomo Cristo rafuedo omoi raise jaillena, navui llofueticue. Ie jira cue jitailla raruiái omoi mona jamai cue ua. <sup>12</sup> Omoi mona raruiaina jiaie lloraini feiñocabilla jira, cuemona Cristo rafuena nano omoi cacaja jira, cue jamai jiaie feiñua; iadedi omoi mona raruiaina jicañedicue.

Cue jitailla raruiái cue ollena, cue onolli diga duere maijedicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoi mona raruiaina jicañedicue. Raruiaina cue jicaia, omoi comeciaina nibai facaitomoi: “Raruiái oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoi mona raruiaina jicañedicue. <sup>13</sup> Ero, Jerusalémo judíuai comini Jusiñamuina sedauilla jofu ite. Nainomo naie comini toiniaina atiuidimaci, Jusiñamuimo fecallena. Moisés micori jiaie llua isoi, naimaci jeacino facaina toiniaina fajanona fecadimaci. Nainomo maijuidino comini atica toiniaimona naimaci rillena, ibajanona ocabitimaci. Iena uifnotomoi. <sup>14</sup> Ie isoide. Cristo rafuena llorainidi naimaci rafuena inotinomona naimaci jitailla rana imaci ua. Cristo iena jai llote. <sup>15</sup> Omoi mona raruiaina jaca jicañedicue. Raruiái birui cue ollena, bie cartana jiaie cueñedicue. Dama cuemo ite ra diga iiticue. Omoi mona iena feiñoticedena, meiruioicaida feiñotice. Omoi mona cue feiñoñena jira, omoi facaina Cristo rafue cue lluamona, abina iedotice. Raruiái cuemo jamai omoi fecaia, ¿niese abina iedoitice?

<sup>16</sup> Jiaie lloraini rana feiñua isoi cue feiñoia, Cristo rafuena cue lluamona abina iedoñeitice. Jusiñamui cuena oretaja jira, naie rafuena llotice. Iena cue lloñenia, Jusiñamui cuena duere finoite. <sup>17</sup> Dama cue comeci jitaillamona Cristo rafuena cue lloiacania, Jusiñamuimona ibana feiñoitice. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidice. <sup>18</sup> Ie jira, ¿niese ibana feiñoitice? Ibana nibai feiñoitice; iadedi omoi mo Cristo rafue cue lloia, cuemona mare. Omoi mona cue jitailla rana cue oñenia, cuemona mare.

<sup>19</sup> Omoi mona raruiaina cue feiñoñena jira, omoi anamo inedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidice. Iese jaidice, ailluena cominina Cristo dibeimo cue itatallena. Iese jaiñedicuedena, eo janore comini Cristo

dibeimo nibai jai itataticue. <sup>20</sup> Judíuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. <sup>21</sup> Judíuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiai jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiai jaidicue. Cristo lloga uaido jiai jaidicue. Naimacina Cristo dibeimo itataiacadicue. <sup>22</sup> Naimaci diga cue nabairillena, Cristo rafuena nia raise iñoñedino diga cue ia: “Omoi baifemo Cristo rafuena uiñoticue” raiñedicue. Naimacina iciacaiñedicue, naimacimo jeacinona cue finoi raillano. Naimacina cue isiruillamona, naimacina canoacadicue. Naimacina Cristo rafuena raise iñuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai iñoitimaci”. <sup>23</sup> Cristo rafuena ailluena comini iñollena, iese jaidicue. Iena llocana jaidicue. Naimaci iñua jira, iobidicue.

<sup>24</sup> Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena iñocana mai cai jailli, ico Jusiñamui illanomo monamo ibana nana cai feiñollena. <sup>25</sup> Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiaina cai eenua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobiticaí. <sup>26</sup> Riire aisiacadimie ebena aisíñede. Onolli diga mena iaímaiaí jamai jifanoia, jafaicina jamai ducoíñediaímaiaí; iadedi conimana ducoídiaímaiaí. Ie isoide. Cristo rafuedo raise cue jaiacania, jamai ebena jaiñedicue; iadedi nana cue comecimona iedo jaidicue. <sup>27</sup> Cue comecina raise sedadicue. Dama Cristo rafue anamo iacadicue. Dama iena iñoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

## 10

*Jiraraina sedañena rafue*

<sup>1</sup> Cue amatiai, bie rafuena feitaño. Cai jaiagai micoriai finoca rafuemona fueoiticai. Egipto raila enruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede raila monailai ruica naimaci jaiacania, Jusiñamuidi naie monailai oni ñaijitate, safefodo nana naimaci ruica jaillena. <sup>2</sup> Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. <sup>3</sup> Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci. <sup>4</sup> Nainomo jinui jiai iñena jira, Jusiñamui llua jira, Moisés micori noficina butajamona, toide jinuina nana jirodimaci. Naimaci nine macaria, Cristona cioiñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; <sup>5</sup> iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fioidaitade.

<sup>6</sup> Cai jaiagai finoca rafuemona cai fueua. Maraiñede jearede rafuena naimaci finua isoi ebiruiño. Abimo omoi oñeno. <sup>7</sup> Jusiñamuiñedimiena sedaño. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oñeno. Jusiñamuiñedimiena omoi sedaño. <sup>8</sup> Naimaci jearede rafuena finodimaci. Naimacimona damierie naimaci aiñede riñoniai diga itimaci. Ie jira naimacimona daruidemo veintitrés mil comini fioidaitimaci. Jusiñamui naimacina fioidaitade. Naimaci finoca rafue isoi abimo cai oñeno. <sup>9</sup> Cai jaiagaimona damierie Jusiñamui Joreñaña ñaitimaci. Naimaci guisoiga radi Jusiñamuimona bite. Naiena ñiamona, Egiptomote guillemo comeciaina facadimaci. Ie muidona naimiena riicaitadimaci. Ie jira Jusiñamuidi jaioniaina naimacina ainitate. Iemona ailluena fioidaitimaci. Naimaci finoca rafue isoi abimo cai oñeno. Jusiñamuina riicaitaño. Cristona cai nia ñnoñena facai finoca rafuemo cai comeciaina facaño. <sup>10</sup> Cai jaiagaimona damierie Jusiñamui facaina lloraini joreñaña ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oñeno. Jusiñamui facaina lloraini joreñaña cai ñaiño.

<sup>11</sup> Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona. <sup>12</sup> Naie isoide rafue omoimo suiñellena, omoi abiaina rairui. Omoi comeciaina nibai facadomoi: “Cristona cai eo raise ñnua jira, iena finoñeiticai”

comeciaina facadomoi; iadedi omoi abiaina omoi rairuiñenia, jeacinona finoitomoi. <sup>13</sup> Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitañeno. Jusiñamuidi ñnogamie. Ie muidona omoi comeciai ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi ñnoñellena, Jusiñamuidi omoina canoite.

<sup>14</sup> Cue amatiai, Jusiñamui omoina canuamona, Jusiñamuiñedimie facaina finoca rafuemona oni i. <sup>15</sup> Abina uiñotomoi. Ie jira omoimo cue llucacinona omoi cacaja mei, iemo omoi comeciaina omoi faca. <sup>16</sup> Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruana, janore llomeniconona guiticai. Jusiñamuimo iobillacinona nano fecadicai. Ie mei janore vino jirodicai. Iena cai jiruamona, Cristona cai nabaillana uiñoticai. Cruzmo Cristo fiodailla jira, naimiena nabaidicai. Naie facaise llomeniconona cai tairuñuamona, naimiena cai nabaillana uiñoticai. Cristo fiodailla jira, iese iticai. <sup>17</sup> Diga creyentiaidicai; iadedi daje llomenicomona jaca guiticai. Daje llomenicomona cai guilla jira, dajena Cristomo cai duillana uiñoticai.

<sup>18</sup> Ero, judíuai raila cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. <sup>19</sup> Omoi illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guilledí jamai guille. Naie jiraraidí jamai ra. Cajeñede; <sup>20</sup> iadedi Jusiñamuina ñnoñedinomona jamai rañede. Naimacimona nanoca ra. “Iemo rille cai fecajia, cai moona sedadicaí” raitimaci; iadedi naie ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoi. Taife diga omoi nabairillana jitaiñedicue. Taifemo omoi duillana jitaiñedicue. <sup>21</sup> Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, marañede. <sup>22</sup> Iese omoi finoia, Jusiñamuina jai iciritaitomoi. Naimiena omoi icia, ¿niese naimie riicaillafuemona jilloitomoi? Jaca jilloñeitomoi.

*Jiaie creyentiaina canocana cai jailla*

<sup>23</sup> Ero, Jusiñamui dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo dibeimo itatañedicai. Iena cai finoia, cai amana Cristo rafuena ñnotacana jaiñeiticai. Naimiena ramo faicana uitataticai. <sup>24</sup> Omoimona nagamié dama naimiemo ite rafuemo comecina facañena; iadedi naga jiaie creyentemo ite rafuemo ie comecina jiai facaja.

<sup>25</sup> Ero, ninena o llicisina omoi ibaia, Jusiñamuiñedimie mo naie llicisina fecajana jicanoñeno; iadedi jicanoñeno iena jaricitaiñeno rino. <sup>26</sup> Iena David micori jaié cuela: “Jusiñamui bie enruena finode. Nana rana finode. Cai guillena, cai guille rana nana comuitaga” cuela. Ie jira ¿niese fimaiticai? Naimie mare finoca rana cai ríia, jeacinona finoñedicai.

<sup>27</sup> Ero, naimie diga o guillena Cristona ñnoñedimiedi ona uaidoia, naimie dine o jaiacania, naimie dine guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno; <sup>28</sup> iadedi Cristona raise ñnoñedimie nainomo jiai guitemo, omo lloia: “Bie llicisidi Jusiñamuiñedimie mo jai fecaca llicisi”, iena o riñeno. Iena o ríia, Cristona raise ñnoñedimie comecina facaite: “Jeacinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno. <sup>29</sup> Naimie comecina facajacinodo cai jaiñenamona, nana Jusiñamui comuitaga guillena guiredicai; iadedi Cristona nia raise ñnoñedimiemona nana guinidicai; iadedi naimie comecina facajacinodo jaiñedicai. <sup>30</sup> Cai guia, Jusiñamuimona naie guille comuitaja jira, Jusiñamuimo iobillacinona fecadicai; iadedi cai guillamona damierie cai joreñona ñaiamona, iena guiñeiticai. <sup>31</sup> Omoimo iena nia lloiticue. Nie isoide rana omoi guia, nie isoide rana omoi ríia, nie isoide rana omoi jiroia, nie isoide rafuena omoi finoia, naieri Jusiñamuina iobita. <sup>32</sup> Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotinona jiai canocabi, naimaci abido danomo uaiñellena. <sup>33</sup> Buena cue finoia, nana cominimo cue comecina facadicue. Ie jira nagarui cue jitaillacinodo jaiñedicue; iadedi Cristo rafuena naimaci ñnollena, nana cominina canocana jaidicue.

## 11

<sup>1</sup> Cristo lloga rafuedo jai jaidicue. Cue isoi omoi jai.

*Roracomo riñoniai illa rafue*

<sup>2</sup> Cuena nia feitañedomoi. Cristo oretagano jaie llogacinona omoina llofueticue. Cue llofueuillacinodo nia jaidomoi. Ie jira omoiri iobidicue; <sup>3</sup> iadedi jaie rafuena nia lloiacadicue. Cristo ie Moo anamo ite. Naga iima Cristo anamo jiai ite. Nagamie ai ie ini anamo ite. Omoi afemo itino uaina omoi iñoñenia, maraiñede. <sup>4</sup> Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaiño bicoñenia, ie ini anamo naiñaiño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide.

<sup>5</sup> Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade. <sup>6</sup> Nie riño ie ifogimo iniroi bicoñeno jaiacania, iima isoi eruaillena, ie ifogidi rijiruda gareca. Iemona naiñaiño meidailamona, ie ini anamo illamona, ie ifogimo iniroina bicuano naiñaiño jaite. <sup>7</sup> Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñotica. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla.

<sup>8</sup> Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide.

<sup>9</sup> Naiñaiño anamo illena naimie comuiñede; iadedi naimie anamo illena naiñaiño comuide. Naimie uai inollena, naimiena canollena, naiñaiño comuide. <sup>10</sup> Ie ini anamo naiñaiño illa jira, riño ie ifogimo iniroina bicuano jailla.

Naiñaiño iese ia, naiñaiño naimaci cianona, Jusiñamui jaienisa imona jiai mare. <sup>11</sup> Naga riño ie ini anamo ite; iadedi Cristona cai inua jira, riño baifemo imadi faiñede. Iima baifemo riño jiai faiñede; iadedi daimaia conimana ia imaiia canua. Cristo naga iimana, naga riñoña daje isoi feiñote.

<sup>12</sup> Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga iima riñomona comuide.

<sup>13</sup> Biemo omoi comeciaina omoi faca: Omoi roracomo Jusiñamui diga nie riño ñaia, omoi einamac i finocabilla isoi, ie ifogina bicoñeno jaia, ¿nie se omoi comeciadi raite? Cue comei: “Maraiñede” raite. Ie ini anamo naiñaiño iñedena eruaide. <sup>14</sup> Nana omoi biesedena raicabitomoi; “Nie iima ie ifotirai eo areniadedi, cai cominimona maraiñeno ciode; <sup>15</sup> iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicotajamona,

naiñaiño ifotie ie ifogina raise ibaide. <sup>16</sup> Iena jaca llofuecabiticue. Jiaie creyentiaie illanomo cue isoi comeciaina lloidimaci. Omoimona bu cue llogacinona uaitaiacania, damamei ite.

*Cristo fiodailla rafuena raise comeciñedimaci*

<sup>17</sup> Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena inocana jaiñedomoi; iadedi naiemona maraiñede rafue comuide. <sup>18</sup> Rollena omoi oficabia, omoi comeciaina daje isoi lloinena jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiai guillena aticabidomoi. Mare; iadedi danomo guiñedomoi. Omoimona damerie ucuberena jira, dueredino diga guiacaiñedomoi. Omoi guille caididomoi. <sup>19</sup> Omoi iese illana jitaiñedicue; iadedi daje isoi omoi comeciaina lloinena mona, Jusiñamui dibeimo raise itinodi uiñoga. Omoimona damerie danomo omoi guillamona, Jusiñamuina omoi isiruillana uiñoticaie. <sup>20</sup> Cristona sedallena omoi oficabia, guitomoi; iadedi vino jiruanona, llomeniconna guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue. <sup>21</sup> Nagamiai guillena aticabidomoi. Dani coniniri raise guiñedomoi. Danerie omoi atica guillena guitomoi. Jiaionna guillena iñedomoi. Damerie omoimo ailluena guille ite. Damerie omoimo guille raise iñede. Jiaionna guillena omoi iñena jira, damerie jaca aimetaitimaci; iadedi jaino monidimaci. Damerie guilla motomo jiai jifaidimaci. Conini nabaiñedomoi. Ie jirari Cristo fiodailla rafuena raise comecinidomoi. <sup>22</sup> Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jainomo guille fecacaiñedomoi? Jiaie creyentiaina omoi isiruiñenamona, Jusiñamuina jiai isiruiñedomoi. Janore guille itinona duere finodomoi, naimacina omoi eacacaiñena jira. Iese omoi illa jira, omoi iobiñedicue.

*Cristo fiodailla rafuena llofuiacino*

<sup>23</sup> Navui omoina buena llofueticue; iadedi omoi raise inoñena jira, iena dane llofueiticue. Cai Nama iena cuemo jaiie llote. Cai Nama Jesús ie gaitatajarui facaiseconi, ie llofueoicaigano diga ia, naimaci guia, llomeniconna llinote. <sup>24</sup> Iena llinuanona, Jusiñamuimo iobillacinona fecade. Ie mei iena tairuanona raite: “Mai, buena guiño. Bie llomenicodi omoi guillamona, cue fiodaillana omoi comeci. Cue fiodaillamona omoi jeacinomona jilloitomoi. Buena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci. <sup>25</sup> Ie

mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toiniaina atiuidimaci, naimiemo fecallena”. Iemo ie comecina facajano, raite: “Cue fiодaillemona, dama cue daillemona, Jusiñamuidi omoimo jiaie rafuena birui llote. Omoijeacinona oni dotajana llote. Bie vinodi naie rafue facai ie. Cue llua isoi, bie vinona omoijeiruamona, cuena comeci. Mai, iena jiro” raite. Ie mei jirodimaci. <sup>26</sup> Naga icaiño Cristo facaina llomeniconona omoije guia, Cristo facaina vinona omoijeiroia, omoijeacino facaina cai Nama fiодaillana uiñotomoi. Naimie nia abido dane bille dinori naiena comeci.

*Cristo fiодailla rafuena raise comeciadicai*

<sup>27</sup> Cristo fiодailla rafuena raise comeci. Naie llomeniconona Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie ñnoñena jira, Cristomo jeacinona finode. <sup>28</sup> Jeacino omoije comeciaino illamo omoije comeciaina faca. Jeacino omoije comeciaino ia, iena guiñeno. Iena jiroñeno. Jeacino omoije comeciaino iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro. <sup>29</sup> Jeacino naimie comecimo nia illamona, iena guia, iena jiroia, marañede. Naimie jeacino facaina Cristo fiодailla jira, Cristo fiодaillana naimie jai jamaide. Ie muidona Jusiñamui naimiema duere finoite. <sup>30</sup> Ie muidona omoimona ailluena irareside. Ie jira omoimona damierie fiодaite. <sup>31</sup> Cai comeciaina raise cai facajamona, jeacinona cai fainonocaia, Jusiñamui caina duere finoñeite. <sup>32</sup> Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiema ñnoñedinona duere finoite. Naimaci diga cai duere sefuiñellena, birui caina duere finode.

<sup>33</sup> Cue amatiai, Cristo fiодailla rafuena omoije comecillena omoije ofia, daacaiño omoije guillesa, jiaino riñedinona seda. <sup>34</sup> Bu eo aimetaia, jofomo nano guilla. Guillanona omoije ofillinomo bi. Dani coniniri raise omoije guiacaiñenia, Jusiñamui omoima duere finoije raillano, jofomo guiño. Nana naie rafuena nia lloñedicue; iadedi omoije dine dane cue ia, iena lloiticue.

## 12

*Cristo facaina raise majillena, Jusiñamui Joreño naga creyentena canode*

<sup>1</sup> Cue amatiai, jiaie rafuena cuemo jai jicanotomoi. Iena jañaiticue. Jusiñamuimona diga uaina feiñoticaie. Naimiemona naimie facaina majija uaina feiñoticaie. Naimie facaina cai



maijillena, jiaie creyentiaina cai canollena, naimiemona cai oga uaina ñaiticue. Iena omoi raise uifüana jitaidicue.

<sup>2</sup> Ero, Cristona nia omoi ñinoñenia, Jusiñamuiñedimiede jiraraina sedaudomoi. Iedo jaie tainodo jai-jaisoidomoi. Taife iedo omoina jifüete. <sup>3</sup> Ie jira buena omoi raise uifüana jitaidicue. Jusiñamui Joreño uaido nie creyente ñaia, Jesús Joreñoña jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiñeno.

<sup>4</sup> Jusiñamui Joreño caimo jai illa jira, Jusiñamui Joreñomona cai maijia uaina oticai. Naga creyente daje isoi oñedicai.

<sup>5</sup> Naga creyente Cristo facaina daje isoide uai diga maijiñedicai; iadedi Cristo facaina nana maijidicai.

<sup>6</sup> Jusiñamuidi diga uai llua motomo naga creyentena maijitate, naimie jitailla rafuena naimaci finollena. <sup>7</sup> Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uifüoticaí.

<sup>8</sup> Damierie creyentemo Cristo rafue jino llole uaina itatate. Damierie creyentemo Cristo rafue llofuelle uaina itatate.

<sup>9</sup> Damierie creyentemo Jusiñamui siño rafue finuana ñnotaja uaina itatate. Damierie creyentemo duidinona jillotaja uaina itatate. <sup>10</sup> Damierie creyentemo siño rafuena finua uaina itatate. Damierie creyentemo jino llole uaina itatate.

Naimacimo Jusiñamuidi ie rafuena llocabite, jiaínomo jino lollena. Dajerie creyentemo uaina itatate, nie isoide uaido Cristo rafuena railla lloraima lluaña uifüollena. Jusiñamui Joreño uaido nie lloraima lloia, iena uifüote. Taife uaido nie lloraima lloia, iena jiaí uifüote. Damierie creyentemo naimaci uifüoñega uaido ñaia uaina itatate. Damierie creyentemo naie uifüoñega uai oni dobaiñolle uaina itatate, comini iena raise uifüollena. Iena naimaci nia dobaiñoñenia, iena jiaí raise uifüoñedimaci. <sup>11</sup> Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

### *Cristomo dajena duidicai*

<sup>12</sup> Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. <sup>13</sup> Dama Jusiñamui Joreñodi dajena Cristomo nana creyentiaidicaídi duidicai. Dajerie judíuaidicai; dajerie judíuainedicai; dajerie patrón anamo

itica; dajerie patrón anamo iñedica. Diga nairaiaidica; iadedi dajena Jusiñamui Joreñona nana feiñotica.

<sup>14</sup> Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidica; iadedi Cristo facaina dajena maijidica. <sup>15</sup> Ero, cai abimona cai eilli niba; facaite: “Onolli isoñedice. Onolli cue baifemo faite. Bie abimo duiñedice” facaite. Iese facaia, jaca iese iñede. Cai abimo jaca duide. Onolli eilli baifemo fañede. Dafaconi ite. <sup>16</sup> Ero, cai jefo niba; facaite: “Uisi isoñedice. Uisi cue baifemo faite. Bie abimo duiñedice” facaite. Iese facaia, jaca iese iñede. Cai abimo jaca duide. Uisi jefo baifemo fañede. Ie isoide. Dajena Cristomo omoi duilla jira: “Jiaimie baifemo itice” raiñeno. Jiaie creyentena abina uradoiñeno. <sup>17</sup> Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaitica? ¿Niese niadedi ra sorillana cacadica? Ie isoide. Dajena Cristomo omoi duilla jira, naga creyentena jitaidomoi, Cristomo dajena ñnocana omoi jaillena. Jiaie creyentena uaitaño. <sup>18</sup> Jusiñamui cai abimo diga rana comuitate. Naimie jitailla isoi, cai abimo naga rana comuitate. <sup>19</sup> Cai abimo diga ra iñedena, ¿buedo cajenitica? <sup>20</sup> Diga ra cai abimo ite; iadedi jaca dajede cai abi.

<sup>21</sup> Rana cai cioillena, cai uisi ite; iadedi cai onolli iñedena, cai ciua rana llinonidica. Ra feitañellena, cai comeci ite; iadedi cai eilli iñedena, macarinidica. Ie isoide. Cristomo dajemo cai duilla jira, naga creyentena dajena ñnocana jail-lana jitaidica. Jiaie creyentemona abina iedoño. <sup>22</sup> Naga cai abimo ite rana jitaidica, raise cai illena. Naga cai abimo ite ra jiaie ra baifemo iñede. Nana daje isoi itena, mare; <sup>23</sup> iadedi dajerie ra ebire eruaillena, cai abi jifollena, iniroina jitaidica. Meiruiñellena, cai abi bainillena, iniroina jia; jitaidica. <sup>24</sup> Cai uiecomo meiredino iñena jira, iena jifoñedica. Ero, Jusiñamui cai abina finode. Dajerie ra jiaie ra baifemo iñede. <sup>25</sup> Jusiñamuidi naga cai abimo ite ra dajena maijiana itatate. Dajena maijicana jaide. <sup>26</sup> Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidica. Ie isoide. Cristomo dajena duidica. Jiaie creyente duere sefuia, naimiena cai canoia, Cristo dibeimo caimare marena itica. Naimiena cai canoñenia, caimare marena iñedica.

<sup>27</sup> Ero, caidi naimie cominina jira, Cristomo dajena nagaia; duidica. <sup>28</sup> Ie jira Jusiñamuidi naimiena ñnotinomona damieriena nano fetuanona, Cristo naimacina oretate, ie rafuena lollena. Ie mei jia;inona fetode, naimacimo ie rafuena llua mei, jia;inomo ie rafuena jino lollena. Jia;inona fetode, ie rafuena llofullena, cominina ie rafuena raise uiñotallena.

Jiaino ie uaina itatate, naimie facaina naimaci maijillena, jiaie creyentiaina naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. <sup>29</sup> Ero, Jusiñamui nana omoina fetoñede, ie rafuena jino lollena. Damieriena fetode. Nana omoina fetoñede, ie rafuena llofuellena. Damieriena fetode. Nana omoina fetoñede, siño rafuena finollena. Damieriena fetode. <sup>30</sup> Nana omoina fetoñede, duidinona jilloitallena. Damieriena fetode. Nana omoina fetoñede, omoi uiñoñega uaido ñaillena. Damieriena fetode. Nana omoina fetoñede, naie uiñoñega uai jino dobaiñollena. Damieriena fetode. <sup>31</sup> Naga creyentemo Jusiñamuidi ie maijia uaina itatate; iadedi damierie uai jiaie uai bai femo ite. Iena omoimo illena, Jusiñamuimo jica; iadedi jiaie rafuena omoi ollena, omoimo lloiticue. Nana jiaie rafue bai femo ite. Jiaie cominina omoi isiruillena lloiticue.

## 13

### *Nana jiaie cominina cai isiruillafue*

<sup>1</sup> Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuena ñaiticai. <sup>2</sup> Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo ñnoia, cominina cai isiruiñenia, Jusiñamuimona jamai bue isoidicai. <sup>3</sup> Jiaie cominina cai canollena nana caimo ite rana cai fecaia, Cristo rafuena cai lollena cai niadi fioidiacania, cominina cai isiruiñenia, jaca buena oñedicai. Jusiñamuina jaca iobitañedicai.

<sup>4</sup> Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoiñedicai. Abina birioicaiñedicai. <sup>5</sup> Cominina cai isiruia, abina iedoñedicai. Naimacimo cai comeciaina facacabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai. <sup>6</sup> Cominina cai isiruia, naimaci jeare finoca rari iobicabiñedicai. Naimaci uanai mare finoca rari iobicabidicai. <sup>7</sup> Cominina cai isiruia, naimaci caina duere finoia, ibana ocabiñedicai. Cai joreñona bu ñaia, caina taino lloia, iena ñnocabiñedicai. Cai marena illamo ocuridicai. Cai comeciaina ocuiñocana jaidicai.

<sup>8</sup> Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite;

iadedi naie uai ico saite. Caimo ie llofuelle uaina jaca itatañeite; iadedi nai uai ico saite. <sup>9</sup> Nana Jusiñamui caina uiñotagacina nia raise cacaiñedicaí. Nana Jusiñamui rafuena nia raise jino lloñedicaí; <sup>10</sup> iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticaí. Naimiemo ite rafuena jiai raise uiñoiticaí.

<sup>11</sup> Jiaie rafuedo iena llofueticue. Jaie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fañonocaidicue. Eimie comecina facajacínodo birui jaidicue. Urue isoi Jusiñamui rafuena birui janore uiñoticaí; iadedi monamo cai ia, eimie isoi iena raise uiñoiticaí. <sup>12</sup> Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiai raise uiñoiticue. <sup>13</sup> Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacínodo jai abina ñnoticaí. Naimie llogacino suillemo jai ocuridicaí. Jusiñamuina cai isiruillamona, jiaie cominina jiai isiruuiticaí. Naie isiruillacino jiaicino baifemo faite. Ie jira coninina isiruicana omoi jai.

## 14

### *Omoi uiñoñega uaido omoi ñaia rafue*

<sup>1</sup> Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino llole uaina ua nicido. <sup>2</sup> Ero, omoi uiñoñega uaido ñaia uaina omoi ñaicabia, jaca buna omoína cacaiñena jira, cominina canollena ñaiñedomoi; iadedi Jusiñamuina iobital-lena ñaitomoi. Omoi uiñoñega rafuena omoi comeciainona ñaitomoi. <sup>3</sup> Jusiñamui rafuena jino omoi lloia, cominina canodomoi. Naimacina Jusiñamuina ñnotodomoi. Naimie díbeimo raise itatatomoi. Naimaci comeciaina ocuiñotodomoi. <sup>4</sup> Nana creyentiaína canodomoi; iadedi naie uiñoñega uaido omoi ñaia, dani omoi comeciaina canodomoi.

<sup>5</sup> Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiaí iena raise cacareillena, iena omoi oni dobaiñoia, cuemona jiai mare. Ie mei naie ñaiamona, Jusiñamui rafuena naimaci cacajamona, creyentiaína canodomoi. <sup>6</sup> Cue amataí omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoína canoñedicue; iadedi

Jusiñamui cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uiñua jira, omoina cue llofueticuedena, omoina jiai canodicue.

<sup>7</sup> Ero, quena jamai tainuaido bu fia, ie figana uiñoñedícaí. Guitarra bu jamai tainuaido taia, ie taillana uiñoñedícaí. <sup>8</sup> Ejércitomo trompetana jamai tainuaido fia, soldaduai maijillena raise uiñoñedímací. <sup>9</sup> Ie isoide. Cai cacaiñena uaido omoi ñaia, omoi ñaiana uiñoñedícaí. Iese omoi ñaia, jamai tainona ñaite isoí cacadícaí. <sup>10</sup> Eo ailluena nairaiáí ite. Naga nairai ie uai ite daní naimací ñaillena; <sup>11</sup> iadedí nie nairai ie uaina cue uiñoñenia, naimacimona jiaie nairai imiena eruaidícue. Cuemona naimací jiaie nairaina eruaidímací. Coniní diga ñaiana cacaiñedícaí. <sup>12</sup> Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, daní coniní Cristo rafuena inocana omoi jaillena. Jusiñamui Joreñomona daní daje uaina nicidoñeno; iadedí nana nicido.

<sup>13</sup> Ie jira ie uiñoñega uaido bu ñaia, ie oni dobaiñua uaina naimiemo illena, jiaie creyentiaí iena cacaiñena, Jusiñamuimo jicaja. <sup>14</sup> Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedí iena cacaiñedícue. Iena uiñoñedícue. <sup>15</sup> Ie jira, ¿niese cue nibaille? Jusiñamui diga cue ñaia, cue uiñoñega uaido ñaitícue; iadedí cominí cue ñaiana raise uiñollena, Jusiñamui diga jamai cue uaido jiaí ñaitícue. Jusiñamuimo cue roia, cue uiñoñega uaido roitícue; iadedí cominí cue ruana raise uiñollena, Jusiñamuimo jamai cue uaido jiaí roitícue. <sup>16</sup> Iobillacinona Jusiñamuimo omoi fecajano, omoi uiñoñega uaido omoi ñaiana, ¿niese omoína cacaiñedíno: “Jee” raitímací? <sup>17</sup> Iobillacinona Jusiñamuimo raise fecadomoi; iadedí omoína cacaiñedínona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno. <sup>18</sup> Cue uiñoñega uaido cue ñaicabilla jira, Jusiñamuimo iobillacinona fecadícue. Omoi baiñemo naie uaido cue ñaiana uiñotícue; <sup>19</sup> iadedí roracomo cue ia, cominina raise cue llofuellena, janore cue ñaiadi, mare; iadedí eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

<sup>20</sup> Cue amatiaí, omoi uiñoñega ñaia uaido daní jai jaidomoi; iadedí jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca. <sup>21</sup> Jusiñamui facaina lloraima micorí jaie cueda: “Jusiñamui llote: ‘Cue cominí dine jiaie nairaina cue oretajamona, cue cominina cuena inotallena, naie jiaie nairai uaido cue cominimo llotícue; iadedí iena jitañeitímací. Cuena jaca uiñoñeitímací’ llote”. <sup>22</sup> Ie isoide.

Uiñoñega uaido omoi ñaiamona, Cristona ñnoñedino iena raise cacaiñedimaci; iadedi Cristona ñnotino iena cacadimaci. Iemona fueotimaci. Jusiñamui rafuena omoi llofuiamona, Cristona ñnoñedino iena cacajamona, Cristona ñnoñedimaci; iadedi Cristona ñnotinona canodomo. <sup>23</sup> Danomo nana omoi ofia, omoi uiñoñega uaido nana omoi ñaia, Cristona ñnoñedino iena cacajanona, omoina; “Uairico” raitimaci; <sup>24</sup> iadedi omoi ofia, Jusiñamui rafuena omoi jino lloia, iena Cristona ñnoñedimie cacajamona, naimiedi jeacino naimie comecimo illana uiñoite. Naie rafue naimiemo riire baite. <sup>25</sup> Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina ñnoite. Ie muidona raite: “Uanai, Jusiñamui omoi motomo ite”.

*Roracomo omoi ia, raise marena omoi i*

<sup>26</sup> Cue amatiai, rollena omoi oficabia, ¿ñiese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo dibeimo creyentiaina raise itatallena, nana omoi finua rafuena raise fino. <sup>27</sup> Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite. <sup>28</sup> Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. <sup>29</sup> Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua. <sup>30</sup> Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llicaila. Iemei jiaimie lloite. <sup>31</sup> Iese damierie nana lloitomoi, naie llua amona Jusiñamui rafuena raise omoi uiñollena, omoi comeciai jiai ocuiñollena. <sup>32</sup> Naga llotimiedi ie uiñua diese llua na uiñote. Ie jira jiaimie nia lloia, iena cacarei. Iemei jiaimie llua. <sup>33</sup> Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

<sup>34-35</sup> Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jae llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

<sup>36</sup> ¿Ñiese cue lluacínodo jaiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote. <sup>37</sup> “Rafuena Jusiñamui cuemo llote” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uiñote; <sup>38</sup> iadedi naimie iese uiñoñenia, Jusiñamui Joreñomona naimie uai iñenana uiñoiticaí.

<sup>39</sup> Cue amatiai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiaí ñaia, iena rairuiñeno. <sup>40</sup> Omoi ofia, cue llua isoi, Jusiñamuina raise marena seda.

## 15

### *Fiodaillamona Cristo jai jillode*

<sup>1</sup> Cue amatiai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacínona feiñotomoi. Iena ñnocana jaidomoi. <sup>2</sup> Naiena omoi ñnuamona, Jusiñamui omoi jeacínomona omoina jillotate. Naiedo nia omoi jaia, iena raise omoi ñnoia, jai jillobidomoi.

<sup>3</sup> Nanoca rafuena omoina llofueticue. Jiaie creyentiaimona buena jai cacadicue. Jusiñamui facaina lloraini micoriai jaie ciegafuiaí isoi cai jeacino facaina Cristodi fiodaite. <sup>4</sup> Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jaie llua isoi. <sup>5</sup> Ie mei Pedro naimiena cide. Ie mei ie once llofueoicaigano naimiena ciodimaci. <sup>6</sup> Ie mei quinientos naimiena ñnotino naimiena daruido ciodimaci. Naimacimona damierie jai fiodaitimaci; iadedi ailluena nia fiodañedimaci. Cristo jilluana uiñotimaci. <sup>7</sup> Ie mei Jacobo naimiena cide. Ie mei nana ie oretagano naimiena ciodimaci.

<sup>8</sup> Ie mei naimiena jiaí ciodicue. Ie jira fiodaillamona naimie jilluana uiñoticaí. Ie doce llofueoicaigano fetua mei, diga años illanona, naimiena nia cue uiñoñena facaise cuena fetode. Ie mei ie rafuena cue lloñena, cuena oretate. <sup>9</sup> Ailluena creyentiaina jaie cue duere finua jira, nana jiaie Cristo oretagano cue baifemo faitimaci. Jamai bue isoidicue; iadedi Cristo cuena fetode. <sup>10</sup> Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. <sup>11</sup> Jiaie oretagano

Cristo rafuena llofueia, iena cue llofueia, daje isoide rafuena llocana jaidicai. Naie rafuena omoi cacajamona, iena ñnotomoi.

*Fiodaillamona nana creyentiai ico jilloitimaci*

12 Fiodaillamona Jusiñamui Cristona jillotajana llofuecabiticai; iadedi omoimona dajerie raitomoi: “Fiodaillamona, nana comini imaci abiai diga ico jilloñeitimaci”. 13 Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede. 14 Cristo jilloñenia, Cristo rafuena jai tainona lloticai. Naie rafuena jiai tainona ñnotomoi. 15 Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiaina ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticai. 16 Fiodaillamona nana creyentiai ico jilloñenia, Cristo jiai jaie jilloñede. 17 Cristo nia jilloñenia, naimiena tainona ñnotomoi. Jusiñamui omoi jeacinona niadedi oni dotañede. 18 Cristona ñnuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci. 19 Nana cai ille dinori dani Cristo caina jilloitallemo cai ocuiria; iadedi naimie jilloñenia, jai duere iticai. Jai tainomo ocuiridicai.

20 Ero, tainomo ocuiriñedicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentiai jiai jilloitimaci. 21 Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloiticai. 22 Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloiticai, naimie diga jaca cai illena. 23 Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticai. 24-25 Ie mei naimie dinena nana naimie dibeimo iñedinona anafesitaite. Nana naimie dibeimo iñede joreñuaina jiai anafesitaite. Illaimana Cristo illamona, nana naimie dibeimo iñedinona anafesitaite. “O uai cuemo o illamona, nana o jitailla rafuena jai fuidodicue” ie Moomo lloite. 26 Nana naimie dibeimo iñedino naimie anamo jai illa mei, Cristo muidona naimie comini jai jilluamona dane fiodaiñeitimaci. 27 Jusiñamuidi nana cominina Cristo anamo itataite. Ie muidona creyentiaidicai dane fiodaiñeiticai; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. 28 Naga ra Cristo anamo illa mei, ie majia fuilla mei, Jusiñamui ie Moona jira, Jusiñamui anamo



Cristo jiaí iite. Jusiñamui nanocamiéna jira, nana naimie finoca ra naimie anamo iite. Nana comini naimie anamo iitimaci.

<sup>29</sup> Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese ñnoñedomoi. Dajerie creyentiai marena illamona, omoimona dajerie creyentiaina jaidomoi. Naimaci jai fiodaitimaci; iadedi fiodaillamona ico jilluana ñnotimaci. Iena omoi ñnuanona, bautizagaomoi. <sup>30</sup> Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fiodaicabiticue? <sup>31</sup> Cue amatiai, cai Nama Jesucristomo omoi duilla jira, omoiri iobidicue; iadedi nagarui niadedi fiodaicabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci. <sup>32</sup> Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llamona jaca buena oñeiticue. Ie muidona fiodaillamona cai jaca jilloñeiticaidena, Cristo rafuena fainonocaida, ico raire jamai cai fiodailla jira, jamai ua jai jaicaillafuena cai jaiacaiticai. Ie ia iese iñede. Cristo jai jillode.

<sup>33</sup> Ie jira omoi abiaina jifueñeno. “Jilloñeiticai” railla comini diga omoi nabairia, naimaci llogacinodo jiaí jaitomoi. Ie muidona naimaci diga nabairiñeno. <sup>34</sup> Ie jira raise abina uiñuanona, mai jai. Jeacinona finocana jaiñeno. Omoimona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidaillena, omoimo iese lloticue. Jusiñamui rafuedo raise mai omoi jai.

### *¿Niese creyentiai jilloitimaci?*

<sup>35</sup> Omoimona damie nibai jicanoite: “¿Niese fiodaillamona creyentiaidicai jilloiticai? Naimaci abiai nibai jai rifaidimaci. ¿Nie isoide abiai diga dane iiticaí?” <sup>36</sup> Iese bu jicanoia, raise comequina facañede. O illimo buena o ria, janore sicua meinoconi, o riga radi jai abidi rifaide. <sup>37</sup> Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruañede. <sup>38</sup> Naga riarra daje isoi eruañede. Jusiñamui jitailla isoi, jiaiforie eruaide. Ie isoide. Naga fiodaitimie jillua mei, Jusiñamui jitailla isoi, ie abina jiaiforie itataite. <sup>39</sup> Diga isoide cai abiaina Jusiñamui jai comutate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede. <sup>40</sup> Jusiñamui dine ico cai ia, cai abiai iite, nainomo cai illena. Bene cai abiai jiaí ite, bene

cai illena. Monamo cai ia, ebireniticai. Bene cai ia, jiai ebire iticai; iadedi daje isoi ebire iñedicai. <sup>41</sup> Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuai isoi lligaiñoñede. Naga ucuai daje isoi lligaiñoñede. Monamo cai ico illena, naimie jitailla diese cai abiai caimo iite. <sup>42</sup> Ie isoide. Fiodaillamona cai jillua mei, cai abiai jiaifo eruaite. Cai fiodaillamona cai abiai rifaide; iadedi cai jilluamona, cai abiai dane jai rifaiñeite. <sup>43</sup> Cai fiodaillamona cai abiai jai ebinide; iadedi cai jilluamona, cai abiai ebirenite. Fiodaicana cai jailla jira, cai abiai birui raise mairiñede; iadedi ico cai jilluamona, cai abiai mairite. Nana Jusiñamui jitailla rafuena finoreniticai. <sup>44</sup> Cai fiodaia, come abiai isoi caimo birui ite; iadedi cai jilluamona monamo ico caimo cai abiai jiai iite. Enirue iena cai abiai birui caimo ite. Ie jira monamo cai jiaifo eruaite abiai caimo iite.

<sup>45</sup> Adán micori comuilla rafuena Moisés micori jaie cuela: “Jusiñamuidi nano comuidimie dofomo jafaicina firaiñuamona, naimie micori comena jaide” cuela. Naimiemona cai comuilla jira, fiodaiticai. Fiodaillamona Cristo jillua jira, ico cai jiai jilloille jira, caina jiaifo eruaite abiaina ico itataite. <sup>46</sup> Eniruemo birui cai illa jira, caimo birui ite abiai diga iticai. Fiodaillamona ico cai jillua mei, monamo cai ia, jiaifo eruaite abiai diga iiticai. <sup>47</sup> Adán micoridi enirue ie. Imuicimona Jusiñamuidi naimiena finode. Cristodi eniruemo billanona, iimana jaide; iadedi Jusiñamui dinena monamona naimie bite. <sup>48</sup> Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiai imuicina jaiticai; iadedi Cristomo jiai duidicai. Cai jillua mei, naimie isoi ico iiticai. <sup>49</sup> Adán micorimona cai comuilla jira, naimiena eruaidicai. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaifo eruaite abi naimiemo ite. Cai jillua mei, Cristona eruaiticai.

<sup>50</sup> Cue amatiai, buena lloticue. Caimo jai ite abiai diga monamo Jusiñamui ie comina sedajanomo iñeiticai. Cai abiai rifaila jira, cai fiodailla facaise naie isoide abiai diga nainomo jaca iñeiticai. <sup>51</sup> Ero, Jusiñamui cuena uiñotaga rafuena omoimo ja lloiticue. Iena navui jaca uiñoñedicai. Nana creyentiaidicai fiodaiñeiticai; iadedi Jusiñamui cai abiaina jiaifo meidotaite. <sup>52</sup> Omoi uisi jarire cuirorilla isoi, iena ua raire meidotaite. Ie trompeta fillanona, jai fiodaite creyentiaina Jusiñamuidi jillotajanona, naimaci abiaina meidotaite. Nia fiodaiñedinodicai cai abiaina jai meidotaite. Dane fiodaiñeiticai. <sup>53</sup> Cai abiai birui rifaiacade. Ie jira birui fiodaicana jaidicai. Jusiñamuidi cai abiaina ico meidoite.

Íco monamo jiaífo abiaí caímo ía, caí abiaí rifaiñeíte. Fiodaiñeíticai. <sup>54</sup> Iese caímo sua, Jusiñamui facaina lloaíma micorí jaie cuega uai jiaí suite. Cuega: “Nairuimona creyentiaí jaca fiodaiñeítimaci”. <sup>55</sup> Caí jaca illa jira, fiodaicana jaiñeíticai. Fiodaillana jaciruiñeíticai, dane caí fiodaiñeíticaina jira. <sup>56</sup> Jeacino illa jira, birui fiodaicana jaidicai. Moisés micorí jaie llogacino illa jira, iena caí raise finonina jira, jeacino caímo illana uiñoticaí; <sup>57</sup> iadedí caí jeacino facaina caí Nama Jesucristo fiodailla jira, jeacino anamo jai iñedicai. Caí fiodailla mei, dane fiodaiñeíticai. Jusiñamui caína íemona jai jillotate. Íe muidona naimieri caí íobillasa.

<sup>58</sup> Cue amataí, fiodaillamona nana creyentiaí íco jillua jira, Cristo rafuena ínocana jai. Naganomo íñeno; iadedí Cristo rafuena llocana omoí jai. Naimie jitailla rafuena ínocana omoí jai. Naimie facaina omoí maijía, taínona maijíaíñedomoí. Naiemona díga mare rafue comuite. Iena jai uiñotomoí.

## 16

### *Jerusalémo ítinomo ucubena oredimaci*

<sup>1</sup> Jiaíe rafuena cuemo jicanotomoí. Jerusalémo íte creyentiaímo ucubena oretaiacadomoí. Galaciamo íte creyentiaímo cue llua ísoí, omoímo lloíticue. <sup>2</sup> Naga domingo omoí ucubemona daje díese eneno oní eeno. Omoí maijía bailla díese ucubemona cue bille dínorí íena eeno. Iese naga domingo omoí eenoñenia, íco cue bia, ¿níese dacaiño ofrendamo ailluena ucubena joneítomoí? <sup>3</sup> Omoí díne cue rilla mei, omoí eenoga ucubena uillena, Jerusalémo íte creyentiaímo omoí fetocanona oretaiticue. Cartana jiaí oretaiticue, omoí fetocano mareuidínona Jerusalémo ítino uiñollena. <sup>4</sup> Jerusalémo cue comeci jiaí jaiacania, cue díga jaitimaci.

### *Pablo jai macariacade*

<sup>5</sup> Macedonia railla eníruemo nano jaiticue. Creyentiaína cioillena, dajerie nairáímo jaiticue. Íe mei omoí díne jaiticue. <sup>6</sup> Díga írui omoí díga níbai ííticue. Nana rollime facaise omoí díga níbai ííticue. Níbai daje amani fívuí ííticue. Íe mei cuena omoí canollemona oní jaiticue. Omoí dínomona cue jaía, cue jaíllínona nía uiñoñedicue. <sup>7</sup> Omoí díne biruí nía jaiñeíticue. Omoí díne biruí cue jaía, dallu omoí díga ííticue; iadedí jaiíruido omoí díne cue jaía, caí Nama jitaía, omoí díga are ííticue. <sup>8</sup> Beno Efesomo nía ííticue. <sup>9</sup> Beno díga comíní Cristo rafuena cacacadimaci. Naimacimo íena llofueiacadicue. Díga comíní cue lluaína uaitatimaci. Cue lluaína jitaíñedimaci Íe jira bene nía lloiacadicue. Pentecostés railla rafue fuille mei, jaiticue.

<sup>10</sup> Omoï dine Timoteo ria, naimiëna raise marena nafue. Cue isoi cai Nama facaina naimie maijicabide. <sup>11</sup> Ie muidona naimie lluacina jamaïño. Omoïmona naimie jaiacania, cue dine abido naimie raise rillena, naimiëna raise cano. Naimie jaiacania, naimie caimare caimaduano oreta. Jiaie creyentiaï diga naimie billemo ocuridicue.

<sup>12</sup> Apolona jicanotomoi. Jiaie creyentiaï diga omoï dine naimie jaillana naimiemo lloticue; iadedi naimie comeci nia jaiacaiñede. Jiaïruido abi juarenia, omoï dine jaite.

### *Fuiduacino*

<sup>13</sup> Jeacinomona abina rairui. Cristo rafuena ñnocana omoï jai. Eimie isoi omoï comeciaina ocuiño. <sup>14</sup> Jiaie cominina omoï isiruillamona, nana omoï finoacalle rafuena fino.

<sup>15</sup> Cue amatiaï, Acaya railla eniruemo Estéfandi, ie comini diga, nano creyentiaïdimaci. Iena uñotomoi. Naimaci jitailla jira, jiaie creyentiaïna canocabidimaci. <sup>16</sup> Naie isoidino lloga uaina cacarei. Naga Cristo dibeimo maijidino uaina cacarei. Iedo omoï jai. <sup>17</sup> Omoïmona cue dine Estéfanas bite. Fortunato diga, Acaico diga naimie billa jira, iobidicue. Cue dine ñnedomoi; iadedi naimaci billa jira, omoï isoi cuena canodimaci. <sup>18</sup> Naimaci billamona cue comeci caimataide. Omoï comeci jiaï caimataide. Naie isoidinomo: “Marena maijidomoi” omoï railla.

<sup>19</sup> Diga creyentiaï Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiaï orediaïmaiaï. Iaimaiaï jofomo dajerie creyentiaï rocabitimaci. Cristomo naimaci duilla jira, omoïna isiruillanona, nana naie creyentiaï imaci uaina jiaï oredimaci. <sup>20</sup> Nana bene ite creyentiaï imaci uaina oredimaci. Nana creyentiaïna eo caimare uaido.

<sup>21</sup> Omoïmo cue uaina jiaï oredicue. Cuena canollena, naimiemo cue llua isoi, jiaïmie bie carta cuega; iadedi cue mameci bene dama cueticue. Nana iena ñno. Pablodicue.

<sup>22</sup> Omoïmona Cristona bu isiruiñenia, Jusiñamui naimiëna duere finollesa. Cai Nama abido dane billesa.

<sup>23</sup> Cai Nama Jesús omoïna duenaillasa. <sup>24</sup> Jesucristomo cai duilla jira, omoïna cue isiruillana omoï uñuana jitaïdicue. Mai. Macaibaite.

## CORINTOMO ITE CRISTONA HNOTINOMO IE EMO DOMO PABLO ORETAGA RABE

*Corintomo ite creyentiaimo Pablo cartana orede*

<sup>1</sup> ¿Nigacino? ¿Nie isoidomoi? Pablodícue. Corintomo ite creyentiai, omoi dine bie carta oredícue. Nana Acaya railla eniruemo ite creyentiaimo bie carta jiai oredícue. Jusiñamui jitailla jira, ie rafuena cue jino lollena, Jesucristo oretagamiedícue. Cue diga Timoteo illa jira, naimie ie uaina omoi dine jiai orede. <sup>2</sup> Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiai omoína uri jai itatate. Iena omoi uiñocana mai omoi jai.

*Pablo ie duere sefuilla rafuena cuete*

<sup>3</sup> Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. <sup>4</sup> Nie isoide rafuemonona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiaínona canoredícue. Nie isoide rafuemonona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredícue. <sup>5</sup> Cristomo jai cue duilla jira, naimie isoi cue duere sefuia, naimie cue comecina ocuiñotade. Iemonona jiaíno comecina ocuiñotajana raise uiñoticue. <sup>6</sup> Duere cue sefuillamonona, omoína canoredícue. Jusiñamui jitaillacino omoi finocana jaillana jitaídícue. Cuena naimie ocuiñotajamonona, Cristona omoi faínonocaiñellena, cue isoi omoi duere sefuia, omoína ocuiñotaredícue. <sup>7</sup> Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñoticue.

<sup>8</sup> Cristomo cai duillamonona, cue amatiai isoi itomoi. Asia railla eniruemo jaie eo duere sefuídícue. Iena omoi raise uiñollena, ie rafuena dane omoimo lloiacadícue. Eo duere cue sefuilla jira, cue comeci niadedi ocuiñoñedícue. Niadedi fiodaitícue. <sup>9</sup> “Naie facaise fiodaitícue” raillanomo cue comecina facadícue. Cue finoca rafuemonona dama jillondícue; ia Jusiñamui uai siñona jira, naimie cuena jillotate. Fiodaitinona naimie jillotarede. Niadedi fiodaitinona jiai jillotarede. Naimiedi naimie cuena jillotajana cue inuana jitaide. <sup>10</sup> Naie facaise eo duere sefuillamonona cuena jillotate. Ico cue duere sefuia, iemonona dane cue jilloillena inoticue. <sup>11</sup> Iena cue facaina omoi jicabi. Jusiñamui fairiua meinomo,

ailluena comini cue facaina Jusiñamuimo iobillacinona fe-  
caitimaci. Cuen a Jusiñamui canua jira, iobillacinona fe-  
caitimaci.

*Pablo Corintomo navui jaiñede*

<sup>12</sup> Cuen a gaiñedino cuena nibai jeare ñaitimaci; ia daje rafueri abina iedoticue. Cue comecimona iena uiñoticue. Cristona ñnoñedinona marena finodicue. Omoina marena finodicue. Jusiñamui jitaillacino finocana jaidicue. Jusiñamuimona jeacinona finoñecana jaidicue. Cue comecina facajacinomona iese jaiñedicue; ia Jusiñamui cuena canuamona, iese jaidicue. <sup>13</sup> “Iese cuetio; iadedi o comecimo jiaie rafue ite diga caimo cuetio” raitomoi. Omoina jifueiacaiñedicue. Cue cueda cartaiaina jai facadomoi. Cue cueda rafue omoi raise cacajana jitaicue. <sup>14</sup> Cuen a nia eo raise uiñoñedomoi; ia cuena uiñocana omoi jaillanona, cueri omoi iobillana jitaicue. Cai Nama Jesús abido bia, omoi rie cue iobilla isoi, cueri omoi iobillana jitaicue. <sup>15</sup> Omoimo iese cue comecina facajamona, omoi dine navui jaiacadicue. Macedoniamoi cue jaiacadicuemo, raise omoina cue iobitallena, omoi dine nano navui jaiacadicue. <sup>16</sup> Macedoniamona cue abido bia, omoi dine navui dane jaiacadicue. Judeamo cue diga jaillena, omoimona damieriena omoi oretajana jitaicue. Iese cue jaillamo navui comecina facadicue. <sup>17</sup> Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “JH” raitimaci; ia: “Dama ite” comeciaina facadimaci. <sup>18</sup> Iese iñedicue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finodicue. <sup>19</sup> Jusiñamui Jito Jesucristo rafuena omoimo navui lloticue. Cristo ie llogacinona jaca meidoñede. Silvano iena jiai llofuede. Timoteo iena jiai llofuede. Nagarui daje isoide rafuena llofueticai. Jaiiruido jiaie Cristo rafuena llofueñedicai. <sup>20</sup> Nana Jusiñamui jai lloga uai Cristo finoca rafuemon a suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. <sup>21</sup> Jusiñamui Cristo dibeimo caina jai itatate. Ie rafuena cai llollena, caina jai fetode. <sup>22</sup> Ie cominina caina itatate. Iena cai uiñollena, ie Joreño caimo jai itatate. <sup>23</sup> Jusiñamuidi cue uanaicinona llua uai uiñote. Uanaicinona cue lloñenia, Jusiñamui cuena duere finuana jitaicue. Omoi finoca rafue jai cue uiñuamona, omoimo cue riire lloi raillano, omoi dine navui dane jaiñedicue. <sup>24</sup> Cristona jai omoi ñnuana uiñoticue. Cristona ñnocana omoi jailla jira, omoi finolle rafuena lloñedicue; ia omoi iocire illana jitaicue.

## 2

<sup>1</sup> Omoï dine nia cue jaiñellemo começina facadicue. Omoï dine navui cue ia, iocire coniniri iñedicai. <sup>2</sup> Omoïna jai icidicue. Cueri omoï iobillana jitaïdicue; ia omoïna cue dane icia, coniniri iocire iñeiticai. <sup>3</sup> Omoïmo cartana navui oredicue. Omoï dine ite rafuena raise finollena, iena oredicue. Cuen a iobitajana uiñotomoï. Omoï dine ite rafuena omoï raise finoïa, coniniri iocire iiticaï. “Cuen a iobitaitomoï” raillanomo cue começina facadicue. <sup>4</sup> Cue começi eo sunaillanona, cue começi eo eiamona, carta navui oredicue. Omoïna iciaicaiñedicue; ia omoïna cue eo isiruillana omoï uiñuana jitaïdicue. Ie jira omoï dine ite rafuena raise fino.

*Marañede rafuena finodimie rafuena feita*

<sup>5</sup> Marañede rafue navui damie finua jira, sunaiticaï. Naimie muidona cue começido duere jaide; ia daje isoi omoï começiaï jiaï duere jaide. <sup>6</sup> Omoï nabei dine ite cominimona naimie jai duere sefuilla jira, dama iesede. Naimiena dane duere finoñeno; <sup>7</sup> ia naimie finoca rafuena mai feita. Iena dane linoñeno. Naimie começina ocuiñota. Naimiena iese omoï canoñenia, omoïmona duere sefuillanona, abido danomo jaite. <sup>8</sup> Ie jira: “Ona nia isiruiticaï” naimiemo llono. Iena eo jitaïdicue. <sup>9</sup> Nana cue lluaana omoï iñuana cue facacillena, carta omoï dine navui cueticue. <sup>10</sup> Naimie finoca rafuena omoï feitaia, iena cue jiaï feitaïticue. Cristo rafuena omoï iñocana jaillana cue jitailla jira, naimie rafuena feitaïticue. Cristo cuena uiñuamona, iena feitaïticue. <sup>11</sup> Taife ramo cai faiana uiñoticaï. Cristo rafuedo cai raise jaiñellena, naimie jitaillana uiñoticaï. Cristo dibeimona caina Taife itatañenia, omoï motomo itimie finoca rafuena feitaïticaï.

*Troamo navui Pablo ia, uri iñede*

<sup>12</sup> Troamo navui jaidicue. Cristo rafuena cue lollena jaidicue. Cai Nama comini começiana jetajamona, naimie dibeimo cue maijiamona, ie rafuena lloticue. <sup>13</sup> Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiana facaduanona, Macedoniamo jaidicue.

*Jusiñamuidi Cristo dibeimo iñedinona anafesitaitaite*

<sup>14</sup> Jusiñamui fue eo mare. Cristo dibeimo iñedinona naimie anafesitajanona, Cristo cominina cai illanona, naimie rafuena uicana jaidicaï. Ie rafuena cai lloia, iena comini iñoia, Jusiñamui naimacina jai caimare itatate. <sup>15</sup> Cristomo cai duillanona, ie rafuena cai lloia, Jusiñamuina iobitadicaï. Cai lluaana, damierie jillodimaci. Iena jitañenamona, damierie faifidimaci. <sup>16</sup> Iena cacajamona, damierie faificana

jaidimaci. Jusiñamui illanomo jaca iñeitimaci. Iena cajamona, jiaino Jusiñamui illanomo jaca iitimaci. Jamai bue isoidicue; ia bie rafue llocana jaidicue. <sup>17</sup> Damierie Jusiñamui rafuena llamona, ucubena oiacadimaci. Omoimo comecina facañedimaci; ia iese llofueñedicue. Omoimo cue comecina facajanona, bie rafue cue llamona, buena oñedicue. Jusiñamui mona cue llogacinona oticue. Jusiñamui cuena cúa jira, Cristomo cue duilla jira, uanaicinona jaca lloticue.

### 3

#### *Cristo caimo lloga rafuedo birui jaidicai*

<sup>1</sup> Omoi dine damierie llofueraini jaia, cartaiaina uicabitimaci. Naimaci cartaiaimo jainodi: “Bie llofueraini mare” raillanona cuetimaci. Omoimona jiaino cuega cartaiaina: “Bie comini mare” raillana jitaiñedicue. Cuemona jiaino cuega cartaiaina: “Pablo mare” raillana jiai jitaiñedomoi. <sup>2</sup> Omoi marenana jai uiñoticue. Cue maremienana jai uiñotomoi. Carta isidomoi. Jusiñamui dibeimo omoi comeciái meiduamona, cue comecimona omoína raise uiñoticue. Omoi birui illamona, omoína fidiamona, nana comini omoína raise uiñotimaci. Ie jira jainodi: “Bie comini mare” raillana omoimona jitaiñedicue. <sup>3</sup> Cristo rafuena omoimo lloticue; ia Cristo omoi comeciaina jai meidotaja jira: “Omoi mare” raillanona naimie jai cuegadana, nana comini uiñotimaci. Tinta diga naimie cueñede. Jusiñamui Moisés micorimo jaie lloga rafue jamai noficimo cuega. Cai cajede Jusiñamui birui iese cueñede; ia naimie Joreño uaido omoi comeciaina birui meidote. <sup>4</sup> Cristomo cue jai duilla jira, Jusiñamuina cue ñnuamona, omoína iese lloticue. <sup>5</sup> Cue finoca rafuemoni iese lloñedicue; ia Jusiñamui uai cuemo illamona, iese omoimo lloticue. <sup>6</sup> Jiaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

<sup>7</sup> Moisés micorimo lloga rafuedo jaillamona, Jusiñamui dine buna jaca iñena. Noficimo Jusiñamui cuega. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamui mona naimie abido bia, Israel comini Moisés micori uiecomo eruainidimaci. Nargarui Jusiñamui diga naimie ñañenia, naimie micori uieco ja muidomo queninide. <sup>8</sup> Jusiñamui Moisés micorimo jaie lloga



uai ebirede; ia Jusiñamui Joreño birui caimo lloga uai baifemo ebirede. <sup>9</sup> Moisés micori rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite. <sup>10</sup> Moisés micori rafue jaie ebirede; ia jaie rafue birui illa jira, Moisés micori rafue jai birui ebinide. <sup>11</sup> Birui ite rafue jaca saiñena jira, ua eo ebirede.

<sup>12</sup> Iena cai uiñuamona, bie rafuena marefodo jaciruiñeno lloticue. <sup>13</sup> Eniroi diga, Moisés micori isoi cue uiecona ibaiñedicue. Naimie micori ie uieco ibaide, ja muidomo ie uieco quenirena feioicaillana comini cioiñellena; ia cue lloga rafuena marefodo llocabiticue. <sup>14</sup> Moisés micori comini Jusiñamui rafuena jaca ñnoñedimaci. Naimaci comeciai jitañena jira, ñnoñedimaci. Moisés micori rafuena birui judíuai comini facaia, iena nia raise cacaiñedimaci. Dani Cristona ñnuamona, naimaci comeciai raise cacareitimaci. <sup>15</sup> Cristo rafuena birui naimaci ñnoñena muidona, Moisés micori rafuedo nia jaidimaci. <sup>16</sup> Cai Nama díbeimo bu jaia, naimie comeci raise cacade. Moisés micori rafuedo naimiedi cai jaiñenana raise uiñote. <sup>17</sup> Cai Nama Joreño lloiticue. Cristo díbeimo cai jaia, naimie Joreño caimo jiai ite. Cristona cai nabaillamona, jeacino anamo jai iñedicai. Moisés micori rafue anamo jai iñedicai. <sup>18</sup> Cristomo jai cai duilla jira, naimiena cai comeciaimona raise uiñua jira, ie ebirede uaina uiñoticaí. Acaranimo cai eruailamona, cai abina ciodicaí. Ie isoide. Cai illamona jiaie comini Cristona uiñotimaci. Cai Nama Joreño cana canuamona, naimie ebirena isoi cai illena, icana jaidicaí.

## 4

<sup>1</sup> Jusiñamui cuena duenailamona, cue comecina ocuiñocaida, Cristo rafuena llocana jaidicue. <sup>2</sup> Meirede rafuena llofueñedicue. Iena bainino llofueñedicue. Jifuianona omoína llofueñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uiñuamona, naimie rafuena uanaicinona llofuecabiticue. Cue llofuiana bu raise cacaia, uanaicino cue llofuecabillana uiñote. <sup>3</sup> Faificana jaidinodi cue mare lloga rafuena raise cacaiñedimaci. <sup>4</sup> Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uiñuana jitañede. <sup>5</sup> Cue finoca rafuena llofueñedicue; ia Jesucristodi cai Namanana llofuecabiticue. Naimie díbeimo cue maijiamona, omoína canollena, naimie rafuena llofuecabiticue. <sup>6</sup> Enirue finua facaise Jusiñamui llote: "Jitiredino nana eniruemo iñellena, useredino mai iite".

Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

*Cai comeci ai ocuiñocaida ñnocana jaidicai*

<sup>7</sup> Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uiñotomoi; ia ie uai siñonana illamona, Jusiñamui illana uiñotomoi. <sup>8</sup> Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefiñeno comecina ocuiñocana jaidicue. <sup>9</sup> Damierie cuena duere finodimaci; ia Jusiñamui cuena fainonocaiñeno cuena canode. <sup>10</sup> Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue. <sup>11</sup> Jesús rafuena cue llua muidona, nagarui damierie cuena meineiacade. Iemona cue jillocabbilla jira, Jesús siño uaina uiñotomoi. <sup>12</sup> Naimie rafue cue llua muidona, cuena meineiacadimaci; ia bie rafuena omoi ñnuamona, Jusiñamui illanomo jaca iitomoi. <sup>13</sup> Jusiñamui facaina lloraima jaie cuela: “Cue ñnua jira, iena llofueticue”. Naimie isoi cue ñnua jira, bie rafuena jiai llofuecabiticue. <sup>14</sup> Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiai jillotaite. Jesúmo cai duilla jira, naimie illanomo danomo caina ico itataite. <sup>15</sup> Omoi facaina nana cue rafue finodicue. Cristo rafuena comini uiñollena, duere sefuidicue. Iemona Jusiñamui naimacina duenaillana uiñoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci. <sup>16</sup> Ie jira iena sefuiruiñedicue. Cue mairici fuicana nagarui jaie; ia cue comeci nagarui ñnocana ocuircana jaidicue. <sup>17</sup> Birui duere sefuidicue; ia iemo cue comecina eo facañedicue. Cristo rafue muidona birui duere cue sefua, Jusiñamui illanomo ico cue ia, nainomo ebire marena iiticue. Iemo cue comecina eo facaducue. <sup>18</sup> Cuemo birui suide rafuemo comecina eo facañedicue. Jusiñamui illanomo cue nia cioñena rafuemo comecina eo facaducue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

## 5

<sup>1</sup> Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite. <sup>2</sup> Birui cue duere sefuillamona, Jusiñamui

cuemo ico itatalle abina eo oiacaducue. <sup>3</sup> Cue fiodailla mei, Jusiñamui cue joreño mo jiaie isoide abina itataite. <sup>4</sup> Cue jiaie isoide abi cuemo illena, cue jamai fiodaicaiñedicue; ia iena eo oiacaducue. Jusiñamui cuemo jiaie isoide itataiacade abina eo oiacaducue. Cue fiodaille abi ifomo jaca ille abina cuemo iite. <sup>5</sup> Jusiñamuidi ie Joreño caimo itatajamona, cai abiaina iese jiai itatajana uiñoticaí. <sup>6</sup> Iena cue uiñuamona, nie isoide rafue ia, inocana jaca jaiducue. Nia cue fiodañenia, cai Nama illa ecimo nia iñedicue. <sup>7</sup> Naimiena birui cioiñedicue; ia naimiena inocana jaiducue. <sup>8</sup> Iese jaiducue. Cue Nama diga cue illena, fiodaicaducue; <sup>9</sup> iadedi nia cue fiodañenia, naimiena jaca iobitaiacaducue. Cue fiodaia, naimiena jiai jaca iobitaiacaducue. <sup>10</sup> Naimie llua jira, Cristo uicomo ico nana iiticaí. Cai bene finoca rafuena uiñotaite. Marañede rafuena cai bene finua diese, naimiemona ibana feiñoñeiticaí. Mare rafuena cai bene finua diese, naimiemona ibana feiñoiticaí. Ie muidona naimie jitaillacinona jaca finoacaducue.

*Jusiñamui diga cai uri illafue*

<sup>11</sup> Cue Nama uicomo ico cue illemona, iena cue jaciruillamona, naimie dibeimo cominina jai itatacana jaiducue. Jusiñamui cue illana raise uiñote. Cue illana raise omoi uiñuana jitaídicue. <sup>12</sup> “Cuedi maremieducue” lloñedicue; ia cue abi facaina omoi ríidollena, bie rafuena llotucue. Omoi motomo damerie llofueraíni naimaci llofuiacino diga abina iedotimaci; ia naimaci comeciáimo iticino diga abina iedoñedimaci. <sup>13</sup> “Naimiedi uairico” cuena raitimaci. Iese cue iticuedena, Jusiñamui facaina iese itucue; ie iadedi uairicoñedicue. Omoína llofuellena, omoi facaina maijíducue. <sup>14</sup> Nie isoidicuenta, Cristo cuena isiruillana cue uiñuamona, jaca llofueiacaducue. Nana comini facaina damie fiodaillana jai inotucue. Naimaci jeacino ifomo naimie jai fiodaite. <sup>15</sup> Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai inoñenia, dani cai comeciáimo ite rafue diga iobidicaí; ia naimiena jai cai inua mei, dani cai comeciáimona naimiena cai iobitajana naimie jitaide. Ie jira cue illana jai uiñotomoi.

<sup>16</sup> Damerie llofueraíndi jiaínomo eruaillamona, naimaci comeciáina facajamona: “Naimaci mare” raitimaci. Jiaícaíño: “Naimaci marañede” raitimaci; iadedi Cristona cue inua facaisemona iese cominimo eruañedicue. Naimiena nia cue inoñenia, Cristona jaie raise uiñoñedicue. “Naimiedi jamai iima” raillamo comecina facaducue; ia iese naimiemo birui comecina facañedicue. <sup>17</sup> Cristona cai inua mei, naimiemo jai cai duillamona, cai comeciáí iuaina meidoticaí. Jai jiaie isoidicaí. Jiaie rafuedo jai jaidicaí. Jaie caimo ite rafuedo jai jaíñedicai. <sup>18</sup> Jusiñamui cai comeciáí iuaina meidotade. Cristo

fiodaillamona, Jusiñamui dibeimo caina itatate. Iemona naimiena jai nabairedicai. Naimacimo ie rafuena lollena, cuena fetode, jiaie cominina ie dibeimo itatallena. <sup>19</sup> Cristo finoca rafue muidona, Jusiñamui dinena cominina nabaia-cade. Naimaci jeacino facaina ibana jai oiacañede. Bie rafuena lollena, cuena jai fetode. <sup>20</sup> Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoi nabaillanona, naimie diga uri i. <sup>21</sup> Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicai.

## 6

<sup>1</sup> Bie rafuena nia lliacadicue. Jusiñamui facaina cai maijiamona, naimie dibeimo cominina itataticai. Naimie caina duenaillana uiñoticue. Iena omoi ñnocana jaillana jitaidicue. <sup>2</sup> Jaiie Jusiñamui cuetatate: Cue jitailla facaise omoi jitaillacinona jai cacadicue. Omoi jilloillena, omoina jai canodicue.

Ero, Jusiñamui birui omoina cacaacade. Birui omoina canuanona, omoina jillotaiacade. Ie muidona naimiena ñnocana jai. <sup>3</sup> Bie rafuena omoi ñnoñellena, cue llofuiacinona omoi jamaiñellena, bu diga rafuena comuitaiacaiñedicue. <sup>4</sup> Jusiñamui dibeimo cue maijiamona, nie isoide rafuemonaramo cue jiria, cue illamona naimiedi: “Mare” cuena raillana jitaidicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue. <sup>5</sup> Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maijia jira, diga icaiño eo raise iniñedicue. Aime guisoidicue. <sup>6</sup> Jearede rafuena ebiruiñedicue. Cristo rafuena uiñocana jaidicue. Iciríñedicue. Jiaínona canocabidicue. Jusiñamui Joreño anamo iticue. Cominina raise isiruiticue. <sup>7</sup> Uanaicinona llocabiticue. Jusiñamui uai cuemo illamona, llofuecabiticue. Cue comequina riidollena, Taifena emodofillena, Jusiñamui jitailla isoi, marecinona finocana jaidicue. <sup>8</sup> Damierie cuena marena jai ñaitimaci. Jiaíno cuena jeare nia ñaitimaci. Damierie cueri jai iobidimaci. Jiaíno cue joreño jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue. <sup>9</sup> Damierie: “Jamai bue isoidio” cuena raitimaci; ia jiaíno cuena raise uiñuamona, naimaci dinena jamai bue isoíñedicue. Nagarui niadedi fodaicabiticue; ia nia iticue. Duere sefuicana jaidicue; ia Jusiñamui cue comequina ocuiñotacana nia jaidicue. <sup>10</sup> Sunaiticue; ia iocire jaca iticue. Dueredicue; ia ailluena comini comequina

eo caimaretadicue. Buenidicue; ia Jusiñamuimona ailluena marecinona feiñoticue. Iese jaca jaidicue. Cue illamona: “Naimiedi mare” cuena omoi raillana jitaidicue.

<sup>11</sup> Corintomo itino, cue nabaiñiai, cue comecimo ite rafuena marefodo jai lloticue. Cue comecimona omoi diga marena iacadicue. <sup>12</sup> Cuemona omoina raise isiruiticue; ia omoi dinena nia cuena eo isiruifedomoi. <sup>13</sup> Cue urui ai omoi isoilla jira, omoi diga ñaiticue. Omoina cue isiruilla isoi, cuena omoi isirui.

### *Jusiñamui cai comeciaino illanodica*

<sup>14</sup> Creyentedimie mo jearede ramo faitatai raillano, daje isoide rafuedo iaiaiaiai jaiñena jira, daje isoi rafuena iaiaiaiai comeci lloiñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimien creyentediñaiño oñena. Marecinodo jaiacadimiedi marañedicinodo jaiacadimie daje isoi diga nabairinide. Jusiñamuina uanaicinona uiñotimiedi useredinomo jai ite isoide. Jeacino anamo nia itimie jitiredinomo nia ite isoide. Cristo rafuena naimie uiñoñede; ia Cristo rafuena omoi uiñuamona, useredinomo jai itomoi isoidomoi. <sup>15</sup> Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comecina facañede. <sup>16</sup> Creyenteñedimiedi Jusiñamuina sedañede; ia jiraraina sedade. Creyente comecimo Jusiñamui illamona, Jusiñamuina sedade. Nana creyentiaiai comeciaino Jusiñamui ite. Iena jaiie Jusiñamui llote:

Comini motomo iiticue.

Naimacina nabaiticue.

Naimaci Jusiñamuniticue. Cue comininitimaci.

<sup>17</sup> Ie muidona cuena iñoñedino diga daje rana namatañeno.

Naimaci jearede jetaca rafuena abimo oñeno.

Iemona omoina raise feiñoiticue.

<sup>18</sup> Omoi Moona iiticue. Cue uruiaina jaitomoi.

Siño jitodicue.

## 7

<sup>1</sup> Cue isiruiganodomoi. Bie llogacino Jusiñamui caino jai llua jira, naga marañede rafuena fañonocaida, cai jailla. Naga cai comeciaina jearetade rafuena fañonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

### *Pablo cartamo ciegacino diese finodimaci*

<sup>2</sup> Omoi comeciainona cuena raise feiño. Buna jeare finoñedicue. Buna jifueñedicue. <sup>3</sup> Marañede rafuena jai omoi finuana lloñedicue. Omoimo cue comecina nagarui

facadicue. Iena ailli lloticue. Nia cue ia, raire cue fiodaia, omoina jaca uibiñocabiticue. <sup>4</sup> Cue llucacina omoi inuana raise uñoticue. Omoiri iobidicue. Omoi diga jai uri iticue. Duere sefuidicue; ia iocire iticue.

<sup>5</sup> Macedoniamu navui cue jaidicue, cue comeci uri inede. Cue dibeimo inedinomona nagarui duere sefuillamona, cue comeci jarire ite. Cristo dibeimona creyentiana naimaci itallemo cue comeci jarire ite. <sup>6</sup> Comeciaina ocuinedinona Jusiñamui ocuinotacabilla isoi, Tito billamona, Jusiñamui cue comecina ocuinotade. <sup>7</sup> Cue dine naimie ria, iocire iticue. Omoimo ite rafue cue cacajamona, jiai iocire iticue. Cuena omoi cioacanana llote. Cue comeci jarire illari sunaitomoi. Cuena ridoiacadomoi. Iena cue cacajanona, iocire iticue. <sup>8</sup> Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. <sup>9</sup> Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cueda carta muidona icirifedomoi; ia Jusiñamui jitailla isoi sunaitomoi. <sup>10</sup> Jusiñamui jitailla isoi, ie jecino facaina bu sunaillamona ie comeci iuai Jusiñamui dibeimo meidoia, sunaiñede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca ineite. <sup>11</sup> Jusiñamui jitailla isoi omoi sunaillamona, omoi comeciaina raise finodomoi. Maraiñede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuena dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, maraiñede rafuena finodimiena duere finodomoi. Nana bie rafuena raise fuidodomoi. <sup>12</sup> Carta navui omoi dine cue oretaia, maraiñede rafuena finodimie mo cue comecina eo facañedicue. Naimiemona duere sefuidimie mo cue comecina eo facañedicue. Cuemo omoi comeciaina facajana omoi uinollena, navui cueticue. Jusiñamui iena uinote. <sup>13</sup> Ie jira cue comecina ocuinoticue. Tito jiai iocire illa jira, dane iobidicue. Naimie comecina caimare omoi itataja jira, iobidicue. <sup>14</sup> Omoi dine Tito nia jaiñenia, naimie mo omoina lloticue. “Naimaci ona feiñotimaci. Naimaciri iobidicue” naimie mo navui lloticue. Iese naimiena omoi feiñua jira, ieri meidaiñedicue. Omoimo uanacina jaca lloticue. Naimie mo cue llua isoi jiai suide. <sup>15</sup> Naimie llofuicacino omoi inoiacana jira, naimie omoina birui raise isiruite. Meiruoicaida, comeci jarire illamona, naimiena feiñotomoi. <sup>16</sup> Omoina raise uñoticue. Cristo inocana omoi jaillana raise inoticue. Omoiri iocire iticue.

## 8

*Creyentia; Jusiñamuimo ucubena fecaja rafue*

<sup>1</sup> Cue amatai, omoimo jiaie rafuena lloiacadicue. Jusiñamui naimacina canuamona Macedoniamite creyentiaina omoi uiñuana jitaidicue. <sup>2</sup> Eo duere sefuidimaci. Jiaie eodueredimaci; ia iocire illamona, jiaie creyentiaimo ucubena caidiñeno fecacabidimaci. <sup>3</sup> Naimacimo ite ucube diese fecadimaci. Iena uiñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue. <sup>4</sup> Naimacimo iese lloñedicue; ia iena naimaci eoduecaacana jira, jiaie creyentiaina canollena, cuemo iena eoduecanotimaci. Ucube diga jiaino creyentiaina naimaci canuana cue llwana eoduecajitaidimaci. <sup>5</sup> Cue comecina facaja isoi, fecañedicue. Ucubena fecadimaci; ia: “Cai Nama dibeimo maijiacadica!” jiaie llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci. <sup>6</sup> Omoi dine Tito dane jaillena jitaidicue. Omoi dine naimie navui ia, ucube omoi uana naimie canode. Iemona janore tainedomoi. Jiaie creyentiaina omoi canuana raise fuiduana jitaidicue. <sup>7</sup> Cristona iinocana jaidomoi. Iena jiaino llocabitomoi. Cristo rafuena raise uiñotomoi. Cristo jitaillacinona eoduecafinocana jaidomoi. Cuena jiaie isiruitomoi. Ie muidona omoi ucube diga, jiaie creyentiaina omoi raise canuana jiaie jitaidicue. <sup>8</sup> Omoina iese riire lloñedicue. Macedoniamite creyentiaina eoduecancanuana omoi uiñuamona, jiaie creyentiaina omoi canoia, Cristona omoi isiruillana uiñoticaie. <sup>9</sup> Cai Nama Jesucristomona caie fueua. Naimie cana duenaillana uiñotomoi. Ie Moo ecimo naimie nano illamona, naga ranaimiemo ite; ia eniruemo ie billamona, cana canollena, iimana jaillanona, duere ite. Iemona Jusiñamui rafuena caie cacaja jira, duere iñedicai. <sup>10</sup> Ie jira omoimo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jiaie jitaidicue. <sup>11</sup> Omoi jitaillamona bie rafuena fuido. Omoimo ite ucube diese feca. <sup>12</sup> Ailluena ucubena omoimo iñenia, dama iesede. Omoi jitailla jira, omoimo ite ucube diese omoi fecaia, Jusiñamuimona mare; <sup>13</sup> ia omoi jitailla rana omoi ollena, omoi ucube iñeni raillano, omoi jitailla baifemo omoi fecajana lloñedicue. <sup>14</sup> Jiaie creyentiaimo ra birui raise iñena jira, naimacina omoi canuana jitaidicue. Omoi ra ico iñenia, naimaci dinena omoina canuana jitaidicue, nana omoimo daje isoi omoi ra illena. <sup>15</sup> Moisés micori illa facaise ite cominimona caie fueua. Naimacina jiaie iese ciega: “Jusiñamui oretaga guiga ramona ailluena guillena, nagarui damierie iraiuidimaci. Jiaino janore guillena, iraiuidimaci; ia coniniri fecajamona, imaci jitailla diese nagarui nana guitimaci”. Ie muidona omoimo

ite ucubemona naimaci jitailla ra illena, jiaie creyentiaimo omoi fecajana jitaidicue.

*Pablo Titona ñaite*

<sup>16</sup> Omoi dine Tito dane oretaiacadice. Cue isoi naimie omoimo começina facade. Omoina canoacade. Naimie começina Jusiañamui iese itataja jira, Jusiañamui iobidicue. <sup>17</sup> Omoi dine jaillena naimiemo lloticuemo, naimie dinena: “Jee” raite. Naimiemo nia iese cue lloñenia, omoina naimie eo canoiaçana jira, naimie omoi dine jaillemono ie começina facade. Omoi dine raire jaite. <sup>18</sup> Naimie diga jiaimie oretaiticue. Naga nairaimo ite creyentiaidi: “Cristo rafuena eo raise llofuecabite” naimiena raitimaci. <sup>19</sup> Cue diga jaillena, naimiena fetodimaci. Dueredimonio omoi ucubena cue uillena, cue diga naimie jaite. Iemona cai Namana iobitaiticai. Iemona nana creyentiaidi naimacina cue canuana uiñoitimaci. <sup>20</sup> Omoi ucubena raise cue sedajana jitaidicue. Iemona: “Pablo cai ucube fiide” omoi llwana jitaifidicue. “Iena Pablo raise fecañede” omoi llwana jitaifidicue. <sup>21</sup> Iena raise marena sedaacadice. Jusiañamui iena uiñote. Nana creyentia iena uiñuana jia i jitaidicue. <sup>22</sup> Iaimaia diga jiaimiena jia oretaiticue. Naimie Cristona eo inocana jaillana raise uiñoticue. Omoi rafuena naimie fidiano, jiaie creyentiaina omoi canuana naimie inuanona, omoi dine naimie eo jaiacade. <sup>23</sup> Omoimo Titona bu jicanoia, naimacimo naimiena raise llono. Danomo Cristo dibeimo maijidicoco. Cue diga omoina canode. Jiaie iaimaiaina bu jicanoia: “Jiaie creyentia iaimaiaina fetuamona bitiaimaia” llono. Cristona iobitaiacadiaimaia. <sup>24</sup> Cuenam omoi isiruillamona: “Omoi mare” omoina cue lluamona, naimacina raise nafue. Nana cue jitailla rafuena omoi finuana naimaci uiñuana jitaidicue. Omoi ucubena eenuana raise fuiduana jitaidicue. Iena omoi finuamona, abido naimaci bia, naimacina oretaga creyentiaimo iena lloitimaci.

## 9

*Jiaie creyentiaina canollena, omoi ucube olle rafue*

<sup>1</sup> Bie rafuena omoi jai uiñua jira, iena dane lloñeiticue. <sup>2</sup> Ucubena omoi jai feaacana uiñoticue. “Benomo Macedoniam ite creyentiaimo omoiri iobidicue” llocabiticue. “Navuidi añaomona feaacadomoi” llocabiticue. “Acaya railla provinciam ite creyentia feaacadimaci” llocabiticue. Iese omoi illamona, bene ite creyentia jaino creyentiaina jia canoacadimaci. <sup>3</sup> Iese uiñoticue; ia omoina cue canollena Titona oretaiticue, cue jitaillacino omoi raise fuidollena. Ucubena dajena uana raire jitaidicue. <sup>4</sup> Omoi dine Macedoniam ite creyentia diga cue rillanona, omoi ucube



dajena nia iñenia, iese omoina cue lluaconi meidaiticue. Omoidi jiai meidaitomoi. <sup>5</sup> Ie muidona Tito idai jaillana jitaidicue. Ucube dajena uana omoi llua isoi, omoina canoite. Omoi ucube dajena uana lloiacañedicue; ia omoi comeciainona jiaino creyentiaina canuana omoi jitailla jira, iena jitaidicue. <sup>6</sup> Jiaie rafuedo iena lloiticue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua jira, omoi ucube dajena oia, eo caimare iñeitomoi; ia omoi comeciai jitaillamona omoi ucubena dajena oia, eo caimataitomoi. <sup>7</sup> Ucube dajena omoi oia, nagamie ie comecina facajamona fecaja. Naimie jitañenia fecañena. Naimie jitailla jira, naimie fecaja. Jiaimie omoina ñai raillano, “Cai ucubena fecaiticai” rañeno; ia o jitaillamona iena feca. Comeciai iocire illamona omoi fecaia, Jusiñamuina iobitadomoi. Iena Jusiñamui jitaide. <sup>8</sup> Jusiñamui omoi jitailla baifemo omoimo fecarede. Nana omoi jitailla ra omoimo naimie illamona, jiaimio omoi fecaia, naimacina canorenitomoi. <sup>9</sup> Jusiñamui facaina lloraima micori iena jaie cuega: “Jusiñamuina ñnotimie dueredinona canocabide. Mare rafuena finocana jaide”. Ie omoi finollemo, Jusiñamui omoina canoite. <sup>10-11</sup> Ero, illimo maijirainimo Jusiñamui iduaina itatate. Iena sicuamona, monaillamona, nainomo maijirainidi naiemona guicabite. Ie isoide. Omoimo Jusiñamui nana omoi jitailla rana jaca itataite. Iemona jiaie creyentiaina raise canorenitomoi. Omoi ucubena cai uia, iena jiai creyentiai feiñoia, Jusiñamuimo iobillacinona eo fecaitimaci. <sup>12</sup> Ucubena omoi oretai, duerede creyentiaina canodomoi. Omoi muidona naimaci Jusiñamuimo iobillacinona jiai fecadimaci. <sup>13</sup> Iemona Cristona omoi raise ñnuana uiñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoi. Iemona nana jiaie creyentiaina canoitomoi. <sup>14</sup> Omoi facaina Jusiñamuimo juitimaci. Omoina naimaci isiruillamona, Jusiñamui omoina eo canuana naimaci uiñuamona, omoi facaina juitimaci. <sup>15</sup> Jusiñamui caina eo canua jira, iobillacinona naimiemo cai fecallena, cai uai raise iñede. Uainicaidicai. Naimie eo mare. Naimiena cai iobillasa.

## 10

### *Cai Nama Pablona fetua jira, ie uai Pablomo ite*

<sup>1</sup> Jiaie rafuena lloiacadicue. Omoimona damierie llotimaci: “Cai dine Pablo ia, naimiedi caina jaciruite. Riire caimo naimie rafuena lloñede; ia cai dine naimie iñenia, riire caimo naimie rafuena llote” llotimaci. Ero, Cristo iciricabiñena isoi

iacadicue. Naimie isoi omoimo lloiacadicue. <sup>2</sup> Riire omoimo lloiacaiñedicue. Omoimona damierie cuena raitimaci: “Pablodi Cristona iñoñedimie isoi icabite”. Naimaci iese nia lloia, omoi dine cue ria, naimacimo jaciruiñeno riire lloiticue. <sup>3</sup> Comena iticue; ia comini diga cue rafue iñede. <sup>4</sup> Taife dibeimo itino diga cue rafue illa jira, jamai cue uai diga naimacina llicaitañeticue; ia Jusiñamui uai diga naimacina llicaitaiticue. <sup>5</sup> Cristo uai diga Jusiñamui dibeimo iñedino llucinoconi uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue iñotallena. <sup>6</sup> Cristo anamo omoi raise ia, cue lloga uaina omoi raise iñocana jaia, omoimona raise iñoñedinona duere finoiticue. <sup>7</sup> Cominimo jamai eruaillamona: “Naimaci mare” raitomoi. Jiaicaiño: “Naimaci maraiñedimaci” raitomoi; ia naimaci comeciaina uiñoñedomoi. Omoimona damie nibai comeciina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie faiñede”. <sup>8</sup> Abina iedoñedicue; ia cue abi iedoia, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacaiñedicue. <sup>9</sup> Omoimo riire llollena cue uai ite; ia cue carta diga omoina jacinaitaiacaiñedicue. Omoina canoiacadicue. <sup>10</sup> Omoimona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riinde. Cristo rafue raise lluaana raise uiñoñede”. <sup>11</sup> Iese iñedicue. Omoi motomo cue ia, cartana cue cueia, daje isoi llofuecabiticue. <sup>12</sup> Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comeciina facañedicue. <sup>13</sup> Jusiñamui cue maijana cuemo llote. Naimie llua baifemo jaiñeticue. Omoi dine ie rafue cue llofuellena, naimie jitaillanona, omoi dine navui jaidicue. <sup>14</sup> Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue. <sup>15</sup> Jiaie llofueraini llofuiamona buena oiacañedicue. Cristo rafuena omoi iñocana jaillamona, omoi motomo cue illamona, Jusiñamui jitailla diese omoina canoacadicue. <sup>16</sup> Jiaie nairaii illanuaimo Cristo rafuena nia lloiacadicue; ia nainomo jaie llofueraima llofuiamona buena oiacañedicue. <sup>17</sup> Bu abina iedoiacania, cai Nama finua rafueri naimie abina iedua. <sup>18</sup> Ie llofui diga bu abina iedoia, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

## 11

*Pablodi Cristo oretaganona abi caitadinona llote*

<sup>1</sup> Abina cue raise uiñoñenia, cue diga iciriño. Cue lluomo nia cacarei. <sup>2</sup> Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Fima diga nia iñediñaiño, ie inina illena, ie jitaillamie mo mo fecaja isoi, Cristomo omoina fecaacadie. Omoimo jeacino iñena isoilla jira, omoina Cristomo fecaacadie. <sup>3</sup> Jiaie rafuemo omoi comeciaina facacana omoi jaillamo jacinaitie. Jaie jaiona eruaillamona, Taife Eva micorina jifue. Jiai llofueraini Cristo rafuedo omoi raise jaiñenana itatajamo jacinaitie. <sup>4</sup> Diga llofuerainina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo dibeimona omoi jaillamo jacinaitie. <sup>5</sup> “Cristo oretaganodicai” raitimaci; ia naimaci cue baifemo faimo cue comecina facañedicue. <sup>6</sup> Naimaci isoi rafuena jino lluaña eo uiñoñedicue; ia Cristo rafuena eo raise uiñotie. Nana cue finoca rafuemonona omoina iena diga icaiño uiñotadicue. Uanaicinona omoina jaca llofuecabitie. <sup>7</sup> Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijiticue. Iese cue illa jira, damierimona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi. <sup>8</sup> Omoina cue canollena, jiaie creyentiamona ucubena feiñotie. Omoi facaina naimacimona feiñotie. <sup>9</sup> Rana cue jitailla facaise omoimona ucubena jicañedicue; ia Macedoniamona bite creyentia cuena canodimaci. Omoimona navui ucubena cue oñena jira, birui cue oñena jira, cuemona ibana oñeitomoi. <sup>10</sup> Cristo cue illana uiñuamona, naimie uanaicinodo cue jaillamona, nana Acaya railla provinciamona iena jaca lloiticue. <sup>11</sup> Omoina cue isiruilla jira, ucubena omoina jicañeitie. Jusiñamui cue comecina raise uiñote. <sup>12</sup> Abina ieduumona omoi motomo damierie: “Pablo isoi llofueticai” raitimaci. Ucubena omoimona feiñotimaci. Naimaci isoi iacaiñedicue. “Daje isoi maijiticai” naimaci raiñellena, ucubena omoimo jaca jicañeitie. <sup>13</sup> Cristo oretaganona abi caitadinodimaci. Cristo dibeimo raise maijiticue. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci. <sup>14</sup> Ieri rajicaiñedicue. Cominina jifuellena, Taifedi Jusiñamui jaienicina abi caitadimienona jaicabide. <sup>15</sup> Taife dibeimo itinodi Jusiñamui ie mare rafuena llofuerainina jaicabidimaci. “Cai lloga rafuedo omoi jiaia, Jusiñamumona marebicaitomoi” llofuecabitimaci. Naimaci

finolle rafue diese Jusiñamuimona duere sefuitimaci.

*Cristo oretagamiena naimie illa jira, Pablo duere sefuide*

16 “Pablo abina uiñoñedimie” raillamo omoï comeciaina facañeno; ia iese cuena omoï comeciaina facaia, cue lluamo nia cacarei. Omoï motomo ite llofuerañi abina iedua isoi, icaiñedicue; ia janore cuemo iticino diga abina iedoticue. 17 Abina iedumona cue lloia, cai Nama Cristo isoi lloñeiticue. Naimie cuemo llua jira, iena lloñeiticue; ia abina uiñoñedimie isoi lloiticue. 18 Omoï dine damerie llofuerañi naimaci illa diga abina iedua isoi lloiticue. 19 Abina uiñoñedimaci; ia: “Abina eo raise uiñoticaï” omoï llumona, naimaci llofuiaçinona cacacabidomoi. 20 Naimaci anamo omoïna itataiacadimaci. Omoïmo ucubena jicacabidimaci. Omoïna ocuicabidimaci. Içirillamona, omoï uiecuaina bofedimaci. Iese omoïna finocabidimaci; iadedi buena naimacimo finoñedomoi. Hana oñedomoi. 21 Iese omoïmo finoñedicue, omoïna cue jaciruilla jira.

Cue illana omoïmo ja lloiticue. Nibai abina raise uiñoñedicue; ia naie llofuerañi isoi cue illa diga abina iedoiticue. 22 Omoï motomo ite damerie llofuerañina ja lloiticue. Judíuai uaido ñaitimaci. Iena jiai ñaiticue. Judíuai nairai imaci. Daje isoidicue. Judíuai nairai imedicue. Abraham micori uruiaidimaci. Jiai naimie micori uruedicue. 23 “Cristo dibeimo maijidicaï” raitimaci. Abina uiñoñedimie isoi lloticue; ia naimaci baifemo Cristo dibeimo maijidicue. Naimaci baifemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fiodaicabiticue. 24 Judíuai comini cinco digacaño cuena fatimaci. Naga icaiño treinta y nueve digacaño rao diga cuena jicuidimaci. 25 Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui naio monaillaimo botedo jamai furi baiticue. 26 Eo jacirede illedo jaicabidicue. Firiruidino eo illa jira, jaciruioicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaimo cue ia, diga icaiño duere sefuidicue. Naisodo cue macaria, duere sefuicabidicue. Monaillaido cue jaia, duere sefuicabidicue. Cristo rafuena llorañina abi caitadinomona jiai duere sefuicabidicue. 27 Cue ucube ollena, duere maijicabidicue. Diga icaiño raise iniñedicue. Diga icaiño aime guiticue. Rollimemona duere sefuicabidicue. Iniroininamona jiai duere sefuidicue. 28 Diga jiaie rafuemona duere sefuicabidicue. Duenailamona naga creyentiaï illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue.

29 Nie creyente Cristo rafuedo nia raise ñnoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue. 30 Cue abina iedoiacania, jamai bue isoidimiedicuena lloiacadicue. 31 Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue llwana uñnote. 32 Cue illana nia lloiacadicue. Damascomo jaie creyentena cue jailla facaise cuena gaitatallena, Aretas railla illaima anamo ite gobernadori nairai llaiga nasena sedatate; 33 iadedi llaigafo ecimo ite jofo a ite ventanamona cirigai isoide diga ana jaillanona, naiemona jillodicue.

## 12

### *Pablo nicairilla isoide rafuena ciode*

1 Abina iedoiacañedicue; ia cue illana janore nia lloiticue. Iemona bue oñeiticue; ia cue illa abina ridoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. 2-3 Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uññoñedicue. Nibai dama cue joreña uite. Dama Jusiñamui iena uñnote. Naimie mare illanomo iticue. 4 Nainomo cue ñainina rafuena cacadicue. 5 Ie diga abina iedoñeiticue. Cue jamai bue isoidimie diga abina iedoiticue. 6 Uanaicinona cue llwamona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uñnotomoi. Ie baifemo cuena omoi comeciaina facajana jitañedicue. 7 Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue. 8 Cuemona iena naimie oni oretallena, cai Namamo dacaiño amani jidicue; 9 ia cuemo llote: “Ona jillotañeiticue; ia cue ona duenailacinodo jaca ocuiñoitio. O abi eo mairiñenia, ona cue canuana raise uññoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uññoiticue. 10 Cristo muidona duere cue sefuia, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoia, cue comecina ocuiñoiticue. Cue duere sefuia, cue Nama cuena eo canode.

### *Pablo Corintomo ite creyentiamo comecina eo facade*

11 Abina uññoñedimie isoi iticue. Cue illana cue cuia jira, abina uññoñedimie isoi iticue; ia iese cuena itatatomoi. Cuena ridoñedomoi; ia jaino eo mare railla llofuerainina raise feñnotomoi. Jamai bue isoidicue; ia naimaci cue

baifemo faiñedimaci. <sup>12</sup> Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiñeno omoi motomo iticue. <sup>13</sup> Cuemona duere sefuiñedomoi. Jiaie creyentiai omoi baifemo faiamo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiai isoñedomoi. Iena omoi gaiñenia, iena feita. Cue diga iciriñeno.

<sup>14</sup> Menacaiño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitañedicue; ia Cristo dibeimo omoi illana, naimiena omoi raise ñnuana jitaidicue. Cue uruiái isoïdomoi. Rana eenoñedomoi, omoi mootiai iena; ia omoi mootiai rana eenotimaci, omoi ena. Ie isoïde. Cue uruiái isoï omoi illamona, omoïmona rana jitañedicue; ia omoïmo rafuena iacadicue. <sup>15</sup> Nana cuemo ite ra omoïmo feaacadicue. Nana cue comecimo iticinona omoïmo jiai iacadicue. Omoïna eo isiruiticue; ia cuena janore isiruitomoi. <sup>16</sup> “Caïmona ucubena jicañedio; ia jifuecana caïmona otio” raicabitomoi. <sup>17</sup> Ero, omoi dine menamiena cue oretajamona, omoïmona ¿nie isoïde rana otiaïmaïaï? ¿Ñiese omoïna jifuetiaïmaïaï? <sup>18</sup> Omoi dine Titona oretaticue. Jiaïsie creyente imïena Tito diga oretaticue. ¿Ñiese Tito omoïna jifujete? Omoïmo coco comecina daje isoï facadicoco. Daje rafuedo jaca jaidicoco. Omoïna jaca jifueñedicoco. ¿Ñiese omoi comeciaina raitomoi? <sup>19</sup> “Caïmona ie abina riïdote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo dibeimo omoi raise illana, naimiena raise omoi ñnollena, bie rafuena llocabiticue. <sup>20</sup> Omoi dine cue ria, cue jitailla isoï omoi iñenamo jacinaiticue. Iese omoi ia, omoi diga cue illana jiai nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaïnona jeare ñaicabitomoi. Nibai nia jiaïno joreñona ñaicabitomoi. Nibai nia abina uradoidomoi. Nibai daje isoï comeciaina nia lloïñedomoi. Omoi iese illari cue comecidi jarire ite. <sup>21</sup> Omoi dine dane cue ria, omoi muidona Jusiñamui cuena meidaitajamo jacinaiticue. Cristo dibeimo omoi raise iñenia, sunaiticue. Jearede rafuena omoi nia faïnonocaiñenia, omoi aiñede riño diga illana omoi faïnonocaiñenia, omoi iñede iima diga illana omoi faïnonocaiñenia, sunaiticue.

## 13

### *Iraïcáiño Pablo naimacina llofujete*

<sup>1</sup> Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jiaie llote: “Mena iaïmaïaï daje isoï lloïllamona, daje amani daje isoï lloïllamona, maraiñedicinona finodimïena

duere finua". <sup>2</sup> Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciai uai nia meidoñenia, naimacina duere finoiticue. <sup>3</sup> Iemona Cristo uai cuemo illana uiñoitomoí. Naimiena omoi ñnuamona, naimie uai siñonana uiñotomoí. Jamai uaido naimie omoína jillotañede; ia ie siño uaido omoína jai jillotate. <sup>4</sup> Jamai bue isoidimie isoi cruzmo naimie fiodaite; ia fiodailamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue. <sup>5</sup> Cristona ñnocana omoi raise jaillamo omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi diga illana uiñotomoí. Cristomo omoi duiñenia, naimie omoi diga nia iñede. <sup>6</sup> Cristo omoi diga illana omoi uiñuamona, Cristo uai cuemo illana jiai uiñoitomoí. <sup>7</sup> Maraiñedicino omoi finocana jaillana jitañedicue. Jusiñamuimo iena jaiticue. Omoi comeciai uai omoi meidoñenia, Cristo uai diga omoína duere finoacaiñedicue. Omoi comeciai uai meiduana jitañedicue; ia Cristo uai diga omoína cue duere finoñenia, Cristo uai cuemo illana nibai uiñoñeitomoí. <sup>8</sup> Cristomona cue uai illana omoi uiñollena, maraiñedicino omoi finuana jitañedicue. Mare rafuena omoi finocana jaillana jitañedicue. Iena finocana jiai jaiacadie. <sup>9</sup> Cristo rafuena ñnocana omoi raise jai, iobidie. Omoimo cue riire lloñenia, iobidie. Cristo jitaillacino eo raise finocana omoi jaillena jicabidie. <sup>10</sup> Birui bie rafuena cueticue. Omoi dine iñedicue; ia bie cartana omoi feiñua mei, omoi comeciaina raise finuana jitañedicue. Cai Namamona cue uaina feiñoticue. Iedo omoimo riire lloiacaiñedicue; iadedi iedo naimie dibeimo omoi raise itataiacadicue. <sup>11</sup> Cue amatiai, bie carta cuiana jai fuidoacadie. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiai comeciai daje isoi lloicana jai. Coniniri uri omoi i. Iemona Jusiñamui omoína isiruillana uiñoitomoí. Jusiñamui omoína uri itatajana uiñoitomoí. <sup>12</sup> Nana creyentiaína eo caimare uaido. <sup>13</sup> Nana cue diga ite creyentiai imaci uaina oredimaci. <sup>14</sup> Cai Nama Jesucristo omoína jaca duenaite. Jusiñamui omoína jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitañedicue. Mai. Macaibaite. Pablodie.

## GALACIAMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Galaciamo ite creyentiai, omoi dine bie carta oredicue. Pablodicue. ¿Nigacino? ¿Nie isoidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena orediaimaiai. Comini cuena oreñedimaci. Cue lloga uaina cominimona jiai oñedicue. <sup>3</sup> Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatatiamaiai. Iena omoi uiñocana mai omoi jai. <sup>4</sup> Cai Moo Jusiñamui jitailla isoi, birui ite maraiñedicinomona cai jilloillena, cai jeacino facaina Cristo fiodaite. <sup>5</sup> Cai Moona jaca cai iobillasa. Iena jitaidicue.

### *Pablo lloga rafuedi jaca dajede*

<sup>6</sup> Jusiñamuina raire omoi fainonocaillari rajicaidicue. Cristo dibeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomoi. <sup>7</sup> Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itatañedimaci. <sup>8</sup> Jesucristo rafuena omoimo jaie lloticai. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jiai naimie illasa. <sup>9</sup> Omoimo jaie iese lloticue. Dane ja lloticue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa. <sup>10</sup> Comini cueri iobillana jitañedicue; iadedi Jusiñamui cueri iobillana jitaidicue. Cominina iobitaiacadicuena, Cristo dibeimo nia maijiñedicue.

### *Ie oretagamiena jaillena, Cristo Pablona fetua rafue*

<sup>11</sup> Cue amatiai, cue lloga rafuena omoi raise uiñuana jitaidicue. Omoi jeacinomona omoi jilluana jaie lloticue. Bie rafuena comini comeciai facajacinomona oñedicue. <sup>12</sup> Cominimona oñedicue. Bu jaca cuena iena llofueñede; iadedi Jesucristo cuena uiñotade. <sup>13</sup> Jesucristona nia cue iinoñenia, cue judíuai einamací lloga rafuedo cue jaillana jai fididomoi. Cristona iñotinona jaie eo duere finodicue. Naimacina fuidoacadicue. <sup>14</sup> Cue einamací jaie llua isoi, Jusiñamuina raise iñoticue. Nimací llogacinuaido eo



duere cue jailla jira, daje facai cue diga itino baifemo ñnoticue; <sup>15</sup> iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote. <sup>16</sup> Omoi judíuainñedomoimo naie Jito rafuena cue llollena, cuemo ie Jitona jaie bairetate. Naie facaise cuemo jai suide rafuena bu diga ñañedicue; <sup>17</sup> ia Arabia railla eniruemo jaidicue. Nainomo comini iñena jira, cuemo jai suide rafuemo começina facadicue. Jerusalémo Jesucristo nano oretagano ðine jaiñedicue. Cuena Jesucristo nia oretañenia, naimacina orede, ie uai llollena. Arabia railla eniruemo cue illa mei, Damasco railla nairaïmo abido jaidicue. <sup>18</sup> Cristo cuemo bairia facaise tres años illamona, naimiena cue uiñollena, Jerusalémo Pedro ðine jaidicue. Naimie ðinomo quince ðigarui iticue. <sup>19</sup> Naie facaiseconi nana Jesucristo oretaganona cioiñedicue. Pedrona ciodicue. Jacobona jiai ciodicue. Naimiedi cai Nama ie ama Jiainona cioiñedicue. <sup>20</sup> Omoïmo nana cue ciegacïnodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue. <sup>21</sup> Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue. <sup>22</sup> Judeamo ite Cristona ñnotinodi cuena nia cioiñedimaci. <sup>23</sup> Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai ñnuana navui jitañede. Caina fuidoacade”. Jiaie cue finoca rafuena fidiñedimaci. <sup>24</sup> Ie fidiamona, cueri Jusiñamuïmo iobillacinona jai fecadimaci.

## 2

### *Jerusalémo Pablo jailla rafue*

<sup>1</sup> Catorce años illanona, Jerusalémo dane jaidicue. Bernabé cue diga jaide. Titona uiticue. <sup>2</sup> Jusiñamui cuemo llua jira, nainomo ite creyentiaïmo jaidicue. Judíuainñedino Cristo rafuena jai ñnuana cue llollena, jaidicue. Cue llofuiana naimaci raise uiñollena, creyentiaï illaicomïnimo anado nano lloticue. Cue llofuiana: “Mare” naimaci railana uiñoiacadicue. Tainona Cristo rafuena cue lloi railanona uiñoiacadicue. Naimaci diga cue ñaia mei, cue llofuiana: “Mare” raitimaci. <sup>3</sup> Tito cue diga ite. Naimiedi judío nairaï imieñede; iadedi naimaci abina detacabilla isoi, creyentiaï illaicomini ðinena naimie abi detatajana lloñedimaci. <sup>4</sup> Creyentiaïna abi caitadino billa jira, Tito abina detatajana siadoticaï. Naimacina cai uaidoñeno bitimaci. Moisés micori llogacïnuaï anamo cai iñenana naimaci uiñollena, bitimaci. Cristo Jesús cai ñnua jira, Moisés micori llogacïnuaïdo jai

jaiñedicai. Moisés micori llogacinuai anamo caina dane itatalena, iena uiñoiacadimaci. <sup>5</sup> Cai mare rafuena jiaiena jaca meidoñellena, naimaci ñaiana dallu cacareiñedicai. Uanaicinona omoi uiñuana jitaidicai. <sup>6</sup> Naie creyentiai illaicomini omoimollolena, cuemo jiaie rafuena lloñedimaci. Illaicomina raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede. <sup>7-9</sup> Cue llofuiana rairuiñedimaci; iadedi creyentiai illaicomini cuena Bernabé diga marena feiñotimaci. “Daje isoi comeciaina facadicaí” raillamona, cue llofuiana: “Jai mare” raitimaci. Creyentiai illaicomini di Jacobo, Pedro, Juan digamie. Judíuai dine Pedrona Jusiñamui oretaja isoi, cue llumona judíuaiñedinone dine Jusiñamui cuena oretajana uiñotimaci. Pedro llumona Jusiñamuidi ailluena judíuaina creyentiaina itatate. Cue llumona, Jusiñamuidi ailluena judíuaiñedinona creyentiaina jiai itatate. Iemona Jusiñamui uai cuemo illana jai uiñotimaci. Judíuaiñedinomo Jesucristo rafuena llocana nia coco jaillana jitaidimaci; iadedi judíuaimo Jesucristo rafue llocana nia jaidimaci. <sup>10</sup> Daje rafue cocomo llotimaci. “Duerede creyentiaina canocabi” llotimaci. Iena iocire finoacadice.

### *Antioquíamo suide rafue*

<sup>11</sup> Antioquíamo cue jailla mei, Pedro nainomo jiai jaide. Nainomo Pedro bia, maraiñedifue naimie finua jira, naimie uiecomo naimiemo riire lloticue. <sup>12</sup> Nainomo Pedro nano rilla mei, nana creyentiai diga nainomo naimie guisoide. Judíuai creyentiai diga, judíuaiñede creyentiai diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuaiñede creyentiai diga Pedro jai guiñede. Ie ñnoga rafuedo naimie jai jaiñede. <sup>13</sup> Naimie iese illamona, judíuai creyentiaidi judíuaiñede creyentiai diga jai jiai guiñedimaci. Pedro illa isoi, Bernabé iedo jiai jaide. <sup>14</sup> Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uiñua jira, nana comini uiecomo Pedromo lloticue: “Judío nairaí imedio; iadedi o jeacinomona o jilloillena, cai einamací llucínodo birui jaiñedio. Ie jira, ¿bue ñellena judíuaiñedinone cai einamací llucínodo jaillana jai jitaidio?”

*Judíuidi creyentiaina jailla mei, Moisés micori llogacinuaido jai jaiñedimaci*

<sup>15</sup> Nia lloticue: Judíuaiñedinodi Moisés micori lloga uaina jaiie uiñoñedimaci. Caidi judíuaina jeicigacai. Ie muidona Moisés micori llogacinuai anamo jaiie jeicigacai. <sup>16</sup> Iese iticai;

iadedi Moisés micori llogacinuaido jaillamona, Jusiñamui jitailla isoi, jaca bu marebicañede. Jusiñamui jitailla isoi, Jesucristona ñnuamona marebicaidicai. Iena uiñoticaí. Ie jira Cristo Jesúna ñnoticai, cai marebicaillena. Cai marebicaillena, Moisés micori llogacinuaina ñnoñedicai. Moisés micori llogacinuaina ñnuamona, jaca buna marebificainide. 17 Jusiñamui mona cai marebicaiacallena, Cristona cai ñnuamona jeacino finorainiñedicai. “Cuena ñnuamona, marebicaítomoi” Cristo iese llofueuide. Naimie llua isoi cai marebicañenia, cai jeacinomona nia cai jilloñenia, Cristo muidona; iadedi iese iñedicai. 18 Moisés micori llogacinuai jai jamaiñocaidicue. Ie jira naicinuai dane abido cue oia, iena birui cue ñnoñena jira, jai jeacino finoraimiedicue. 19 Iemona cue marebicañena jira, Moisés micori llogacinuai cuemo jai duiñede. Ie anamo jai iñedicue. Ie muidona Jusiñamui llogacinuaido jai jaidicue. Cristo anamo jai iticue. 20 Naimie dibeimo jai iticue. Cristo cuemo ite. Cristo cuena namatade. Jusiñamui Jitona cue ñnocana jai jaidicue. Cuena isiruillamona, naimie jitaillamona, cueri fiodaite. 21 Jusiñamui caina duenaillana jamaiñedicue. Jusiñamui jitailla isoi, Moisés micori llogacinuaina cai ñnuamona marebicaidicaina, Cristo tainomo niade fiodaite.

### 3

*Jesucristona ñnuamona judíuaidi Jusiñamui Joreña feiñotimaci*

1 Gálatas imaci, abina jai uiñoñedomoi. Jiaíno omoína birui jifuate. Omoímo Jesucristo cruzmo fiodailla rafuena jai marefodo lloticue. Iena raise cacadomoi. 2 Ie jira omoímo biena jicanoiadicue: ¿Niese Jusiñamui Joreña jai feiñotomoi? Moisés micori llogacinuaido jaillamona iena feiñoñedomoi. Jesucristo rafuena omoí cacajamona, ñnotomoi. Ie mei Jusiñamui Joreña feiñotomoi. ¿Niese birui abina uiñoñedomoi? 3 Omoí marebicaillena, Jusiñamui Joreño omoímo jai ite; iadedi Moisés micori rafuena dane omoí jaiacanamona, omoí jaiie finolle rafuemona jai marebicaiacadomoi. 4 Jusiñamui Joreñomona diga marecinuaina feiñotomoi; iadedi iena jai jitañedomoi. Iese omoí illana ñnoñedicue. 5 Dane jicanoiticue: ¿Niese Jusiñamuidi ie Joreño omoímo fecade? ¿Niese siño rafuena omoíri finode? Moisés micori llogacinuaido omoí jaillamona ie Joreño omoímo fecañede. Moisés micori llogacinodo omoí jaillamona, siño rafuena omoíri finoñede; iadedi Jesucristo rafue omoí cacajamona, iena omoí ñnua jira, ie Joreña fecade. Iemona siño rafuena omoíri jiai finode.

*Abraham micorí Jusiñamuina ñnua muidona marebicaide*

<sup>6</sup> Abraham micorí ie rafuena lloiticue. Naimie micorímona fueoiticai. Moisés micorí naimiena cuete: “Abraham micorí Jusiñamuina ñnua jira, Jusiñamuimona naimiedi marebicaide”.

<sup>7</sup> Iena cai cacajamona, Abraham micorí isoi cai ñnuamona, naimie ua cominina cai illana uiñotícaí.

<sup>8</sup> Jusiñamuidi judíuainñedino ico marebicaillena jaie uiñote. Naimiena ico naimaci ñnollena jaie jiaí uiñote. Iena uiñuamona, Jusiñamuidi ico suille rafuena Abraham micorímo jaie llote. Mare rafue naimiemo llote: “Nana cuena o isoi ñnotinona marebicaítaiticue” llote.

<sup>9</sup> Abraham micorídi ñnote. Jusiñamui naimiena marebicaítate. Ie isoide. Nana Jusiñamuina ñnotinona marebicaítate; <sup>10</sup> iadedi nana Moisés micorí llogacínuaído jaidino jai faidobidímaci. Moisés micorí iena jaie cuega: “Nana cue lloga uaido jaiñedino jai faidobide”.

Buna nana naie lloga uaido jaiñena jira, nana faidobidícaí.

<sup>11</sup> Biena uiñotícaí. Moisés micorí llogacínuaído jaillamona, Jusiñamuimona jaca buna marebicaíñede. Jusiñamui facaina lloraíma iena jaie cuete: “Jusiñamuina ñnuamona marebicaídímaci. Ie mei jaca iitímaci”.

<sup>12</sup> Moisés micorí llogacínuaí daje isoíñede. Nana Moisés micorí llogacínuaína finuamona cominí marebicaide. Moisés micorí iena jaie cuega: “Cue lloga uai finuamona, marebicaídímaci. Iemei jaca iitímaci”. Jusiñamuina ñnuana lloñede: ia ie lloga uai finollena cominímo llote. Nana ie lloga rafuena finuamona, cominídi marebicaídímaci.

<sup>13</sup> Moisés micorí llogacínuaí anamo jaie cai illa jira, faidobidícaí; iadedi cai facaina naimie fiodailla jira, Cristodí iemona caina jillotate. Cruzmo Cristo cuinaja jira, cai facaina naimie jai faidobide. Moisés micorí iena jaie cuega: “Cruzmo cuinacámie Jusiñamuimona jai faidobide”.

<sup>14</sup> Jusiñamuina naimie ñnua jira, Abraham micorí jaie marebicaide. Jesucristo fiodailla muidona, naimiena judíuainñedino ñnuamona, Abraham micorí isoi marebicaídímaci. Jusiñamuidi ie Joreñona caímo fecallena jaie llote. Ie muidona Jesucristona ñnuamona, Jusiñamui Joreñona birui feiñotícaí.

*Jusiñamui lloga rafue*

<sup>15</sup> Cue amatiaí, bie rafuemo comeciaina faca. Nie isoide rafuena menámie finoacania, naie rafuena feitañellena, rabemo cuetiíaimaiaí. Iaimaiaí mamecina nainomo cuja mei, jairuido damie naie rafuena jaiífo dama meidonide.

<sup>16</sup> Ie isoide. Jusiñamuidi Abraham micorímo ico suille rafuena jaie llote. Iena naimie llua jira, iena meidonide. Ie uruíaímo ico suille rafuena lloñede; ia daje uruemo ico suille rafuena llote. Cristona ñaíte. <sup>17</sup> Biena lloiacadicue.

Naimie jilloillena, Jusiñamuina naimie ñnuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jiaie rafuena llote; iadedi Abraham micorimo jaie lloga rafuena meidoñede. <sup>18</sup> Jusiñamui llua jira, Abraham micori jillode; iadedi Moisés micori llogacínuaído cai jaillamona, cai jilloiadedi, Abraham micori isoi jilloñedícaí. <sup>19</sup> Iese itena, ¿bue ñellena Jusiñamui Moisés micorimo jiaie rafuena llote? Naiemona jeacínona cai uiñollena, iena llote. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedícaí. Jusiñamuidi ie jaienisaimo naie rafuena llote, Moisés micorimo iena llollena. Ie mei Moisés naie rafuena comínimo llote; <sup>20</sup> iadedi Jusiñamuidi Abraham micorimo ie rafuena atona llote. Jaiñiemo iese lloñede, Abraham micorimo iena llollena.

<sup>21</sup> Moisés micorimo Jusiñamui rafuena llote; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaidícaí; <sup>22</sup> iadedi Moisés micori ciegafuiaídi nana comini jeacino anamo illana llote. Moisés micori llogacínuaído jaillamona, jeacino anamona jilloñedícaí. Jesucristona cai ñnuamona Jusiñamui llua isoi, jeacino anamona jillodícaí. <sup>23</sup> Jesucristona ñnuana nia cai uiñoñenia, Moisés micori llogacínuaí anamo itícaí. Jesucristo billamona, naimiëna ñnuana uiñotícaí. <sup>24</sup> Moisés micori llogacínuaídi cai lletarafue. Cristo díbeimo cai illena caina lletade. Cristona cai uiñuamona, naimiëna cai ñnuamona, marebicaidícaí. <sup>25</sup> Naimiëna ñnuana jai cai uiñuamona, naie lletarafuena jai oñedícaí.

#### *Abraham micori ua uruiái*

<sup>26</sup> Cristo Jesúsna ñnuamona, nana omoi Jusiñamui comínidomoi. <sup>27</sup> Cristo díbeimo omoi illamona, bautizagaomoi. Iemona naimie Moodi jiai omoi Moo. <sup>28</sup> Jusiñamuimona dajena itomoi. Naimiedi nana comínina feiñote. Judíuaina omoi illamona, omoína feiñote. Judíuainíñedinona omoi illamona, omoína feiñote. Mullaíaina omoi illamona, omoína feiñote. Mullaíainíñedinodomoidena, omoína feiñote. Iiñiaina omoi illamona, omoína feiñote. Riñoniaina omoi illamona, omoína feiñote. Jesucristona omoi ñnua jira, jaca damacídómoi. <sup>29</sup> Cristomo omoi jai duiadedi, Abraham micori comínidomoi. Ie jira Jusiñamui Abraham micorimo lloga rafuemo jiai jainaiáidomoi.

## 4

*Jusiñamui uruiaina jaidícaí*

<sup>1</sup> Moisés micorí llogacinona dane lloiticue. Jiaie rafuedo iena lloiticue. Riái uruíai moo fiodailla mei, ie moo raruíaidi nano doforamiemo fiebide. Naie nano doforamié uruena, naimíe mamecido naimiemo jide. Naimiemo nia raise jiiñede. Naimiedi nia jamai ite isoide. Naimíe ie jofomo mullaiaí isoi ite. <sup>2</sup> Naimíe moo llua dinorí jiaíno anamo naimíe ite. Ie moo raruíai jiaíno anamo jiaí ite. Naimíe jai eimiéna illemona naimíe moo raruíaidi naimiemo raise jai duite. <sup>3</sup> Jaié dajé isoidicái. Uruíai isoidicái. Cai jaiagai llogacinuai anamo iticái; <sup>4-5</sup> iadedi ie jitailliruiemo Jusiñamuidi ie Jitona orede, naicinomona caina jilloitallena. Jusiñamui uruíaina cai jaillena, ie Jitodi naicino anamo riñomona jeiciga. <sup>6</sup> Naimíe uruíaidicaina jira, Jusiñamuidi ie Jito Joreño cai comeciáimo orede. Naimiéna cai feiñuanona, naimiedi caina Jusiñamuina: “Cai Moo” raitatate. <sup>7</sup> Ie jirari jiaíno anamo jai iñedomoi; iadedi Jusiñamui uruíaidomoi. Jusiñamui uruíaidomoina jira, nana naimíe lloga rafue omoímo jai duide.

*Moisés micorí llogacinuai anamo omoí jaia, danomo abido jaidomoi*

<sup>8</sup> Jaié Jusiñamuina nia omoí uiñoñenia, ua jusiñamuillañede ra anamo itomoi. Naie isoide rana sedavidomoi. <sup>9</sup> Jusiñamuina jai uiñotomoi. Naimíe omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi. <sup>10</sup> Judíuai comini rafuena finocabillaruiemo jiaí finocabidomoi. Iemoná: “Marebicaiticái” raillanona iese finocabidomoi. <sup>11</sup> Cue lloga uai omoí finoñena jira, omoímo tainona jai lloticue. Nibai jai tainomo maijdicue.

*Pablo naimaci diga illana uibiñote*

<sup>12</sup> Cue amatiaí, omoí dine nano cue jaia, Moisés micorí llogacino anamo iñedomoi. Naie llogacino anamo jaié iticue; ia birui ie anamo iñedicue. Birui cue illa isoi omoí illana jiaí jitaídicue. Omoí dine cue nano ia, cuena raise feiñotomoi. <sup>13</sup> Cristo rafuena omoímo nano cue llua facaiseconi duidicue. Iena uiñotomoi. <sup>14</sup> Cue duico omoímona jacire eruaide; iadedi cuena jearuiñedomoi. Jusiñamui jaienici omoí dine billa isoi, cuena feiñotomoi. Jesucristo omoí dine billa isoi, cuena jiaí feiñotomoi. <sup>15</sup> Jaié caimare iticái. ¿Niese birui cue diga caimare iñedomoi? Cuena omoí canoitena, cuemo fecallena, omoí uisi jaié jino juiconoiacadomoi. <sup>16</sup> Omoímo jicanoíacadicue: ¿Uanaicinuai omoímo cue llua jira, omoí eoiñamiéna jai jaidicue? <sup>17</sup> Moisés micorí llogacinuaído jaidino omoína eo nabairitimaci; iadedi mare rafuena finoacaiñedimaci. Naimaci diga omoí nabairillena, cue diga omoí nabairillana jai jitaíñedimaci. <sup>18</sup> Mare comeciáimona cuena omoí jaca

jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiaie mare. <sup>19</sup> Cue uruiaie, Cristo omoi comeciaina raise namataja dinori, omoi rie cue comeci eo duere dane llicidaite. <sup>20</sup> Omoi diga ja iacadie, omoi diga atona raise ñaillena. Omoi mona are cue illa jira, dane raise cai nabairillena, omoi mo cue llua raise uiñoñedicue.

*Jesucristo rafue Moisés micorí llogacínuaie baifemo faite*

<sup>21</sup> Moisés micorí llogacínuaie anamo iacadino, omoi mo daje rafuena jicanoiacadie: ¿Moisés micorí cuegafuiaina raise cacadomoi? <sup>22</sup> Moisés micorí jaie cuega: “Abraham micorimo mena jito ite. Daje jito ie mullañomona comuide. Jiaie jito ie mullaiañediñaiñomona comuide. Naiñaiñodi ie nanocai. <sup>23</sup> Abraham micorí jitailla jira, ie mullaño jitona comuitate; iadedi ie mullaiañediñaiño jito comuide, Jusiñamui llua jira”. <sup>24-25</sup> Naie rafuemonai cai fueolle. Ie iañuaide mena jai lloga rafue isoidiañuaie. Abraham micorí mullaño mameci Agar micorí. Naiñaiñodi Sinaí railla anedumona lloga rafue isoide. Arabia railla eniruemo Sinaímona Jusiñamuidi Moisés micorimo rafuena llote. Naiñaiño mullañona jira, ie urue mullaimana jeiciga. Ie nama anamo jaca ite. Ie isoide. Moisés micorimo llogacínuaie jaidinodi naie rafue anamo itimaci. Jerusalémo itino Moisés micorí llogacínuaie anamo jai nia illa jira, Agar micorí Jerusalén railla nairai isoide. <sup>26</sup> Jiañaiñodi jiaie lloga rafue isoide. Naiñaiño Abraham micorí ai. Naiñaiñodi Sara micorí. Naiñaiñodi monamo ite Jerusalén isoide, naiñaiño mullañoñena jira. Nainomo jainaiaidicai, Moisés micorí llogacínuaie anamo jai cai iñena jira. <sup>27</sup> Isaías micorí iena jaie cuete:

Oiño, mai iobi.

Urue nia jocoñediñaiño, ado iobi.

Ñirediñaiño baifemo eo uruiairenitio.

Iemona Moisés micorí llogacino anamo iñedinomona Cristona ñinotina ailluena jaillana uiñoticaie.

<sup>28</sup> Cue amatiaie, bie rafue omoi mo duide. Jusiñamui llua jira, Abraham micorí jito Isaac micorí comuide. Ie isoide. Jusiñamui llua jira, caide ie uruiaina jaidicai. <sup>29</sup> Ero, mullaño jitodi mullaiañediñaiño jitona jaie duere finouide. Daje isoi Moisés micorí llogacínuaie anamo itinodi Jusiñamui Joreño anamo itinona birui duere finocabidimaci. <sup>30</sup> ¿Ñiese cai nibaille? Moisés micorí Sara micorí llua jiaie cuete: “‘Mullañona, naiñaiño jito diga, oni dota. Ie moo fiodailla mei, mullaño jito ie moo raruiaina feñoñeite. Dama mullaiañediñaiñede jito ie moo raruiaina feñoite’ llote”. <sup>31</sup> Ie jira mullaño urue isoñedicai Moisés micorí llogacínuaie anamo jai cai iñena jira, mullaiañediñaiño urue isoidicai.

## 5

*¿Nie isoide rafuedo jaitomoi?*

<sup>1</sup> Moisés micorí llogacinuai anamona Cristodí caina jai jil-lotate. Ie jira omoi comeciaina ocuiño. Jaie omoi illa isoi, dane jaiño. Omoi marebicaitañede rafue anamo jaie itomoi. Ie jira Moisés micorí llogacinuai anamo iño. Iemona marebi-caiñeitomoi. <sup>2</sup> Jeacinomona omoi jillobillena, Moisés micorí llogacinodo omoi jaiacanamona, omoi abiaina omoi detataia, Cristo rafuena jai jitaiñedomoi. <sup>3</sup> Dane lloiticue: Jeacinomona omoi jillobillena, naga abina detatagamie nana Moisés micorí llogacinuaina inua. Nana iena inoñenia, naimie jilloñeite. <sup>4</sup> Moisés micorí llogacinuaina inuamona omoi marebicaia-cania, Cristo rafuena jai duiñedomoi. Jusiñamui caina due-naillamona, Cristona jaie cai dine orede. Moisés micorí llogacinodo omoi jaiacania, Cristo rafuena jai jitaiñedomoi. <sup>5</sup> Moisés llogacinuaina inuamona marebicaiñedicaí; iadedi Jesucristona cai inuamona, Jusiñamui Joreño caina canua-mona, cai marebicaillemo iocire ocuridicaí. <sup>6</sup> Abina de-tatajamona, cai jeacinomona jilloñedicaí. Abina cai de-tatañenamona, jiai jilloñedicaí. Dama Cristona cai inuamona jillobidicaí. Naimiena cai inua jira, nana cominina isiruicana jaidicaí. <sup>7</sup> Cristo rafuedo navui marena jaidomoi; ia damerie uanaicinona omoi inuana jai jitaiñedimaci. <sup>8</sup> Jusiñamui mona naimaci uaina oñedimaci. Jusiñamui omoína navui uaidote, naimie dibeimo omoi illena.

<sup>9</sup> Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jaiie rafuedo jai, diga cominina jifuerede, naimie jailla dibeido jaillena. <sup>10</sup> Jiaiie rafuedo omoi jaiñellemo cue comecina jai facadicue. Cai Nama cue inua jira, cue lloga uaido omoi jaillemo cue comecina jai facadicue. Omoi comeciaina naganomo itatatiniena uiñoñedícue; iadedi Jusiñamui naimiena duere finoite.

<sup>11</sup> Cue amatiaí: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira. <sup>12</sup> Omoi comeciái naganomo itatatinodi raitimaci: “Janore jisa abina detataja-mona, cai jeacinomona jillobidicaí”. Iese itena, Jusiñamuina uiñoñedíno finua isoi, namiena naimaci abiaí diana jiai jitaídícue.

<sup>13</sup> Moisés llogacinuai anamona Jusiñamui omoína jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jaiie cominina cano. <sup>14</sup> Moisés micorí iena jaie llote: “O abi o isiruilla isoi, o ecimo itinona isirui”. Iena omoi finoa, nana Moisés micorí llogacinuaina jai finodomoi. <sup>15</sup> Iese



omoi finoñenia, conima diga omoi riire iciria, jaca danomo iñeitomoi.

### *Jiaie cominina omoi isiruilla rafue*

<sup>16</sup> Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite marañedicinodo omoi jaiñeno. <sup>17</sup> Cai comeciaino ite marañedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; <sup>18</sup> iadedi Jusiñamui Joreño anamo omoi raise ia, naimie llwana omoi raise iñoia, Moisés micori llogacinona jai jitañedomoi. <sup>19</sup> Ero, marañede comeciaino iticinodo omoi jaia, bie isoidicinona finocabidomoi: aiñede riño diga illacina, iniñede ima diga illacino, jeare ñaiacino, diga eo jearede rafuena finuacino, <sup>20</sup> jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino, <sup>21</sup> dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jaie lloticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite. <sup>22</sup> Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino, <sup>23</sup> uai oñenacino, abina eenuacino. Moisés micori llogacinuai bie isoidicinona ñaiñede. <sup>24</sup> Cristo Jesúmo jainaiadinodi naimaci marañede comeciai jitaillacino anamo iñedimaci. <sup>25</sup> Jusiñamui Joreño caino illa jira, naimie cai comeciaina namatajacinodo cai jaillesa. <sup>26</sup> Iemona abina cai biriñellesa. Abina jiai cai iedoñellesa.

## 6

### *Jiaie llofuiacino*

<sup>1</sup> Cue amatiai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise icíño lloño. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoi raillano, nagamiiai abi rairuillesa. <sup>2</sup> Bu duere sefua, bu Taife ramo faia, coninina cano. Iese omoi canoia, Cristo llogacinuaina jai iñotomoi. <sup>3</sup> “Cuemo iese suiñeite. Dama abina sedadicue. Jamai bue isoñedicue” comecina facadimie dama abina jifue. Naimie jamai bue isoide. <sup>4</sup> Marañeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi

iobilla. Dama ie maijia rafuedi naimiemo duide. Jiaimiemo ite maijia rafuedi naimiemo duiñede. <sup>5</sup> Naimie finoca rafuemonagame jeacinona finoia, dama naimie muidona. <sup>6</sup> Naga Jesucristo rafuena fueotimiedi ie llofuegamiemo mare ra fecalle. <sup>7</sup> Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feiñoite. <sup>8</sup> Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faifiñeite. <sup>9</sup> Jusiñamui Joreño jitaillacinona finuana sefuiruiñeno. Cai comeciai cai ocuiñoia, Jusiñamui jitailla fa-caiseconi ibana feiñoiticaí. <sup>10</sup> Ie jira nana cominina canocabi. Nana creyentiaina ua eo canocabi.

### *Facaduacino*

<sup>11</sup> Ero, jerie cuiano omoimo bie facaimo cueticue. <sup>12</sup> Jiaie cominimona iobillacinona omoi abiaina detatajana jitaidinodi feiñoiacana jira, omoi abiaina detatajana jitaidinomaci. Cristo rafue lloticainadedi: “Cristo rafuena uiñoñedinodi niade duere caina finodinomaci” raillanomo comeciaina facajamona, iese jitaidinomaci. <sup>13</sup> Omoi abiaina detatajana jitaidinodi Moisés micori llogacinodo raise jaiñedinomaci. Nana iena iinoñedinomaci. Omoi abina iedoiacana jira, omoi abiaina detatajana jitaidinomaci; <sup>14</sup> iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiañedicue. Naie rafue anamo jai iñedicue. <sup>15</sup> Abina diamona cai jeacinomona jilloñedicai. Abina deñenanomona jaca jilloñedicai; iadedi Jusiñamui Joreño caina comonori comuitajamona jillobidicai. <sup>16</sup> Jusiñamuidi nana bie llucacinodo jaidino uri itatatesa. Naimie naimacina duenailasa. Jusiñamui cominidi ua jaca iese illasa.

<sup>17</sup> Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellaña jai oticue.

<sup>18</sup> Cue amatiaí, cai Nama Jesucristo omoína duenailasa. Mai. Pablodicue.

## EFESOMO ITE CRISTONA HNOTINOMO PABLO ORETAGA RABE

*Efesomo ite creyentiaimo Pablo cartana orede*

<sup>1</sup> Efeso railla nairaimo ite creyentiai, Pablodicue. Bie carta omoi dine oredicue. Ie rafue lollena, Jusiñamui jitailla jira, Jesucristo oretagamiedicue. Naimiemo omoi jai jainaiaila jira, Jesucristona ñnocana jai jaidomoi. <sup>2</sup> Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iaimai omoi comeciaina uri itatajacabillana uiñocana mai omoi jai.

*Cristomo jai cai jainaiaila jira, Jusiñamui marena itatajacinona feiñotikai*

<sup>3</sup> Cristomo cai jainaiaila jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiaila jira, cai comeciai marena itatajacinona Jusiñamuimona jai feiñotikai. <sup>4</sup> Iena ja lloiticue. Enirue nia iñenia, Jusiñamui nana naimiena hnotinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemona cai marebicaillena, jeacinona cai finoñellena, caina fetode. <sup>5</sup> Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidicai. <sup>6</sup> Naimie caina fetuamona, naimie caina duenaillana jai uiñotikai. Iemona naimiedi eo mareuidimiena jai jai uiñotikai. Ie isiruiga Jitomo cai jainaiailamona iena uiñotikai. Naimiemo buena cai finoñenia, caina duenaite. Naimiena cai iobitallena, caina fetode. <sup>7-8</sup> Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jai oñeite. <sup>9</sup> Naimiena cai raise ñnollena, caina abina jai uiñotade. Jusiñamui caina naimie nana caina birui jilloitaiacanana jai uiñotade. Cai cominidi iena jaie uiñoñedimaci; iadedi Jusiñamui jitailla diese Cristo finoca rafuedo caina iena jai uiñotade. <sup>10</sup> Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. "Cristo cai Nama" raitimaci.

<sup>11</sup> Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidicai. <sup>12</sup> Naimie

caina fetuanona Cristona jaie ñnoticai. Naimie diga ico jaca cai illemo birui ocuridicai. Naimiena cai iobitallena caina fetode. “Naimie fue eo mare” cai raillena caina fetode. <sup>13</sup> Cristona jai birui ñnotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie ñbeimo omoi illana uñnotomoi. <sup>14</sup> Jusiñamui Joreño caimo jaca illa jira, Jusiñamui diga ico cai jaca illena uñnoticai. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaiticai. Naimiemo cai jainaiaila jira, naimiemonana nana cai comeciai marena itatajacinona feñnoticai.

### *Naimaci facaina Pablo jide*

<sup>15</sup> Cai Nama Jesuna omoi ñnuana jai fididicue. Nana jiaie creyentiana omoi isiruillana jiai fididicue. <sup>16</sup> Ie jirari Jusiñamui cue jia, omoina feitañedicue. Omoi facaina naimiemo iobillacinona jaca fecadicue. <sup>17</sup> Cai Nama Jesucristo Jusiñamui duilla jira, cai Moo Jusiñamui uai siñonana jira, naimiemo cue jianona, omoi facaina jicanoticue. Naimie Joreño uaido naimie rafue raise uñocana omoi jaillena jicanoticue. Naimiena raise uñocana omoi jaillena jicanoticue. Iese omoi facaina jicanocabiticue. <sup>18</sup> Naimie ñbeimo omoina naimie jai uaidua jira, naimie diga ico jaca omoi illemona, iena omoi raise uñuana jitaidicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uñuana jitaidicue. <sup>19</sup> Naimie uai ua eo siñonana omoi uñuana jitaidicue. Naimiena cai ñnua muidona, ie uaido naimie caina canorede. Iena omoi raise uñuana jitaidicue. <sup>20</sup> Fiodaillamona Cristona ie uaido Jusiñamui jai jillotaja jira, naimie uai siñonana uñnotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. <sup>21</sup> Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaimaiai isoide joreñuai afemo naimie ite. Birui iese ite. Ico iese nia iite. <sup>22</sup> Jusiñamuidi naga ra Cristo anamo ua jai itatate. Cristona nana creyentiai imaci illaimana jiai ua jai itatate. <sup>23</sup> Cristomo daajena nana cai creyentiaidicaidi duidicai. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

## 2

*Jusiñamui caina isiruilla jira, cai jeacinomona jai jillobidicai*

1 Jusiñamuina jaie omoi nia ñnoñenia, naimiemo omoi duiñena jira, naimiemona fiódaitino isoidomoi. Jeacino anamo omoi illa jira, naimiemona fiódaitino isoidomoi. Jeacino finocana jaidomoi. Maraiñedicinona finocana jaidomoi. 2 Jeacinona ebiruitomoi Jusiñamui díbeimo ñnedino rafuedo jaidomoi. Taiñe díbeido jai jaisoidomoi. Jusiñamuina oiacañedino Taiñe jitailla rafuedo jaisoidimaci. 3 Naimaci isoi jaie nana iticai. Cai comeciáimo ite jearede jitaillacinona finodicai. Iedo jai jaisoidicai. Ie jira Jusiñamui rícaillafue anamo jaie iticai. Iese jaie nana iticai. 4-5 Jeacinona jaie cai finua jira, jeacino anamo iticai. Jusiñamuina ñnoñedicai; iadedi Jusiñamui caina eo duenaillanona, caina eo isiruillamona, naimie díga íco jaca cai illena, naimie díbeimo caina itatate. Fiódailamona Cristona Jusiñamui jillotaja jira, jeacino anamona caina jai jillotate. Ie muidona monamo íco iiticai. 6 Cristona jillotaja mei, Jusiñamui ie ecimo naimiena dane itatate. Cristomo cai jai jainaiáilla jira, Jusiñamui nainomo caina jiai jainaiáitate. 7 Cristo finoca rafuemona caina iese jai itatate. Caina iese jai itatajamona, nana cominidi Jusiñamui caina eo duenaillana uiñoitimaci. 8 Naimie caina duenaillanona, caina jai jillotate. Jaca buena cai finuamona jillobiñedicai; iadedi naimie jitailla jira, naimie caina jai jillotate. 9 Cai jilloillena jaca buena cai finoñena jira, abina iedoñedicai. 10 Jesucristomo cai jainaiáillamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

*Cristomo jai cai duilla jira, jiaie nairaiaí díga birui uri iticai*

11 Omoi jaie isoillana uiñotomoi. Iena comecitomoi. Jusiñamuina jaie uiñoñedomoi. Judíuaiñedinona omoi jeicíñena jira, cai judíuai comini isoi abiaína detatañedomoi. Ie jira cai cominimona maraiñedomoi. 12 Omoi jeacinomona Cristo omoina jilloitaiacanana naie facaiseconi uiñoñedomoi. Cai judíuai nairaímo jainaiáañedomoi. Ie muidona Jusiñamui cai judíuai cominimo jaie lloga rafuena uiñoñedomoi. Jusiñamuina nabailana uiñoñedomoi. Jusiñamui díga omoi íco jaca illena uiñoñedomoi. Jusiñamuina omoi uiñoñena jira, naimiena sedañedomoi. 13 Naimie díbeimo jaie jaiñedomoi; iadedi Jesucristomo birui duidomoi. Jusiñamui jaie ñnoñedomoi; iadedi Cristo jai fiódaila jira, naimiena birui ñnotomoi. Naimiena omoi jai ñnuamona, cai díga naimie díbeimo jai itomoi. 14 Naimie omoi comeciá jai uri itatate. Cai comeciá jiai jai uri itatate. Cai judíuaiimona omoina jaie jearuiticai. Iese jaie iticai; iadedi Cristo muidona daní coninina nana birui nabaidicai. 15 Cristo fiódailamona Moisés micorí jaie

llogacino anamo jai iñedicaí. Naie llogacino dani cai judíuaimo duilla jira, Jusiñamui díbeimo jaie iñedomoi; iadedi Cristo finoca rafue muidona, birui daajena jaidicaí. Omoína jaie cai gaiñena jira, omoína jaie nabaiñedicaí; iadedi Cristomo daajena cai duilla jira, birui nabairedicaí. <sup>16</sup> Cruzmo Cristo fiodailla jira, Jusiñamui díbeimo cai illamona, mena nairaimona caina daje nairaina jai itatate. Ie jira daje nairaina uri iticaí. <sup>17</sup> Cristo jaie billanona, mare rafuena llote. Omoi judíuaiñedinomo, cai judíuaimo, comeciaí uri illana llote. Nana caina jilloitaiacanana llote. <sup>18</sup> Naimie muidona Jusiñamuina jai nabairedicaí. Jusiñamui Joreño caina canuamona, naimie diga birui nabairedicaí. <sup>19</sup> Jusiñamui cominina omoi jai illa jira, nana naimiena ñnotino diga Jusiñamuimo daajena duidomoi. Caimona birui jiaie cominiñedomoi. <sup>20-22</sup> Jofo isoidicaí. Jofona cai finoacania, naie ibiri nano finodicaí. Ie mei diga rana cai atiamona, iena niticaí. Ie isoide. Diga jiaie isoide cominiaina iticaí; iadedi Cristomo daajena jai duidicaí. Naimiedi birui nana cai Nama. Cristo facaina llorainimona naimie rafuena jai cacadicaí. Jusiñamui Joreño caina canuanona iena ñnoticaí. Iena cai ñnuamona, naimie jitailla isoi, mare rafuena finocana jaidicaí. Cai diga Cristomo omoi jai duillamona, Jusiñamui Joreño nana cai comeciaino jai ite.

### 3

#### *Judíuaiñedinomo Pablo Cristo rafuena llofue*

<sup>1</sup> Jesucristo rafuena omoi judíuaiñedinomo cue llofueuilla jira, cárcelmo iticue. <sup>2</sup> Omoína naimie duenaillanona, omoína llofuellena, Jusiñamui cuena oretate. Iena jai uiñotomoi. <sup>3</sup> Jusiñamui cuemo jaie uiñoñega rafuena jai llote. Naie rafuena janore como jai cueticue. <sup>4</sup> Bie carta omoi facaia, Cristona jaie uiñoñega rafuena cue jai uiñuana uiñoitomoi. <sup>5</sup> Jusiñamuidi cominimo iena jaie raise uiñotañede; iadedi ie Joreñodo Cristo facaina llorainina iena birui jai uiñotade. <sup>6</sup> Iena lloiticue. Judíuaiñedomoi; iadedi Jusiñamui cuemo jaie llote: “Judíuaiñedino Cristona ñnuanona, omoi judíuai isoi jilloitimaci” llote. Omoi facaina Cristodi fiodaite. Naimiena omoi ñnoia, omoína ie uruiaina cai isoi jai itatate. Naimiedi nana cai Moo. Jai daje nairaidicaí. Cristomo daajena duidicaí. Cristo rafuena omoi ñnuamona, naimie jai llua isoi, Jusiñamui diga ico jaca iitomoi. Jusiñamui cuena iena jaie uiñotade. <sup>7</sup> Jusiñamui jitailla jira, cuena naimie duenaillanona, naimie uai cuemo illamona, naie mare rafuena llofuecabiticue. <sup>8</sup> Creyentena nia cue jaiñena facaiseconi, creyentaina jaie cue duere finouilla jira, jamai bue isoidicue.

Nana jiaie creyentiaie cue baifemo faitimaci; iadedi Jusiñamui cuena duenaillanona, ie rafuena cue lollena, cuena oretate. Cristo caina eo raise marena canocabillana llofuecabiticue. <sup>9</sup> Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate. <sup>10</sup> Judíuainedino judíuai diga creyentiaina jaillamona, Jusiñamui jaienisaie naimie uai siñonana uiñoitimaci. “Naimie fue eo mare” raitimaci. <sup>11</sup> Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fodaite. Iemona Jusiñamui jitailla rafuedi suide. <sup>12</sup> Cristona cai inua jira, Jusiñamui diga jaciruiñeno birui jai ñairedicai. Naimie caina cacajana jiaie uiñoticai. <sup>13</sup> Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoie comeciaie sefuiruisiñeno; iadedi Cristo rafue omoimo cue lluanona cue duere sefuia, iobicana omoie jai.

*Cristo caina eo isiruite*

<sup>14</sup> Cai Moo Jusiñamui caina eo canocabillanomo cue comecina facaia, naimiemo jiidicue. <sup>15</sup> Naimiedi nana creyentiaie imaci Moona jira, naimiemo jiidicue. <sup>16</sup> Naimiemo cue jianona, omoie facaina jiidicue. Naimiemo eo ebirede siño iticino illamona, ie Joreñodo naimie omoie comeciaina raise ocuiñotallena jicanoticue. <sup>17</sup> Cristona omoie inuamona, naimie omoie comeciaina raise namatallena jicanoticue. Jusiñamuina omoie isiruicana jaillana jiidicue. Jiaie cominina omoie isiruicana jaillana jiaie jiidicue. <sup>18-19</sup> Cristo caina jaca eo isiruillana, nana jiaie creyentiaie diga jaca eo isiruillana, omoie eo raise uiñuana jiidicue. Naimie caina eo isiruillacino cai comeciaie facajacino baifemo uailla jira, naimie caina eo isiruisoillacinona jaca raise uiñoñedicai; iadedi iena janore cai uiñuamona, Jusiñamui omoie comeciaina namatallena jiidicue. Iese omoie facaina jicabidicue.

<sup>20</sup> Ie jira Jusiñamuimo iobillacino cai fecajasa. Ie uaido cai comeciaie marena icana jaitate. Naimiemo cai jicajacino baifemo naimie fecarede. Cai comeciaie facajacino baifemo naimie jiaie finorede. <sup>21</sup> Ie muidona naimiemo iobillacinona nana cai creyentiaidicaide fecacabillasa. Jesucristo finoca rafue muidona iobillacinona jiaie cai fecacabillasa. Mai.

**4**

*Jusiñamui Joreño jai caimo illa jira, cai comeci daje isoi lloide*

<sup>1</sup> Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaina

omoi jai jailla jira, Cristo jitailla isoi omoi i. Jusiñamui omoi na jai fetode naimie jitailla rafuena omoi finollena. <sup>2</sup> Ie muidona abina jaca iedoñeno. Raire iciriñeno. Jiaimie ona duere finoia, ibana oñeno; iadedi uai oñeno naimiena jaca isirui. <sup>3</sup> Jusiñamui Joreño omoi mo illamona, omoi comeciai daje isoi lloicana jai. Daje isoi omoi comeciai lloillamona, omoi jitaillamona daní uri omoi i. <sup>4</sup> Iena nia lloiticue. Cristona cai ñnuamona, daajena naimiemo jainai aidi cai. Jusiñamui Joreño nana caimo illamona, daní omoi comeciai lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridí cai. <sup>5</sup> Jaca dajede Nama sedacabidí cai. Caina jilloitallena, da naimiena ñnotí cai. Dama naimie facaina bautizaganodí cai. <sup>6</sup> Cai Moo Jusiñamui jaca dajede. Jaca dajede Jusiñamuina nana cai creyentiaidí caidi sedadí cai. Naimie anamo nana ití cai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

<sup>7</sup> Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaina naimiemo ñnotacana jaillena, ie uai caimo fecade. <sup>8</sup> Iena cai raise uiñollena, David micorí jaie cuegafuemonona fueoití cai. Naimie cueba: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaite. Iemona Cristo cai maijiacino caimo illana uiñotí cai. <sup>9</sup> Biemo omoi comeciaina faca. Monamo abido naimie jailla jira, monamonona eniruemo Cristo nano billana uiñotí cai. <sup>10</sup> Eniruemo bite; iadedi monamo abido jaide. Nana cominina birui sedade. Naimie baifemo jaca buna iñede. <sup>11</sup> Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino llollena, ie uaina fecade. Ie rafuena nia ñnoñedinomo llollena, damieriemo ie uaina fecade. Creyentiaina ie rafuena llofuellena, damieriemo ie uaina fecade. <sup>12</sup> Iese ie uaina fecade, naimie facaina raise cai maijillena, nana jiaie creyentiaina cai canollena, Ie mei Cristo rafuena daajena ñnocana jaití cai. <sup>13</sup> Iena cai ñnuamona, Jusiñamui Jitona raise uiñocana jaití cai. Cai comecidí daje isoi lloicana jaití cai. Naimie jitaillacinodo raise jaití cai. Naimie marena icana illa isoi jaití cai. <sup>14</sup> Cai uruai facaise cai comeciai naganomo ite. Naie facaise nie isoide rafuena cai cacajia, iena raire ñnotí cai. Cristo ñnocana cai jaillamona, uruai isoi cai iacaiñena. Damierie naga llofueraima uaido jaidimaci. Damierie llofuerañidí Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; <sup>15</sup> iadedi jiaie cominina cai isiruillamona, uanaicínodo cai



jailla. Cristo isoi icana cai jaillamona, abina uiñoiticaí. Cristodi cai illaimana jira, caina ocuide. <sup>16</sup> Naga creyente naimiemo jainaiáide. Aillosiedicaí; iadedi daajena naimiemo jainaiáidicaí. Daajena naimiemo cai jainaiáillamona, naimie jitaillacino cai finoia, naimiena ñnocana jaiticaí. Iemona dani coninina isiruicana jaiticaí. Daajena naimiemo cai jainaiáilla jira, cai comeciaí daje isoi lloicana cai jailla.

*Cristomo jai cai duilla jira, naimie rafuedo birui jaidicaí*

<sup>17</sup> Omoimo nia lloiticue. Cai Namamo cue duilla jira, biena lloiticue. Jusiñamuina ñnoñedino isoi dane omoi ñño. Jaie naimaci isoi itomoi. Naimaci comeciaídi tainomo jai jaide isoide. Cacarefiacaiñedimaci. <sup>18</sup> Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui dibeimo illana jaca uiñoñedimaci. Uanaicinona uiñoiacaiñedimaci. <sup>19</sup> Jearede rafuena naimaci finoia, meiruñedimaci. Naimaci comeciaí oiacana rafuedo jai jaidimaci. Naga jearede isoide rafuena eo finocana jaidimaci; <sup>20</sup> iadedi Cristo rafuena omoi cacajamona, naimiena omoi raise uiñuamona, naimaci isoi omoi illena fueoñedomoi. Cristo rafuena omoi cacajamona, jiaiena illena jai fueotomoi. <sup>21</sup> Naimiena cacajanona iena ñnotomoi. Naimiena cue llofuia-mona, naimiena Cristo facaina llorañi llofuiamona, danomo omoi roracomo omoi ofia, Cristo uanaicinona cacadomoi. <sup>22</sup> Biena omoína llofuecabiticue. Cristona jaie nia omoi ñnoñena isoi, omoi jaiñño. Omoi comeciaímo jaie iticinodo jaiñño. Naga jearede rafue omoi comeciaí oiacanamona faificana jaie jaidomoi. Iedo birui jaiñño; <sup>23</sup> iadedi Cristo dibeimo omoi jai illanona, naimiemo omoi comeciaí facajano, Jusiñamui omoína canuamona, omoi comeciaí uaillaina meidocana jai. <sup>24</sup> Cristo rafuena birui ñnotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide. <sup>25</sup> Ie jira tainona lloñño. Cristomo daajena jai jainaiáilla jira, coninimo uanaicinona jaca omoi llono. Jiaínona omoi jifueñño. <sup>26</sup> Maraiñedicinona bu finoia, naimiemo riire llono; iadedi iese o lloia, naimiena jeare ñaiñño. Jiaimie ona icia, naimiena jeare ñaiñño. Naimie diga o rafue ia, naie rafue nairuido marena fino, <sup>27</sup> Taife ramo o fai raillano. Bu diga o nicino ia, iena raire marena o finoñenia, ibana oiacanitió. Naie raire o feitañena jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido llinoñño. <sup>28</sup> Naimiemo ra illena, fñamona omoimona navui bu ia, creyentena naimie jai jailla jira, naimie dane fññena; iadedi ra naimie jitaia, naimie maijiite. Ie maijiamona ie ra ollena, ucubena feiñoite. Ie

mei dueredinona naimie jiai canoite. <sup>29</sup> Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoitomoi, Jusiñamui dibeimo naimaci raise illena. <sup>30</sup> Jusiñamuimo omoi jai jainaiaila jira, jeacinona finoñeno. Jeacino omoi finoa, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uiñoticaí. Cristo dane abido billemona, naimie dine cai jaca illena, caina jai jillotate. <sup>31</sup> Jiaie cominina iciñeno. Iciriñeno. Uaina uaitaño. Jiaie cominina jeare ñaiñeno. Naimacina duere jeare finoñeno; <sup>32</sup> iadedi coninina canua. Jiaie cominina duenai. Jiaimie diga omoi nicino ia, naimie finoca rafuena feitajanona, naimie diga marena ñaino. Naie rafuena dane abido linoñeno. Cristo finoca rafue muidona, Jusiñamui omoi jeacinona jai feitaja isoi, jiaimie diga omoi rafue ia, naifuena omoi feita.

## 5

*Jusiñamui cominina jai cai illamona, naimie jitaillacinona finoiticaí*

<sup>1</sup> Jusiñamui isiruiga uruiaidomoi. Naimie marecinona finua isoi, omoi fino. <sup>2</sup> Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fodaite. Cai jeacino oni dotallena naimiedi fodaite. Naimie iese fodailla jira, Jusiñamuina eo iobitade. <sup>3</sup> Jusiñamui cominidomoi. Omoi aiñede riño diga iñeno. Omoi iniñede iima diga iñeno. Rana nicidoño. Jearede rafue finuamo omoi comeciaina facaño. <sup>4</sup> Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobillacinona fecacana omoi jai. <sup>5</sup> Ie aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede iima diga icabitiñaiñodi Cristo ie cominina sedajanomo jiai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi. <sup>6</sup> “Creyente naie isoide rafuena finorede” bu lloia, naimie omoiña jifueiacade. Naimie iese lluaña ñinoño. Jusiñamui naie jeacinona finocana jaidinona duere finoite. <sup>7</sup> Ie jira naimaci jearede finoca rafuedo jaiñeno. Naimacina nabaiñeno. <sup>8</sup> Jusiñamuina jaie omoi uiñoña jira, jiti redinomo itomoi isoidomoi; iadedi cai Namamo omoi duillamona, uanaicinona ñinocana omoi jai. <sup>9</sup> Jusiñamuina omoi jai uiñoia, jeacinona omoi fañonocaia, Jusiñamui jitaillacinona finocana jaitomoi. Uanaicinona llocana jaitomoi. <sup>10</sup> Buena o finoacania, Jusiñamui jitaillacinona o finuacinomo

o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. <sup>11</sup> Jitiredinomo nia itino finoca rafuedo omoi jaiñeno. Naimaci finoca rafuemonona marecinodi jaca comuiñede. Naimacimo: “Maraiñede” llono. <sup>12</sup> Iena cue meidaila jira, naimaci jearede bainino finoca rafuena ñaiacaiñedicue. <sup>13</sup> Marecinona omoi jaca finuamona, jiaie comini naimaci finoca rafue eo maraiñenana raise uiñotimaci. <sup>14</sup> Cai ofia, naiena rocabitica:

Mai casi. Iniñeno.

Jai fiodaitino isoidomoi;

iadedi omoi comeciaina Cristo jai lligaiñeite.

<sup>15</sup> Ie jirari omoi marena illena, abina rairuicana omoi jai. Jusiñamuina inoñedino ebena jaicabidimaci. Naimaci isoi jaiñeno. <sup>16</sup> Diga maraiñede rafue birui comuicabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai. <sup>17</sup> Ie jira ebe isoi jaiñeno; iadedi Cristo jitaillacinona uiñocana omoi jai. <sup>18</sup> Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jiai iitomoi. <sup>19</sup> Danomo omoi ofia, nana omoi comeciainona diga isoide ruana iocire rorona. Omoi ruamona jiaie creyentiai comeciaina ocuiñota. Cai Namamo omoi ruamona, omoi fillamona, omoi taillamona, naimienona iobitaitomoi. <sup>20</sup> Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca feca.

*Cristomo jai cai duilla jira, cai comini diga marena iacadica*

<sup>21</sup> Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi coninina nagamiaiaina cano.

<sup>22-23</sup> Inirediñaiñuai, omoimo rafuena lloiacadicue. Cai Nama Cristomo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ino. Cristo nana creyentiai afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiai imaci jeacinomona jillotajamona, naimie anamo itimaci. <sup>24</sup> Cristo anamo nana creyentiai illa isoi, naiñaiñuai iniñiai uaina jaca inua. <sup>25</sup> Airedino, omoimo jiai lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui. <sup>26</sup> Nana creyentiai marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai inuamona, cai jeacinomona jai jillobidicai.

27 Fiodaite, nana cai creyentiai comeciai marena illena. Cai comeciai jeaninana jitaide. Cristo abido bille facaisemo, Jusiñamui jitailla isoi cai marenana jitaide. 28 Naimie abi naimie isiruilla isoi, naga ini ie aina isiruilla. Iaimaiaia daajena jira, ie aina isiruitimiedi ie abina jiai isiruite. 29 Jaca bu ie abina enoiñede; iadedi ie abina sedade. 30 Naimiemo nana cai creyentiai duilla jira, Cristo caina isiruillamona, caina sedade. Ie isoi nagamie ie aina isiruilla. 31 Bie jaie lloga uaimona iena uiñoticaia. Moisés micori Jusiñamui lluaana jaie cuela: “Ie aina ollena, ima ie moona, ie ei diga fañonocaite. Iemei dajena iitiaimaiaia”. 32 Naie llofuiaicnomona jiai rafuena fueoiticaia. Cristona ñaiticue. Creyentiaina ñaiticue. Naimiemo cai duillamona, daajena iticaia. 33 Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitaño inua.

## 6

1 Uruiaia, omoimo rafuena lloiacadicue. Cai Nama jitailla jira, omoi eiñiaia uaina ino. Omoi mootiaia uaina jiai ino. Jusiñamuimona marenana jira, iaimaiaia uaina ino. 2-3 Moisés micori Jusiñamui lloga uaina jaie cuela: “O moo uai ino. O ei uai ino. Marena o illena, raire o fiodaiñellena, iaimaiaia o isiruillamona, iaimaiaia uaina ino” cuela. Jusiñamui diga lletarafuena llote; iadedi bie nanoca rafuena llote. 4 Mootiaia, omoimo lloticue. Omoi uruiaiaina jamaia icineno; iadedi naimacina cai Namana naimacia uiñollena llofue. Naimacia inoiacainenia, abina naimacia uiñollena, naimacina isiruillamona, naimacina duere fino.

5 Patrón anamo itino, omoimo lloticue. Omoi patrones ocuica uaina ino. Omoi maijiana naimacia ocuica, naimacina iobitallena, jaciruioicaida raise maiji. Omoi comeciaimona naimacia jitailla rana maiji. Cristo iedena, naimacia ocuica uaina ino. 6 Omoimo naimacia eruaia, naimacina iobitallena, marena maiji; iadedi omoimo naimacia eruaiñenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciaia maiji raillamona, marena omoi maiji. 7 Patrón facaina maijiacino dani comecina facaño; iadedi iocire maiji, cai Nama facaina omoi maijidomoidena. 8 Biena uiñoticaia: Marena bu maijia, cai Nama Cristomona ibana ico feiñoite. Patrón anamo itino iena feiñoitimaci. Patrón anamo inedino iena jiai feiñoitimaci. 9 Patrones, omoimo lloticue. Omoi Nama Cristo monamona omoimo eruailla jira, Cristo monamona naimacimo jiai eruailla jira, omoi anamo itinona marena fino. Naimacina riire ocuiño. Naimacina jeare

finoñeno. Cristo nana naimie cominimo daje isoi comecina lloide. Ie jira omoi anamo itinona marena fino.

*Cristomo jai cai duilla jira, naimie cai comeciaina ocuiñotaite*

<sup>10</sup> Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuiñotacana omoi jai. <sup>11-12</sup> Ero, Taife caina ramo jifueoicaida faite. Caina anafetitaiacade. Naimie isoidino caina jiai anafetitaiacadimaci. Naimacidi aillosie. Naimaci anamo nana Jusiñamuina ñnoñedino jai itimaci. Jitiredinomo naimaci illanona, Jusiñamui dibeimo iñedimaci. Beno eniruemo itimaci. Jusiñamui illanomo duiñedimaci. Cominina ñaiñedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñuaina ñaiticue. Cai dibeimo iñedimaci. Naimacimona abina omoi rairui. <sup>13</sup> Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Hfogi icona jitadimaci. Lloebina llinotimaci. Ie isoide. <sup>14</sup> Cristomo omoi comeciai facajanona, uanaicinona jaca llono. Jusiñamui jitailla isoi, marecinona finocana omoi jai. <sup>15</sup> Cristo rafuemona omoi comeciai uri itatajamona, iena meiruiñeno llocana uiño. <sup>16</sup> Taifemona nana jearede rafuedi comuide. Naimiedi ramo faiacana jai jaide. Cristona omoi ñnuamona, Taife ramo faiacinona jamai. <sup>17</sup> Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona ñnoñeno. Taifena anafenollena, Jusiñamui Joreño Jusiñamui uaimona fueo. <sup>18</sup> Jusiñamui Joreño omoina canuamona, Jusiñamui diga ñaicabi. Taife ramo omoimo faia, iena omoi ñnoñellena, Jusiñamui omoina canoite. Iese abina omoi rairuia, Taifena anafetitaitomoi. Taife ramo faiacino naimaci ñnoñellena, nana jiaie creyentiai facaina jiai jicabi. <sup>19</sup> Cue facaina jiai omoi jii. Marefodo nana Cristo ie rafuena cue lluaana omoi jii. Cristo nana cominina jilloitaiacanana nia lloiacadicue. <sup>20</sup> Naie rafue cue llollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluaana mai omoi jii.

<sup>21-22</sup> Tíquico omoi dine oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai ocuiñoitomoi. <sup>23</sup> Cai Moo Jusiñamui, cai Nama Jesucristo diga, omoina uri itatajamona, Cristona jai omoi ñnuamona, coniniri uri icana jaillana jitaidicue. Iaimaiai omoina isiruillamona, iaimaiaina omoi ñnuamona, nana jiaie

creyentiaina isiruicana omoi jai. <sup>24</sup> Cai Nama Jesucristona  
omoi eo isiruilla jira, Jusiñamuidi omoi na duenaillasa. Mai.  
Pablodice.

## FILIPOMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Filipomo ite creyentiaí, Jesucristomo jai omoí duillamona, bie carta omoí dine oredicue. Pablodicue. Timoteo cue diga ite. Naimie cominina coco illamona, Jesucristo díbeimo maijicabidicoco. Omoímo coco uaina oredicoco. Omoí creyentiaí illaicomínimo coco uaina ua oredicoco. ¿Nigacino? ¿Nie isidomoi? Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoí jai. Iaimaiaí omoína uri jai itatate. Iena omoí uiñocana mai omoí jai.

### *Jusiñamuimo iobillacino fecade*

<sup>3</sup> Naga icaiño omoína cue comecia, Cristo rafuedo omoí jailla jira, Jusiñamuimo iobillacinona fecadicue. <sup>4</sup> Naga icaiño Jusiñamui diga cue ñaia, omoí facaina caimare jidicue, <sup>5</sup> Jesucristo rafuena cue lluana cuena omoí canua jira. Nano bie rafuena omoí cacajamona, cuena canodomoí. Cuenania canodomoí. <sup>6</sup> Jusiñamuidi omoí comeciaina jaiemarena itataja facaiseconi mare rafuena tainede. Omoí comeciaino mare rafue illicinona tainede. Cristo Jesús dane billiruimo Jusiñamui bie rafuena fuidoite. Iese fuidollemo ocuridicue. <sup>7</sup> Omoímo iese cue comecina cue facajia, omoína cue isiruilla jira, cuemona mare. Cárcelmo cue illamona, Jesucristo rafuena cue riduano, Jesucristo rafuedi uanaicino cue lluano, Jusiñamui cuena canocabide. Iemona naimie cana duenailana jai uiñoticaí. <sup>8</sup> Cuenamona Cristo Jesús isiruitajamona, nana omoína isiruiticue. Jusiñamuidi uanaicinona cue lluana uiñote. <sup>9</sup> Jiaie cominina eo isi-isiruicana omoí jaillena, Jusiñamuina raise omoí uiñollena, nie isoide rafue omoímo ia, abina raise omoí uiñollena, Jusiñamuimo jicabidicue. <sup>10</sup> Iese omoína jitaidicue. Mare rafuedo omoí jaiacanana jitaidicue. Jiaruido Cristo abido biite. Ie jira omoí comeciaí jeanillena jitaidicue, Jusiñamui jitailla isoi omoí comeciaí marena illena. <sup>11</sup> Jusiñamui jitailla isoi omoí illamona, mare rafuena jaca omoí finuana jitaidicue. Jesucristona omoí inuamona, naimie omoína iena finotarede. Iese omoí finocana omoí jaia, Jusiñamuina eo iobitaitomoi.

*Cárcelmo Pablo illamona, diga comini Jesucristo rafuena cacadimaci*

<sup>12</sup> Cue amatiaí, bie rafuena omoí uiñuana jitaidicue. Cárcelmo cue illamona, diga comini Jesucristo rafuena cacadimaci. <sup>13</sup> Cai illaima jofomo itino cacadimaci. Nana

bene itino jiai cacadimaci. Jesucristo rafuena cue llua jira, cárcelmo iticue. Iena jai uiñotimaci. <sup>14</sup> Cárcelmo iticue; ia jaciruiñeno Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

<sup>15</sup> Cuen a uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci. <sup>16</sup> Cuen naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci. <sup>17</sup> Cue afemo iacadino mare comeciainona llofueñedimaci. Iemona cuena duere finoacadimaci. <sup>18</sup> Iese itimaci; iadedi uradoillamona naimaci llofuaia, marecinona finuacanamona naimaci llofuaia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue. <sup>19</sup> Cueri Jusiñamuimo omoi jiano, Jesucristo Joreño cuena canuano, nana cuemo ite rafuemona jilloiticue. Iena cue uiñuamona, nia iobiticue. Jesucristo Joreño ie Moo diga daje. <sup>20</sup> Cue finolle rafuemona cue meiruiñellena eo jitaidicue. Jiaie cue finocabilla isoi, Cristona marefodo birui iobitaia-cadicue. Cue nia fioldaiñenia, naimiēna iobitaia-cadicue. Cue fioldaillemona naimiēna jiai iobitaia-cadicue. Iemona jiaie creyentiaidi Jusiñamuimo iobillacinona fecaitimaci. <sup>21</sup> Nia cue fioldaiñenia, Cristo rafuena nia lloiticue. Mare; iadedi cue fioldaiia, naimie dine cue illena jiai eo mare. <sup>22</sup> Nia cue fioldaiñenia, diga cominimo Cristo rafuena nia lloiticue. Ie jira nie isoide cue illana cue comeci niese rainide. <sup>23</sup> Nia raise uiñofnedicue. Jiaicaiño fioldaiacaiñedicue. Jiaicaiño fioldaiacadicue. Cue comeci Cristo dine jaiacade. Nainomo cue illena cuemona eo mare; <sup>24</sup> iadedi omoina cue canollena, nia fioldaiacaiñedicue. Cue nia fioldaiñenia, omoina nia canoacadicue. <sup>25</sup> Cue comecina jai facajano, raite: “Nia fioldaiñeiticue. Omoi diga nia cue illana uiñoticue”. Cristona omoi innotacana omoi jaillana jitaidicue. Omoi innuamona, caimare omoi illana jiai jitaidicue. <sup>26</sup> Iemei omoi dine dane cue illa jira, cueri Cristomo iobillacinona eo fecaitomoi.

<sup>27</sup> Cue fioldaiia, cue fioldaiñenia, Cristo ie mare rafuedo omoi jai. Omoina cue cioia, omoina cue cioiñenia, mare rafuena omoi finuana fidiacadicue. Cristo rafuena innocana omoi jaillana, omoi comeciāi daje isoi lloillana, Cristo rafuena omoi riiduana fidiacadicue. <sup>28</sup> Omoi dibeimo iñedinona omoi jaciruiñenana fidiacadicue. Iese omoi ia, Jusiñamuidi omoi dibeimo iñedino faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate. <sup>29</sup> Jusiñamui Cristona omoi inollena omoina fetode; iadedi Cristori omoi duere sefuillena omoina jiai fetode. <sup>30</sup> Omoi nairaimo cue nano illa facaise Cristona



ñnoñedīnomona duere sefuidicue. Iena ciōdomoi. Cárcelmo birui cue illamona, naimacimona iese nia birui duere sefuidicue. Iena birui fidōdomoi. Naimacimona cue isoi birui jiai duere sefuidomoi.

## 2

### *Jiaie creyentiai diga raise omoi illacino*

<sup>1</sup> Jiaie creyentiai diga omoi marena illena, dajerie rafuena lloiacadicue. Cristomo omoi duilla jira, coninina omoi comeciai ocuiñotajamona, Cristo omoi na isiruillana omoi uiñuamona, Jusiñamui Joreño nana omoi na nabaitajamona, coninina omoi comeciai eo duenaillacino illamona, <sup>2</sup> cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata. <sup>3</sup> Jaca buena finoñeno, jiaimie afemo jamai omoi illena. Abina iedumona buena finoñeno. Abina iedoñeno jiaimacimo comeciaina faca: “Naimaci cue baifemo faite”. <sup>4</sup> Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca. <sup>5</sup> Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. <sup>6</sup> Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede; <sup>7</sup> iadedi iena fañonocaida, ie Moo ocuica rafuena finollena, imana naimie jaide. <sup>8</sup> Jamai bue isoidimiena jaide; iadedi ie Moo uaina ñnote. Ie Moo jitailla jira, fiodaite. Marañede rafue finodimie isoi, cruzmo fiodaite. <sup>9</sup> Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade. <sup>10</sup> Jesúsna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisai naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiai fecaitimaci. <sup>11</sup> Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

### *Marañedino comeciaina lligaiñotomoi*

<sup>12</sup> Cue isiruiga amatiaidomoi. Ie Moona Jesucristo ñnua jira, cue llua nia ñnocana omoi jai. Jiaie omoi diga cue ia, Cristo rafuena raise ñnotomoi. Birui omoi diga iñedicue; iadedi Jusiñamuina omoi ñnua jira, naimie jitailla rafuena jaciruiocaida, finocana omoi jai. <sup>13</sup> Ie jitailla rafuena omoi finollena, Jusiñamui omoi comeciaina birui marena itatate. Naimie omoi na iena finotaiacade. Naimie mare jitaillacinomona, omoi na iena finotaite. <sup>14</sup> Nana omoi

finolle rafuemo abi jafueoicaiñeno fino. Uai uaitañeno fino, <sup>15</sup> jiaie comini omoiri ñai raillanona, Jusiñamui uruiaina omoi illa jira, omoi comeciai jeanidemona marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uiñotallena. <sup>16</sup> Jesucristo rafuena llocana uitomoi. Iena naimaci ñnuamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: “Tainona jaie lloticue” cue raillano, Jesucristo rafuena llocana nia omoi jai. <sup>17</sup> Jusiñamuina omoi ñnua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataiticue. <sup>18</sup> Ie muidona caimare iitomoi. Cue diga caimataitomoi.

### *Pablo Timoteona orede*

<sup>19</sup> Cai Nama Jesús jitaia, omoi dine Timoteona raire oretaiacadicue. Cue dine abido naimie bia, omoi rafuena cue fidiano jiai iobiticue. <sup>20</sup> Cue dine jiaino naimie isoi iñede. Dama naimie omoi ite rafuemo comecina facade. <sup>21</sup> Jiaino dani naimacimo ite rafuemo comeciaina facadimaci. Jesucristo rafuemo comeciaina facañedimaci. <sup>22</sup> Timoteodi mareuidimiena uiñotomoi. Cue jito isoide diga, Cristo rafuena lloticoco. <sup>23</sup> Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadicue. <sup>24</sup> Cárcelmona cue jino jaillena cai Nama jitaia, omoi dine jiai raire jaiacadicue.

### *Pablo Epafroditona abido orede*

<sup>25</sup> Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimiena oredomoi, cuena canollena. Naimiena omoi dine abido oretaiacadicue, <sup>26</sup> omoi dine naimie illemo naimie comecina facaja jira. Naimie navui duillana omoi fidia jira, naimie uri iñede. <sup>27</sup> Navui niadedi fiodaianamona jillode, Jusiñamui naimiena duenaila jira. Naimie fiodaillamona, eo cue duere sefuiñellena, Jusiñamui cuena jiai duenaita. <sup>28</sup> Ie jira Epafroditona eo raire oretaiacadicue, naimiena omoi cianona omoi iobillena. Iemei jiai uri iiticue. <sup>29</sup> Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita. <sup>30</sup> Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

## 3

*Moisés micori llogacinuaido jaidinomona abina rairui*

<sup>1</sup> Cue amatiai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite. <sup>2</sup> Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiana detatimaci; iadedi naimaci comeciai nia raise finoñedimaci. <sup>3</sup> Cai abiana detatajamona, cai comeciai raise finobiñede. Cai comeciai raise finuamona, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiana detatañedicai. <sup>4</sup> Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoñedicue. <sup>5</sup> Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judíuai imacina jira, cue uruenamona judíuai uaido ñaiticue. Fariseo cue imiena jira, Moisés micori llogacinuaido fainonocaiñeno iedo eo jaidicue. <sup>6</sup> Iena eo cue jitailla jira, Cristona ñnotinona duere finodicue. Nana Moisés micori llogacinuaido eo raise jaidicue. Iena raise finodicue. <sup>7</sup> Iese jaie iticue. Cue comeci iena: “Mare” raite; iadedi Cristona jai cue ñnua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue. <sup>8</sup> Dane lloticue: Cue Nama Cristo Jesúna cue uiñoiacana jira, jaie rafue cuemona ieñedicino. Naimiena cue uiñuacinodi nana jaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaidicue. Iena sofeticue, Cristo dibeimo raise cue illena, <sup>9</sup> naimiemo raise cue duillena. Moisés micori llogacinuaido cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate. <sup>10</sup> Cristona raise uiñoiacadicue. Naimie fodaite; ia iemona jillode. Naiemona cue comeci marena illena, naimiena jillotate uaina uiñoiacadicue. Naimie rafuena cue lluamona, naimie isoi duere sefuiticue. Iemona ñbai fodaiteicue. <sup>11</sup> Cue fodaile mei, fodaillamona naimie isoi cue jilloillemo ocuridicue. Ie jira naimiena uiñocana jaiacadicue.

### *Pablo jitaillacino*

<sup>12</sup> Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote. <sup>13</sup> Cue amatiai, iena nia iñedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. <sup>14</sup> Cue risaillinomo iocire jaidicue, ibana cue

feñollena. Ieri Cristo Jesúsdo Jusiñamui cuena uaidote, monamo cue illena. <sup>15</sup> Cai mona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicnona raise uiñotaite; <sup>16</sup> iadedi caimo jai ite uiñuacnodo mai cai jailli.

*Pablo illa isoi cai illa*

<sup>17</sup> Cue amatiai, Cristona cue ñnua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. <sup>18</sup> Jaie omoimo lluidicue. Cue sunaillamona dane lloiticue. Ailluena comini Cristo fi-daila rafuena birui jitaiñedimaci. <sup>19</sup> Ja muidomo faifitimaci. Naimaci Jusiñamuidi imaci guille, dani guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. <sup>20</sup> Monamo ite Jusiñamuimo cai jainaiailla jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. <sup>21</sup> Naimie bia, cai fi-daille abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

**4**

<sup>1</sup> Ie jira Cristo rafuena ñnocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue llumona Cristona jaie ñnotomoi. Ie rafuedo omoi jailla jira, iobidicue. <sup>2</sup> Evodia raillañaiñomo rafuena lloiacadicue. Sintique raillañaiñomo jiai lloiacadicue. Cai Namamo iañuui duilla jira, iañuui comeci daje isoi lloillana jitaidicue. Coniño diga icirillana jitaiñedicue. <sup>3</sup> Cue mare nabai, omo jicanoticue, iañuaina canollena, coniño diga iañuui dane marena ñaillena. Cristo rafuena cue diga llotiaiañuui. Clemente diga llotiaiañuui. Cue diga llofueuidino diga llotiaiañuui. Monamo ite rabenicomo nana naimaci mameciai jai cueda. Jusiñamui diga monamo jaca iite comini mameciai diese cueda.

*Iobillacino, uri illacino diga*

<sup>4</sup> Cai Namamo omoi duilla jira, jaca iobi. Dane lloiticue: Iobi. <sup>5</sup> Omoi rininana nana comini uiñuana jitaidicue. Cai Nama dane abido billirui iairei ite. <sup>6</sup> Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaa, naimiemo iobillacinona jiai feca. <sup>7</sup> Iemei Jusiñamui omoi comeciaina uri itataite. Omoi comeciai facajacino baifemo omoina uri itataite. Cristo Jesúsna omoi ñnuano, omoi comeciaina eenoite. <sup>8</sup> Cue amatiai, ie muidomo daje rafuena

nia lloiticue. Uanaicinomo comeciaina faca. Inogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca. <sup>9</sup> Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comeciaina uri itatajanona, Jusiñamui omoi diga iite.

*Filipomo ite comini Pablona eo canodimaci*

<sup>10</sup> Cai Namari iobidicue, diga irui illamona dane cuena omoi comecia jira. <sup>11</sup> Cuemo comeciaina facadomoi; iadedi bu jaca binide, ucubena cue dine atillena. Bumo cue jitailacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue. <sup>12</sup> Duere cue illana uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. <sup>13</sup> Nie isoide rafue cuemo ia, Cristo cue comecina ocuiñotaja jira, naga rafuena finocana jaiticue. <sup>14</sup> Cue duere sefuillamo cuena omoi duenaillamona, cuena omoi canua jira, cuemona mare. <sup>15</sup> Omoimo Cristo rafuena nano cue lluamona, cuena canodomoi. Macedoniamona cue jailla mei, jiaie creyentiai cuena canoñedimaci. Dani omoi cuena canodomoi. Iena uiñotomoi. <sup>16</sup> Tesalónicamo nia cue ia, diga icaiño ucube cuemo oredomoi; <sup>17</sup> iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue. <sup>18</sup> Nana cue jitaille rana jai feiñoticue. Ailluena cuemo ite. Epafroditomona cuemo omoi oretaga rana feiñoticue. Jusiñamuimo fecadomoi isoide. Jusiñamui dibeimo cue maijia jira, mare rana finodomoi. Ie jira Jusiñamui iena gaide, caimare soride rana cai gaia isoi. Naimie iena jiai feiñote. <sup>19</sup> Naimiemo ailluena ite ramona cue Jusiñamui nana omoi jitaille rana fecaite, Cristo Jesús mo cai duilla jira. <sup>20</sup> Cai Moo Jusiñamuimo iobillacino jaca cai fecacabillasa. Iena jitaidicue.

*Fuiduacino*

<sup>21</sup> Cristo Jesús mamecido cue facaina nana creyentiaimo cue uaina llono. Cue diga amatiai imaci uaina jiai oredimaci. <sup>22</sup> Nana benomo ite creyentiai imaci uaina oredimaci. Cai illaima César jofomo maijidino imaci uaina ua oredimaci. <sup>23</sup> Cai Nama Jesucristo omoi comeciaina jaca caimare itatajana jitaidicue. Mai. Pablodicue.

## COLOSAMO ITE CRISTONA HNOTINOMO PABLO ORETAGA RABE

### *Colosamo ite creyentiaimo Pablo carta orede*

1-2 Colosas railla nairaimo ite creyentiai, Pablodice. ¿Nie isoidomoi? Bie carta omoi dine oredice. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue llollena, Jesucristo oretagamiedice. Naimiemo jai duidomoi. Naimiena raise inocana jaidomoi.

### *Naimaci facaina Pablo jide*

3 Cai Nama Jesucristo Moodi Jusiñamui. Omoi facaina Jusiñamuimo coco jia, naimiemo iobillacinona jaca fecadicoco. 4 Jesucristona nia omoi inuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco. 5 Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino. 6 Diga illanomo, diga comini iena jiai jai cacadimaci. Iena inuamona Cristo dibeimo naimaci comeciai jai meidoga. Iena inuamona marecinodo jai jaidimaci. Ie isoidomoi. Jusiñamui omoina duenaillana jai uinotomoi. Uanaicinona omoi raise uinuamona, iedo jaidomoi. Ie marecinona finocana jaidomoi. 7 Epafra lluamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana maijide. Omoi motomo cai inena jira, Cristo dibeimo cai facaina naimie raise maijuide. 8 Naimiemono omoimo ite rafuena fididicoco. Jusiñamui Joreño omoina canuamona, jiaie creyentiaina omoi isiruillana fididicoco.

9 Ie jirari omoi facaina jaca jidicoco. Omoi rafuena coco fidiama, Jusiñamuimo omoi finolle rafuena omoi eo raise uinollena jidicoco. Nana naimiemo ite abi uinuacinona omoi eo raise uinuana jitaidicoco. 10 Cai Nama: "Mare" omoina raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uinocana jaillana jitaidicoco. 11 Nie isoide ramo omoi jiria, nana naimie siño ebirede uaido naimiedi omoi comeciaina ocuifotajana jitaidicoco. Iocire omoi illana jitaidicoco. 12 Caina ie cominina naimie jai itataja jira, nana ie comini diga naimie illanomo ico jaca iiticai. Ie muidona naimiemo iobillacinona omoi fecacabillasa. 13 Jeacino anamo navui cai illa jira, jitiredinomo iticai isoidicai. Jeacino anamona caina Jusiñamui jai jillotajamona,

caina ie isiruiga Jito cominina itatate. <sup>14</sup> Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai feitate. Naiena ico abido llinofite.

*Cristo muidona Jusiñamui ricailifue anamo iñedicai*

<sup>15</sup> Jusiñamuina cionidicai; iadedi Cristomona naimiena uiñoticaí. Jaca bue nia iñenia, Crsito nano jaca ite. <sup>16</sup> Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioiñena rana finode. Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. <sup>17</sup> Nano dofoconi Cristo jaca ite. Naimie uaido naga ra marena icana jaide. <sup>18</sup> Naimiedi nana creyentiaí imaci illaíma. Fiodaitinomona naimie nano jillodimiena jira, cai fodaia, ico jiaí jilloiticaí. Naimiedi naga ra baifemo faite. Naimiedi nana comini baifemo jiaí faite. <sup>19</sup> Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. <sup>20</sup> Cristo finoca rafue muidona, Jusiñamuidi nana cominina naimie díbeimo itataiacade. Ua nana naimie díbeimo iñedinona naimie díbeimo itataiacade. Cruzmo Cristo fodailla jira, Cristo diaillamona, Cristona cai ñnoia, Jusiñamui ricailifue anamo jai iñedicai. <sup>21</sup> Jusiñamui díbeimo navui iñedomoi. Naimiena nabaillana jitaíñedomoi. Omoi comeciáimona naimiena enoidomoi. Maraiñedicinona finouidomoi; <sup>22</sup> iadedi cruzmo naimie abi illanona, nainomo Cristo fodailla jira, naimiedi naimie díbeimo omoi na itatate. Jusiñamuimona mareuidinona omoi illena, omoi mo nicino iñellena, Jusiñamui dine ico omoi ia, naimie díbeimo omoi na jai itatate. <sup>23</sup> Naimiena raise ñnocana omoi jaia, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo dine omoi illemo ocuridomoi. Díga comini naie rafuena jai cacadimaci. Naie rafuena llocana jaidicue.

*Pablo Cristo rafuena llofuecabite*

<sup>24</sup> Omoi mo Cristo rafue cue llua muidona, duere sefuidicue; iadedi iocire nia iticue. Omoi creyentiaí facaina Cristo isoi duere sefuidicue. <sup>25</sup> Jusiñamui cuena oretaja jira, naimie rafuena ailluena cominimo eo raise cue llollena, omoi creyentiaí facaina llofueticue. <sup>26</sup> Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci. <sup>27</sup> Jusiñamui naimacina iena uiñotade. Naie rafuedi eo ebirede. Judíuaiñedinodomoi; iadedi bie rafue omoi mo jai duide. Omoi comeciáimo Cristo illana jai uiñoticaí. Ie jira naimie ebirede illanomo ico omoi jaca illemo ocuridomoi. <sup>28</sup> Cristo rafuena llofueticaí. Nana cominimo Cristo díbeimo naimaci iacanana lloticaí. Cristona naimaci eo raise ñnollena, Cristo isoi naimaci marebicaillena, naimaci

abi uiñuana lloticaí. <sup>29</sup> Ie jira bie rafuena llofuecabiticue. Nana Cristo cuemo iga uaido eo llofuecabiticue.

## 2

<sup>1</sup> Omoimo eo comecina facadicue. Iena omoi uiñuana jitaídícue. Laodicea railla nairaimo jiaí eo comecina facadicue. Diga comini cuena nia cioñedimaci. Naimacimo jiaí eo comecina facadicue. <sup>2</sup> Omoi comeciaina ocuiñotallena, iese omoimo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoimo comecina facadicue. Naie rafuedi Cristona llote. <sup>3</sup> Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide. <sup>4</sup> Naimaci ñaiamona omoína bu jifuei raillanona, buena omoimo llotícue. <sup>5</sup> Omoi dine iñedicue; iadedi cue comecidi omoi dine ite. Omoimo cue comecina facadicue. Danomo omoi marena illa jira, Cristona omoi raise ñnocana omoi jailla jira, iobidícue. <sup>6</sup> Cai Nama Jesucristona omoi ñnuamona, naimie lloga rafue finocana omoi jai. <sup>7</sup> Naimie dibeimo raise icana omoi jai. Naimiena ñnocana omoi jai. Omoi lloraini omoína llofuia isoi, naimiena ñnocana omoi jai. Jusiñamuimo iobillacino eo fecacana omoi jai.

### *Cristona cai ñnuano, cai illa rafue*

<sup>8</sup> Jiaie comini naimaci jamai comeciái facajacinomona omoi jifuei raillanona, abina omoi rairui. Uanañedicinomo comeciaina jamai facadimaci. Naimaci einamacimona iena otimaci. Naie rafuedo omoi jaillana jitaídímaci. Cristo rafuedo omoi jaillana jitañedimaci.

<sup>9</sup> Ero, Cristomo nana Jusiñamui uai ite. Eniruemo billanona, Cristo ñimana jaide. Naimiemona Jusiñamuina uiñoticaí. <sup>10</sup> Cristomo omoi jainaiáilla jira, naimiemona nana omoi jitaillacinona oitomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite. <sup>11</sup> Cristomo omoi duilla jira, omoi comeciaino ite jeacino anamona omoína naimie jillotate. Omoi abiaína detatajamona naimie iena finoñede; iadedi omoi comeciaino ite jearede iuai meiduumona jillobidomoi. Naimie iena finode. <sup>12</sup> Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai iñedicaí. Cristo fodaite; iadedi fodaillamona Jusiñamui naimiena jillotate. Jusiñamuina omoi ñnua jira, jeacino anamo jai iñedomoi. Naie anamona Jusiñamui omoína jiaí jillotate. <sup>13</sup> Jeacino anamo jaie omoi illamona, naimiemona fodaitino isoidomoi. Omoi marañede jitaillacino anamo jaie itomoi. Cristomo omoi jai duillamona, omoi jeacinona oni dotajamona, naie anamona Jusiñamui omoína jai jillotate. Cristo



dibeimo omoına itatate. <sup>14</sup> Moisés micori jaie llogacinona jaie cai ñnoñena jira, Jusiñamui riicaillifue anamo iticai; iadedi cruzmo Cristo fiodailla jira, naie llogacino anamo jai iñedicai. Ie muidona Jusiñamui caimo ibana oñeite. <sup>15</sup> Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Duşisiñodi anafefide. Naimie siño rafuena finuamona, Cristo uai naimaci uai baifemo uaillana uiñoticaí.

### *Cristomo ite rafuedo omoi jai*

<sup>16</sup> Cristo rafuedo omoi jailla jira, omoi guiga rana bu fimaia, naimaci ñaiamo cacarefiñeno. Judíuai einamací rafue dine omoi jaiñenia: “Omoi mareiñedomoi” bu raia, naimaci ñaiamo cacarefiñeno. <sup>17</sup> Naie isoide rafuedo jaie jaidicai; iadedi iedo birui jaiñedicai. Cristo rafuedo birui jaidicai. <sup>18</sup> Dajerie llofueraini jiaie rafuedo jaidimaci. “Abina iedoñeno” raitimaci. “Jusiñamui jaienisaina seda” raitimaci. Nicaíillacinodo jaidimaci. Naimaci isoi omoi jaiñenia: “Maraiñedomoi” omoına naimaci raia, naimaci ñaiamo cacarefiñeno. Naimaci illa isoi iñeno. Naimaci llucacino anamo iñeno. Naimaci llucacinodo omoi jaia, omoi jitaillanomo Cristo dine riñeitomoi. Naimaci comeciaí jearena jira, jamai buena uiñoñenano abina iedotimaci. <sup>19</sup> Cristo rafuedo jaiñedimaci. Cristomo cai duilla jira, naimie caina ocuicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie dibeimo cai raise illena, naimiena cai raise ñnollena, naimiemona fueoticaí. Cristomo cai duilla jira, dani coninina nabaidicai. <sup>20</sup> Cristo fiodaillamona, jiaie rafue anamo jai iñedicai. Naimiena ñnoñedino rafue anamo jai iñedicai; iadedi naie rafuedo nia jaidomoi. Damierie llofuerainidi diga rana fimaidimaci. <sup>21</sup> “Biena jetañeno. Biena guiñeno” raitimaci. <sup>22</sup> Ero, naie fimaica guille ra ite, cai guillena. Iena cai guilla mei, jai buena iñede. Naimaci fimaiduacino cominimona otimaci. Jusiñamuimona oñedimaci. <sup>23</sup> Naie fimaiduacinodi eo abi uiñuacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicai. Cai abina isiruiñedicai” raitimaci; iadedi naie isoide llucacinodo bu jaia, naimie comecimo ite jeacinomona jilloñede. Naimiedi jeacino finocana nia jaide.

## 3

<sup>1</sup> Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite. <sup>2</sup> Cristomo ite rafuemo omoi comeciaina facacana jai. Bene ite maraiñede rafuemo omoi comeciaina facañeno. <sup>3</sup> Bene ite maraiñede rafue anamo jai iñedomoi; iadedi Jusiñamui ecimo naimie jai illa

jira, Cristomo omoi duilla jira, naimie finoacaga rafuena omoi finollena, omoïna naimie canoite. <sup>4</sup> Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

*Omoi comeciaino ite jeacinona fainonocai*

<sup>5</sup> Cristomo omoi jai duilla jira, omoi comeciaino ite jeacinona fainonocai. Omoi aiñede riño diga iñeno. Omoi iniñede iima diga iñeno. Jeare finoca rafuemo omoi comeciaina facañeno. Omoi maraiñede jitaillacinodo omoi jaiñeno. Rana nicidoñeno. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi. <sup>6</sup> Naie isoidicinona comini finua jira, naimiena naimaci ñnoñena jira, Jusiñamuidi naimacina duere finoite. <sup>7</sup> Naie isoide rafuedo jaie jaidomoi. <sup>8</sup> Nana bie isoide rafuedo jaiñeno. Icirriñeno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno. <sup>9</sup> Tainona lloñeno. Omoi comeciaino ite jeacino anamo jaie itomoi. Naicino anamo omoi jai iñena jira, naicinodo jaiñeno; <sup>10</sup> iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate. <sup>11</sup> Cristo rafuedo birui omoi jailla jira, Jusiñamuimona nana creyentiaidomoi; daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detatañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo iñedinodomoi. Cominimona iese itomoi; iadedi Jusiñamuimona daje isoidomoi. Cristo ñibeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite. <sup>12</sup> Jusiñamui omoïna fetode. Omoi comeciaina maretate. Omoïna isiruite. Ie jira jiaie cominina duenai. Jiaie cominina cano. Abi iedoñeno. Abi biriñeno. Icirriñeno. <sup>13</sup> Dani omoi ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita. <sup>14</sup> Coninina omoi isiruicana jai. Isiruillacino nana jiaie lluacino baifemo faite. Coninina omoi isiruia, danomo marena iitomoi. <sup>15</sup> Jusiñamui omoïna fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciaino uri illamona, Jusiñamuimo iobillacinona feca. <sup>16</sup> Cristo rafuena

omoi eo ñnuana jitaídícué. Naie rafuena coninimo omoi llofue. Iena raise uñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciáimona iocire rono. David micorí cueda salmos omoi roia, Jusiñamui Joreño omoína birui cuetataga ruana omoi roia, omoi comeciáimona iocire rono. <sup>17</sup> Buena omoi lloia, buena omoi maijiia, cai Namamo omoi comeciáina facajano, iena fino. Cai Nama muidona, cai Moo Jusiñamuimo iobillacinona jiaí feca.

### *Coniniri creyentiaí illa rafue*

<sup>18</sup> Inirediñaiñuái, omoimo rafuena lloiacadícué. Cai Namamo omoi jainaiáilla jira, naimie jitailla jira, omoi iniñiaí anamo raise omoi i. Naimaci uaina raise ñno.

<sup>19</sup> Aireдино, omoimo jiaí lloiacadícué. Omoi ainiaína isirui. Naiñaiñuái diga iciricabiñeno. Naiñaiñuáimo riire lloñeno.

<sup>20</sup> Uruiaí, omoimo rafuena lloiacadícué. Nana omoi mootiaí uaina ñno. Nana omoi eiñiaí uaina ñno. Iena omoi ñnoia, cai Nama eo iobite.

<sup>21</sup> Mootiaí, omoi uruiaína jamai iciñeno. Naimacina omoi jamai icia, comecina facaitimaci: “¿Niese cai mootiaí uaina raise ñnoíticaí? Iena eo sefuiruiticaí”. Ie muidona omoi uaina raise ñnoñeitimaci.

<sup>22</sup> Patrones anamo itino, nana omoi patrones ocuica uaina ñno. Omoimo naimaci eruaíñenia, omoi patrones facaina raise maiji. Cai Namana omoi ñnua jira, cai Namana raise omoi iobitaiacana jira, omoi patrones facaina raise maiji. <sup>23</sup> Buena omoi maijiia, omoi comeciáimona maiji. Dani comini facaina maijiñedomoi; iadedi cai Nama facaina maijidomoi. Ie jira raise maiji. <sup>24</sup> Naimie jai llua isoí, cai Namamona ibana íco feiñoitomoi. Cai Nama Cristo facaina omoi maijidomoi; <sup>25</sup> iadedi Jusiñamui raise maijiñedinona duere finoite. Jusiñamuimona naga maijidimie ie maijia diese feiñoite.

## 4

<sup>1</sup> Patrones, omoimo lloítícué. Naimaci omoi anamo illa jira, omoi diga maijidinona raise iba. Naimacina jífueñeno. Omoi Nama monamo illamona, omoimo eruaíde. Naimie anamo omoi illa jira, omoi anamo itinona marena raise fino.

<sup>2</sup> Jusiñamui diga ñaicana jai; iadedi omoi comeciáina facajanona omoi jii. Naimiemo iobillacinona feca. <sup>3</sup> Cristo rafuena llocana cue jailla jira, cárcelmo birui itícué; iadedi naie rafue nia lloiacadícué. Jusiñamui nana comini Cristo díbeimo jai jitaillana lloiacadícué. Ie jira cai facaina omoi jii. Jusiñamuidi comini comeciáina jetajana omoi jii. Naimaci comeciáina Jusiñamui jetajamona, naimacimo naie rafuena lloiacadícué.

<sup>4</sup> Naimaci iena raise cacaillena, naie rafuena raise lloiacadicue. <sup>5</sup> Creyentiañedino motomo omoi ia, marena omoi i. Naimacimo Cristo rafuena llono. <sup>6</sup> Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

*Damierie ie uaina orede*

<sup>7</sup> Tíquicodi nana cuemo ite rafuena omoimo lloite. Naimiena isiruiticai. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. <sup>8</sup> Cai illana omoi uiñollena, omoi dine naimiena oredicue. Omoi comeciaina ocuiñotaite. <sup>9</sup> Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticai. Naimiedi omoi comini imie. Nana bene jai suide rafuena omoimo lloitiaimaia. <sup>10</sup> Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño. <sup>11</sup> Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie díbeimo cominina jai jitaide” naimaci llumona, cue comecina ocuiñotadimaci. <sup>12</sup> Epafras ie uaina jiai orede. Naimie omoi comini imie. Jesucristo díbeimo naimie maijide. Jusiñamui diga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jicabide. <sup>13</sup> Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. <sup>14</sup> Cai médico Lucas ie uaina jiai orede. Naimiena isiruiticai. Demas ie uaina jiai orede. <sup>15</sup> Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. <sup>16</sup> Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoi jiai faca. <sup>17</sup> Arquipomo llono: “Cai Nama fetocamedio. Naimie rafuena llocana raise o jai” llono. <sup>18</sup> Cue uaina omoimo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoi jii. Jusiñamui omoina duenaioillasa. Mai. Cue cueba rafue jai fuite. Pablodicue.

# TESALÓNICAMO ITE CRISTONA #NOT#NOMO PABLO NANO ORETAGA RABE

## *Uaiduacino*

<sup>1</sup> Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenailana uiñocana omoi jaillana jitaidicai. Iaimaiai omoi uri itatajana omoi uiñocana jaillana jiai jitaidicai.

## *Tesalónicamo ite creyentiai Jusiñamui uaina raise #notimaci*

<sup>2</sup> Jusiñamuimo cai jiiia, naimiemo omoi facaina iobilana jaca fecacabidicai. Omoi facaina jicabidicai. <sup>3</sup> Cai Moo Jusiñamuimo cai jiiia, omoina comeciticaí. Jusiñamuina #notomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuiridomoi. Iese omoina comeciticaí. <sup>4</sup> Omoina naimie isiruillamona, Jusiñamui omoina fetuana uiñoticaí. <sup>5</sup> Jamai cai uaido Cristo rafuena omoina llofueñedicai; ia siño uaido iena llofueticaí. Jusiñamui Joreño uaido iena llofueticaí. Naie rafuena #nuanona llofueticaí. Omoi diga cai jaie ia, nie isoi cai illana raise uiñotomoi. <sup>6</sup> Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusiñamui Joreño omoina iocire itatajamona, Jusiñamui uaina iocire feiñotomoi. <sup>7</sup> Ie jira nana Macedoniammo ite creyentiai omoimona fueotimaci. Nana Acayamo ite creyentiai omoimona jiai fueotimaci. <sup>8</sup> Omoimona Macedoniammo ite comini cai Nama uaina fididimaci. Acayamo ite comini jiai fididimaci. Ailluena nairaiai Jusiñamuina omoi #nuana jai fididimaci. Ie jira naimacimo Cristo rafuena omoi #nuana jai lloñedicai. <sup>9-10</sup> Omoi dine nano cai ria, caimare caina feiñotomoi. Cristo rafuena omoi cacajamona, jiraraina sedajana fañonocaida, cajede nanoca Jusiñamuina jai sedadomoi. Jusiñamui Jito abido billemo birui jiai ocuiridomoi. Iese jiaie creyentiai omoina birui ñaicabitimaci. Cristo fiodaillamona Jusiñamui naimiena jaie jillotate. Naimiena cai #nuamona, Cristo Jusiñamui riicallifuemona caina jai jillobitade.

## 2

*Pablo Tesalónicamo llofuia rafue*

1 Cue nabaiñiai, omoi diga jaie cai ia, tainomo jaiñedicai.  
 2 Omoi dine cai nia riñenia, Filipomo iticai. Nainomo itinodi caina jeare finodimaci. Iena jai uiñotomoi. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoina llofueticai. Ailluena comini iena jitaiñedimaci; ia iena llofueticai. 3 Unaiñedicinona jaca llofueñedicai. Jearedicinona jaca llofueñedicai. Jifuerillacinona jaca llofueñedicai; 4 iadedi Jusiñamui uiñoganodicai. Ie jira caina naimie oretajamona, ie rafuena llofueticai. Cominina iobitallena llofueñedicai; iadedi Jusiñamuina iobitallena llofueticai, Jusiñamui cai comecina raise uiñua jira. 5 Cai llofuicino diga omoina bifueñedicai. Omoimona ucube ollena, iese llofueñedicai. 6 Cominimona iobillacinona jitaiñedicai. Omoimona jitaiñedicai. Jainomona jiai jitaiñedicai; iadedi Cristo oretaganona cai illa jira, cai jitaia, omoimona iobillacinona jicaredicai. 7 Uruiaina raise sedaraiño isoi, fe-cuise omoina llofueticai. 8 Jusiñamui rafuena omoi raise uiñollena, omoina cai eo isiruillamona, niadedi omoi facaina fioidiacadicai. 9 Omoi motomo cai ucube ollena, jiaie rana maijiuidicai. Omoina cai duere finoñellena, nagarui iese maijiuidicai. Iena raise uiñotomoi. Iese Jusiñamui rafuena omoina llofueticai.

10 Omoi motomo cai illana raise uiñotomoi. Jusiñamui jitailla isoi, nainomo iticai. Maraiñede rafuena finoñedicai. Mare rafuedo jaca jaidicai. Iena uiñotomoi. Jusiñamui iena jiai uiñote. 11 Omoi uruiyai omoi llofuia isoi, omoina llofueticai. Omoimo diga icaiño Jusiñamui rafuena llofueticai. 12 Jusiñamui jitaillacinona omoi finollena, iena llofueuidicai. Monamo ie cominina sedajanomo omoi jaca illena, naimie omoina jai fetode. Nainomo ie siño uai anamo jaca iitomoi.

13 Jusiñamuimo cai jiaia, omoi facaina iobillacinona fecacabidicai. Jusiñamui rafuena caimona omoi jaie caca-jamona, iena raise feiñotomoi. Cominimona cai oga rafue isoi feiñoñedomoi; ia Jusiñamuimona cai oga rafuena feiñotomoi. Cai lloga rafue omoi comeciai iuai meidocana jaide. Ie jira Jusiñamuimo iobillacinona fecacabidicai. 14 Judeamo ite creyentiai isoi duere sefuidomoi. Omoi cominimona duere sefuidomoi. Naimaci judíuai cominimona duere sefuidimaci. 15 Judíuai comini cai Nama Jesúsna jaie meinetimaci. Jusiñamui facaina lloraini micoriaina jiai jaie meinetimaci. Caina jiai birui duere finodimaci. Jusiñamuina iobitañedimaci. Jusiñamui rafue dibeimo jiai iñedimaci. 16 Judíuaiñedinomo Cristo rafuena cai lluana jitaiñedimaci. Jusiñamui judíuaiñedinona jillotajana jitaiñedimaci. Iese jeacino finocana nia jaidimaci; ia ja muidomo Jusiñamui

riicaillifue anamo jai itimaci.

*Tesalónica comini dine Pablo abido jaiacade*

17 Omoimona cai billa mei, nigarui illanona, omoina dane cioacadicaí. Omoina cioiñedicaí; iadedi omoimo comecina facadicaí. Omoi dine eo jaiacadicaí. 18 Ua eo jaiacadícue. Diga icaíño jaiacadicaí; ia Taife cai jaillana jitaíñede. 19-20 Caina omoi jaca iobitaja jira, omoina cioacadicaí. Jesús abido bia, naie facaise omoiri eo iobiticaí. Iemo ocuridicaí. Caina iocire itataitomoí. Omoi muidona iobiticaí.

### 3

1 Cai comeci jarire illamona, Atenas railla nairaimo fiebidicoco; 2 iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise inotallena, omoi comeciaina ocuiñotallena, naimiena oretaticoco. 3 Duere sefuillamona bu bie uai sefuiruillana jitaíñedicaí. Creyentena cai illamona, jaca duere cai sefuillana uiñotomoí. 4 Omoi motomo jaie cai ia, iena llofueticaí. Omoi birui duere sefuillamona cai llwana raise uiñotomoí. 5 Cue comeci jarire illamona, Cristona omoi inuana raise uiñoiacadícue. Omoina Taife ramo faicabillamona, tainomo cai maijiana jacinaiticaí. Ie jira Timoteona oredicoco. 6 Omoimona Timoteo jai abido billamona, omoie mare rafuena cocomo llote. Cristona inocana jaidomoí naimie llote. Coninina isiruitomoí. Cocona caimare comecitomoí. Omoina coco cioacana isoi, cocona dane cioacadomoí naimie llote. 7 Birui duere sefuidicaí; iadedi omoie rafuena cai cacajano, cai comeci marena ite. 8 Cristo rafuena inocana omoi jaillana jai cai uiñuamona, cai comeci marena ite. 9 Omoiri eo caimare jai iticaí. Ie jira Jusiñamuimo iobillacinona eo feaacadicaí. 10 Omoina dane cai cioillena, naimiemo nagarui jidicaí. Naimiena nia omoi raise inoñenia, omoina naimiena raise inotaacadicaí. Ie jira omoina cioacadicaí. 11 Iese omoi facaina, cai Moo Jusiñamuimo, cai Nama Jesúmo jicabidicaí. Omoi dine caina naimie oretajana jidicaí. 12 Cai Nama coninina isiruitacana omoi jaillana jitaidicaí. Caina omoi isiruilla isoi, nana jainona omoi isiruillana jidicaí. 13 Omoi comeciaina ocuiñollena, omoi comeciaina Jusiñamui jitailla isoi, marena illena jidicaí. Nana ie comini diga cai Nama Jesús abido bia, Jusiñamui dine omoi ia, omoi comeciaina marena illena jitaidicaí. Iese omoi facaina jicabidicaí.

### 4

*Naimaci marena illena llofujete*

<sup>1</sup> Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaídicaí. Iese birui itomoi; ia nagarui iese omoi illana jitaídicaí. Ie jira cai llua isoi, omoi jai. <sup>2</sup> Cai Nama Jesús jitailla jira, navui iena llofueticaí. <sup>3</sup> Jusiñamui jitailla isoi omoi marena illena, omoi aiñede riño diga iñeno. <sup>4</sup> Nagamiiai riñona ie aina otena, mare; ia maraiñede rafuena finoñeno. Nagamiiai dajena daje riño uana Jusiñamui jitaide. Dañaiño diga iaímaiaí jionaillena jiaí jitaide. <sup>5</sup> Naimiëna ñnoñedino isoi, omoi ai uana jitaíñede. Naiñaiñuai abina jamai cioillena riñona otimaci. <sup>6</sup> Jiaie creyentemo jeacinona finoñeno. Naimie aina jamai aifiedoñeno. Naie isoide rafuena bu finoiá, cai Nama naimiëna duere finoite. Iena navui omoimo lloticue.

<sup>7</sup> Jearede rafuena cai finollena, Jusiñamuidi caina fetofede; iadedi mare rafuena cai finollena caina fetode. <sup>8</sup> Bie llofuiacino nie creyente ñnoñenia, cue llofuiacínona jamaide; ia Jusiñamui Joreño naimiëmo illamona, Jusiñamui llofuiacínona jiaí jamaide. <sup>9</sup> Jiaie creyentiaína omoi isiruillana omoimo eo lloñeiticue. Jusiñamui omoína coninina isiruillana jai uiñotade. <sup>10</sup> Nana Macedoniamó ite creyentiaína jai isiruitomoi; iade nia isiruicana omoi jai. <sup>11</sup> Uri omoi i. Dani omoimo ite rafuena omoi uiuicaí. Jiaínomona ucubena jicañeno; ia omoi ucube ollena, omoi onolli diga rairuioicaíñeno omoi maiji. <sup>12</sup> Ie mei omoi jitailla ra iite. Iemona Cristona ñnoñedino omoína jiaí mameriñeitimaci.

### *Jesucristo dane abido billena llote*

<sup>13</sup> Omoi raise uiñollena, daje rafuena lloiticue. Omoi creyentiaímona dajerie jai fiódaitimaci. Jesúna ñnoñedinomona bu fiódaia, fiódaillamona jilluamo naimaci ocuiriñena jira, sunaitimaci; iadedi naimaci sunailla isoi, omoi illana jitaíñedicue. Fiódaillamona jilluamo jai ocuiridomoi. <sup>14</sup> Jesús fiódaillamona naimie jilluana ñnoticaí. Ie jira Jesús abido billa facaise, jai fiódaite creyentiaína Jusiñamui jilloitajana jiaí jai ñnoticaí. <sup>15</sup> Cai Nama llofuia isoi, bie rafuena lloiticue. Jesús abido bia, jai fiódaite creyentiaí, nia fiódaíñede creyentiaí diga, daacaiño naimie dine a jaiticaí. <sup>16</sup> Cai Nama Jesús abido bia, Jusiñamui dinena naimie billanona, caina jidaite. Ie jaienicí caina uaidoite. Jusiñamui ie trompeta daacaiño jiaí fiite. Jai fiódaitino nano jilloitimaci. <sup>17</sup> Iemei nia fiódaíñedinodi como jillodino diga uillie motomo naimiëmo dafaiñellena, Jesús caina uite. Iemei naimie diga jaca iiticaí. <sup>18</sup> Bie llofuiacino diga conini comeciána omoi ocuiño.

## 5

<sup>1</sup> Bie rafue suilliruina uiñoñedicaí. Bie rafuena omoi jai



uiñua jira, iena dane eo cueñeticue. <sup>2</sup> Cai Nama abido billana jai uiñotomoi. Fiiredimie naiona ebena billa isoi, naimie abido biite. <sup>3</sup> “Uri iticai. Marena iticai” Cristona ñnoñedino raia, naie facaise naimacimo duere sefuillifue suite. Urue riño jigicomo casilla isoi, ebena suite. Naiemona jilloñeitimaci. <sup>4</sup> Naie facaise suia, Cristo billena omoi jai uiñuamona, fiiredimie naiona ebena billa isoi, jacinaiñeitomoi. Cristona ñnoñedino isoi, iñedomoi. <sup>5</sup> Uanaicinona omoi jai uiñuamona, Cristo ie cominina jai jaidomoi. Jeacino anamo omoi jai iñena jira, Cristona ñnoñedino dibeimo jai duiñedomoi. <sup>6</sup> Ie jira abina sedacana omoi jai. Abina rairuioicaida omoi jai. Jifaidino isoi ebena omoi jaiñeno. <sup>7</sup> Cristona ñnoñedino abina sedacana jaiñedimaci. Rairuioicaida ebena jaidimaci. <sup>8</sup> Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogí icodi jiai ite. Ie isoide. Cai comeciaina eenollena, Cristona ñnocana mai cai jailli. Jiaino isiruicana mai cai jailli. Jusiñamui dine ico cai illemo ocuircana mai cai jailli. <sup>9</sup> Caina duere finollena, Jusiñamui caina fetofede; iadedi cai Nama Jesucristo finoca rafue muidona, duere finollemona cai jilloillena, caina fetode. <sup>10</sup> Cristo cai facaina jai fiodaite. Ie jira birui cai fiodaia, naimie bille facaise nia fioidañednona cai ie, naimie diga jaca iiticai. <sup>11</sup> Ie jira coninina ocuiñotacana omoi jai. Cristo dibeimo coninina itatacana omoi jai. Iese birui jaidomoi; ia nia iese omoi jai.

### *Omoi creyentiaina llofuerañi uaina ñno*

<sup>12</sup> Cue amatiai, jiaie rafuena lloiticue. Omoi creyentiaina llofuerañi uaina ñno. Cristo jitailla jira, omoi afemo itimaci. Cristo dibeimo omoina raise itatallena, omoi facaina llofuetimaci. <sup>13</sup> Omoina naimaci canua jira, naimacina isiruillanona, naimaci uaina raise omoi ñno. Coniniri uri omoi i. <sup>14</sup> Omoi motomona maijiacaiñednona imaci maijillesa ocui. Duere sefuillamona jai comecina ocuiñonidinona comecina ocuiñota. Raise ñnollena, Cristona nia raise ñnoñednona jiai cano. Fecuisse naimacina ui-uillanona, naimacina cano. <sup>15</sup> Omoina jiaimie duere finoia, ibana oñeno; iadedi naimiemo mare rafuena fino. Nana cominimo mare rafuena fino. <sup>16</sup> Nie isoide rafue omoimo ia, caimare omoi i. <sup>17</sup> Jusiñamuimo nagarui jii-jii. <sup>18</sup> Nie isoide rafue omoimo ia, Jsuiñemui jitailla jira, naimiemo iobillacinona feca. Jesucristomona Jusiñamui jitaillacinona jai uiñoticai. <sup>19</sup> Jusiñamui Joreñona jamaiñeno. <sup>20</sup> Jusiñamui Joreño uaido llorañi llofuiana jamaiñeno; <sup>21</sup> iadedi Jusiñamui Joreño uaido naimaci llofuiana facaci. Mare rafuedo jaca omoi jai. <sup>22</sup> Nana marañede rafuemonona eneno oni omoi i. Naie isoide rafuena omoi abimo omoi

oñeno. <sup>23</sup> Ie jira Jusiñamuimo omoi facaina jiiitícue. Naimie omoína jai uri itatate. Naimie omoína nagarui marena itat-acana jaillana jitaídícue. Iese omoi jaia, cai Nama Jesucristo dane abído bille facaise, naimie jitailla isoi, omoi comeciái marena iite. <sup>24</sup> Jusiñamuidi ñnogamiéna jira, iese omoína finoite.

<sup>25</sup> Cue amatiai, Jusiñamuimo cai facaina omoi jicabi. <sup>26</sup> Cue facaido nana creyentiaina caimare uaido. <sup>27</sup> Cai Namamo cai duilla jira, naimie jitailla jira, bie cartana nana creyentiái uicomo faca. <sup>28</sup> Cai Nama Jesucristo omoína duenailasa. Mai. Pablodícue.

# TESALÓNICAMO ITE CRISTONA HNOTINOMO PABLO IE EMODOMO ORETAGA RABE

## *Uaiduacino*

1-2 Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uiñocana omoi jaillana jitaidicai. Iaimaiai omoi uri itatajana omoi uiñocana jaillana jiai jitaidicai.

## *Cristo dane abido bia, naimiena ñnoñedinona duere finoite*

3 Jusiñamuimo cai jiaa, omoi facaina naimiemo iobillacinona fecacabidicai. Cristona ñnocana raise jaidomoi. Coniniri isiruicana raise jaidomoi. 4 Ie jira marena omoi illana jiaie creyentiai illanomo llocana uiticai. Duere sefuidomoi; iadedi danomo abido jaiñedomoi. Cristona ñnocana jaidomoi. Iena llocana uiticai. 5 Jiainomona birui duere sefuidomoi; ia ñnocana jaidomoi. Iemona Jusiñamui omoi facaina illana uiñoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

6 Jusiñamui omoína duere finodinona ico duere finoite. Omoi facaina ibana oite. Iese naimie finoia, naimiemona mare. 7 Cai Nama Jesús abido bia, duere sefuillamona jilloiticaí. Monamona ie siño jaienisaí diga biite. Irai boua isoi ana biitimaci. 8 Jusiñamuina ñnoñedinona diese duere finoitimaci. Cai Nama Jesús rafuena naimaci ñnoñena jira, naimacina duere finoitimaci. 9 ñnoñena jira, jaca faifitimaci. Jaca legi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. 10 Cristo bille facaise naimiemo iobillacinona fecaiticai. Naimieri nana naimiena ñnotino rajicaitimaci. Omoimo cai lloga rafuena omoi jai ñnua jira, iese iitomoi.

11 Ie jira omoi facaina jicabidicai. Naimie jitailla isoi, omoína naimie marena itatajana jidicai. Omoína naimie fetuamona, ie uaido mare rafuena finocana omoi jaillana jidicai. Ie uaido naimiena ñnocana omoi jaillana jidicai. 12 Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caina duenaillamona iese iiticaí.

## 2

*Jesucristo abido bille rafue*

<sup>1</sup> Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue. <sup>2</sup> “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena iñoñeno. Nie lloraima iena lloia, iena iñoñeno. “Pablomona cue feiñoga carta iena llote” damie raia, iena iñoñeno. <sup>3</sup> Naie isoide rafue diga omoina jiaino jifueiacania, iena iñoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; <sup>4</sup> iadedi nano jiaie rafuena finoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona, “Jusiñamuidicue” raite. <sup>5</sup> Omoi dine navui cue ia, bie rafuena omoimo lloticue. <sup>6</sup> Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. <sup>7</sup> Taife maraiñede rafuena birui bainino finotate. Jusiñamui Joreño naimiena maraiñede rafuena birui marefodo finuana rairuide. Jusiñamui Joreño naimie rairuiñena mei, <sup>8</sup> Taife dinena maraiñedimie biite; ia cai Nama Jesús abido ebire bia, firaiñuamona naimiena meineite. <sup>9</sup> Cai Nama Jesús nia abido biñenia, comini jifuellena, Taife uaido bie maraiñedimiedi diga siño rafuena finoite. <sup>10</sup> Cominina eo maraiñedicinodo jifueite. Naie comini ico faifitimaci. Jusiñamui ie uanaicinona naimaci iñoñena jira, jilloiacaiñeitimaci. <sup>11</sup> Ie jira Jusiñamui naimacina tainocinona iñotaite. <sup>12</sup> Jusiñamui ie uanaicinona naimaci iñoñena jira, maraiñede rafuena naimaci ebiruilla jira, Jusiñamui naimacina duere finoite.

*Jusiñamui omoina jai fetode*

<sup>13</sup> Jusiñamuina iñoñedino isoí Jusiñamui omoina duere finoñeite. Naimie omoina jai fetua jira, naimiemo iobil-lacinona jaca fecacabidicai. Omoi jilloillena, nano dofoconi omoina fetode. Ie Joreño uaido naimie jitaillacinona omoi finollena, naimie uanaicinona omoi iñnuamona, omoina fetode. <sup>14</sup> Ie rafuena cai lluamona, Jusiñamui omoina jai jillotate. Iemona cai Nama Jesucristo ebirede illanomo jaca iitomoi. <sup>15</sup> Ie jira, Cristona iñnocana omoi jai. Cai llogacinodo omoi jai. Iena caimona jai cacadomoi. Cai cartamona iena jiai cacadomoi. <sup>16</sup> Omoi facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai. <sup>17</sup> Naimie omoi comeciaina nia ocuiñotallena jidicai. Nie isoide rafuena

omoi finoia, naie rafue omoi marena finollena jiidicai. Buena omoi ñaia, omoi marena ñaillena jiaí jiidicai.

### 3

#### *Cai facaina omoi jiana jitaídicaí*

<sup>1</sup> Daje rafue nia lloiacadícue. Cai facaina omoi jiana jitaídicaí. Cai Nama rafue llocana jaillana jitaídicaí. Omoi ñnua isoi, jiaíno ñnuana jiaí jitaídicaí. <sup>2</sup> Maraiñedinomona cai jillobillena, omoi jiana jitaídicaí. Ailluena comini Cristona ñnoñedimaci; <sup>3</sup> ia cai Nama jaca ñnogamie. Omoi comeciaina ocuiñotaite. Maraiñedinomona omoína eenoite. <sup>4</sup> Cristomo cai duilla jira, cai llogacinona omoi jai ñnuana jai uiñoticaí. Iena nia ñnoitomoi. <sup>5</sup> Cai Nama Jesús omoína Jusiñamui omoína isiruillana uiñotajana jitaídícue. Cristo duere sefuide; iadedi ie Moo jitailla rafuena sefuiruiño finocana jaide. Iese Jusiñamuimo omoi facaina jiiíticue.

#### *Maijuillasa*

<sup>6</sup> Cai Nama Jesucristo jitailla jira, jiaíe rafuena nia lloitícue. Jiaíe creyente maijiacaiñenia, naimie diga eo nabairiño. Iena navui omoimo llotícue; ia damierie iese ia, naimaci diga eo nabairiño. <sup>7</sup> Caímona fueo. Navui omoi motomo iticaí; ia cai ucube ollena, jaca maijidicaí. <sup>8</sup> Guillena ibaño guiñedicaí; ia nagarui eo maijidicaí, omoína duere cai finoñellena. <sup>9</sup> Cristo facaina cai maijia jira, omoímona ra jamai cai jicallena, caímo uai ite; iadedi caímona omoi fueollena iese jicañedicaí. Omoi ra ollena, omoi maijiana jitaídicaí. <sup>10</sup> Navui omoi motomo cai illa facaise lloticaí: “Bu maijiacaiñenia, guiñena”. <sup>11</sup> Omoi motomo damierie jai maijiñenana jai fididicaí. Maijiño jai itimaci. <sup>12</sup> Cai Nama Jesucristomo cai duilla jira, naie isoidinomo maijillena lloticaí. Uainino maijiamona ucube naimaci uana jitaídicaí. <sup>13</sup> Cue amatiaí, nie isoide mare rafuena finollena sefuiruiño. <sup>14</sup> Cue jai cuega cartamo ite rafuena bu ñnoñenia, nana creyentiaína naimiena uiñota. Naimie meidaillena, naimie diga nabairiño. <sup>15</sup> Naimiena enoiño; ia creyentena naimie nia illamona, naimiena fecuise llofue.

#### *Fuiduacino*

<sup>16</sup> Cai Nama omoi jaca uri itatajana jitaídicaí. Naimie omoi diga jaca iite. <sup>17</sup> Cuenca canollena, naimiemo cue llua isoi, jiaímie bie carta cuega; iadedi cue mameci buone dama cueticue. Nana cartamo iese cue mamecina cueticue. Pablodícue. <sup>18</sup> Cai Nama Jesucristo nana omoína duenaillasa. Mai. Macaibaite.

## TIMOTEOMO PABLO NANO ORETAGA RABE

### *Pablo Timoteona uaiduacino*

1-2 Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue lllollena, naimie cuena orede Naimiena cue cioillena, naimie isoi cue illena, naimie abido billemo ocuridicue. Jusiñamui cuena jiai orede. Naimiedi cai Jilloitaraíma. Cue llofuiacinomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimaiaia. Iena uiñocana mai o jai.

### *Cristo rafuena tainona llofueraini llofuiacinodo jaiñeno*

3-4 Macedoniammo jaie jaidicuemmo, Efesommo o fiebicaillena omo lloticue. Nainommo dajerie Cristo rafuena raise llofueñedimaci; iadedi jiaiforie llofuetimaci. Diga iigaiaina facafacadiimaci. Imaci usumatiai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai inuamona, marena iticai. Iena llofueñedimaci. Ie jira naimaci uaina llicaita. <sup>5</sup> Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeciai jeaninana jitaidicai. Jusiñamuina raise naimaci inuana jiai jitaidicai. Ie jira Jusiñamui rafuena llofuecabiticai. <sup>6</sup> Dajerie llofueraini iese llofueñedimaci; iadedi jamai ñaitimaci. <sup>7</sup> Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

<sup>8</sup> Iena raise llofuegana, Jusiñamuina uiñoñedinona naimiena uiñotallena, mare. Iena uiñoticai. <sup>9-10</sup> Moisés micori llogacinuaidi mareuidinomo jainaiñede. Jainommo jainaiide: Jusiñamui uaina inoñedinommo lloga uaina inorainidinomo, Jusiñamuina jitañedinommo, jeacino finorainimmo, jeare ñaicabitinomo, Jusiñamuina enoidinomo, eina meinetinomo, moonna meinetinomo, jiaie cominina meinetinomo, aiñede riño diga itinomo, iniñede ima diga itañaiñuaimmo, daje isoide ima diga conini aifuedotinomo, comena fidinomo, taino llorainimmo, taino lluana jifueridinomo, uana rafue facaisena iñedinommo. Nana Cristo rafue facaina iñedinommo Moisés micori llogacinuai ua jainaiide; <sup>11</sup> ia naie rafue cuemo jai jainaiñede. Ie mare

rafuena cue lollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

*Jusiñamui caina duenaila jira, Pablodi iobide*

<sup>12</sup> Cuena fetua jira, cai Nama Cristo Jesúri iobidicue. Naimiena cue ñnollena, naimie cuena uiñuamona, cuena fetode, naimie rafue cue lollena. Iena lollena, cue comecina jiai ocuiñotade. <sup>13</sup> Jaie naimiena jeare ñaiticue. Naimiena ñnotinona jiai duere finodicue. Abina cue uiñofiena jira, naie facaiseconi naimiena nia cue ñnoñena jira cuena duenailamona, naimie cuena fetode. <sup>14</sup> Cuena eo duenaite. Iemona naimiena ñnoticue. Naimiena jiai isiruiticue.

<sup>15</sup> Bie lluadi mare cue uiñuamona, nana comini biena ñnuana jitaidicue. Maraiñedinona naimaci jeacinomona jilloitallena, eniruemo Jesucristo bite. Ero, nanoca jeacinona finoraimadicue; <sup>16</sup> iadedi Jesucristo cuena duenaite. Naimiena cue ñnuamo jaie fecuise ocuride. Nana jeacinona finorainimo fecuise ocuride, naimiena ñnollena. Naimiena cai ñnuamona, Jusiñamui diga jaca iiticaí. Cuena duenaila jira, biruimona naimiena ñnoitinodi naimie naimacina duenailana uiñoitimaci. <sup>17</sup> Jusiñamuidi nanocamie. Jaca fioidañeite. Naimiena cionidicaí. Naimie damiede. Jaiena ññede. Naimiena jaca iobicabillasa. Iena jitaidicue.

<sup>18</sup> Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerañidi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena. <sup>19</sup> Cristona ñnocana o jai. O comecina marena finocana o jai. Dajerie naimaci comeciai iuaimo comeciaina facañedimaci. Ie jira Cristona jai ñnoñedimaci. <sup>20</sup> Iese ite Himeneo. Alejandro jiai jai daje isoide. Jai ñnoñediaimaiai. Ie mei iaimaiaia Taife anamo jai itabicaítaticue, duere sefuillena. Iaimaiai fueolena, Jusiñamuina jeare ñaññellena, iese itabicaítaticue.

## 2

*Nana comini facaina jaiticaí*

<sup>1</sup> Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. <sup>2</sup> Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii. <sup>3</sup> Iese cai jiiia, Jusiñamuimona mare. Naimiedi cai jilloitaraíma. <sup>4</sup> Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide. <sup>5</sup> Nana nairaiaí imaci Jusiñamuidi jaca dajede. Comini diga

Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie iimananona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. <sup>6</sup> Cai jeacinomona cai eneno illena, Jesucristo nana cai facaina jai fodaite. Naimie jitailla facaiseconi Jusiñamuidi cominina bie rafuena jai uiñotade. <sup>7</sup> Bie rafue cue llollena, Jusiñamui cuena fetode. Judíuaiñedinomo cue llollena, bie rafue naimaci ñnollena, uanaicinona naimaci uiñollena, cuena orede. Tainona lloñedicue.

<sup>8</sup> Ie jira naga roracomo ite iññiai, cai comini onolliai a ñuitacabilla isoi, comeciaino jeacino iñenanomona, Jusiñamuimo jiana jitaidecúe. Naimaci comeciaino icirillacino iñedemo, Jusiñamuimo jii. Naimaci comeciaino uaitajacino iñedemo, Jusiñamuimo jii. <sup>9-10</sup> Riñoniaimo jiai lloiticue. Roracomo omoi jaia, abi ieduoamo comeciaina facañenamona, omoi ifotiena fino. Jamai ebinai raillano, abi ieduoamona abina finora jitañeno. Jamai ebinai raillano, abi ieduoamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina ñnoticai” omoi raillanona, naimie jitailla isoi, marena omoi finolle. <sup>11</sup> Rollena comini ofia, ñaiñenanomona, uaitañenamona omoi fueo. <sup>12</sup> Omoi ofia, omoi iññiaina llofuiana jitañedicue. Nainomo omoi ñaiñena. Hiñiai omoi anamo illana jitañedicue. Iese omoi riñoniaimo lloiacadicue. <sup>13</sup> Jusiñamui Adán micorina nano finua jira, iese lloticue. Adán micori finua mei, Eva micorina jiai finode. <sup>14</sup> Taifedi Adán micorina jifueñede; iadedi Eva micorina jifujete. Ie mei naie riño jeacinona finode. <sup>15</sup> Iemona jilloite; iadedi uruiái jococana jaite. Riñoniaidi Jusiñamuina ñnoia, jiaie cominina isiruiá, Jusiñamui jitailla rafuena finoia, ie abina eenoia, jilloitimaci.

### 3

#### *Creyentiaina sedaraini illa rafue*

<sup>1</sup> Bicinodi uanaicino. Creyentiaina llofueraimana bu jaiacania, naimie comecimo mare jitaillacino ite. <sup>2</sup> Bie isoide llofueraimana jaiacadimiena jitaidecúe. Naga comini naimie mare raillamie. Dañaiñona airedimie. Abi eenotimie. Ebena iñedimie. Inogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. <sup>3</sup> Jifairuiñedimie. Fuirirainidimie. Raie icirirainidimie. Ucubena nicidoñedimie. <sup>4</sup> Naimie cominina raise sedadimie. Naimie anamo naimaci illanona, naimie uruiái ie uaina raise ñnotadimie. Ie isoidimie llofueraimana jaillana jitaidecúe. <sup>5</sup> Iese naimie iñenia, ie anamo itinona naimie raise



sedañenia, ¿niese jiaie creyentiaina raise sedaite? <sup>6</sup> Como creyentena jaidimiena creyentiaina llofueraimana fetofieno, naie diga naimie abi iedoi raillano. Abi iedumona, Taife isoi jeacino finoite. <sup>7</sup> Llofueraimana jaiacadimiena creyenteñedino: “Mare” raiñenia, naimiena fetofieno. Iese naimiena raiñenia, naimie joreñaona jeare ñaitimaci. Iemei Taife ramo jiai faite, naimie abido danomo uaillena. Ie muidona naimie uaina jaca cacarefiñeitimaci.

### *Diáconuai illa rafue*

<sup>8</sup> Diáconuai creyentiai llofueraini isoi marena illa. ñinouiganona illa. Jifairaiñena. Ucubena nicidoñena. <sup>9</sup> Naimacidi Cristona cai ñnua rafuena jeanide comeciámona ñnua. <sup>10</sup> Bu omoi fetocania, naimacina nano facaci. Roracomo jiaie rana nano maijita. Iena raise finoa, diáconuaina jaite. <sup>11</sup> Diáconuai ainiai jiai ñnogañaiñuaina illa. Jiaie comini joreñaona ñaiñena. Jirorainina. Naga rafuena marena raise finua. <sup>12</sup> Nana diáconuai aidi dañaiñorie. Diáconuai uruai naimaci uaina raise ñnua. Diáconuai imaci anamo itinona raise sedajana uiñua. <sup>13</sup> Diáconuai marena maijia, comini naimacimo iobillacinona fecaitimaci. Cristo Jesúsna ñnuano, naimiena marefodo jiai lloitimaci.

### *Jusiñamuina ñnotino*

<sup>14</sup> Timoteo, raire o dine jaiacadicue; iadedi uicodo bie rafuena omo cueticue. <sup>15</sup> Are cue riñenia, dani omoi creyentiai diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadica. Uanaicinona riidotica. <sup>16</sup> Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raitica: Eniruemo Cristodi ñimana jai bairede. Jusiñamui Joreñodi caina naimie uai siñonana uiñotade. Jusiñamui jaienisai naimiena jiai cioidimaci. Jiaie nairaiáimo naimiena llotica. Iena cacajamona, ailluena cominidi diga nairaimona naimiena birui ñnotimaci. Monamo naimie abido jai jaide.

## 4

### *Jiaínodi jiaiforie rafuena lloitimaci*

<sup>1</sup> Jusiñamui Joreño caimo raise llote: “Jesucristo nia abido biñena facaiseconi damierie creyentiai Cristona fainonocaitimaci. Taife dibeimo ite lloraini lluna cacarefillamona, Janabamona ite llucinodo jaitimaci. Taifemona ite llucinodo jaitimaci”. <sup>2</sup> Naie llorainidi: “Uanaicinona llotica” raitimaci; iadedi taino llocabiitimaci.

Naimaci comeciai jai tainomo iite. <sup>3</sup> Fima riño ie aina ollena rairuitimaci. Riño iima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiai uanaicinona uiñuanona, iobillanona guillena, naimiedi naga rana finode. <sup>4</sup> Nana Jusiñamui comuitaga guille radi mare. Iobillano iena cai feiñuanona, guiticai. <sup>5</sup> Jusiñamui llua jira, Jusiñamuimo cai jüia, nana guille radi jai mare. Iemona marañede rafue jaca caimo comuiñeite.

### *Jesucristo rafuedo raise ñnocana jai*

<sup>6</sup> Timoteo, cue lluaña creyentiaimo o lloia, Jesucristo dibeimo raise maijidio. Cristo uaina ñnocana o jailla jira, mare llogacinodo o jailla jira, raise maijidio. <sup>7</sup> Jamai rafuemo, jamai ñgaiaimo o comecina facañeno; iadedi Jusiñamui jitailla rafuena finocana o jai. <sup>8</sup> Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jiairuido o jaillena, o comecina marena jiai raise finotaite. <sup>9</sup> Bie lluacinodi uanaicino. Ie jira iena cai ñnua. <sup>10</sup> Cai jillobilena, cajede Jusiñamuimo ocuiridicai. Ie jira duere sefuillano maijidicai. Jeacinomona Jusiñamuidi nana cominina jillobitaacade. Naimiena ñnotinona jai jillotate.

<sup>11</sup> Nana creyentiaimo cue lluaña raise llofue. <sup>12</sup> Naimacina o llofueia, coniruena nia o illamona: “O afemo iticai” naimaci raiadedi, damamai iese raitimaci. Mare illacinodo o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o ñnuamona, o jeanide rafuena o finoñenamona, naimacidi fueoitimaci. <sup>13</sup> O dine nia cue riñenia, creyentiai ofia, Jusiñamuina ciegafuaina ado faca. Iena llono. Iena llofue. <sup>14</sup> Creyentiaina llofueraini navui ofidemo, Jusiñamuimona o baitajacinona o feiñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fañonocaiñeno. <sup>15</sup> Iena eo uiuicai, nana comini Cristona ñnocana o jaillana uiñollena. <sup>16</sup> O comecina raise eeno. Marena raise llofue. Cristo uaina ñnocana o jai. Iese o jai, jeacino finuamona jilloitio. Iese ona cacadino jiai jilloitimaci.

## 5

### *Timoteo afemo itino diga ie illa rafue*

<sup>1-2</sup> Eimiaiina illamona, o afemo itinona riire llofueñeno; iadedi o moomo o llua isoi, naimacina fecuise llofue. O anafemo itinona o amatiaimo o llua isoi, llofue. O afemo itiañuaina o eimo o llua isoi, llofue. O anafemo itiañuaina o

miriñotiaimo o llua isoi, llofue. Naiñaiñuaimo jeare comecina facañeno. <sup>3</sup> Naiñaiñuaina canollena, feciñuai comini iñenia, naiñaiñuaina cano. <sup>4</sup> Feciñomo uruai ia, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi ibana oite. Iese itena, Jusiñamuimona mare. <sup>5</sup> Feciñomo uruai iñenia, da Jusiñamuimo naiñaiño ocuride, naimie naiñaiñona canollena. Jusiñamuimo nagarui jicabite. Bie isoide feciñuaina cano; <sup>6</sup> iadedi Jusiñamuimo duiñede rana ebiruiga feciñona canoñeno. Jusiñamui anamo naiñaiño jai raise iñenamona, Jusiñamuimona naiñaiñodi jai fiodaitiñaiño isoide. Fiodaite cominina jaca canoñedicaí. <sup>7</sup> Ie jira creyentiaimo biena llono, feciñuaina jeare bu ñai raillanona.

<sup>8</sup> Ie cominina canoñedimie Cristo uaina jai fainonocaide. Naimiedi Cristona iñoñedimie baifemo eo jearedimie. <sup>9</sup> Creyentiaina sedarainina canolle feciñuai mameciaina o joneia, iese jone: Jai jionaidiñaiñuai diese mameci jone. Dajede inirediñaiñuai mamecina jone. <sup>10</sup> Mare rafue naiñaiñuai finocabilla jira, jiaie cominidi naiñaiñuaidi mareñaiñuai raillañaiñuai. Ie uruai raise sedadiñaiñuai. Cominina nafuecabitíñaiñuai. Jiaí creyentiaina abina iedoñeno canocabidiñaiñuai. Duidinona canocabidiñaiñuai. Diese mare rafuena finocabidiñaiñuai mameci jone. <sup>11</sup> Feciñuai diese mameci o joneia, nia jionaiñede feciñuai mameciaina joneñeno. Naiñaiñuai nano llotimaci: “Ínina dane oñeiticaí. Da Cristona sedaiticaí” llotimaci. Ie mei uri iñenanomona, imana niciduamona, inina jitaitimaci. Ie jira naiñaiñuai mameci joneñeno. <sup>12</sup> Naiñaiñuai navui llucacina jai fainonocailla jira, jiaie comini naiñaiñuai joreñuaina ñaitimaci. <sup>13</sup> Naiñaiñuai diga jofomo macariruillamona, rairaiedimaci. Eo ñaillaredimaci. Naiñaiñuai ñaiñenacinauido ñaitimaci. <sup>14</sup> Nia jionaiñede itiñaiñuai iese iñellena, naiñaiñuai inina dane uana jitaidicue. Ie mei uruaiarenitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite. <sup>15</sup> Cristona dajerie fainonocaida, Taise dibemo jai jaidimaci. <sup>16</sup> Creyente cominimona feciño iade, da naimie naiñaiñona canua. Jiaie creyentiaimo naiñaiñona canolle rana jicañena. Ie muidona comininide feciñuaina canorenitimaci.

<sup>17</sup> Creyentiaina llofueraini marena maijia, raise ibauiga. Naimaci lloia, naimaci jiaí llofueia, eo raise ibauiga. <sup>18</sup> Moisés micori jaie cuegafuiai iena llote: “Trigo oni juillena jurareta saisia, ie fuena maiñeno, ie guillena”. Guillamona ibana jai ote. Cristo jaie llote: “Maijidimiedi ibauiga”. <sup>19</sup> Creyentiaí llofueraimana damie llogidoia, iena cacareñeno. Mena comini, nibai daje amani comini iese naimiena llogidoia, iemo cacarei. <sup>20</sup> Creyentiaí llofuerainimona bu jeacinona finocabia, nana creyentiaí uicomo naimiemo riire llono,

jiaie creyentiaí daje isoi iñellena. <sup>21</sup> Dacinodo naga jeacino finoraímamo lloño. Nagamiemo ridoñeno lloño. Fecuisse damiemo lloñeno, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisaí caina jiaí cioidimaci. Ie jira dacinodo lloño. <sup>22</sup> Jeacino naimiemo ia, naimie jeacino facaisena o iñellena, creyentiaí llofueraímama jaillena, buna raire fetoñeno. Jeacinomona oni eneno o i. <sup>23</sup> Eo o duia, da jinuína jiroñeno. O duicabilla jira, janore vino jiro, o jebe manollena. <sup>24</sup> Jeacino dajerie finoia, iena uiñoticaí, juez isoi Jusiñamui iena nia lloñenia. Jeacino jiaíno finoia, iena uiñoñedicaí; iadedi jiaíruido Jusiñamui lloia, iena uiñoiticaí. <sup>25</sup> Ie isoide. Mare rafue bu finoia, iena uiñoticaí; iadedi birui iena cai uiñoñenia, jicarena finoñena jira, jiaíruido iena uiñoiticaí.

## 6

<sup>1</sup> Jusiñamuina iinote maijiraíndi naimaci patrones eo iinua. Ie mei Jusiñamuina iinoñedino Jusiñamuina jeare ñaiñeitimaci. Cai llofuiacinona jamaiñeitimaci. <sup>2</sup> Jesucristona naimaci patrones iinoia, maijiraíni naimaci uaina jiaí iinua. Naimaci comeciaí facañena: “Patrón creyentena illa jira, daní conima cai isiruilla jira, raise maijiñeiticaí”; ia: “Raise maijiiticaí” comeciaina facaja.

### *Uanaíñedinona llucino*

<sup>3-4</sup> Cai llogacínodi uanaicino. Cai Nama Jesucristona lloticaí. Bie llogacínomona naimie jitaille isoi cai illanona, raise uiñoticaí. Jiaicínodo bu llofueia, abi iedote. Abi uiñoñede. Uai eo uaitaiacade. Ie meinoconi comíni abina uradoidimaci. Daajena comeciaina lloiñedimaci. Jiaie comíni joreñona ñaitimaci. Cai fiiena bitimaci. <sup>5</sup> Uai uaitatimaci, naimaci comeciaí maraiñeno illa jira. Uanaicínona jai uiñoñedimaci. “Cristo uai llumona, ailluena ucubena oiticaí” raillanomo comeciaina facadimaci. “Iemona caimare iiticaí” raillanomo comeciaina facadimaci. <sup>6</sup> Ie iadedi iese iñede. Cristona eo raise cai iinuamona, caimo diese ite ra diga caimare iticaí.

<sup>7</sup> Cai jeiciaí, jaca buenidicaí. Cai fioidailla mei, cai rana uiñeiticaí. Cai radi benomo fiebicaite. <sup>8</sup> Ie jirari, cai guille ia, cai iniroi ia, caimare bene cai illa. <sup>9</sup> Eo ucuberedínona jaiacadínona Taife eo ramo faite. Taife uaina iinuana ucube ollena, ucuberedínona jaiacadínodi diga maraiñede rafuena finodimaci. Ja muidomo imaci abi faifitimaci. <sup>10</sup> Ucubena ebiruillanona, ucuberedínona jaiacadíno naga jeacínona finocabidimaci. Ucube ollena, dajerie Cristona jai faidonocaidimaci. Ie muidona eo duere sefuidimaci.

*Jusiñamui uaina iinocana jai*

<sup>11</sup> Ero, Timoteo, odi Jusiñamui fetocamiedio. Nana cue como lloga rafuemona oni eneno o i. Mare rafuedo o jai. Jusiñamui jitailla rafuena finocana o jai. Jesucristona ñinocana o jai. Jiaie cominina isirui. Mare rafue dibeimo o comecina jone. Riicinodo cominina llofueñeno. <sup>12</sup> Jeacino dibeimo o ñhellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio. <sup>13</sup> Ie isoide Jesucristo. Poncio Pilato dine jaiie naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinona omo lloticue. <sup>14</sup> Cai Nama Jesucristo nia abido biñenia, nana omo cue llogacinuai ñno. Jearede rafuena finoñeno, jiaie comini naie llogacinuaina uaitañellena. <sup>15</sup> Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaïma. Cai nanoca Nama. <sup>16</sup> Da jaca naimie fiodaiñeite. Eo isire lligaiñote ra dinomo naimie ite. Nainomo jaca bu iaïrei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaïdicue.

<sup>17</sup> Eo ucuberedinomo llono: “Abina iedoñeno. Ucubedi fuirede. Ie jira ucubena uamo ocuirineno; iadedi Jusiñamuimo ocuirir”. Cai comeciai jaisillena, naimiedi caimo rana eo raise fecacabide. <sup>18</sup> Ucuberedinomo jiai llono: “Omoi ucube diga mare rafuena fino. Jiaie cominimo ucubena caidiñeno fecajana cano”. <sup>19</sup> Ie muidona iese naimaci finoia, monamo naimaci isiruiga rana iite, jiaïruido iena. Iese naimaci jaiia, jaca itatajacinona marena raise ua uiñoitimaci.

### *Fuiduacino*

<sup>20</sup> Timoteo, cue omo llogacinona faiñeno raise uuiicai. Jajamai rafuemo cacarefiñeno. “Uanaicinona eo uiñoticaï” dajerie raitimaci; iadedi uiñoñedimaci. Naimaci ñaïana cacarefiñeno. <sup>21</sup> Dajerie iena cacajano, Cristona nia uiñoñedimaci. Jusiñamui ona duenaïllasa. Jaca dinori omo rafuena lloticue. Mai. Pablocicue.

## TIMOTEO MO PABLO IE EMO DOMO ORETAGA RABE

### *Uaiduacino*

1-2 Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitailla jira, Cristo Jesús oretagamiedicue. Cominimo jaca itatajacinona lollena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiñaimaiaí. Iena uiñocana mai o jai.

### *Jusiñamuimo iobillacinona fecade*

3 Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jiaí, o facaisena iobillacinona fecadicue. 4 Cue comeci caimareficaillena, ona eo cioacadicue. Navui cue o facadoia, o eiana comeciticue. 5 Cristo Jesús o ñnuana dane jiaí comeciticue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñnuana jai uiñoticue.

6 Ie jira o comecina dane ocuiño, Jusiñamui uai o llofuelleña. Cue onolli o ifogimo navui joneticue, ona fetollena, naimie uaina o lollena. Jusiñamuimona o baitajacinona naie facaiseconi feiñotio. 7 Jusiñamuidi cominina o jaciruillana jitañede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade. 8 Ie jira cai Nama rafuena o lluaña meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefuiña, rairuioicañeno i. Jusiñamui o comecina ocuiñotaite. 9 Naimie isoi cai mareña illena, caina fetuano, jeacinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue ña finofena facaiseconi caina jaie duenaite. Cristo Jesús caina iena jai uiñotade. 10 Cai Jilloitaramadi Cristo Jesús. Caimo Jesús jai bairia jira, Jusiñamui caina duenaillana jai uiñoticaí. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui dibeimo jaca illacinona jai uiñotade. 11 Bie rafuena lollena, cuena fetode. Cuena oretaja jira, biena llofueticue. 12 Ie jira duere sefuidicue; iadedi cue illana meiruiñedicue. Cue ñnogamiena cue uiñua jira, naimie bille dinori naimiedi nana cuemo naimie jai iga rafuena cue llofuellena, cuena raise eenoite. 13 Cue llua isoi o i. Uanaicinona lloticue. Cristo Jesús

ñnocana o jai. Jiaie cominina isiruicana o jai, Cristo Jesúmo o jainaiaila jira. <sup>14</sup> Jusiñamui Joreño caimo illa jira, omo naimie lloga uanaicinona fainonocaiñeno uiuicai. Uanaicinona o fainonocaiñellena, naimie ona canoite.

<sup>15</sup> Diga Asiamo ite cominidi cuena fainonocaidimaci. Naimacimona Figelo cuena fainonocaide. Hermógenes cuena jiai fainonocaide. <sup>16</sup> Onesíforo daje isoñede. Diga icaiño naimie cue começina ocuiñotade. Cuena meiruñede. Cai Namadi Onesíforo jofomo itino duenaillasa. <sup>17</sup> Romamo Onesíforo navui ria, cuena isire jenuano, cuena baite. <sup>18</sup> Efesomo jaie cue ia, naimie cuena jiai canode. Iena raise uiñotio. Cai Nama ico abido bia, cai Namamona naimie iba feñuana jitaidicue.

## 2

### *O maijia rafuena raise fuido*

<sup>1</sup> Cuena fainonocaidino isoi iñeno; iadedi cue jito, Cristo Jesús ona canuano, Cristo ðibeimo o começina ocuiñocana jai. <sup>2</sup> Diga cominimo cue llwana navui cacadio. O uaina ñnotinomo cue llwana llono, iena jiaie cominina naimaci llofuellena. <sup>3</sup> Cristo Jesús rafue muidona duere o sefua, rairuioicaiñeno i. Cai Nama rafuena o riiduamona, naimie soldado isoidio. <sup>4</sup> Ie illaima uai naimie ñnoiacania, soldadodi soldadoñede rafuena maijiacaiñena. Ie illaima iobitallena, ie illaima ocuica rafuena finoacanite. Ie isoide. Da Cristo Jesús rafuena o fino, naimiena iobitallena. <sup>5</sup> Reglamientos llua isoi naimie raise jifanoñenia, jifanoraimadi bue isoide rana cioñede. Ie isoide. Ibana o feñollena monamo o jaiia, Cristo Jesús llwado raise o jai. <sup>6</sup> Illimo duere maijiraimadi maijia jira, naiemona naie guiledi oga. Ie isoide. Duere o maiji, ibana feñollena. <sup>7</sup> Cue llwamo o começina facacabi. Cai Nama ona canoite, iena uiñollena.

<sup>8</sup> Jesucristo fiodaillamona jillode. Iena comeci. Naimie usumadi David micori. Jesucristona cue llua jira, <sup>9</sup> marañedimie isoi cárcolmo duere jai sefuidicue; iadedi Jesucristo rafue nia llocana jaide. <sup>10</sup> Ie jira Jusiñamui fetocano facaina duere sefuidicue, Cristo Jesúsna naimaci ñnuamona naimaci jilloillena, monamo naimaci jaca illena. <sup>11</sup> Bie lluacínodi uanaicino:

Naimie ðibeimo cai jaillamona, naimie diga jaca iiticaí.

<sup>12</sup> Naimie muidona cai duere sefua, naimie diga iiticaí, ie cominina naimie sedalle facaiseconi.

Naimiena cai janoia, naimie caina jiai janoite.

<sup>13</sup> Naimie raise cai ñnoñenia, naimie uai meidoñena muidona, naimiedi nia ñnogamie.

*Timoteo illa rafue*

14 O cominimo biena dane lloño, iena comecillena. Jusiñamui facaina naimacimo lloño: Uaina jamai uaitañeno, mare rafuena naicinomona comuiñena jira, naicinona cacadino comeciaina maretañena jira. 15 Mareña maiji, Jusiñamui ori iobillena. O meiruiñellena, naimie o maijia jibuia, mareña maiji. Uanaicino o uiñuamona, naimie uaina mareña raise llofue. 16 Jamai ñaiana cacarefiñeno. Comini jamai ñainoicaia, Jusiñamui jitailla rafuena finocana jaiñedimaci. 17 Diga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiai jaide. 18 Uanaicinona fainonocaidiaimaiai. Coco ñnua isoi, llofueñediaimaiai. “Cai fiodaia, cai abi ico jilloñeite” llofuetiaimaiai. “Cristona cai ñnua facaise jai jilloñeite. Cai fiodaia, cai joreño jaca iite” llofuetiaimaiai; iadedi cai abi ico jillollena ñnoñediaimaiai. 19 Ie ia Jusiñamui comini jaca ñnocana jaidimaci. Ie cominimo Moisés micori jaie llamona, iaimaiai finoca rafuena jiai ñaite: “Jusiñamuidi ie cominina uiñote. ‘Jusiñamuina ñnoticue’ raitimiedi marañede rafuemonona eneno illasa” llote. Ie jira iaimaiaimona eneno o i.

20 Ero, ucuberedimie jofomo diga guillirue joneuilla ra jai ite. Eo jitairede rana jai ite. Janore jitairede rana jiai jai ite. 21 Ie isoide. Jusiñamui ñibeimo itinomona naga isoide comini ite; iadedi jeacinomona eneno bu ia, Jusiñamui naimiena fetoite, ie eo jitailla rafuena finollena. Jusiñamui ñibeimo raise maijiite. 22 Ie jira conirueni comeciiai jitailla marañede rafuemonona eneno o i. Mareña i, Jusiñamui jitailla isoi. Jesucristona ñnocana jai. Nana cominina isirui. Uri i. Mare comeciaimona nana cai Namana sedadino diga iese i. 23 Jamai ebena rafuemo iñeno. Naiemona icirillacinodi comuide. Iena uiñotio. 24 Jusiñamui facaina llofueraimadi raie iciriñena. Nana cominina nabairilla. Mareña fecuise llofuega. Ricaiñena. 25 Naimie uaina jitañedinona fecuise llofuega. Ie mei Jusiñamui naimaci comeciiai iuaina ñibai meidotaite, uanaicino ñibeina uiñollena. 26 Ie mei abi uiñuanona, Taife anamona jilloitimaci. Taifedi naimacina ie anamo jai itatate.

### 3

#### *Jusiñamui ñibeimo iñedinomona abina rairui*

1 Bie llucinomo comecina raise faca. Jesucristo abido bille facaise iairei ia, creyentena illena eo sefuienite. 2 Naie facaiseconi comini dani imaci abina isiruitimaci. Ucubena ollena eo ñicidoitimaci. Abina iedoitimaci. Abina biruitimaci. Jusiñamuina eo jeare ñaitimaci. Naimaci moo uaina, naimaci ei uaina ñnoñeitimaci. Jiaie cominimo



iobillacinona jaca fecañeitimaci. Jusiñamuina jaca jitañeitimaci. <sup>3</sup> Jiaie cominina duenaiñeitimaci. Comeciaina jaiarenitimaci. Jiaie comini joreñona eo jeare ñaitimaci. Naimaci comeciaina enoñeitimaci. Ebe isoi naga rana duere finoitimaci. Mare rafuena jitañeitimaci. <sup>4</sup> Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeci jitailla rafuena finoacanitimaci. Jusiñamui rafuena isiruiñeitimaci. <sup>5</sup> “Jusiñamuina sedadicaí” raitimaci; iadedi Jusiñamui uaina jamaitimaci. Bie isoide comini diga nabairiñeno. <sup>6</sup> Naimacimona dajerie jiaie jofuemo macaritimaci, naie jofuemo ite riñoniaina jifuanona llofuellena. Diga jearede rafuena finuano, naie riñoniái ebena itimaci. Naimaci comeci iuailai raire meidocana uitimaci. <sup>7</sup> Naga lloraíma llamo naiñaiñuai cacareidimaci; iadedi uanaicinona jaca uiñoñedimaci. <sup>8</sup> Naimaci comeci eo marañede. Jusiñamui uaina ñnoñedimaci. Jannes, Mambres diga, Moisés micori lloga uai jaie uaitatíaimaiaí. Ie isoi bie comini uanaicinona birui jiaí jitañedimaci. <sup>9</sup> Nana comini naimaci rafue jamai ebe isoi finoca rafue uiñuamona, Jannes iaímaiaí Mambres rafue jaie fuilla isoi, naimaci rafue raire fuite.

### *Timoteo uanaicinona ñnuanona jaiilla*

<sup>10</sup> Timoteo, cuena uiñotio. Cue llofuiana uiñotio. Cue illana uiñotio. Cue jitailla rafuena uiñotio. Cristona cue ñnuana uiñotio. Iciríñeno fecuise lloticue. Cominina isiruiticue. Duere cue sefuia, cue comecina ocuiñoticue. Iena uiñotio. <sup>11</sup> Antioquámo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade. <sup>12</sup> Jusiñamui jitailla rafuena finuano, Cristo Jesús uaido jaidinodi duere sefuitimaci. <sup>13</sup> Ie facaiseconi marañedinodi marañede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiaí jifueitimaci. Iese jaitimaci; <sup>14</sup> iadedi cue llofuia uaido ñnocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie ñnotio. <sup>15</sup> O uruenamona Jusiñamuina mare cuegafuiaina cacadio. Naie cuegafuiaí cai jilluana caímo llote. Cristo Jesúsna cai ñnuamona, jillobidicaí. Iena caímo jai llote. <sup>16</sup> Comini nana naie cuegafuiaina cuetimaci; iadedi Jusiñamui jitailla isoi, naga cuetímie cuete. Ie jira nana naie cuegafuiaí Jusiñamuimona ite. Cominimona ññede. Ie jira naie cuegafuiamona uanaicinona uiñoticaí. Cai marañedicinona caímo llote. Cai comeciái marena illena, Jusiñamui jitailla isoi, caímo llote. <sup>17</sup> Iese llote, naimiemo cai duillamona, nana Jusiñamui

rafuena cai raise uiñollena. Raise uiñuamona, Jusiñamui rafuena raise llofuereniticaí. Naga Jusiñamui jitailla rafuena jiaí raise finoreniticaí.

#### 4

<sup>1</sup> Jiaíruido Cristo Jesúdi illaímana eníruemo abido biite. Illaíma isoi ie comínina sedajite. Naimíena iñoñenamona nia cajedínona duere finoite. Jai fiódaitínona jillotajanona, naimíena iñoñenamona, naimacína duere finoite. Jusiñamuidi birui caina jaca cíode. Cristo Jesús birui caina jaca cíode. Iena cue uiñuamona, bie uai omo lloiticue. <sup>2</sup> Naimíena iñoñedinona Cristo duere finoñellena, naimíe rafuena naimacímó jaca llono. Comíni o dafaífia, comíni ofía, comíni o díne ría, naimacímó iena lloítiosa. Naimací jitaía, llono. Jitaíñenia, jiaí llono. Jeaínona bu finoía, naimacímó llono. Marena naimací illena, naimacímó llono. Fecuíse jaca llofue. <sup>3</sup> Jiaíruido dajeríe uanaícínona jitaíñeitímaci. Jiaífuena jitaítímaci. Naimacímó daní naimací cacaacana rafuena llollena, díga llofuerainína jenoítímaci. <sup>4</sup> Uanaícínona faínonocáida, iigaiái icínuaído facajitímaci. <sup>5</sup> Timoteo, o comeína eeno. Duere o sefúa, rairuíocaiñeno i. Jesucristo rafuena llocana o jai. O llofuiacínona marena fuido.

<sup>6</sup> Jai iaírei ite cue meinellírui. <sup>7</sup> Cai Nama rafuena llocana cue jaillano, iena marena jai riídotícue. Cue illa dínorí jai fuiacade. Cai Namana faínonocaiñedícue. <sup>8</sup> Cai Nama-mona marena cue illa jira, monamo íbana feiñoitícue. Iemo jai ocuiridícue. Iena cai Nama cuejena eenote. Naimíe abido billírui mo iena feiñoitícue. Caina raise uiñuamona, dama cuemo fecañeite; íadedí nana naimíe abido billena jitaídínomo íbana jiaí fecaite.

#### *Pablo damieríena ñaía rafue*

<sup>9</sup> Timoteo, raíre cue díne bí. <sup>10</sup> Biniemo ite rafuena Demasdí eo ebiruilla jira, Tesalónícamo naimíe jaillano, cuena faínonocáide. Galaciamo Crescenedí jai jaide. Dalmaciamo Tito jai jaide. <sup>11</sup> Dama Lucas cue díga ite. Marcos o díga atí. Cuena canollena, naimíena jitaídícue. <sup>12</sup> Efesomo Tíquícóna oredícue. <sup>13</sup> O bí, cue fiebide iníroína atí. Troasmo Carpio jofomo fiebide. Cue libros atí, cue rabíaí díga. <sup>14</sup> Alejandro raillamíe navuí cuena jeare finode. Naimíedí lloeomona rana finoraíma. Cai Nama naimíemo íba oíte. <sup>15</sup> Naimíemona o abí rairuí. Naimíe cue lluaña eo jitaíñede. Iena uaitate. <sup>16</sup> Illaícomíni díne cue rafue nano cue riídoía, jaca buna cue facaína riídoñede. Nana cuena faínonocáidímaci. Jusiñamuidí naimacímó íba uana jitaíñedícue. <sup>17</sup> Cai Nama cue facaína ite. Cue comeína ocuíñotade, nana judíuáiñedinomo naimíe uai raise cue llollena. Naimíe muidona cue fiódaisaillanomona

jillobidicue. <sup>18</sup> Cai Nama naga maraiñede rafuemonā cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidicue.

*Fuiduacino*

<sup>19</sup> Diga cominimo cue uai oredicue: Priscamo, Aquilamo, Onesíforo jofomo itinomo. <sup>20</sup> Corintomo Erasto fiebide. Mile-tomo Tróximo duide fañonocaidicue. <sup>21</sup> Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentia.

<sup>22</sup> Cai Nama o começi ocuiñotajasa. Naimie nana omoina duenaillasa. Mai. Pablodice.

## TITOMO PABLO ORETAGA RABE

### *Uaiduacino*

<sup>1</sup>Tito, omo cartana oretaiacadieue. ¿Nigacino? ¿Nie isoidio? Pablodieue. Naimie cominina cue illamona, naimie jitailla rafuena cue finuamona, Jusiñamui anamo llofuecabitieue. Ie rafuena llofuellena, Jesucristo ie oretagamiedieue. Jusiñamui fetocanona inotallena, naimacina uanaicinona uinotallena, Jusiñamuina naimaci raise sedallena, cuena oretate. <sup>2</sup>Naimie diga jaca cai illemo cai ocurilla jira, Jusiñamuina sedadicaí. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede. <sup>3</sup>Iemei naimie jitaillarui caina ie rafuena jai uinotade. Naie rafuena cue llollena, naimie cuena oretate. Naimiedi cai Jilloitaraima. <sup>4</sup>Tito, bie carta omo cuetieue. Cue isoi o inua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaí ona jai duenaitiaímaiaí. Iena uinocana mai o jai. Ona uri jai itatatiaímaiaí. Iena uinocana mai o jai.

### *Creyentiaína sedaraini illacinuai*

<sup>5</sup>Nainomo ite rafue o fuidollena, Creta railla uiasimo ona faionocaidieue. Creyentiaína sedallena, naga nairai illanomo llofuerainina o fetuana navui omo llotieue. <sup>6</sup>Creyentiaína llofuerainina o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruai creyentiaína itimie. Nana comini naimie uruai mare raillamie. Naimie uruai ie uaina inotimie. <sup>7</sup>Jusiñamui facaina naimie maijia jira, creyentiaí sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena. <sup>8</sup>Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. <sup>9</sup>Naie uai raise llofuiamona comini comeciaina ocuinotallena, naimie uaina uaitatinona llicaitallena, cai llofua isoi uanaicinona inocana naimie jailla.

<sup>10</sup>Ie isoidinona feto, ailluena comini Cristo rafuena raise inoñena jira. Tainocinuaina ñaicabitimaci. Cominina jifuecabitimaci. Judíuai creyentiaimona diga comini iese itimaci. <sup>11</sup>Ie jira naimacina llicaita. Naimacidi diga cominina uri itatañedimaci. Uanañedicinona llofuetimaci, ucube bifuiano ollena. <sup>12</sup>Naimacomona comini rafuena lloraima navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillaredimaci. Rairaedimaci” raite. <sup>13</sup>Naimiedi uanaicinona llote. Ie jira creyentiaímo riire llono,

naimaci Jusiñamui uaina raise ñollesa. <sup>14</sup> Judíuai ñgaiaina naimaci ñnoñellena, comini lletarafuena naimaci ñnoñellena, naimacimo riire llono. Damierie uanaicinona jitañedimaci. <sup>15</sup> Ero, mareuidinomona naga ra mare. Jusiñamuina ñnoñedinomona naga ra jearede. Naimaci comeciaidi jai jearena jira, jeagerie comeciaina facacabidimaci. <sup>16</sup> “Jusiñamuina uiñoticaí” raitimaci; iadedi Jusiñamuina uiñoñedimaci. Naimaci finoca rafuemonona iena uiñoticaí. Jusiñamui naimacina eo gañede. Buena ñnoñedimaci. Ie jira mare rafuena finuana uiñoñedimaci.

## 2

### *Creyentiaí marena illena, uanaicinona llofue*

<sup>1</sup> Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uiñollena. <sup>2</sup> Uaicimaiaína llofue. Canamacina jiaí llofue: Jifaiñeno. ñnogamiena jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefuia, omoi comeciaina ocuiño. <sup>3</sup> Uaicíñuaina llofue. Cañaiñuaina iese jiaí llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuai mare rafuedo jaitimaci. <sup>4</sup> Naiñaiñuai inina isiruillena, naiñaiñuai uruiaína jiaí isiruillena, <sup>5</sup> uairico isoi iñellena, jearede rafuena ñnoñellena, jofomo raise maijillena, cominina duenaillena, naiñaiñuai ñniñiaí uaina ñnollena, jiaie comini Jusiñamui uaina jamaiñellena, naie cañaiñuaimona fueoitimaci. <sup>6</sup> Einamacimo llono. Coniruenimo jiaí llono: Ieñede ramo omoi comeciaina facañeno. Uairico isoi iñeno. <sup>7</sup> Tito, naga rafue o finua diese, mare rafuedo o jai. O llofuia, uanaicinona llono. Jamai ebe isoi llofueñeno. <sup>8</sup> Marena llofue. Marena o llofuia, ¿nese comini o uai uaitaitimaci? Uaitañeitimaci. Iemei o dibeimo iñedino meidaitimaci, caimo jearede rafue iñenia. Ie jira cairi ñaiñeitimaci. <sup>9</sup> Patrón anamo itinomo iese llono: Omoi patrón uaina ñno. Naimie jitailla rafuena raise fino. Naimie uaina oñeno. <sup>10</sup> Rana fiñeno. Naimie raruiaí raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai jilloitaraima.

<sup>11</sup> Jusiñamui caína duenaillena jai cai uiñua jira, naicinona llofue. Naimiedi nana cominina jillotaiacade. <sup>12</sup> Naimie uai caimo llote: “Cue dibeimo iñede rafuena eneno fañonocai. Marañede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide. <sup>13</sup> Jiaí caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai

Jusiñamui. Jiai cai Jilloitaraïma”. <sup>14</sup> Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. <sup>15</sup> Naie rafuena llofue. Maraiñede rafue comini finoia, naimacimo llono. Illaïma uai isoi llono. Cominidi o uaina jamaiñellena, raise llofue.

### 3

#### *Creyentiaï illacinuai*

<sup>1</sup> “Omoi illaïcomini uai anamo i” creyentiaïmo dane llono. Omoi illaïcomini llucinona ñno. Mare maijille ia, iena raise fino. <sup>2</sup> Jiaie cominina jeare ñaiñeno. Fuirineno. Fe-cuise uiucaï. Nana comini diga marena ñaino. <sup>3</sup> Jaië cai jiai ebe isoidicaï. Jusiñamuina ñnoñedicaï. Taife caina jifute. Dani cai comeciï jitaillacino railla isoi finouidicaï. Diga ie jearede rafuena finouidicaï. Jiaie cominina jeare finouidicaï. Marairainidicaï. Abina uradoisoidicaï. Cominidi caina enoisoidimaci. Coninina jiai enoisoidicaï. <sup>4</sup> Ie ia Jusiñamuidi maremienana jai fididicaï. Naimie caina isiruillana jiai fididicaï. <sup>5</sup> Ie mei Jusiñamui caina jillotate. Mare rafuena cai finoñedicaï; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie dibeïmo cai comeciaina dobaiñoticaï. Jusiñamui Joreño cai comeciaina marena finode. <sup>6</sup> Ie Joreño caïmo raise fecade, Jesucristo finua muidona. Jesucristo cai Jilloitaraïma. <sup>7</sup> Ie jira naimiemona marebicaïdicaï. Caina duenaillamona, marebicaïdicaï. Caina ie cominina itatate. Iemona naimie diga jaca illemo ocuridicaï.

<sup>8</sup> Tito, cue llucinodi uanaicino. Jusiñamuina ñnotino marena maijillena, cue llucinona llo-llocai. Cue llucinno mare. Ie jira nana cominidi iena cacacabillasa. <sup>9</sup> Ebena ñaiñeno. Omoi usumatiaï mameciaina jamai sia-siadoñeno. Moisés micori llogacinuaina uaitañeno. Naicino diga buena oñedicaï, Jusiñamui jitaillacinona cai finollena. <sup>10</sup> Roracomo comini comeci jiaïfocaitatimie ia, naimiemo llono: “Iena finoñeno”. Dacaiño o llamona naimie ñnoñenia, dane llono. Ie mei ñnoñenia, naimie diga omoi ñaiñeno. Naimie diga omoi nabairiñeno. <sup>11</sup> Uanaicinodo naimie jai jaiacaiñede. Jeacinona jai finode. Naimie iena jai uñnote.

#### *Fuiduacino*

<sup>12</sup> Artemas o dine cue oretaia, Tíquico o dine cue oretaia, Nicópolis railla nairaïmo are sedañeno raire bi. Nainomo rollime facaiseconi cue comeci illana jitaide. <sup>13</sup> Zenas railla abogado Apolos iaïmaïaï diga cano, iaïmaïaï oni jaiacana jira. Iaïmaïaï jitaïlle rana feca. <sup>14</sup> Dueredino ia, naimacina

canollena, creyentiaimo: “Marena maiji” jiai llono. Naimaci jamai iñellena, iese llono.

<sup>15</sup> Cue diga itino naimaci uaina omo oredimaci. Jesucristona cai inua jira, caina isiruitinomo cue uaina llono. Jusiñamui nana omoina duenaillana uiñocana omoi jaillana jitaidicue. Mai. Pablodicue.

## FILEMÓMO PABLO ORETAGA RABE

### *Filemómo Pablodí carta orede*

<sup>1</sup> Filemón, bie carta o dine oredicue. ¿Nie isoidio? Pablodícue. Jesucristo rafue cue llumona, cárcelmó iticue. O dine cue uai oredicue. Timoteo cue diga ite. Ie uai jiaí orede. Cai Moo Jusiñamuimo jai cai jainaiailla jira, naimiedi coco ama. Coco diga Cristo facaina o maijia jira, ona isiruiticoco. <sup>2</sup> Coco uaina Apiamo jiaí oredicoco. Cristo díbeimo naiñaiño illamona, naiñaiñodi coco miriño. Coco uaina Arquipomo jiaí oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiaí oredicoco. <sup>3</sup> Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoi jai. Iaimaiaí omoina uri jai itatate. Iena omoi uiñocana mai omoi jai.

### *Filemón Cristona ñnocana jaide*

<sup>4</sup> Jusiñamui diga cue ñaia, o facaina cue jiaia, naimiemo iobillacinona fecadícue. Mare rafuena o finuana cue fidia jira, naimiemo iobillacinona fecadícue. <sup>5</sup> Cai Nama Jesúsna ñnocana o jaillana fididícue. Nana creyentiaína o isiruillana jiaí fididícue. <sup>6</sup> Cristo díbeimo cai illa muidona, naimiemono diga marecinona feiñoticaí. Cristona o ñnuamona, jiaie creyentiaína o nabaia, omona naie marecinona uiñoitimaci. Naga mare ra uiñocana naimaci jaillana jitaídícue. <sup>7</sup> Cue ama, creyentiaína o isiruilla jira, iobidícue. O muidona creyentiaí comeci caimare uri illa jira, cue comeci iocire ite.

### *Onésimo facaina Pablo ñaite*

<sup>8</sup> Cue comeci iocire ite; iadedi daje rafuena o diga ñaiacadícue. Cristo uai cuemo illamona ñaiñeitícue; <sup>9</sup> iadedi conima coco isiruilla jira, o diga ñaitícue. Jai uaicimadícue. Jesucristo rafuena cue llua muidona, cárcelmóna jai ñaitícue. <sup>10</sup> Onésimo facaina ñaiacadícue. Cárcelmó cue illa facaiseconi, cue muidona Cristona naimie ñnua jira, naimie cue jítóna jaide. <sup>11</sup> Omo naimiedi marañede rafue navui finode. O mullaíma naimie illanona, raise maijñede. Bene aisiamona, Cristona naimie ñnote. Cuena birui eo canode; iadedi birui o diga raise iacade. <sup>12</sup> O dine naimiena abido oretaitícue. Dama naimiena oretañeitícue; iadedi naimiena cue eo isiruillamona cue comeciña jiaí oretaitícue. <sup>13</sup> O facaina naimie cuena birui canode. Cue diga naimie fiebillana jitaídícue; <sup>14</sup> iadedi: “Jee” o nia raiñena jira, iese finoiñeitícue. Iena omo jicañeitícue. Omo cue jicanuamona buena o finuana jitaíñedícue; iadedi dama o comeci jitailla jira, mare rafuena o finuana jitaídícue. <sup>15-16</sup> O



anamo naimie nia ite; iadedi Cristona naimie jai inua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaima; ia naimiedi jiai birui o ama. Naimiena isiruillanona feiño. <sup>17</sup> O nabaina iticuena cuena o feiñua isoi, naimiena feiño. <sup>18</sup> Naimie marañede rafuena omo navui finode. Omo naimie nia debia, cue facaina jone. <sup>19</sup> Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o inua jira, ailluena cuemo debedio. <sup>20</sup> Cue ama, coco Nama Cristomo coco jainaiaila jira, cue jitaille rafuena fino. Ie mei cue comeci uri iite. <sup>21</sup> Cue jitailla rafue o finollena uiñoticue. Cue jitailla rafue baifemo o finollena uiñoticue. <sup>22</sup> Jiaie rafuena lloiacadicue. O jofomo daje cuarto cuejena fino. Cue facaina o jia, Jusiñamui jitaia, o dine jaiticue.

*Damierie imaci uaina jiai orede*

<sup>23</sup> Omo Epafras ie uaina orede. Jesucristo rafue llua muidona, cárcelmo cue diga naimie ite. <sup>24</sup> Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide. <sup>25</sup> Cai Nama Jesucristo nana omoi creyentiai comeciaina ocuiñotajamona omoina duenaillasa. Mai. Macaibaite. Pablodicue.

## HEBREOS COMINIMO ORETAGA RABE

*Jesucristo rafuena jai cai cacajamona, Jusiñamuiña jai uiñoticai*

<sup>1</sup> Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaia orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaia orede; <sup>2</sup> iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticai. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. <sup>3</sup> Ie Jito uaido nana naie rana finocana uite. Naimie muidona Jusiñamui marena ebirenana uiñoticai. Jusiñamui marena naimie illa isoi, naimiemona Jusiñamuina uiñoticai. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

*Jusiñamui Jito Jusiñamui jaienisaí baífemo faíte*

<sup>4</sup> Jusiñamui Jitona naimie illamona, naimie illano Jusiñamui jaienisaí illano baífemo faíte. Ie illanomona naimie Jusiñamui jaienisaí baífemo faiana uiñoticai. <sup>5</sup> Jusiñamuidi: “Cue Jitodio” Cristomo llote; iadedi ie jaienisaimo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisaí ie Jito baífemo faíñena jira, ie jaienisaimo iena jaca lloñede. <sup>6</sup> Ie dajede Jito eniruemo oretaja facaiseconi Jusiñamui llote:

Nana cue jaienisaí naimiemo iobillacinona fecaja;

<sup>7</sup> iadedi jiaie rafuedo ie jaienisaia ñaite:

Cue ocuilla rafuena naimaci finollena, cue ocuilla diese naimacina oretacabiticue.

<sup>8</sup> Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

<sup>9</sup> Mare rafue finuana jitaidio.

Maraiñedinona finuana jitaiñedio.

Ie jira ona caimare jai itataticue.

Monamo o abido billanona, cue jaienisaí baífemo ona caimare itataticue

raite. <sup>10</sup> Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie  
finodio.

Mona jiai finodio.

<sup>11</sup> Bie eniruedi mona diga ico fuite.

Iniroi fuilla isoi, iñeite;

iadedi odi jaca iitio.

<sup>12</sup> Eniruena mona diga meidotaitio;

iadedi odi jaca daje isoitio.

Jaca iitio

raite. <sup>13</sup> Ie Jitomo buena lloite; ia ie jaienisaïmona damiemo  
iese lloñede. Ie Jitomo lloite:

Illaimana o illamona, cue nabei dine ana rai.

Nana o dibeimo iñedinona o anamo itataiticue.

<sup>14</sup> Ie jaienisaïmo iena lloñede; iadedi naimacina oretacabite, ie  
Jitona ñnotinona canollena. Ie jira nana naiemona, ie Jito ie  
jaienisaï baifemo faiana uiñoticaï.

## 2

### *Jusiñamui caina jillotaja rafuena cai jamaiñena*

<sup>1</sup> Jusiñamui Jito siño jitonana jira, naimie birui lloga rafuena  
eo raise cai cacajasa. Naiemona abido cai jaiñellena, naiena  
cai feitañellena, naiena eo raise cai ñnuasa. <sup>2-3</sup> Ero, Jusiñamui  
ie jaienisaïna jaie oretajanona, Moisés micorimo diga rafuena  
jaie lloite. Naie lloga rafuena bu raise finoñenia, iena bu raise  
ñnoñenia, Jusiñamui naimiena eo duere finode. Jusiñamui  
jaienisaï lloga rafue mare; iadedi Cristo birui lloga rafue  
jaienisaï jaie lloga rafue baifemo faia jira, Cristo rafuena cai  
ñnoñenia, Jusiñamui caina duere finollemona ua jilloñeiticai.  
Ero, naimie cai jeacinomona caina jillotaiacade. Naie ra-  
fuenta cai jamaia, iena cai ñnoñenia, naimie caina duere  
finollemona ua jilloñeiticai. Cai Nama Cristo naie rafuena jaie  
lloite. Naimiena cacadinodi caimo iena jai llotimaci. Cristo  
rafuedi uanaicinona llotimaci. <sup>4</sup> Jusiñamui uai diga jiaïforiede  
siño rafuena naimaci ñnuamona, Cristo rafuedi uanaicinona  
uiñoticaï. Naimie jitailla diese naga creyentemo Jusiñamuidi ie  
uaina itatate. Naga creyente naimie dibeimo raise maijillena,  
ie uaina itatate. Naga creyentemo naie uai illamona, Cristo  
rafuedi uanaicinona uiñoticaï. Ie jira naie rafuena cai ñnuasa.

### *Cai isoi illena, Jesucristo ñimana jaide*

<sup>5</sup> Jusiñamuidi ie jaienisaïna oretauide, ie jitailla rafuena  
naimaci finollena; iadedi naimaci anamo comini ico il-  
lena jaca lloñede. Cristo anamo comini ico illena lloite.

<sup>6</sup> Jusiñamuimo David micori iena jaie lloite:

Cai jamai bue isoidicaï; iadedi caimo comecina facadio.

Jamai cominidicaï; iadedi caina canodio.

<sup>7</sup> Caina cominina o finua jira, o jaienisaí isoi iñedicaí.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

<sup>8</sup> Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira. <sup>9</sup> Jesúsna dane lloiticue. Naimiena uiñoticaí. Eniruemo naimie jaie billamona,

Jusiñamui ecimona naimie billa jira, Jusiñamui jaienisaí illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamona, Jusiñamui naimiena iobitade. <sup>10</sup> Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede.

Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicaí. Naimie illanomo ico iiticaí. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena innotinodicaina jai raise canorede.

<sup>11</sup> Naimie fiodaillamona marebicaidicaí. Naimie dibeimo jai cai illa jira, daajena mooredicaí. Ie jira naimiedi: “Cue cominidomoi” caina meiruiñeno llote. <sup>12</sup> Jusiñamui facaina lloraini micoriai llogacinomona naie rafue uanaicinona uiñoticaí. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci

jaie llotimaci. <sup>13</sup> Jesúsna dane ñaitimaci:

Ie comini diga naimiedi Jusiñamuina innocana jaite.

Jusiñamui cominina damierie jailla jira, naimacidi jiai naimie comini

ñaitimaci. Naimaci ñaia isoi, Jusiñamui cominina birui jaidicaí.

<sup>14</sup> Jusiñamuina innotinodi cominina jira, cai isoi naimie illena, Jesúsdi comena jaide. Cai fiodailla isoi, naimie jiai fiodaite. Taife uaina cai innoia, jeacino finodicaí. Iemona fiodaicana jaidicaí. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui dibeimo iñenanomona jai jillodicaí. <sup>15</sup> Jesús nia fiodaiñenia, nana cai illa dinori fiodaillana jaciruicana jaidicaí. Jesús jai fiodailla jira, caina jaciruillacino anamona jillobitade. <sup>16</sup> Jeacino anamo naimaci iñena jira, Jusiñamui jaienisaímo ie comecina facañede; iadedi Abraham micori isoi innotinomo naimie comecina facade. Naimacina naimie jilloitallena, naimiedi comena jaide. <sup>17</sup> Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faiamona, naimie fueollena, naimiena

orede. Cai illana raise uñote. Iemona caina dueruite. Jusiñamui jitaillacino finuana raise uñote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamui jicanote. <sup>18</sup> Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie ñnoñena jira, caina canorede. Taife uaina cai finoñellena, cai comeciaina ocuiñotade.

### 3

#### *Jesús Moisés micori baifemo faite*

<sup>1</sup> Cue amatiai, jeacino anamo omoi jai iñena jira, ie dibeimo omoina Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena lollena, Jusiñamui naimiena orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima. <sup>2</sup> Ie Moo cominina naimie raise sedajanona, naimiedi ie Moo uaina ñnuanona, iena finode. Nana Israel cominina naimie sedajanona, Moisés micori Jusiñamui uaina ñnuanona, iena finode. <sup>3</sup> Jusiñamui mona Jesúdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúri Jusiñamui iobide. Cai jillua jira, Jusiñamui cominina jaidicai. <sup>4</sup> Buena cai finuamona, naimie cominina jaiñedicai; iadedi naimie caina ie cominina dama itatarede. <sup>5</sup> Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiemona Jusiñamui ico lolle uaidi uanaicinona uñnoticai. <sup>6</sup> Jusiñamui facaina maijianona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñnocana jaia, naimiemo caimare cai ocuiria, Jusiñamui ua cominidicai.

#### *Jusiñamui mona abido cai jaiñellena, bie rafuemona cai fueua*

<sup>7</sup> Jusiñamui Joreño caimo birui lloia, iena cacarei. Ero, Jusiñamui jaie llua cuetate:

<sup>8</sup> Omoi jaiagai isoi iñeno.

Jofue iñenanomo omoi jaiagai ia, cue uaina ñnoñedimaci.

<sup>9</sup> “Naimie uaina raise uñnoticai” raillanona, cuena facacabitimaci.

Cuarenta años cue siño finoca rana ciodimaci; iadedi jaca ñnoñedimaci.

<sup>10</sup> Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacañedomoi”.

11 Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

12 Cue amatiai, cai jaiagai rafuena cai uiñuamona, cai fueua. Uanai Jusiñamui mona abido omoi jaiñellena, naimie jai lloga rafuena omoi ñnocana jai. Omoimona bu raise ñnoiacaiñenia, naimiemo llono. 13 Jusiñamui rafuena omoi raise ñnollena, nagarui conini omoi comeciaina ocuiñota. Omoimona jeacinona ebiruiñellemona, jeacino anamo omoi iñellesa, birui Jusiñamui rafuena raise ñno. Jeacino anamo omoi dane jai, Jusiñamui rafuena ñnoñeitomoi. Iemona naimie riicaillafue anamo dane iitomoi. 14 Cristomo cai duilla jira, naimie caina jaca canu-anona, cai comeciaina marena caimare jaca itataite. Nana cai ille dinori naimiema cai nano ñnua isoi, cai ñnocana jai, marena caimare iiticaí. 15 Ie jira naimiema ñno. Bie jaie cueda: Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci cueda. Naimaci isoi iñeno.

16 Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise ñnoñedimaci. 17-18 Cuarenta años jofue iñenanomo itimaci; iadedi naimiema naimaci ñnoñena jira, Jusiñamui naimaci diga icirite. Naimiema ñnoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fiodaitimaci. 19 Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciái jaca uri illana uiñoñedimaci.

## 4

1 Jusiñamui dibeimo raise cai illamona, Jusiñamui cai comeciái birui uri illana jitaide. Naimie lloga uai nia saiñede. Caimona damerie iese iñellesa, cai jaiagai isoi cai iñellena, abina rairuicana mai cai jailla. 2 Jusiñamuidi comini comeciái uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci ñnoñena jira, iemona buena oñedimaci. 3 Jusiñamuidi cai comeciái uri illana birui caimo jai llote. Cristo ie mare rafuena jai cacadicaí. Naimie uaina cai ñnua jira, cai comeciái jai uri ite. Cai jaiagai comeciái uri iñede. Moisés micori cuiamona iena uiñoticaí. Cueda:

Naimaci diga Jusiñamui icirilla jira, naimacimo lloga eniruemo jaiñedimaci

Comeciái uri illana jaca uiñoñedimaci

cueda. Jusiñamuidi nana comini comeciái uri illana jitaide. Eniruena naimie finocamo, comini comeciái uri illana jitaide.

4-9 Iena Moisés micori jaie cueda:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote cueda. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci inoñena jira, naimaci comeciai jaca uri inede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci inoñena jira, naimaci comeciai jaca uri inede. Josué micori illa facaisemona diga años illanona, David micori comeciai uri illana jiai llote:

Naimie uaina birui omoi cacaia, iena ino

llote. Naiemona Jusiñamui cai comeciai uri illana jitaillana uifnoticai. Naimiena inotinodicaimo naie rafue jai duide.

<sup>10</sup> Jusiñamuina cai inuamona, cai comeciai jai uri ite. Cai comeciai uri illena, jiaie rafuedo jaiñedica. Naimiena cai inuamona, naimie illanomo ico iitica. Nana naimie finoca rafuena naimie fuidua mei, nainomo uri iitica.

<sup>11</sup> Cai jaiagai inoñedimaci. Cai faifñellena, naimaci isoi cai jaiñena; iadedi Jusiñamui uaina inocana mai cai jailli. Jusiñamuina cai inuamona, naimiedi cai comeciai uri itatate.

<sup>12</sup> Naimiena cai inoñenia, naimie iena uifnote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciamo riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciamo iticinona riire bairetate. Nana cai comeciaina facajacinuaina riire bairetate. <sup>13</sup> Jusiñamuimona buna reirinide. Jusiñamui nana caina ciode. Nana cai finoca rafuena uifnote. Nana cai comeciamo iticinona uifnote. Ie jira naimie uaina inocana mai cai jailli

### *Jesúdi cai facaina Jusiñamui diga nanoca ñairaima*

<sup>14</sup> Jesúdi naie uaina cai inuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena inocana jaitica. <sup>15</sup> Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi,

Taife naimie naga isoide ramo faite; iadedi Taife uaina naimie inoñede. Iemona Taife ramo faiacinona inoñenana naimie uifnua jira, jeacinona ofede. Caina canorede. “Naimacina cano” ie Moomo llocabite. <sup>16</sup> Cai facaina ie Moo abimo naimie illa jira, cai comeciaina naimie ocuiñotaiacana jira, Jusiñamuina jaciruiñeno naimiemo cai jia. Naimie caina duenaillamona, cai jeacinona feitaite. Cai comeciaina jiai ocuiñotaite.

## 5

<sup>1</sup> Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticai. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaima Jusiñamui diga ñaite. <sup>2</sup> Nana comini isoi naimiedi jeacino finuamona, comini facaina Jusiñamui diga ñairaima ñaiana raise uifnote. Jusiñamui dibeimo raise jaiñedinona fecuise canorede. <sup>3</sup> Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

<sup>4</sup> Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uifnoticai. <sup>5</sup> Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie ciegafuiaimona iena uifnoticai. David micori Jusiñamui llua jaie ciega:

Cue Jitodio. Jai o Moodicue

cuega. <sup>6</sup> Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

<sup>7</sup> Eniruemo Cristo ia, imana naimie jailla jira, duere sefuide. Naimie fiodiacana iairei ia, Jusiñamuimo eo jide. Naimie fiodaiñena Jusiñamui jillotarede; iadedi Jusiñamuimo ado llote: “Cuenta legi cacaitañeno; iadedi cue comeci jitailla isoi finoñeno. O comeci jitailla isoi fino” llote. Jusiñamui uaina naimie raise inua jira, Jusiñamui naimie jiana cacajano fairiote. <sup>8</sup> Naimiedi Jusiñamui Jito; iadedi Jusiñamui naimiena legi cacatate. Iemona Jusiñamuina inocana jaca jaillana naimie uifnote. <sup>9</sup> Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite. <sup>10</sup> Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saiñena jira, naimie ifomo illena, jiaimiena jaca fetoñede. Ie isoi Jesús uai jaca saiñede.

*Cristo dibeimona abido danomo jaiñeno*

<sup>11</sup> Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeciai iena raise jitañena jira, omoimo iena raise llonidicue. <sup>12</sup> Cristo rafuena are omoi cacaja jira, iedo omoi raise jaidomoidena, llofuerañina jaidomoi; iadedi iedo



nia raise omoi jaiñena jira, jiaimie omoina llofuiana nia jitaidomoi. Cristo dibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena inocana nia raise jaiñedomoi. Eo janorede janosa monoi ijina jitaicabide. Einamací isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonate. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. <sup>13</sup> Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñoñede. Jusiñamui jitailla isoi marecinona finuana nia uiñoñede. <sup>14</sup> Guilledí moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiaí uiñote.

## 6

<sup>1</sup> Diga icaiño bie rafuena jai cacadomoi. Cristona nano cai cacaja rafuena raise cai inuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo dibeimo caina itatañede rafuedo navui jaidicaí; iadedi cai comeciaí uai birui jai meidoticaí. Cristo dibeimo itatate rafuedo birui jaidicaí. Jusiñamuina inuamona, naimie dibeimo jaidicaí. <sup>2</sup> Cristo dibeimo bautizajana jai uiñoticaí. Llofueraimana jaillena fetuana jai uiñoticaí. Creyentiaina naimaci sedallena, naimacimo cai onolli jonianona, Jusiñamuimo cai jianona, naimaci fetuana jai uiñoticaí. Nana creyentiaí fiodaillamona jilluana jai inoticaí. Jusiñamuidi naimiena inoñedinona ico jaca duere finollena jai inoticaí. <sup>3</sup> Naie isoide rafue mare; iadedi iena cai raise inuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli. <sup>4</sup> Uanaicinona omoi comeciaí uiñuamona, Cristona omoi inuamona, Jusiñamui Joreño omoimo illamona, <sup>5</sup> Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai. <sup>6</sup> Cristo dibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitañena jira, Cristo fiodaillana jai jitañede. Cristona jeare jai finode. Cristo finoca rafuena jamaide. Cristona naimie jitañenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. <sup>7</sup> Ero, iena jiaie rafuedo lloiticue. Jusiñamui noci deitacabilla

jira, enirue naimie riaticabilla jira, iemo riana sicuanona, iena ie nama raitia, naiemona ie llisillana naimie uamona, Jusiñamui iobide; <sup>8</sup> iadedi naie eniruemona riana sicoñenia, marañede. Monaigi cuiraio diga naiemona dama sicoia, marañede. Jusiñamui nainomo noci deitate; iadedi naiemona llisillana onide. Naie enirue caimanide. Marañede. Ie nama iobiñena jira, iena fañonocaide. Naie enirue isoidomoi. Jusiñamui mona mare rafuena cacadomoi. Iena ñnocana omoi jaia, naimie omoina iobitaite. Iena omoi jitañenia, naimiemona duere sefuitomoi.

*Jusiñamui llua jira, cai comeciai ocuiñocana jaidicai*

<sup>9</sup> Cue isiruigaomoi, abi rairuillicinona omoi mo lloticai; iadedi cai llofuicino omoi mo duiñenamo cai comeciaina facañedicai. Cristona ñnocana omoi jaillamo cai comecina facadicai. <sup>10</sup> Jusiñamui omoina raise uiñote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi. <sup>11</sup> Omoi comeciaina jiaie creyentiaina omoi canua isoi, Cristo rafuedo nana omoi ille ñnori ñnocana omoi iocire jaillana jitaidicai. Naimie diga ico jaca omoi ille jira, iese omoi jaillana jitaidicai. <sup>12</sup> Cristo rafuedo omoi jaillamona omoi sefuiruiñenana jitañedicai. Jusiñamui lloga uaina ñnocana jaidino isoi, omoi jaillana jitaidicai. Naimiena naimaci ñnuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiaie oitomoi.

<sup>13</sup> Ero, Jusiñamuidi Abraham micorimo lloga uaina uiñotomoi. Naimiedi Jusiñamuina jira, uanaicinona llote. Tainona lloñede. <sup>14</sup> Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaina eo jebuitaiticue” llote. <sup>15</sup> Abraham micori naimie lloga uaina ñnote. Iena suillemo fecuise ocuride. Ie jito Isaac micori, Jusiñamui llua isoi, comuide. <sup>16</sup> Uanaicino cai llocabillana jiaie comini uiñollena, Jusiñamui mamecina llinoticaí. “Jusiñamui caina cide” lloticai. “Uanaicinona cai lloñenia, Jusiñamui caina duere finoite” lloticai. Ie jira cai lloga uaina buna uaitañede. <sup>17</sup> Ie isoide. Jusiñamuidi ie finolle rafuena cimo jai llote. Naimie lloga uai meidonillana cai uiñuana naimie jitaide. <sup>18</sup> Naimiedi Jusiñamuina jira, ie uai naimie jai llua jira, naimie tainona llonillana uiñoticaí. Ie jira naimie lloga uai naimie finuana uiñoticaí. Naimiena cai ñnuamona, naimie anamo cai illa jira, caina naimie eenua jira, cai comeciai ocuiñocana jaidicai. Naimie illanomo ico cai jaca illemo ocuridicai. <sup>19</sup> Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finollemo ñnoticaí. Monamo Jusiñamui illanomo ico cai illena eo raise

uiñoticaí. Nainomo fiebillena, barco ie lloelluna illemo dotaja isoi, cai comeciaí naganomo iñellena, Jesús caina eenote. <sup>20</sup> Jesús nainomo jai illa jira, naimie muidona nainomo jiaí iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micorí ñaia uai saiñena isoi, Jesús cai facaina ñaia uai jaca saiñeite.

## 7

*Melquisedec micorí illa isoi, Jusiñamui diga ñairaimana Jesús jaide*

<sup>1</sup> Iena omoi raise uibiñollena, Melquisedec micorí rafuena omoimo lloiticue. Naimie micorídi Salem railla nairai ie illaíma. Naimiedi comini facaina cai Moo Jusiñamui diga ñairaima. Cinco illaímana Abraham micorí anafesitaja mei, ie jofomo Abraham micorí abido billano, naisomo naimie dine Melquisedec micorí bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñotícue” llote. <sup>2</sup> Jusiñamui diga ñairaimana Melquisedec illa jira, naimiemo Abraham micorí dajerie rana fecade. Naie cinco illaímana anafesitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micorídi Salem railla nairai illaíma. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. <sup>3</sup> Naimie moona, naimie eina, naimie cominina uiñoñedicaí. Naimie jeiciaruina uiñoñedicaí. Naimie fiodailaruina uiñoñedicaí; iadedi Jusiñamui Jito isoi Jusiñamuimona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

<sup>4</sup> Ero, cai cominimona Abraham micorí cai jaiagai baifemo faite; iadedi Melquisedec micorí Abraham micorí baifemo faite. Ie jira naimiemo ie décima facaina rana fecade.

<sup>5</sup> Moisés micorimona Abraham micorí uruiá Jusiñamui lloga uaina cacadimaci. Naimacimo Jusiñamui ie sedaja jofu finuana llote. Nainomo maijidinomo nainomo maijiana llote. Abraham micorí uruiaimona Leví railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona décima facaina rana feiñouidimaci. <sup>6</sup> Melquisedec micorimo Abraham micorídi ie rana fecade; iadedi Melquisedec micorí Abraham micorí cominiñede. Leví railla nairai imieñede. Naisomo Abraham micorí dine Melquisedec micorí billanona, Abraham micorimo

marecinona llote: “Jusiñamui ona jaca canoite. O diga jaca iite” llote. <sup>7</sup> Melquisedec micori Abraham micori baifemo faia jira, naie marecinona naimiemo llote. <sup>8</sup> Ero, Melquisedec micorimo Abraham micori rana fecade; iadedi Melquisedec micori fiodaillaruina uiñoñedicaí. Naimie uai saiñena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judíuai cominidi fecauidimaci; ia naie ñairaini fiodaicana jaillana uiñoticaí. Naimaci uai sailla jira, jiaino naimaci ifomo meidoudimaci. <sup>9-10</sup> Leví micoridi Abraham jito. Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feñouidimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairai baifemo faiana uiñoticaí. Melquisedec micoridi Jusiñamui diga ñairaini baifemo faiana uiñoticaí. Melquisedec isoi Cristo illa jira, Cristodi Leví baifemo faiana uiñoticaí. Cristodi nana naie ñairaini baifemo faiana jiai uiñoticaí.

<sup>11</sup> Jusiñamui diga ñairaini finouilla rafuedo Jusiñamui jitailla isoi marebicaiñedicaí. Naimaci finouilla rafuedo cai jillobidicaidena, jiaie rafuena jitañedicaí. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiena orede. Caina jillobitallena, naimiena orede, jiaie rafuedo cai jillobiñena jira. Jusiñamui Moisés micorimo jaie llua isoi, comini facaina nano ñairaimadi Aarón micori. Naimiedi Leví railla nairai imie. Naimie jitonaiimona comini facaina ñairainina itimaci. Iena uiñotomoi. Aarón jitonaiimona Cristo iñede. Aarón maijia rafuemo Cristo duiñede; iadedi Melquisedec rafuemo duide. <sup>12</sup> Comini facaina ñairainina jaillana jai meidua jira, Jusiñamuidi naimaci rafuena jiai meidote. <sup>13</sup> Iena lloiticue. Aarondi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. <sup>14</sup> Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jaie jaca lloñede.

<sup>15</sup> Cristo billa jira, Moisés micori lloga rafue meiduana uiñoticaí. Melquisedec micori illa isoi, comini facaina ñairaimana Cristo jaca iite. <sup>16</sup> Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide. <sup>17</sup> Jusiñamui lloga uaimona iena uiñoticaí. David micori naimiena jaie cueba:

Melquisedec micori illa isoi, odi comini facaina ñairaimana jaca iitio

cuega. <sup>18</sup> Comini facaina ñairaimana jaillena Moisés micori jaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci começaina ocuiñotañedimaci. Naiedo jaillamona, naimaci Jusiñamuina nabaiñedimaci. <sup>19</sup> Naiedo jaillamona, Jusiñamui jitailla isoi marebicaiñedicai. Iedo birui jaiñedicai. Jiaie rafuemo birui ocuridicai. Cristo finoca rafue muidona, Jusiñamuina cai nabaillamona, Jusiñamui diga birui ñairedicai.

<sup>20</sup> Jusiñamui llua jira, Cristo cai facaina ñairaimana jaide. <sup>21</sup> Leví micori jitonaiidi imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetoñede; iadedi ie lloga uaina jira, Cristo cai facaina ñairaimana jaide. David micori Jusiñamui llua jaie cuega:

Cue jai llua jira, cue llua finoiticue.

Cristomo lloticue: “Comini facaina ñairaimana jaca iitio”

cuega. <sup>22</sup> Jesús ñairaimana jaca illa jira, naimie jailla rafue Moisés micori lloga rafue baifemo uaide. <sup>23</sup> Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena. <sup>24</sup> Naimie jaca illa jira, Cristo ñairaimana jaca iite. Naimie ifomo jaca buna meidoñeite. <sup>25</sup> Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui dibeimo iacadinona, naimaci jeacinomona, ua jaca jillotarede. <sup>26</sup> Caina canollena, naimie isoide nanoca ñairaimana jitaide. Ie Moo isoi naimiedi mareuidimie. Naimiemo jeacino jaca iñede. Jeacino finouidino dibeimo naimie iñede. Jusiñamuidi ie ecimo naimiena itatate. Ie jira naimie caina canorede. <sup>27</sup> Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toñiaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiai finodimaci. Cristo naimaci isoñede. Naimie jitailla jira, comini jeacino facaina naimie fiodailla jira, comini facaina dacaiño fiodaite. Naimaci jeacino facaina naimie dane fiodañeite. <sup>28</sup> Moisés micori facai ñairainidi jeacina finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

*Cristo muidona jiaie rafue birui ite*

<sup>1</sup> Cristomo ite rafuena lloiticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. <sup>2</sup> Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite. <sup>3</sup> Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fodaite. <sup>4</sup> Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. <sup>5</sup> Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofuede: “Monamo iticue; ia cue jofu eniruemo jiai finoitomoi. Sinaí railla anedu navui o ia, ona llofueticue. Ona cue llofua isoi, cue jofona fino” llofuede. <sup>6</sup> Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. <sup>7</sup> Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

<sup>8</sup> Moisés micori lloga uaina cai jaiagai ñnoñena jira, Jusiñamui jai llote:

Naie cominimo jiaie rafuena ico jairuido lloiticue.

<sup>9</sup> Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue;

iadedi Moisés micorimo cue lloga rafuedo jaiñedimaci.

Ie jira naimacina fainonocaidicue.

<sup>10</sup> Naimacimo jiaie rafuena ico jairuido lloiticue.

Iena naimaci uiñuamona, cuena raise ñnoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

<sup>11</sup> Nana naimaci cuena uiñoitimaci.

Ie jira naimacimo: “Cai Namana omoi ñno” buna niese lloñeite.

Jamai bue isoidinomona cuena ñnoitimaci.

Jamai bue isoñedinomona cuena jiai ñnoitimaci.

12 Naimacina cue duenaillamona, naimaci jeacinona jaca  
feitaiticue  
llote. 13 Jiaie rafuena Jusiñamui jai lluamona, Moisés micorimo  
lloga rafue jai saillana uiñoticaí. Moisés micori lloga rafue  
caimo jai duiñede. Cristomona jiaie rafuena birui jai ca-  
cadicaí.

## 9

*Hebreos comini Jusiñamui jofona eniruemo jaie nitimaci.  
Monamo Cristo birui illanona, Jusiñamui ecimo naimie ite*

1 Jusiñamuidi Moisés micorimo diga rafuena jaie llote. Naie  
rafuemonaca fueollena, iena lloiticue. Naimiena sedajana  
llote. Naimie sedalle jofo finuana jiai llote. 2 Jusiñamui  
llua isoi, hebreos comini naie jofona nitimaci. Jedaciede  
inroimona finoca jofona nitimaci. Naie jofo jeraimo mena  
cuartos ite. Nano fo jailla cuartomo Jusiñamuina nagarui  
sedadimaci. Nainomo lamparín isoide ra ite. Siete diga naie  
boadi ite. Mesa jiai ite. Nainomo doce llomenico joide. 3 Mena  
cuartos illena inroina sebiñoga. Naie baifemo iticuartodi  
Jusiñamui illano. 4 Naie inroi facai oromona finoca mesa  
ite. Nainomo caimare soride rana jobaisoidimaci. Baifemo  
iticuartomo cajón ite. Ie emodo oro iena jonega. Cajón  
jeraimo oromona finoca nogo ite. Nainomo ite maná railla  
fariñana eruaide guille. Aarón micori jiguida nainomo jiai  
ite. Jusiñamui uaido naie jiguida dacaño llisilla jira, nain-  
omo ite. Jusiñamui cuega nofici ibici jiai ite. 5 Cajón emodo  
ibaillabicidi ite. Ie emodomo nagafebei dine oromona finoca  
mena Jusiñamui jaienici joreño ite. Conimamo fo eruaide.  
Naie motomo Jusiñamui quenirena baireuide. Naie rafuena  
raise omoi jai uiñua jira, iena omoimo are lloñeiticue.

6 Naie isoide rana finodimaci. Iemei Jusiñamui diga  
ñairainimona damerie nano fo jailla cuartomo nagarui  
jaidimaci. Moisés micori llua isoi, nainomo ite rafuena  
finollena, iedo jaidimaci. 7 Baifemo iticuartomo jaca  
jainidimaci. Nanoca ñairaima naga año nainomo darui  
dama jaide. Jurareta faja mei, fo jaillanona, diruena naie  
cajón ibaillabicimo llerede. Dama naimie jeacino facaina  
diruena nano llerede. Chivo fajanona, dane fo jaide, ie  
comini jeacino facaina diruena llerellena. Iena finuamona,  
cominina duenaillamona, Jusiñamui naimaci jeacino facaina  
ibana oñede. 8 Jusiñamui Joreño caina llofuamona, biena  
birui uiñoticaí. Naie jofo nia ia, jamai comini fo jainina jira,  
Jusiñamui diga, cominidi atona nabairinidimaci. 9 Bie rafuena  
birui nia finodimaci. Moisés micori lloga uaido bu jaia, ie  
jeacino facaina faga toñiaina Jusiñamuimo fecallena jobaide.

Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci. <sup>10</sup> Jusiñamuina naimaci raise sedallena, Moisés micoridi diga guille fimaide. Jiruana jiai fimaide. Naimaci abiaina finollena jiai llote. Nie isoide guille, nie isoide jirole, niese naimaci abiai finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

<sup>11</sup> Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicai. Cai comeciai raise jai finobide. <sup>12</sup> Naimie fiodailla mei, dane jilluanona, Jusiñamui dine monamo naimie abide jaide. Toiniai diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate. <sup>13</sup> Maraiñede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toiniai diailla mei, jobaide toiniai ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede. <sup>14</sup> Toiniaina fañeno Jusiñamuina birui sedadica. Cristo fiodaiaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade. <sup>15</sup> Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina inotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiena bu inoia, naimie jeacino facaina Jusiñamui birui ibana oñeite. Nana Jusiñamuina inotinodi naimie jai llua isoi, naimie diga jaca iitimaci.

<sup>16-18</sup> Jusiñamui jofo jaie finua mei, Moisés micorimo Jusiñamui llote: “Cue lloga rafuena raise finodomo. Bie jofomo cuena sedallena, faga toiniai dirue diga bie jofona llereca. Nana naiemo ite rana jiai llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai



jeacinomona jai jillobidicai. <sup>19</sup> Ie cominimo nana naimiemo Jusiñamui lloga rafuena Moisés micorí llua mei, faga jurareta dirue diga, faga chivo dirue diga, nana naie lloga rafue cuegabiaina llerede. Cominina jiaí llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede. <sup>20-21</sup> Jusiñamui jofona dirue diga llerede. Nana nainomo ite rana jiaí llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”. <sup>22</sup> Moisés micorimo Jusiñamui llua isoi, raise finobillena, nana rana dirue diga llerede. Toñiaí fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

*Cristo fiodailla jira, Jusiñamui cai jeacina oni dotade*

<sup>23</sup> Jusiñamuidi Moisés micorimo toñiaína fajana jaie llote. Naie lluaña finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toñiaí baifemo faia jira, monamo cai jaca illena, jeacina oni dotallena, Cristo fiodaite. <sup>24</sup> Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. <sup>25</sup> Dacaiño cai facaina monamo Jusiñamui dine naimie jaide. Moisés micorí facaise nanoca ñairaima Cristo isoiñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toñiaína fajanona, ie diruena uite. <sup>26</sup> Cristo iese itena, nano facaise mona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite. <sup>27</sup> Nana dacaiño fiodaiticai. Iena uiñoticai. Fiodailla mei, Jusiñamui uicomo iiticai. Naimiena cai ñnoia, caina feiñoite. Naimiena ñnoñedinona duere finoite. <sup>28</sup> Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritina monamo Jusiñamui illanomo uite.

## 10

<sup>1</sup> Moisés micorí facaise naie ñairainidi Jusiñamuimo fecallena, toñiaína fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micorí lloga uaimona jeacino cai finuana uiñoticai. Jusiñamui cai jeacino oni dotajana uiñoticai. Jusiñamui jaca mareuidimiena uiñoticai. Jusiñamuina nabaillena janore uiñoticai. Cristo jiaie

rafue caino jai iga. Naimie fiodailla jira, cai jeacino jai feide. Jusiñamuina raise nabairedicai. <sup>2</sup> Naie faga toiniái Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. <sup>3</sup> Naiena fecauillamona, jeacinona finocana naimaci nia jaillana uiñotimaci. <sup>4</sup> Toiniái dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate. <sup>5</sup> Eniruemo jaie billanona, Jusiñamuimo iena Cristo llote:

Jeacino facaina toiniái fajana jai jitaiñedio.

Ie jira eniruemo comena jaillena, comini jeacino facaina cue fiodaillena, cuena oredio.

<sup>6</sup> Jeacino facaina ailluena faga toiniaina jai jitaiñedio.

<sup>7</sup> Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaie cuetimaci

llote. <sup>8</sup> Cristo lluana dane ñaiticue. Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitaiñede. <sup>9</sup> Cristodi: “Jusiñamui jitailla rafuena finuaibiticue” lluamona, Moisés micorimo llogacino jai saillana uiñoticaí. Jiaie rafue birui illana jiaí uiñoticaí.

<sup>10</sup> Jusiñamui jitailla jira, Jesucristona orede. Cai facaina naimie fiodaillena naimiema orede Jesucristo ie Moo jitaillacinona finuamona, cai jeacinomona jai jaca jillobidicai. Jai marebicaidicai.

<sup>11</sup> Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede; <sup>12</sup> iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide. <sup>13</sup> Nana naimie dibeimo iñedinona naimie emodofillemo naimie birui ocuride. <sup>14</sup> Dacaiño Cristo fiodaillamona, naimiema cai inuamona, Jusiñamuimona jaca marebicaidicai. <sup>15</sup> Jusiñamui facaina lloraima micori cuegafuemonona Jusiñamui Joreño caina iena uiñotade. Naimie facaina lloraima micori Jusiñamui lluana jaie iese cueda:

<sup>16</sup> Hebreos cominimo jiaie rafue ico jairuido lloiticue.

Cue rafuena naimaci uiñuamona, cuena raise inoitimaci.

<sup>17</sup> Jiaí cueda:

Naimaci jeacino jaca feitaicue.

<sup>18</sup> Cristo jai fiodailla jira, jeacinona Jusiñamui jai feitaja jira, faga toiniaina naimiemo fecajana dane jai jitaiñede.

### *Jusiñamuina cai nabailli*

<sup>19</sup> Cue amatiai, Jesús fiodailla jira, Jusiñamuina jaciruiño birui nabairedicai. Naimie cai Moo jai illanona, naimie diga meiruiño jaciruiño birui jiai ñairedicai. <sup>20</sup> Moisés micori facaise nanoca ñairaima fo iticuartomo jaillena, sebiñoga iniroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicai. Naimie diga birui atona nana ñairedicai. <sup>21</sup> Cristona jai cai inua jira, cai facaina nanoca ñairaimana naimie illa jira, <sup>22</sup> cai mare comeciama Jusiñamui diga birui cai ñailli. Naimiena eo cai inuamona, cai comeciai jeanillamona, naimie dibeimo cai bautizamona, naimiena mai cai nabailli. <sup>23</sup> Cristo caina jilluana inotica Monamo naimie diga cai illemo ocuridicai. Jusiñamui inogamiena jira, naie rafuena inocana mai cai jailli. <sup>24</sup> Jiaie creyentiamo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli. <sup>25</sup> Rollena omoimona damerie oficabiñedimaci. Naimaci isoi omoi iño; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaiei illa jira, naimiena raise inollena, conini omoi comeciai ocuiñocana mai omoi jai.

<sup>26</sup> Cristo finoca rafuena bu uñua mei, iena naimie inoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite; <sup>27</sup> iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo iñedinona duere finoite. <sup>28</sup> Moisés micori jaie cuega: “Jusiñamui llote: ‘Menaimie naimiena daje isoi lloillamona, Moisés micori llogacinona jamaidimiena dueruiño meinega’ ”. <sup>29</sup> Iese duere sefuillana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreño jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena inotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite. <sup>30</sup> Ero, Jusiñamui jaie llote: “Maraiñedinona bu finoa, ibana oiticue. Cuen a inoñedinona duere finoiticue” llote. <sup>31</sup> Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi iñellena, Jusiñamui lloga rafuena jamaiño.

<sup>32</sup> Creyentiaina nano omoi jaillamo dane comeciaina faca. Creyentiaifedimomona eo duere sefuidomoi; iadedi Cristona inocana jaidomoi. <sup>33</sup> Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci. <sup>34</sup> Cárcelmo jonetinona duenaillamona, naimacina canocabidomoi. Cristomo omoi duilla jira, creyentiaifedino omoi rana bairodimaci; iadedi omoi comeciai nia iocire itomoi. Omoi ramo omoi comeciaina eo facaifedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. <sup>35</sup> Jusiñamuimona iba ico omoi feiñua jira, Cristona nia inocana omoi jai. <sup>36</sup> Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia inocana omoi jai. <sup>37</sup> Jusiñamui buena llua jira, iese suite: Cristo abido billirui iairei illa jira, naimiena inocana omoi jai. <sup>38</sup> Naimie nia abido biñenia, omoina cue jai marebicaitaja jira, cuena inocana mai omoi jailli; iadedi cuena jitaifedinori iobiñedicue. <sup>39</sup> Naie isoidino jillobiñeitimaci. Naimaci isoi ifedicai. Jusiñamuina inocana cai jaillamona, jaca jillobidicai. Ie jira naimiena inocana mai cai jailli.

## 11

### *Jusiñamuina inocana jaidicai*

<sup>1</sup> Jusiñamuina cioifedicai; iadedi naimie illana inoticaí. Naimie lloga uaina inocana jaidicai. Naimie lloga uai suillena inoticaí. Ie lloga uai suillemo ocuridicai. <sup>2</sup> Cai jaiagaimona damierie iese inocana jailla jira, Jusiñamuimona marebicaidimaci. <sup>3</sup> Jusiñamui finoca rana birui cidicai; iadedi jaie nano dofoconi jaca buena ifede. Naie facaiseconi dama ie uaido Jusiñamuidi enruena finode. Mona finode. Nana rana finode. Nana rana comuitate. Iena inoticaí.

<sup>4</sup> Cai jaiagai rafuena ja lloiticue, naiemona cai fueollena. Abel micori Jusiñamuina jaie inuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise inoñena jira, naimie fecaca rari iobiñede. Iena feiñoñede. Abel micori Jusiñamuina inua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise inollena, naimiemona nia fueoiticaí.

<sup>5</sup> Enoc Jusiñamuina jaie inote. Naimiedi Jusiñamuina eo iobitate. Moisés micori ciegafuiaimona iena uiñoticaí. Jusiñamuina inuamona, Jusiñamuina eo iobitaja jira, naimie fiodaifede; iadedi fiodaifeno monamo Jusiñamui naimiena

namiena uite. <sup>6</sup> Jusiñamuina cai ñnoñenia, naimiena iobitañedicaí. Jusiñamuina cai nabaiaacania, naimiena cai raise sedaacania, naimie illana ñnoticaí. Naimiena cai nabaiaacania, cai jitaí raillano, caina canollena ñnoiticaí.

<sup>7</sup> Noé micorí Jusiñamuina jaie jiaí ñnote. Jusiñamui ico suille rafuena naimiemo llote. Enirue buillena llote. Iena ñnuanona, Noé micorí aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui lluana Noé micorí ñnua jira, jillode. Noé micorí Jusiñamui lluana ñnote; iadedi naimie facaise ite comini ñnoñena jira, Jusiñamui ricai llafue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micorí marebicaide.

<sup>8</sup> Abraham micorí Jusiñamuina jaie jiaí ñnote. Ie moo eniruemona naimie jaianillena Jusiñamui naimiemo llote. Are ite eniruemo naimie jaianillena llote. “Jiaie enirue omo iiticue” Jusiñamui llote. Abraham micorí ñnote; iadedi ie jaillinona uiñoñede. <sup>9</sup> Jusiñamui lloga eniruemo Jusiñamuina ñnocana jaide. Naie eniruemo ride; iadedi naie enirue naimiemo nia raise duiñede. Chivo itiraimona niga iniroimona sebiñoa jofomo naimie jaca ite. Ie jito, Isaac micorí, naie isoide jofomo jiaí ite. Isaac micorí jito, Jacob micorí, naie isoide jofomo jiaí ite. Jusiñamuidi nana naimacimo daje isoide rafuena llote: “Bie enirue omoimo iiticue” llote. <sup>10</sup> Abraham micorí mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

<sup>11</sup> Abraham micorí aidi Sara micorí. Jusiñamuina Sara micorí ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana ñnote. <sup>12</sup> Abraham micorí jiaí eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicaí. Ailluena conillie illa jira, iena facadonidicaí. Ie isoide. Eo ailluena Abraham micorí uruiaí illa jira, naimacina facadonidicaí.

<sup>13</sup> Abraham micorí, Isaac micorí, Jacob micorí Jusiñamuina ñnocana jaidimaci. Nana naimacimo Jusiñamui lloga uaina suiñedemo fiodaitimaci. Nia fiodaiñenia, Jusiñamui llogacinona cacadimaci. Iena ñnotimaci. Ie jira bie eniruemo naimaci jaca illemo comecina facañedimaci; <sup>14</sup> iadedi monamo jaca illemo comeciaina facadimaci. <sup>15</sup> Naimaci jaie billa eniruemo comeciaina naimaci facadena, nainomo abido jaidimaci; <sup>16</sup> iadedi jiaie illanomo comeciaina facadimaci.

Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

<sup>17-18</sup> Jusiñamuina Abraham micori ñnua jira, ie jitona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micori naimiena ñnuana raise uinollena, facacite. “O jitona fano” Abraham micorimo llote. Abraham micori Jusiñamuina ñnuanona, ie jito faiacade. <sup>19</sup> Ie jito fiодaillemona, Abraham micoridi Jusiñamui naimiena jilloitalena ñnote. Isaac micori fiодaiñede; iadedi fajamona jillode.

<sup>20</sup> Isaac micori Jusiñamuina jiai ñnote. Naimie fiодaiacania, Jusiñamui ie llogacino finollena ñnuamona, mena ie urue iaimaiamo ie uaina fecade. Llote: “Jusiñamui llua isoi, jebuicana jaitomico”. <sup>21</sup> Jacob micori Jusiñamuina jiai ñnote. Naimie fiодaiacania, Jusiñamuimo jianona, ie jiguidamo juita naidaidemo, José micori ie mena urue iaimaiamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomico. Naimie omicono canoite” llote. <sup>22</sup> José micori fiодaiacania, ie cominimo llote: “Jusiñamui omoina canuano, Egiptomona ico jiairuido omoi jaillena ñnoticue. Omoi jaia, cue illaiciaina omoi diga uino. Canaan railla eniruemo omoi ria, nainomo cue illaiciaina raino”.

<sup>23</sup> Moisés micori moo, ie ei diga Jusiñamuina jiai ñnotiaimaiai. Hebreos comini jebuinellena, naie facaiseconi Egipto illaima nana hebreos isaiaina meiniana llote. Iaimaiai jito jecia mei, iaimaiai uruena daje amani fivui reidiaimaiai. Jusiñamuina ñnuanona, naimie maresana erualla jira, jaciruiñeno naimiena jofomo fo reide. Illaima lluamona Jusiñamui naimiena jillotajana ñnotiaimaiai. Ie jira Faraón jisa anamo comuide. Faraón di Egipto nairai illaima. <sup>24</sup> Moisés micori Jusiñamuina ñnote. Naimie eimienamona, naimiedi Faraón jisa ie jitona mameciarecañede; <sup>25</sup> iadedi naimiedi Jusiñamui naimiena ie cominina Egiptomona jillotajana ñnote. Jusiñamui naimie fetua jira, ie comini dibeimo naimie iacade. Ie comini diga duere sefuiacade. Jusiñamuina ñnoñedino diga ie comeci jamai iobitaiacaiñede. <sup>26</sup> Faraón jisa anamo naimie comuilla jira, naimiemo eo aillue rana ite; iadedi Egiptomo ite ebirede ramo ie comecina eo facañede. Jusiñamuimona iba naimie ico feiñoiacana jira, Jusiñamui jito billemo ie comecina facajano, duere sefuide. <sup>27</sup> Ie jira Egiptomona Moisés micori Faraóna jaciruiñeno oni jaide.

Jusiñamui naimiēna eenuana ñnote. Jusiñamuina cioñede; iadedi Jusiñamui illana naimie ñnua jira, ñnocana jaide.

<sup>28</sup> Jusiñamui ie cominina jillotajana Moisés micori ñnua jira, Jusiñamui llua isoi, pascua railla rafuena finode. Ie cominimo toica llauda fallena llote. Ie dirue nase fuemo jidellena llote. Naie naio Jusiñamui jaienicí nana nano doforanina meinesiñellena, Jusiñamui llua finodimaci. <sup>29</sup> Egiptomona naimaci billa mei, jiairede railla monaillai ruica dine jaillena, Jusiñamuina ñnotimaci. Jusiñamui Moisés micorimo llua naimaci ñnuamona, jinui metodo saferedifodo ruica jaidimaci; iadedi Egipto soldaduai daje isoi ruica jiaicadimacimo, nana corobaitimaci.

<sup>30</sup> Canaán railla eniruemo hebreos comini rilla mei, Jericó railla nairai dine ridimaci. Jusiñamuina ñnuanona, Jusiñamui llua isoi finodimaci. Siete digarui Jericó ecimo naimaci macarilla mei, Jusiñamui llua isoi, naie llaigafo ana bijide. Naie nairaina emodofidimaci. <sup>31</sup> Naie facaiseconi Jericómo Rahab micori fiodañede. Naiñaiñodi callirediñaiño. Nana Jericó comini Jusiñamuina ñnoñena jira, fiodaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comini iaimaiana naiñaiño feiñua jira, Jericó nairaina emodofilla facaise naiñaiñoña meineñedimaci.

<sup>32</sup> Diga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefe micori, David micori, Samuel micori Jusiñamui facaina jaie llorainina jiai eo cueñeiticue. <sup>33</sup> Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaia isoi jiaino naimaci cominina raise marena sedadimaci. Jusiñamui llogacino suillana ciodimaci. Leones naimacina riacanamona damierie jillode.

<sup>34</sup> Iraimo usillamona damierie jillodimaci. Lloebi diga meiniamona damierie jillodimaci. Jiaino jamai bue isoidino; iadedi jamai bue isoiñedinona jaidimaci. Jobaime raise finuamona, jiaino imaci bacuai soldaduaina judaisitade.

<sup>35</sup> Dañaiñorie riñoniaimona uruai fiodailla mei, fiodaillamona Jusiñamui damieriena jillotate. Illaicomini mona jiaino duere fiodaitimaci. Jusiñamuina fañonocaiñena jira, naimacina meinetimaci. Naimaci fiodaiacania, monamo Jusiñamui diga ico jaca illena naimaci ñnua jira, Jusiñamuina fañonocaiñeno fiodaitimaci. <sup>36</sup> Jiaino duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damieriena maianona,

cárcelmo jonetimaci. <sup>37</sup> Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaino buenidimaci. Naimaci iniroi jamai igoí ie. Dueredimaci. Naimaci iniroi raise iñede. Aime guisoidimaci. Jiaie cominimona duere sefuisoidimaci. <sup>38</sup> Jiaie cominimona jamai bue isoidimaci; iadedi Jusiñamuimona jamai bue isoñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai biita inuuidimaci. <sup>39</sup> Jusiñamuina inocana jaidimaci. Naimaci finoca rafuemonu Jusiñamui comini naimaci illana uinotici. Jusiñamuina inotimaci; iadedi nana naimacimo Jusiñamui lloga rafue naimaci illa facaise suiñede. <sup>40</sup> Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodailla Cristona jai orede. Ie cominina birui cai jiai jailla, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

## 12

### *Jesús finoca rafuemo cai comeciaina cai facalli*

<sup>1</sup> Cai jaiagai Jusiñamuina inocana jailla uinotici. Ie jira caidi naimaci isoi, Jusiñamuina inocana birui mai cai jailli. Marena riire cai aisiacania, ailluena rana abiñedici. Ie isoide. Jeacinona cai finoñellena, naimiena raise cai inollena, jeacino finuacinona mai cai faionocaiilli. Nie isoide rafue caimo ia, Jusiñamui jitaillacinona finocana mai duere cai jailli. <sup>2</sup> Jesús finoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuinotajanona, Jesúsna inotici. Cruzmo marañedimie isoi fiodaite. Fiodaillamona jilluana naimie uinuumona, naimie fiodaite. Ie Moo ecimo dane illena naimie uinuumona, iocire fiodaite. Illaimana naimie illamona, ie Moo ecimo birui ite. Jesúsno cai comeciaina facajamona, caimare mai cai jailli. <sup>3</sup> Jusiñamui dibeimo inedinomona Jesús eo duere sefuide. Ie isoi cai duere sefuia, Jesúsno cai comeciaina facajamona, cai comeciaina ocuinotacana mai cai jailli. <sup>4</sup> Jusiñamui dibeimo inedinomona duere sefuillamona, Jesús isoi duere nia sefuinedomoi. Omoína nia meineñedimaci. <sup>5</sup> Duere omoi sefuia, bie jaiie ciegafuiaina feitaño. Naimie cominina omoi illamona, Jusiñamui llote:

Cue uruiái, omoína cue duere finoiá, cuena nia ino.

Duere sefuillamona, cuena faionocaiño.

<sup>6</sup> Omoína cue isiruillamona, omoína duere finodicue.

Cue dibeimo omoína raise itatallena, omoína duere finodicue.



Nana cue cominina cue llofuecabillamona, naimacina duere finodicue llote. <sup>7</sup> Naimie jitaillacinona cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillacinona finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillacinona cai finollena, caina duere finocabide. <sup>8</sup> Caina inotallena, Jusiñamui caina duere finoñenia, naimie cominiñedicaí. Naimiedi nana ie cominina duere finocabide. <sup>9</sup> Cai eniruemo ite cai mootiaí caina duere finoia, naimaci uaina inoticaí. Ie isoide. Cai Moo Jusiñamui caina isiruillamona, caina duere finoia, naimie uaina cai inua. Naimiena cai inuamona, monamo naimie diga ico jaca iiticaí. <sup>10</sup> Naimaci comeciaí llua isoi, cai eniruemo ite mootiaí dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue díbeimo caina itataiacade. <sup>11</sup> Jusiñamui mona duere cai sefua, iena gaiñedicaí. Iena jitaíñedicaí; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

*Jusiñamui rafuena cai cacaia, iena cai aruiruiñena*

<sup>12</sup> Nie isoide ramo caimo jiria: “Jusiñamui caina nibaí canoñede” raiticaí. Iemona naimiena fainonocaiacadicaí; ia iemo cai comeciaína cai facañena. Jusiñamui rafuena cai sefuiruia, duere cai sefua, nie isoide rafue caimo ia, cai comeciaína ocuiñocana mai cai jailli. Jusiñamui caina canuamona, naimiena cai raise inuamona, cai comeciaí ocuiñocana mai cai jailli. <sup>13</sup> Jiaie rafuedo cai jaiñena; iadedi Cristo rafuedo raise inocana mai cai jailli. Iese cai jaia, Cristo rafuedo naimaci jiaí raise jaillena, jiaie creyentiaina canoiticaí. <sup>14</sup> Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. <sup>15</sup> Jusiñamui caina duenailamona, nana cominina jillotaiacade. Omoimona buna Jusiñamui duenailacinona fainonocaillana jitaíñedicue. Omoimo iese sua, iemona conini gaiñenacino comuirede. Iena jitaíñedicue. Omoi comeciaí daje isoi lloillana jitaídicue. <sup>16</sup> Jearede rafuena jaca finoñeno. Esaú micorí jaie finoca rafuena uiñotomoi. Jusiñamui ie moo Isaac micorímo mare rafuena suillena llote. Esaú nano doforamiena illamona, ie moo fiódaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiódaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade.

17 Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiñeno.

18 Moisés micori facaise cai hebreos cominimo Jusiñamui ie rafuena jaie llote. Sinai railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude. <sup>19-20</sup> Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toinia; nainomo macaria, nofici diga fairinuamona, naimiena omoi meine” llote. Jusiñamui llua cacajamona, eo jaciruitimaci. Moisés micorimo: “Jusiñamui caimo nia llua jai jitaiñedica;” llotimaci. <sup>21</sup> Eo jacirede ra illa jira, nana comini diga Moisés jiai jaciruite. <sup>22</sup> Sinai anedumona lloga rafuedo birui jaiñedica; iadedi jiaie rafuedo birui jaidica. Birui Jusiñamuina atona nabaidica. Cai hebreos comini isoi, Sióñ railla anedumo Jerusalémo Jusiñamui jofomo naimiena nabaillena jaiñedica. Monamo Jusiñamui ite; iadedi birui naimiena atona nabairedica. Cai fiodaia, naimie dine jaitica, naimie diga jaca cai illena. Nainomo ie jaienisai naimiemo iobillacinona fecacabidimaci. <sup>23</sup> Ailluena comini diga, Cristona birui inotica. Nana caina Jusiñamui fetuanona, cai mameciai monamo ite rabenicomo jai cueda. Jusiñamui nana comini comeciaina uiñote. Naimiena inotinomona ailluena jai fiodaitimaci; ia naimie ecimo naimaci joreñuai jiai jai itimaci. <sup>24</sup> Jesús fiodailla jira, Jusiñamuina nabairedica. Naimie fiodailla jira, caimo jiaie rafue birui ite. Naie rafuena cai inuamona, cai comeci jai marena itica. Jiai cai jeacinona oni dotade. Iena jiai jai feitate. Abel micori jaie fiodaia, naiemona Jusiñamui buna ie jeacinona feitañede; iadedi Jusiñamui Abel micori meinetimie mo ibana ote.

<sup>25</sup> Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaino iena jitaiñedimaci. Iena inoñedimaci. Ie jira Jusiñamui naimacina duere finode. Cristomona jiaie rafue birui cacadica. Bie rafuedi Moisés lloga rafue baifemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai inua. <sup>26</sup> Moisés micorimo ie rafue llua facaise, Jusiñamui naie eniruena niraidotade. Jusiñamui jairuido jiai llote: “Eniruena dane niraidotaiticue. Ucuaina, fivuina, jitoma

diga, jiaí niraidotaiticue” llote. <sup>27</sup> Naimie lloga uaimona enirue fuillena uiñotícaí. Monamo ite ra fuillena jiaí uiñotícaí. Nana naie rana naimie fuidoite; iadedí naimiena caí ñnua jira, naimie caina fuidoñeite. Ico caí illinona jai finode. Iena naimie fuidoñeite. <sup>28</sup> Illaimana naimie illamona, naimie caina sedaite. Ie jira naimiemo iobillacinona caí fecaja. Naimiena caí ñnuamona, naimiena caí raise sedajamona, naimiena caí iobitaja. <sup>29</sup> Naimiena ñnoñedinona Jusiñamui eo duere finolle jira, naimiena jaciruillanona naimiena caí ñnua.

## 13

### *Jusiñamuina caí iobitaja*

<sup>1</sup> Dani conini jiaie creyentiaína isiruicana omoi jai. <sup>2</sup> Abraham micorí Jusiñamui jaienisaína uiñoñeno jaie nafuete. Jiaie illanomona jiaie creyentiaí bia, naimaci ñillino iñena jira, naimacina nafue. Jusiñamuimona ibana feiñoitomoi. <sup>3</sup> Cristo rafue muidona damierie creyentiaí cárcelmo itimaci. Nainomo omoi jiaí itomoidena, naimacina feitaño. Naimacina isiruillamona cano. Damierie creyentiaí duere sefuia, naimacina jiaí cano. Jiaíruido naimaci isoi ñibaí duere sefuitomoi. <sup>4</sup> Airedimie jiaie riño diga illemo ie comecina facañena. Inirediñaiño jiaie ñima diga illemo ie comecina facañena. Ie añede riño diga bu ia, ie ñiñede ñima diga bu ia, marañede. Iena finoño. Iena bu finoia, ie jecino Jusiñamuimo lloñenia, Jusiñamui naimiena duere finoite. Naiñaiñoña jiaí duere finoite. <sup>5</sup> Ailluena ucube ollena, iemo ñicño. Omoimo ite ra diga caimare i. Iena Jusiñamui facaina lloraíma jaie cuela: “Jusiñamui llote: ‘Omoína jaca canoiticue. Omoína jaca fainonocaiñeíticue’ llote”. <sup>6</sup> Naiena caí uiñuamona, caí comeciána ocuiñoíticai. Jaie cuela fue isoi lloíticai: Cai Nama caina canoite. Ie jira caí comeciái jarire finoñeíticai. Buena jaciruiñeíticai. Jiaímie buena caina jaciruitanide.

<sup>7</sup> Cristo rafuena omoimo navui lloganomo omoi comeciána faca. Naimacimona Cristo rafuena nano cacadomoi. Cristo díbeimo naimaci illamo omoi comeciána facajanona, naimaci isoi Jesucristona ñnocana mai omoi jai. <sup>8</sup> Naimie jaca ñnogamiéna uiñotícaí. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiena caí ñnua. <sup>9</sup> Cristo ieñede rafuedo jaiño. Diga jiaie llofuiacino ite; iadedí iedo jaiño. Jusiñamui caina canuamona, caí comeciána birui ocuiñocana jaiticai. Moisés micorímo lloga rafuedo navui jaidicai. Diga ra fimaide; iadedí naiedo caí jaillamona, caí comeciái raise illena, buena

oñedicai. <sup>10</sup> Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. <sup>11</sup> Moisés rafue llua isoi, nanoca ñairaima toiniaina faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide. <sup>12</sup> Ie isoide. Cristona comini jitaiñena jira, ie comini nairaimona jino uillanona, naimiena meinetimaci. Nainomo jeacino facaina fiodaite, comini comeciaina raise finollena. <sup>13</sup> Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca ñnocana cai jailli. <sup>14</sup> Beno jaca cai illemo ocuriñedicai; iadedi monamo Jusiñamui diga cai jaca illemo ocuridicai. <sup>15</sup> Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja. <sup>16</sup> Marecinona finocana mai cai jailli. Jiaie creyente jitai raillano, omoi raruiaimona naimiena omoi cano. Iena omoi finoia, Jusiñamui omoi iobite.

<sup>17</sup> Omoi llofueraini uaina ñno. Naimaci anamo raise omoi i. Cristo dibeimo omoina raise itataicadimaci. Iese naimaci finoacaiñenia, Jusiñamui naimacina duere finoite. Naimaci uaina omoi ñnoia, Cristo dibeimo caimare maijuitimaci. Naimaci uaina omoi ñnoñenia, sunaitimaci. Sunailla jira, naimaci llofuiacinomona buena oñeitomoi.

<sup>18</sup> Jusiñamui diga omoi ñaia, cai facaina omoi jii. Jusiñamuimona cai comeciai marena illana uiñotica. Naimie jitailla isoi, mare rafuena finocana jaiacadicai. <sup>19</sup> Omoi dine cue raire illena cue facaina Jusiñamuimo eo omoi jii.

### *Naimaci marena jaca illana jitaide*

<sup>20</sup> Jusiñamui conini omoi comeciaina uri itatajana jitaidecue. Cai Nama Jesús fiodailla mei, Jusiñamui naimiena jai jil-lotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede. <sup>21</sup> Jusiñamui ie jitaillacino omoi finuana canoite. Cristona omoi ñnuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidecue.

<sup>22</sup> Cue amatiai, bie cartana caimare feiño. Eo are rafuena cueñedicue. Janore cueticue. <sup>23</sup> Cai ama Timoteo cárcelmona jai jino bite. Cue dine naimie raire bia, omoi dine naimiena atititue. <sup>24</sup> Nana omoi llofuerainimo cue uaina oredicue. Ua nana creyentaimo cue uaina oredicue. Itaiamona bitino

imaci uaina jiai oredimaci. <sup>25</sup> Jusiñamui omoina jaca duenail-  
lana omoi uñuana jitaidecue. Mai. Macaibaite.

## SANTIAGO ORETAGA RABE

### *Uaiduacino*

<sup>1</sup> Caimaci, omoimo cartana oredicue. Santiagodice. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoimo cue uaina oredicue.

### *Ramo omoi jiriadedi, omoi comeciaina mairita*

<sup>2</sup> Amatiai, diga ie ramo omoi jiriadedi, eo iobilla. <sup>3</sup> Ramo omoi jiriadedi, Jusiñamui uaina raise omoi inuana uifnoitomoi. Iemona omoi comeciai mairillemona, inocana omoi jaitomoi. Biena omoi uifua jira, iobilla. <sup>4</sup> Mairicana omoi comeciai jaia, omoi comeciadi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo inoitomoi; <sup>5</sup> iadedi omoimo rafue ia, niese nibaiana omoi uifnoñenia, Jusiñamuimo jica. Ie mei omoimo naimiedi abi uifnoracinona iite. Jusiñamuidi nana naimiemo llotinomo iena caidifno icabilla jira, omoimo iena jiai iite; <sup>6</sup> iadedi omoi jicaia, uai inuanona jica. Omoi comeciai inoñenia, jicañeno. Comecina inoñedimiedi aifi betaja jorai isoide. Naimie comeci naganomo ite. <sup>7</sup> Naimiedi Jusiñamuimona ra feifnollemo tainona sedaite. <sup>8</sup> Naie isoidimiedi nana naimie illa dinori ie comeci naganomo iite.

<sup>9</sup> Naimie ramo jiriadedi, Jusiñamuimona naimie jamai bue isoifna jira, duerede creyente iobilla; <sup>10</sup> iadedi ramo jirillamona ie ucubena naimie faifia, Jusiñamuimona naimie ucubedi ieifna jira, ucuberede creyente iobilla. Safia isoi, naimie ico safenaite. <sup>11</sup> Jitoma a ia, eo ecasillamona, safia safenaite. Llide. Ie mei jai ebinide. Jai ifede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

### *Nana mare rafue Jusiñamuimona feifnoticai*

<sup>12</sup> Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuenaisiruitinona cue illanomo jaca itataitice”. <sup>13</sup> O ramo bu faia, llofno: “Jusiñamuidi cuena ramo faite”. Maraiñede rafue difeimo naimie ifna jira, naimiedi buna ramo jaca faifede. <sup>14</sup> Cai comecimo naie jitaillacino illa jira, ramo faia uai ifnoticai. Naie facaiseconi caimona ebirena jirari, iena

finoacadicaí. <sup>15</sup> Cai jitailla jira, jeacinona finodicaí. Jeacinona finocabillanona jaillano, faifiticaí. <sup>16</sup> Ero, cue isiruiga amatiaí, Jusiñamui omoína ramo faitatañena jira, naimiemona da mare rafue billa jira, daní omoí abina jifueño. <sup>17</sup> Nana mare rafue caí Moomona feiñoticaí. Naimiedi monamo ite lligaiñoraniaina jaie finode. Naie radií nagarui daje isoi lligaiñoñede; iadedí naimie daje isoíñede. Naimie começi jacanano danocni nagarui ite. <sup>18</sup> Naimie jitailla jira, ie uai llano, naimie caína ie uruiaina itatate. Ie uruiaimona nano doforanidicaí.

### *¿Nie isoide rafuena finoacadicaí?*

<sup>19</sup> Cue isiruiga amatiaí, Jusiñamui rafuemo raise cacarei. Ie mei naie uaina uaitañeno. Jiaí raire iciriñeno. <sup>20</sup> Icirillamona, Jusiñamuidí caí marena jitailla isoi, buna jaca marebicaiñede. <sup>21</sup> Ie jira nana maraiñedicinona oni faínonocai. Jusiñamui uai omoí começimo fecuise abí iedoño nagarui feiñocana omoí jai. Naimie ie uai omoí começimo jai itatate, iduai eniruemo caí rilla isoi. Iduai sicuamona, llisilladí ite. Jusiñamui uai caí começiammo itabillamona, caína jillotarede. <sup>22</sup> Cacajamona iena ñnocana jai. Cacajanona iena omoí ñnoñenia, daní abina jifuetomoi. <sup>23</sup> Bu naie uaina cacajamona ñnoñenia, naimiedi acaranimmo eruaídime isoide. <sup>24</sup> Ie uiecona eruaide. Naimie jailla meinoconi, ie eruailla ie uiecona jai raire feitate. <sup>25</sup> Jusiñamui llogacinona bu eo facajia, iena feitañede. Iena ñnote. Naie uaidí jearedicino ie finuamona naimiena marena itatate. Jusiñamui uaina naimie feitañena jira, iena ñnua jira, naimie começi caimare ite.

<sup>26</sup> “Jusiñamuina sedadicue” raillanona ie começina facadimiedi jeare ñaia, maraiñoño ñaia, dama naimie abina jifute. Jusiñamuina taino sedade. <sup>27</sup> Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiaí finoacaiñeite. Jusiñamui díbeimmo iñedino isoi iacaiñeite. Jusiñamui naimie iese sedajia, Jusiñamuimona eo mare.

## 2

### *Nana cominimo começiaína lloitaicadicaí*

<sup>1</sup> Amatiaí, caí Nama Jesucristo uai eo ebirede. Naimiena omoí ñnua jira, naimacimmo daje isoi começiaí lloillamona, nana cominina daje isoi nafue. <sup>2</sup> Ero, omoí roracomo mena ñima bia, ¿nie ñimana nafueitomoi? Damie ucuberedime. Naimiemo oro ie anillos ite. Eo mare ñinroina jítade. <sup>3</sup> Ucuberedimiemo llotomoi: “Baí bene bancomo raí”. Dueredimiemo llotomoi: “Baí bene naidai. Raiacania,

eniruemo rai”. <sup>4</sup> Iese omoi lloia, damiena jai raise nafuetomoi; ia damiena jai raise nafueñedomoi. Iaimai iniroimo omoi eruailamona, nafuetomoi. Mare rafuemo comeciaina facañedomoi.

<sup>5</sup> Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo inua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. <sup>6</sup> Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomoi. Ucuberedinomona duere sefuicabidomoi; ia ucuberedimiena raise nafuetomoi. Majitallena, juez dine ucuberedino omoina uitatatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci. <sup>7</sup> Cristomo omoi jainaiailamona, ucuberedino naimiena jeare jiai ñaitimaci.

<sup>8</sup> “Cristo llogacino finodicai” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofo ecimo itinona isirui, dama o abina o isiruilla isoi”. Iese omoi ia, cuemona mare; <sup>9</sup> iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinona inoñedomoi. Jusiñamui llogacinomona jai marañeno itomoi. <sup>10</sup> Nana Jusiñamui llogacinuaimona daje llogacinona omoi inoñenia, Jusiñamuimona nana naie llogacinuaina jai inoñedomoi. <sup>11</sup> Jusiñamui caimo jai llote: “O añede riño diga iñeno. O iniñede ima diga iñeno”. Jiai llote: “Jiamiena meineño”. O añede riño diga iñedio; iadedi jiamiena o meineia, nana Jusiñamui llogacinuai jai inoñedio. <sup>12</sup> Jiairuido Jusiñamuidi juez isoi omoimo lloite. Omoi comeciaino iticino diese omoimo lloite. Ie jira marena ñaino. Marena i. <sup>13</sup> Ero, omoimo naimie lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaite. Duere sefuillena omoimo lloñeite.

*Jusiñamuina cai inuamona, diga rafuena cai finua*

<sup>14</sup> Amatiai, “Jusiñamuina inoticue” raitimiedi mare rafuena jaca finoñenia, ¿niese naie inoracinodi naimiena jillotaite? Jillotañeite. <sup>15</sup> Jiaie rafuedo iena lloiticue. Omoimona daje creyente iniroinia, guille iñenia, <sup>16</sup> naie creyente omoi dine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? <sup>17</sup> Ero, Jusiñamui omoi



#nuamona mare rafuena omoi finoñenia, omoi #noracino ieñede. <sup>18</sup> Omoi mona damie cuemo nibai lloite: “Jusiñamuina raise #noticue”. Jiaimie cuemo nibai lloite: “Mare rafuena finocabidicue”. Iaimaiaimo lloiticue: “Jusiñamuina cai raise #noia, mare rafuena finocabiticai. Mare rafuena cai finuamona, Jusiñamuina cai raise #nuana uiñoitica”. <sup>19</sup> Dajede Jusiñamuidi illana #notio. Iena o #nuano, mare; iadedi jananiai iena jiai #notimaci. Ie jira Jusiñamuina jaciruitimaci. <sup>20</sup> “Jusiñamuina raise #noticue” nibai nia raitio. Abina raise nia uiñoñedio. Mare rafue o jiai finoñenia, dama abi o #noracinodi ieñede. <sup>21</sup> ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. <sup>22</sup> Abraham micori #note. Mare rafuena jiai finode. Mare rafue naimie finuamona, naimie jai raise #note. <sup>23</sup> Iemona Jusiñamui ie llogacino suide. Iena Moisés micori cuete: “Abraham micori Jusiñamuina #note. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. <sup>24</sup> Abraham micori rafuemona daje rafuena uiñotica. Dama ie #noracino diga jaca bu marebicaiñede; iadedi Jusiñamuina #nuano, mare rafuena finuano, marebicaide. <sup>25</sup> Jiaie rafuedo iena lloiticue. Jai Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiaina feiñote. Naiñaiño nairaidi iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide. <sup>26</sup> Ero, bumio ie joreño jai iñenia, cajeñede. Ie isoide. Mare rafue bu finoñenia, ie #noracinodi ieñede.

### 3

#### *Cai fuiaimona jeacinodi comuide*

<sup>1</sup> Amatiai, omoi mona diga comini creyentiaina llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise #noñenia, Jusiñamui naimacina jiaino baifemo duere finoite. Iese riire naimacimo lluaña jaciruillano, llofuerainina ailluena jaiñeno. <sup>2</sup> Nana caidi diga marañede rafuena finocabidicai. Marañedicinona bu ñaiñenia, jai marebicaide. Naimie nana ie comeci namarede. <sup>3</sup> Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadica. <sup>4</sup> Riire aifi aillue botena nine uiacade; iadedi eo janorede quilla diga,

ie jailla dine piloto botena dataoicaide. <sup>5</sup> Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate. <sup>6</sup> Cai fuiaidi irai isoide. Caimo jeacinona eo finotate. Nana cai comeaiaina jearetatate. Taifemona ie uai ote. Nana cai ille dinori caina jearedicinona finotaiacade.

<sup>7</sup> Nana rana toiredicai: ocainai, sillini, ofomai, eniruemo bicaidino, lliciai. Nana toiredicai; <sup>8</sup> iadedi jaca bu ie fuena namatanide. Cai fuiai jaca eo maraifede. Iemona eo maraifede rafue icabite. <sup>9</sup> Cai fuiai diga cai Namamo, ua cai Momo, marecinona lloticai. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai. <sup>10</sup> Cai fuedi dajede; iade marecinona ñaiticai. Maraifedicinona jiai ñaiticai. Amatai, iese cai ñaifena. <sup>11</sup> Ero, daje pozomona mare jinui, erirede jinui diga, oñedicai. <sup>12</sup> Amatai, higuera railla riaromona aceitunadi comuifede. Uvas railla riaromona higo railla riaradi jiai comuifede. Cuerede jinuiomona mare jinui oñedicai. Cai fuiaimona jeacino comuifellena, cai fuiaina cai namataja.

#### *Ua abi uiforacino*

<sup>13</sup> Omoimona, ¿bu ua abi uifote? Naimie ua abi uifoi, naimie marena illamona, iena uifotomoi. Abi ifoeno mare rafuena naimie finoia, naimiemo ua abi uiforacino illana uifotomoi; <sup>14</sup> iadedi naimie abi eo uradoia, dama naimiemo ite ramo comecina facaia, naimie abi uiforacino diga naimie abina ifoena. Jai tainona llote. Naimie llua isoi ifede. <sup>15</sup> Naie isoide uiforacinodi Jusiñamuimona ifede. Bie enirue ie. Comini ie. Taife ie. <sup>16</sup> Comini abina uradoia, dani naimacimo ite ramo comecina naimaci facaia, comini uri ifedimaci. Diga maraifede rafue naimacimo ite. <sup>17</sup> Jusiñamuimona ite ua abi uiforacinodi mare. Bumo ia, uri ite. Rinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifuefede. <sup>18</sup> Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

## 4

#### *¿Bue ñellena uri ifedicai?*

<sup>1</sup> ¿Bue ñellena fuiriruidomoi? ¿Bue ñellena iciriruidomoi? Omoi comeciaino maraifedicino illa muidona. Omoi comeciaino maraifeno jitaillacino illa muidona. Naie jitaillacino omoi comeciaino namataacana muidona. <sup>2</sup> Rana jitaidomoi. Iena omoi feifoenena jira, naimaci rana fillena, comena meinetomoi. Eo uraidomoi. Omoi jitailla rana feifoenena jira, fuiridomoi. Omoi jitailla rana Jusiñamuimo omoi jicaifena jira, iena feifoenedomoi. <sup>3</sup> Jiaicaiño Jusiñamuimo

jicadomoi; iadedi raise jicañedomoi. Ie jira iena feiñoñedomoi. Dani omoi jitailla ra feiñollena, omoi comeci jaisillena, jicadomoi. <sup>4</sup> Jusiñamuina birui raise jitañedomoi; ia naimie dibeimo iñedinona jai jitaïdomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Niese iena uiñoñedomoi? Bu naie rafuena isiruiacania, Jusiñamui dibeimo jai iacaiñede. <sup>5</sup> Jusiñamui cuetatagafuiaina raise facañedomoi. Naiedi caimo llote: “Jusiñamui omoi mo jai fecaca Joreñodi omoi comecina eo raise namataacade”. <sup>6</sup> Caina eo duenaila jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuiái iena llote: “Jusiñamuidi abi iedotimiena canoñede; iadedi abi iedoñedimiena canode”. Naimie dibeimo iacaiñedimiena ñaite. Naimie dibeimo iacadimiena canuana jiai ñaite.

<sup>7</sup> Ie jira Jusiñamui anamo omoi i. Naimiena raise omoi ñino. Taife uaina jitañenanona, naimie uaina oni caiño. Ie mei omoimona naimie oni jaite. <sup>8</sup> Jusiñamuina nabaillena, naimie dine iaie omoi i. Ie mei naimie omoi dine iaireno iite. Jeacinona finoraini, omoi comeciai iuailaina meido. Naganomo omoi comeciaina facañeno. Omoi comeciaina marena fino. <sup>9</sup> Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai. <sup>10</sup> Jusiñamui dibeimo abina iedoñeno omoi i. Ie mei naimie omoi comeciaina iobitaite.

### *Jiaino jinafomo jeare ñaiñeno*

<sup>11</sup> Amatiai, maraiñede rafuena naimaci finoiadedi, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñinoñede. Jusiñamui uaina naimie ñinoñenamona, Jusiñamui uaina jiai jamaiñocaide. <sup>12</sup> Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoñeno.

### *Ico are caimo suite rafuena uiñoñedicai*

<sup>13</sup> Jiaie rafuena lloicadicue. Nibai llotomoi: “Birui jiaie nairaimo jaiticai. Birui cai jaiñenia, ico are jaiticai. Rana fecajamona ucube cai ollena, nainomo daje año iiticaí”. <sup>14</sup> Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticai. Dallu bene iticai. Ie mei jai iñedicai. <sup>15</sup> Ie muidona omoi llua: “Cai Nama jitaia, nia iiticaí. Cai Nama jitaia, nie isoide rafuena finoiticaí”. <sup>16</sup> Iena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduadi maraiñede.

17 Mare rafuena finuana uiñotimiedi mare rafuena finoñenia, jeacino jai finode.

## 5

### *Ucuberedinomo llucino*

1 Ucuberedino, daje rafuena omoimo jiai lloiacadicue. Omoimo ramo jirite. Ja eo duere sefuitomoi. Ie jira cuiri-cuiri ee. 2 Omoi raruiaj ja sabite. Omoi mare iniroi ja sabite, ibuisaj guilla jira. 3 Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi. 4 Ero, ailluena ucube irairuillaj iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade. 5 Omoi illa dinori ailluena raruiaj omoimo ite. Nana omoi comeciaj jitailla rafuena finodomoi. Omoi comeci jitailla isoi itomoi. Naie iba ollirui jai ride. 6 Maredinona duere finodomoi. Nie isoide rafuena omoimo finoñedimaci. Abina riidoñedimaci; iadedi naimacina meinetomoi. Ie jira Jusiñamui mona ja duere sefuitomoi.

### *Cai Nama billemo fecuise omoi ocuiri*

7 Amatiaj, cai Nama billemo fecuise omoi ocuiri. Cominidi imaci illimona riara feiñuana sedadimaci. Noci deillemo fecuise ocuiridimaci. Ie mei riara llisillana otimaci. 8 Ie isoi cai Nama billemo fecuise ocuiri. Omoi comeciaj rucaicueriñeno, cai Nama bille iaie illa jira. 9 Duere omoi sefuia, Jusiñamui juez isoi omoimo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uiñote. 10 Amatiaj, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci. 11 Naimaci Jusiñamuina fañonocaiñena jira: “Naimaci comeciadi caimare itimaci” raiticai. Job micorina jiai comecitica. Naimie jaie ite. Naimie eeñeno duere sefuide. Duere sefuide; ia Jusiñamuina fañonocaiñede. Ie mei ja muidomo nie isoide cai Nama naimiena finuana uiñotica. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

12 Cue amatiaj, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi llamona, uanaicinona jaca llono. Iese llono, Jusiñamui omoina duere fino raillano.

<sup>13</sup> Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. <sup>14</sup> Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloilena. <sup>15</sup> Inuano jia, jilloite. Cai Nama naimiena jillotaite. Naimie finoca jeacinona oni jiai dotajite. <sup>16</sup> Ie jira coninimo omoi marañedicinona llono. Ie mei Jusiñamuimo coniniaina omoi jii, omoi duicomona omoi jilloillena. Jusiñamuimo marebicaidimie jia, diga rafuena finorede. <sup>17</sup> Eliana começitomei. Jaiete; ia naimiedi cai isoide. Jusiñamuimo jide, noci deñellena. Ie mei daje amani fiemona abimo atomonado jaca deñede. <sup>18</sup> Ie mei dane jide, noci deillena. Ie jira noci deide. Ie mei riara dane sicode.

<sup>19</sup> Amatiai, omoimona damiedi Jusiñamui ie uanaicino dibeimona jai, dane Jusiñamui dibeimo naimiena bu itataia, eo mare. <sup>20</sup> Iena bu finoa, naimiena ie uañedicinomona itatate. Faifillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.

## PEDRO NANO ORETAGA RABE

*Tuude cominimo Pedrodi cartana cuete*

<sup>1</sup> ¿Nigacino? ¿Nie isidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. <sup>2</sup> Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñnollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

*Jesucristo diga jaca cai illemo ocuridicai*

<sup>3</sup> Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, ñnocana cai jaillamo jiai ocuridicai. <sup>4</sup> Omoi ocurillafuedi monamo ite. Faiññeitomoi; ia nainomo caimare marena jaca iitomoi. Jusiñamui iese omoina itataite. <sup>5</sup> Jusiñamuina omoi ñnua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. <sup>6</sup> Ieri iobidomoi; iadedi dallu diga rafuemonona duere sefuidomoi.

<sup>7</sup> Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena "Mare" llotomoi. Oro eo raifide; iadedi jaca iñede. Ie isoide. Cristona omoi ua ñnuana facacillena, diga rafuemonona duere sefuidomoi. ñnocana omoi jaillamona, Jesucristo abido bille facaiseconi Jusiñamuidi omoina: "Mare" lloite. Omoiri eo iobite. <sup>8</sup> Jesucristona jaca cioiñedomoi; iadedi naimiena jai isiruitomoi. Naimiena jaca cioiñedomoi; iadedi naimiena jai ñnotomoi. Ie jira eo iocire itomoi. <sup>9</sup> Cristona omoi ñnuamona, jeacinomona jai jillobidomoi. <sup>10</sup> Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimaci raise cacaiñenia, naiemo comeciaina facauidimaci. <sup>11</sup> Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena

llo timaci. Bumo iese ico suillena uiñoiacadimaci. Naie fa-  
caise illemo comeciaina jiaí facadimaci. <sup>12</sup> Jusiñamuidi naie  
rafue naimacimo duiñenana uiñotade. Naimacina naie rafue  
caimo duillana jiaí uiñotade. Jusiñamui ie Joreñona monamona  
naimacimo oretajanona, ie uaido naimaci llua mona, naimie  
facaina llorainimona bie mare rafuena birui jai cacadomoi.  
Jusiñamui jaienisaí bie rafuena jiaí raise uiñoiacadimaci; ia cai  
isoi iena uiñoñedimaci.

*Naimie jitaillacinona cai finollena, Jusiñamui caina fetode*

<sup>13</sup> Ie jira omoi comeciái raise marena fino. Ebena jaiñeno.  
Jesucristo abido bia, Jusiñamui omoína jai jilloitajana ua  
raise uiñoitomoi. Iemo iocire ocuiri. <sup>14</sup> Jusiñamuina omoi  
nia uiñoñena facaise dani omoi comeciái jitaile rafuedo  
jaisoidomoi. Naimiena omoi jai ñnua jira, naimiena omoi  
nia uiñoñega facaise finoca rafuedo birui omoi jaiñeno. Mare  
uruiái imaci moo uaina ñnotimaci. Jusiñamui uruiaina omoi  
jai illa jira, naimie uaina ñno. <sup>15</sup> Jusiñamui ie uruiaina omoi  
illena, jai omoína fetode. Naimie mareuilla jira, marena omoi  
i. <sup>16</sup> Iena naimiedi jaie cuetatate: “Cue mareuidimiena isoi,  
marena omoi i”.

<sup>17</sup> Cai Moona Jusiñamui illamona, naimiemo birui jiidomoi;  
iadedi juez isoi nagamiemo ico Jusiñamui llua jira, nana omoi  
ille dinori jaciruicana omoi jai. Nagamiena ie maraiñede  
finoca rafue ñese duere finoite; ia maraiñede rafuena  
finoñedimiena duere finoñeite. <sup>18</sup> Omoi einamací rafuedo jaie  
jaisoidomoi. Naie rafue jamaifue. Naifuemona Jusiñamui  
omoína jai jillotate. Hatajamona omoi jeacinomona jillotañede.  
Ucubedi raire cueruide. Raire cueruide ra diga omoína jil-  
lotañede; <sup>19</sup> iadedi Cristo diruedo naimie dacaiño fodailla-  
mona, omoína jaca jillotate. Cai comini imaci jeacino fa-  
caina mare toica llaudana fauidimaci; ia Cristomo jeacino  
iñena jira, cai jeacino facaina birui dacaiño fodaite. <sup>20</sup> Caina  
jilloitallena, enirue nia iñena facaiseconi Jusiñamui Cristona  
jaie fetode. Naimiena omoi uiñollena, birui bene eniruemo  
Jusiñamui naimiena oretate. <sup>21</sup> Cristo muidona Jusiñamuina  
ñnotomoi. Cristo fodaite; ia iemona Jusiñamui naimiena jil-  
lotate. Ie mei monamo ie ecimo naimiena dane itatate. Ie jira  
Jusiñamuina ñnotomoi. Omoi fodaia, dane jilloillemo jiaí jai  
ocuiridomoi. <sup>22</sup> Uanaicinona omoi ñnuamona, omoi comeciái  
jai jeanidimaci. Ie muidona jiaie creyentiaína isiruicana omoi  
jai. Omoi comeciáimona conini omoi isirui. <sup>23</sup> Jusiñamui  
cominina jai jaidomoi. Naimie uaido iese jaidomoi. Comini  
uaido iese jaiñedomoi. Naimie uai jaca fuiñeite. Jaca iite.  
Naie uaido naimie cominina jaca iiticaí. <sup>24</sup> Jusiñamui facaina  
lloraima micori iena jaie cuete:  
Nana cominidi raiticiaí isoidimaci.

Safia dallu ebirede; iadedi raiticiai ie safia diga are iñede.

Ie isoide. Diga rafuena finuanona, dallu iticai.

Are iñedica; <sup>25</sup> iadedi Jusiñamui uai jaca ite

cuete. Naie uaidi mare rafue. Naie rafuena birui jai cadomoi.

## 2

<sup>1</sup> Jusiñamui cominina cai illa jira, jiaie cominina gaiñenacinona fainonocai. Nana jifuiacinona fainonocai.

Abina caitajacinona feita. Nana abi uradoillacinona feita.

Jiaie comini joreñona ñaiñeno. <sup>2</sup> Ero, raise moonaillena, raise

ecairellena, janosa monoi ijina jitaide. Ie isoide. Omoi

comeciai raise marena illena, Jusiñamui rafuena jitaidomoi.

<sup>3</sup> Cai Nama omoina duenailana jai omoi uiñuamona, naimie uaina inocana jai.

### *Cristodi jofomo ite nanoca nofici isoide*

<sup>4</sup> Ie cominina raise omoi illena, Jusiñamui rafuena finocana

jai. Naimie omoina jai fetode. Naimiemo omoi raise duillana

jitaide. Iena omoi raise uiñollena, jiaie rafuedo iena lloiticue.

Naimiedi jofona niacade isoide. Noficimona niacade. Diga

noficina jitaide. Naimie naie noficiaina jai fetode. Nanoca

nofici diga naie jofo nillana tainede. Cristodi naie nanoca

nofici isoide. Cai nairai Cristona jaie jitaiñedimaci; iadedi

Jusiñamuimona naimie maredimiena jira, Jusiñamui naimiena

fetode. Caidi jiaie noficiai isoidicai. Ie jofona nillena isoil-

lena, Jusiñamui caina fetode. <sup>5</sup> Naimiena cai jai inua jira,

naimie cominina jai jaidicai. Naimie diga jai atona ñairedicai.

Naimie diga jiaie comini facaina jai ñaicabiticai. Naimiena

cai raise sedallena, Jesucristo caina canuamona, Jusiñamui

jitaillacinona finocana jaidicai. <sup>6</sup> Jusiñamui facaina lloraima

iena jaie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedi eo mare.

Naimiena inuamona, comini iobitimaci

cuega. <sup>7</sup> Naimiena omoi inoia, Jusiñamui omoina iobitaite.

Naimiena omoi inoñenia, faifitomoi. Jusiñamui facaina

lloraima micori iena jaie cuega:

Jofona finoraini jitaiñena noficidi nana naie jofomo ite noficiai

baifemo jai faiga

cuega. Ie isoide. Cai nairai Cristona jitaiñede; iadedi Jusiñamui

naimieri eo iobide. <sup>8</sup> Dane cuega:

Nine naimaci macaria, naie noficimona ecaitaillamona,

uaitimaci

cuega. Cristona cuete. Cristo uaina naimaci inoñena jira,

Jusiñamui llua isoi faifitimaci.



*Pedro Jusiñamui fetocanona llofuate*

<sup>9</sup> Jusiñamui jai fetocanodomoï. Naimiemo omoi jai duillamona, naimie diga atona ñairedomoï. Jusiñamui ua cominidomoï. Naimiena omoi nia ñnoñenia, jeacino anamo omoi illa jira, jitiredinomo itomoï isoidomoï. Naiemona omoïna jai jillobitade. Naimie anamo jai omoi illamona, useredinomo jai itomoï isoidomoï. Eo mare rafue omoïmo naimie finua jira, iena llocana omoi jai. <sup>10</sup> Jaie Jusiñamui cominiñedomoï; iadedi birui Jusiñamui cominidomoï. Naimie omoïna duenaillana jaie uiñoñedomoï. Birui iena uiñotomoï.

*Pedro Jusiñamui jitaillacinona finocana cai jaillana llofuate*

<sup>11</sup> Cue isiruiganodomoï. Jusiñamui illanomo omoi birui jainaiailla jira, eniruemo jaca iñeitomoï. Eniruemo jaca omoi iñena jira, jeacinona finocana jaiñeno. Jeacino omoi comeciaina namataacana jira, iena ebiruiñeno, naie anamo omoi i raillano. <sup>12</sup> Jusiñamuina ñnoñedinomo motomo omoi illamona, mare rafuena finocana jai. Omoïna birui jeare ñaitimaci; iadedi omoi marena illana naimaci uiñuamona, Jusiñamuina ico naimaci ñnoia, naimiemo iobillacinona fecaitimaci. <sup>13</sup> Cai Namamo omoi duilla jira, illaicomini anamo raise i. Riai diga omoi nanoca illaïma uaina ñno. <sup>14</sup> Naimacina omoi illaicomini fetua jira, omoi gobernadores uaina ñno. Maraiñede rafue omoi finoia, omoïna duere finoitimaci; iadedi mare rafuena omoi finoia, omoïri iobitimaci. <sup>15</sup> Jusiñamuidi mare rafuena omoi finuana jitaide. Iena omoi finua jira, omoïna ebena ñaitino uaina llucaitaitomoï. <sup>16</sup> Jusiñamui anamo cai illamona: “Jiaie illaïma uaina ñnoñeiticai” raiñeiticai. Cai enirue illaïma uaina cai ñnoñenia, jeacinona finodicai. Jusiñamui dibeimo cai illa jira, naimie jitaillacinona finocana cai jailli. <sup>17</sup> Nana cominimo marena fino. Nana creyentiaïna isirui. Jusiñamuina jaciruoicaïda ñno. Riai diga omoi illaïma uaina ñno.

*Cristo duere sefuilla rafuemonafueoiticai*

<sup>18</sup> Patrón anamo damierie itomoï. Omoi patrón ocuica uaina ñnocana omoi jai. Omoi patrón marena fecuise ocuica, naimie uaina ñno. Naimie raire iciria, naimie ocuica uaina jiaï ñno. <sup>19</sup> Maraiñede rafuena omoi finoñenia, omoi patrón omoïna duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. <sup>20</sup> Maraiñede rafuena omoi finoia, omoi patrónona duere sefuitomoï; iadedi maraiñede rafuena omoi finoñenia, omoi patrón omoïna duere finoia, ibana omoi oñenia, Jusiñamuimona mare. <sup>21</sup> Duere omoi sefuia, ibana oñeno. Iese omoi illena, Jusiñamui omoïna fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. <sup>22</sup> Naimiedi maraiñede rafuena jaca finoñede.

Tainona jaca lloñede. <sup>23</sup> Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoina ico duere finoiticue” raiñede. Naimiedi Jusiñamui naimacina ico raise duere finollena uiñote. <sup>24</sup> Cruzmo naimie fodaillamona jeacino anamo cai iñellena, cai jeacino facaina naimie fodaite. Jusiñamui jitailla isoi naimie fodaite. Naimie jai duere sefuilla jira, cai jeacinomona jai jillodicaí. <sup>25</sup> Sedañega toica llaudaiaí isoi jaie ebena jaisoidicaí. Cai sedaraima anamo jai iticaí. Naimiedi cai comeciaina jai eenote.

### 3

#### *Pedrodi inirediñaiñuaina, airedino diga llofuede*

<sup>1-2</sup> Inirediñaiñuai, omoimo jai lloiacadicue. Omoi iniñiaí uaina ñno. Nibai birui Cristo rafuena ñnoñedimaci; iadedi omoi marena illamona, Cristo dibeimo naimacina itatait-omoi. Jusiñamui uaina omoi ñnuamona, omoi marena illamona, damerie Cristona ñnoitimaci. <sup>3</sup> Dañaiñorie abina eo finocabidimaci, naiñaiñuaina jaie comini ebinaillena. Naiñaiñuai ifotiena eo finocabidimaci. Eo raifide rana jitacabidimaci. Eo ebirede raifide iniroina jitacabidimaci. Naie isoide ra comecina marena itatañede; ia Jusiñamui jitaillacinodo jaillamona, comeci marena ite. Jaie comini omoina ebinai raillano, iese omoi iñeno; <sup>4</sup> iadedi jaie comini omoina ebinaillena, omoi comeci marena fino. Omoi iniñiaí uaina oñeno. Naimaci jitailla rafuena fino. Omoi comeci iese ia, Jusiñamuimona eo mare. <sup>5</sup> Cai jaigai facaise Jusiñamuina ñnotiñaiñuai iese itimaci. Cue birui llofuia isoi, naiñaiñuai abina jaie finodimaci. Naiñaiñuai iniñiaí uaina ñnotimaci. <sup>6</sup> Iese Sara micori ie ini Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaia, buena omoi jaciruiñenia, naiñaiño isoi iitomoi. Iemona naiñaiño uruiaina jaitomoi isoitomoi.

<sup>7</sup> Airedino, omoimo jai lloiacadicue. Omoi ainiaimo comeciaina faca. Cai isoi naiñaiñuai mairiñena jira, naiñaiñuaina isiruillamona, naiñaiñuaina marena raise seda. Jusiñamui omoina duenaillamona, naimie cominina jai jaidomoi. Omoina jai jillotate. Omoi ainiaina omoi raise sedañenia, Jusiñamuimo daajena raise jñnidomoiico.

#### *Cristo dibeimo cai illa rafue*

<sup>8</sup> Daje isoi comeci marena lloicana jai. Coninina duenai. Naga creyentena isirui. Jainona cano. Abina iedoñeno. <sup>9</sup> Omoina jaie comini duere finoia, ibana oñeno. Omoina naimaci jeare ñaia, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia,

Jusiñamui ðinena: “Mare” caina raite. <sup>10</sup> Jusiñamui facaina lloraima micorì iena jaie cuela:

Marena uri jaca bu iacania, jeare ñaiñeno.

Tainona lloñeno.

<sup>11</sup> Jearede rafue finuana fañonocai. Mare rafuedo jai.

Omoì ecimo itino ðiga, uri icana omoì jai.

<sup>12</sup> Naimie jitailla rafue omoì finoia, Jusiñamui iena uiñuamona, omoina raise sedade.

Naimie ðiga omoì ñaia, iena cacade;

iadedì maraiñede rafue bu finoia, Jusiñamui naimie ðiga icirite.

<sup>13</sup> Mare rafuena omoì finocana jaia: “Maraiñede rafuena naimaci finua jira, naimacina duere finoiticaì” rainidimaci; <sup>14</sup> ia mare rafuena omoì finuamona omoì duere sefua, Jusiñamui omoina canoite. Omoina duere finodina jaciruiñeno. Jarire iñeno; <sup>15</sup> ia omoì comeciaì jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoimo bu jicanoia, uaina raise ono. Fecuisse iciruiñeno, uaina ono. <sup>16</sup> Mare rafuena finocana jai. Omoina jiaño jeare ñaia, mare rafuena omoì finocabillamona meidaitimaci. Omoì marena illamona, tainona naimaci lluaña bairenite. <sup>17</sup> Mare rafuena omoì finuamona, Jusiñamui jitaillamona omoì duere sefua, dama iese duere sefuitomoi; ia maraiñede rafuena omoì finuamona omoì duere sefua, omoì muidona. <sup>18</sup> Cristomo omoì comeciaina faca. Dacaiño cai jeacino facaina naimie fiodaite. Naimie mareuidimie; iadedì maraiñedino facaina fiodaite. Jusiñamui ðibeimo caina itataiacade. Naimiena meinetimaci; iadedì naimie Joreño jaca ite. <sup>19</sup> Ie Joreñodo naimie jaillanona, jaie fiodaitino imaci joreñuai eenoranomo ie finoca rafuena lluaide. Naimaci nia fiodaiñenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide. <sup>20</sup> Jusiñamui rafuena jaie ñnoñedimaci. Noé micorì facaise Jusiñamuidì naimaci naimiena ñnuamo fecuisse ocuride. Jinuimona jillobillena, Noé micorì ie balsana finode. Ocho ðigamie jillobidimaci. <sup>21</sup> Ie isoide. Omoì bautizaia: “Jusiñamui ðibeimo jai iticaì” llotomoi. “Jeacinomona jai jillobidicaì” llotomoi. Omoì abimo ite jearenamona jillobiñedomoi; iadedì omoì comeciaì jai marena ite. Fiodaillamona Jesucristo jillua muidona, jillobidicaì. <sup>22</sup> Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafilla jira, Jesucristo anamo naimie ite; ia naimiena nia janafetañede.

## 4

*Jusiñamuimona cai feiñooga uai diga, naga jiaie creyentena cai canua*

<sup>1</sup> Cai isoi naimie illamona, Cristo duere sefuide. Naimie duere sefuide; ia jeacinona finoñede. Duere omoi sefuia, naimie illamo omoi comeciaina faca. <sup>2</sup> Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai. <sup>3</sup> Jusiñamuina uiñoñedinno isoi jaiie bie isoide rafuena finouidomoi: Omoi aiñede riñoniai diga isoidomoi. Omoi iniñede iñiaia diga isoidomoi. Jearede rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraina sedauidomoi. <sup>4</sup> Naie isoide rafuena omoi jai finoñenia, Jusiñamuina uiñoñedinodi omoi ri raicicaidimaci. Omoi na jeare ñaitimaci. <sup>5</sup> Iese itimaci; iadedi Jusiñamui uicomo ico iitimaci. Naimacina duere finoite. Nia fiodaiñedinona duere finoite. Jai fiodaitinona jiaie duere finoite. <sup>6</sup> Naimaci nia fiodaiñena facaise, Jesucristo rafuena cacadimaci. Jeacino muidona nana fiodaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

<sup>7</sup> Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoi jai. <sup>8</sup> Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire faitaitomoi. <sup>9</sup> Jiaie cominina jafueoicaida feiñoñeno; ia caimare feiño. <sup>10</sup> Creyentiaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano. <sup>11</sup> Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidicue.

*Cristo dibeimo cai illamona, duere sefuiticai*

<sup>12</sup> Cue isiruiganodomoi. Eo duere omoi sefuia, raicicaiñeno. Creyentiaina omoi jailla jira, duere sefuitomoi. Jusiñamuidi Cristona raise omoi ñnuana facacite. <sup>13</sup> Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomoi. <sup>14</sup> Creyentiaina omoi illamona, omoi na bu jeare ñaia, caimare omoi i. Iemona Jusiñamui Joreño omoi mo illana uiñoitomoi. Naimie: "Mare" omoi na raite. <sup>15</sup> Jiainodi cominina meinetimaci. Rana fiidimaci. Maraiñede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoñeno. Naie

isoide rafuena omoi finuamona omoi duere sefuillana jitañedicue. <sup>16</sup> Creyentiaina omoi illamona omoi duere sefuia, ieri meiruiñeno; iadedi creyentiaina omoi illamona, iobilacinona Jusiñamuimo feca.

<sup>17</sup> Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. <sup>18</sup> Jusiñamui facaina lloraima micori iena jaie cuega: “Mareuidinodi niadedi jillobiñedimacimo, ¿niese comeciaina jearedinodi jillobitimaci? ¿Niese maraiñedinodi jillobitimaci? Nibai jaca jillobiñeitimaci” cuega. <sup>19</sup> Iena omoi uiñuamona, mare rafuedo jai. Jusiñamui jitaillamona duere omoi sefuia, mare rafuedo jai. Jusiñamui caimo finuana omoi uiñuamona, naimie anamo raise i. Naimie omoina raise enoite. Ie lloga uaina jaca finoite.

## 5

### *Pedro creyentiaina nia llofuede*

<sup>1</sup> Creyentiaina llofueraini, omoimo rafuena lloiacadicue. Cuedi jiai llofueraimadicue. Cristo fiodallana ciodicue. Naimie ebire abido bia, jiaie creyentiai diga iena cioiticue. Iese cue illamona, omoimo lloiacadicue. <sup>2</sup> Omoi anamo ite creyentiaina raise seda. Naimacina raise llofue. Jiaimie railla jira, llofueñeno; iadedi omoi jitailla jira, llofue. Rana ollena llofueñeno; iadedi iocire llofue. <sup>3</sup> Omoi anamo itinona riire llofueñeno; iadedi mare rafuedo omoi jaillamona, naimacina llofue. <sup>4</sup> Cai creyentiai nanoca sedaraimadi Cristo. Naimie abido bia, naimiemona ibana feiñoitomoi. Naimie diga jaca iitomoi.

<sup>5</sup> Conirueni, omoi llofueraini uaina raise ñno. Coninimona abina iedoñeno. Jusiñamui facaina lloraima micori iese jaie cuega:

Bu abina iedoia, Jusiñamuimona maraiñede;

iadedi bu abi iedoñenia, Jusiñamuimona mare.

Jusiñamui naimiena duenaite

cuega. <sup>6</sup> Iese illa jira, cai Jusiñamui siñona jira, naimie anamo abina iedoñeno mai raise omoi i. Iemona naimie jitailliruido omoina iobitaite. <sup>7</sup> Nie isoide rafue ia, Jusiñamui omoina canocabillana omoi uiñuamona, omoi comeciai jarire finoñeno. Naimie omoina enoite.

<sup>8</sup> Ebena jaiñeno. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide. <sup>9</sup> Naimie ra faia uaina ñnoñeno; ia Cristona ñnocana jai. Omoi duere sefuilla

isoi, nana jiaie creyentiaie duere sefuidimaci. Iena omoi uiñuamona, omoi comeciaie ocuiñocana jai. <sup>10</sup> Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iiticaie. Dallu birui duere cai sefuaia, Jusiñamui cai comeciaina raise finoite. Cai comeciaina raise ocuiñotaite. <sup>11</sup> Illaimana naimie illamona, caina jaca sedade. Naimiemo iobillacino cai fecacabillasa. Iena jitaidicue.

*Naga creyentiaimo carta oria rafue*

<sup>12</sup> Silvanona uiñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise inogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uiñuamona, bie rafuena inocana jai.

<sup>13</sup> Babiloniamo ite creyentiaie omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiaie orede. Cristomo naimie jai duilla jira, naimie cue jitona eruaide. <sup>14</sup> Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uiñocana mai jai. Macaibaite. Pedrodicue.

## IE EMODOMO PEDRO ORETAGA RABE

### *Pedro creyentiaimo carta orede*

<sup>1</sup> ¿Nigacino? ¿Nie isidomoi? Bie carta omoimo oredicue. Simón Pedrodicue. Jesucristo dibeimo maijamona, ie rafuena lloticue. Cuen a oretajamona, ie lloga uaina finodicue. Cai isoi jai inotomoi. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai inotomoi. Jusiñamuimona cai isoi omoi illa jira, bie carta omoi dine oredicue. <sup>2</sup> Jusiñamuina omoi uñuamona, cai Nama Jesús omoi uñuamona, iaiaia omoina duenaillana uñocana jai. Iaiaia omoi uri itatajana uñocana jai.

### *Creyentia marena illa rafue*

<sup>3</sup> Jesús siñona illamona, bene cai marena illena, naimiedi nana rafue caimo jai iga. Naimiena cai uñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode. <sup>4</sup> Naimie iese illamona, eo mare rafuena caimo jai llote. Jiaie rafue baifemo faite. Bie rafue muidona jeacinomona jillobidicai. Cai comeciai jai jitailla jira, faificana jaidicai; iadedi naimie rafuena cai inuamona, naimie illa isoi, icana jaidicai. <sup>5</sup> Jesucristona jai inotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uñocana jai. <sup>6</sup> Jearede rafue finocana jaiñeno; iadedi omoi comeciaina eeno. Iena ocuiñocana jai. Jusiñamuina sedacana jai. <sup>7</sup> Jiaie creyentiaina isiruicana jai. Nana cominina isiruicana jai. <sup>8</sup> Naie isidicinona jitaidomoi. Iedo omoi raise jaia, cai Nama Jesucristona eo raise uñocana jaitomoi; <sup>9</sup> iadedi iedo omoi jaiñenia, abina nia raise uñoñedomoi. Omoi jeacinomona jai jilluana jiai jai feitatomoi. Mare rafuena finocana jaillena, omoi jeacinomona jillobidomoi. Iena feitañeno. <sup>10</sup> Cue amatiai, naie isidicinona finocana jai. Iemona Jusiñamui omoina fetuana raise uñoitomoi. Abido danomo jiai jaiñeitomoi. <sup>11</sup> Iese omoi jaia, cai Jilloitaramana naimie illamona, cai Nama Jesucristo ie illanomo omoina eo marena feiñoite. Nainomo naimie anamo jaca iitomoi.

<sup>12</sup> Ie jira bie isoide rafuena diga icaiño omoimo lloticue. Bie rafuena uñotomoi. Bie rafue uanaicinona jai raise uñocaidomoi. <sup>13-14</sup> Cai Nama Jesucristo cuemo jai lua jira, raire cue fiodaillena uñoticue. Nia cue fiodañenia, bie rafuena omoimo diga icaiño lloticue. Iese omoimo cue lloia, cuemona mare. <sup>15</sup> Bie rafue omoi raise nagarui uñollena,

omoina birui canoiticue. Cue fiодaille mei, nagarui bie rafuena omoi feitañenana jitaídicue. Ie muidona bie rafuena jai cueticue.

*Pedro Cristona ebirenana jaie ciode*

<sup>16</sup> Jamai rafue omoi mo lloñedicai. Omoina jifueiacaiñedicai. Cai Nama Jesucristo siñonana lloticai. Naimie abido billena jiai lloticai. Naimiena ebirenana jaie ciodicai. <sup>17-18</sup> Eniruemo naimie jaie ia, anedu muidomo naimie diga jaidicai. Jusiñamui nainomo jiai illa jira, naie illano mare. Naie facaise Jusiñamui llua na cacadicai. Jusiñamui naimiena iobitaiacade. Ebire llote: “Bimie cue isiruiga Jito. Naimieri iobidicue”. Iena jaie cai ciuanona, birui naimie siñonana lloticai. <sup>19</sup> Naiemona Jusiñamui facaina jaie lloraini micoriai lloga rafue suillena jai raise uiñoticai. Naimaci lloga rafuemo omoi comeciaina faca. Lamparín jiti redinomo lligaiñua isoi, naie rafue cai comeciaina uanaicinona uiñotade. Monairaicuduna cai cioia, iairei monaille ua illana uiñoticai. Ie isoide. Cristo dane bairea, iena raise uiñoticai. Jusiñamui facaina lloraini micoriai rafuena cai uiñuamona, uanaicinona ua uiñoticai. <sup>20</sup> Biena uiñoticai. Dani comeciainona Jusiñamui facaina lloraini micoriaidi naimaci lloga uaina llofueñedimaci. <sup>21</sup> Dani naimaci comeciainona jamai facajamona naie rafuena oñedimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

## 2

*Pedro tainona llofuerañina llote*

<sup>1</sup> Cai jaiagai facaise tainona llofuerañini itimaci. Birui ie isoide. Omoi motomo tainona llofuerañini iitimaci. Jusiñamui rafuena raise llofueñeitimaci; iadedi naie rafuemona omoina itataiacanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raire ebena faifitimaci. <sup>2</sup> Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci. <sup>3</sup> Ucube ollena, naimaci tainona llofuiacinodo omoina jifueiacanitimaci; iadedi Jusiñamui riicaillafue anamo jai itimaci. Jusiñamui naimacina ico duere finoite.

<sup>4</sup> Naimie ecimo ite jaienisañimona damerie jeacino jaie finua jira, Jusiñamui naimacina jai oni dotade. Naimie riicaillafue anamo naimaci jai illamona, naimacimo ite uai jai iñede. Jiti redinomo jai itimaci. Naimacina duere finoite, nana comini Jusiñamui dine illirui ia. <sup>5</sup> Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llote; iadedi



Jusiñamuina ñinoiacaiñedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. <sup>6</sup> Sodoma railla nairai, Gomorra railla nairai diga, Jusiñamuidi bootate. Naimiena naimaci ñinoñena jira, naimacina fuidode. Naiemona naimiena ñinoñedinodi fueua. <sup>7</sup> Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. <sup>8</sup> Naimaci motomo naimie illamona, nagarui naimaci marañede rafue naimie ciuamona, naimie comeci uri iñede. <sup>9</sup> Naimiena jaie ñinoñedinona Jusiñamui jai duere finode; iadedi Jusiñamui naimiena ñinotino ramo faiamona jilloitajana uiñote. Jusiñamui naimiena ñinoñedino naimie riicaillafue anamo illana jiai uiñote. Ico naimacina duere finoite.

<sup>10</sup> Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaia jaciruiñeno jeare ñaitimaci. <sup>11</sup> Jusiñamui jaienisaia uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñaiñedimaci. <sup>12</sup> Ocainaiaia abina raise uiñoñena muidona, cai rillena naimacina faticai. Bie tainona llofueraini ocainaiaia isoidimaci. Naimaci raise uiñoñega rafuena jeare ñaitimaci. Ocainaiaia faifilla isoi, faifitimaci. <sup>13</sup> Jiaie cominina naimaci duere finua dinori duere sefuitimaci. Birui ite rafuena nagarui ebiruitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi. <sup>14</sup> Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñinoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. <sup>15</sup> Cristo rafuena faionocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacaiñede; iadedi jiaie rafuena llollena, jiaie nairai dine jaide. <sup>16</sup> Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

<sup>17</sup> Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeciai daje

isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jiti redinomo jaca iitimaci. <sup>18</sup> Jamai ñaia diga abina iedotimaci. Uanañede rafuemonas, como Cristomo ñnotinona ramo faitimaci. “Jearede rafue finuana mare” raitimaci. <sup>19</sup> “Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci. <sup>20</sup> Cai Nama Jesucristo. Naimiedi cai Jilloitaraima. Naimiena naimaci jaie ñnuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci. <sup>21</sup> Cristo rafuena jaie uiñotimaci. Birui iena uiñotimaci; iadedi naie mare rafuedo raise jaiñedimaci. Iena fainonocaillamona, eo jai fodo jaidimaci. <sup>22</sup> Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemonas danomo abido jaidinodi daje isoidimaci.

### 3

#### *Pedro cai Nama Cristo dane billena llofuede*

<sup>1</sup> Cue isiruiganodomo. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. <sup>2</sup> Jusiñamui facaina jaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomoi. Bie rafuemo omoi comeciai facajana jitaidicue. <sup>3</sup> Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci. <sup>4</sup> Jicanoitimaci: “¿Ñiese Cristo nia abido biñede? Enirue finua facaisemona nana ra daje isoi comucana jaide. Cai mootiai jai fiodaicana jaidimaci. Cristo jaca biñeite”. <sup>5</sup> Iese raitimaci; iadedi iese iñede. Jaie suide rafuemo comeciaina facacaiñedimaci. Jusiñamui jaie lluamona, ie uaido mona finode. Enirue jiai finode. Jinuimona iena finuamona, jinuimona eniruedi bairede. <sup>6</sup> Jinui diga Jusiñamuidi Noé micori facaise cominina jaie fuidode. <sup>7</sup> Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena ñnoñedinona iese duere finoite. Ie uai jai llote; ia nia suiñede. <sup>8</sup> Cue isiruiganodomo. Biena feitaño. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide. <sup>9</sup> Damierie comeciai facadimaci: “Are suiñena jira, cai Nama ie lloga uaina ñibai

finoñeite”. Iese cai Nama iñede; iadedi comini naimiena ñnuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. <sup>10</sup> Fñriraïma billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite. <sup>11</sup> Bie rafue suillena uiñoticaï. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa. <sup>12</sup> Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite. <sup>13</sup> Naimie jai llua isoi, jiaie mona, jiaie enirue diga illena sedadicaï. Nainomo Jusiñamui jitailla isoi marena jaca iiticaï. Nainomo mare rafue finocana jaiticaï.

<sup>14</sup> Cue isiruiganodomoï. Bie rafue nia suiñena jira, naimie abido nia biñena jira, jeacino finoñeno i. Uri icana omoi i. Iese omoi ia, naimie abido bia, omoïna: “Mare” raite. Omoi iobite. <sup>15</sup> Raire abido cai Nama biñenia, naimiedi comini naimiena ñnuamo ocuride. Iena uiñoticaï. Cai isiruiga ama Pablo, bie isoide rafue omoïmo navui cuete. Cristo naimiena uiñotaga rafue diese cuete. <sup>16</sup> Nana naimie cartaiïmo bie isoide rafuena cuete. Naimie cartaiïmo diga rafue ite. Dajerie rafue irirede. Cristo rafuena raise uiñoñedino, Cristona raise ñnoñedino iena tainonana llofuecabitimaci; iadedi iemona faificana jaidimaci. Jiaie Cristona ciegafuiaina tainonana llofuecabitimaci.

<sup>17</sup> Bie rafue birui uiñotomoï. Iena omoi uiñuamona, jearede rafue finocabidino rafuedo jaiñeno. Abido danomo omoi jaiñellena, iemona abina rairui. <sup>18</sup> Cai Nama cai duenaillana uiñocana jai. Naimiedi cai Jilloitaraïma. Naimiena omoi uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

## JUAN NANO FUEÑE ORETAGA RABE

*Jusiñamui diga cai jaca illena, Juan cuete*

<sup>1</sup> Cue uruiaina omoi isoilla jira, omoimo cartana oredicue. ¿Nie isoidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicai. Naimiena ciodicai. Naimiena jiai jetadicai. Caina Jusiñamuina uiñotade. Jusiñamui diga cai jaca illena, jiai caina llofuate. <sup>2</sup> Jusiñamui dinena billanona, imana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicai. <sup>3</sup> Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiai jitaidicue. <sup>4</sup> Omoi comeciai caimareficaillena, omoimo bie rafuena cueticue.

*Jusiñamuidi jaca mareuidimiena jira, useredinomo ite isoide*

<sup>5</sup> Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredinomo ite isoide. Naimie comecidi jaca jeanina jira, jitedinomo iñede isoide. <sup>6</sup> “Jusiñamuina nabaidicai” cai raia, iadedi jeacinona finocana cai jaia, tainona lloticai. Uanaicnodo nia jaiñedicai. <sup>7</sup> Jusiñamui jeacino jaca finoñede. Naimie isoi jeacino finoñeno cai jaia, coninina nabaidicai. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate. <sup>8</sup> “Caimo jeacino jaca iñede” cai raia, dani cai abina jifueticai. Uanaicnodo nia jaiñedicai. <sup>9</sup> Naimiemo cai finoca jeacino cai lloia, Jusiñamui cai jeacinona dotaite. Nana cai maraiñedicinona dotaite. Naimie inogamiena jira, naimie maremiena jira, iese finoite. <sup>10</sup> “Omoimo ite jeacino” Jusiñamui llote; iadedi: “Jeacono finocabiñedicai” cai raia, “Jusiñamui tainona llote” raiticai. Iemona naimie uaina jai uaitaticai.

## 2

*Cai facaina riidotimiedi Cristo*

<sup>1</sup> Cue uruai isoi cue mamecaomoi. Jeacono finocana omoi jaiñellena, omoimo birui cueticue. Jeacono omoi finuana jitaiñedicue; ia jeacino bu finoa, Jusiñamuimona naimie facaina riidotimie jai ite. Jesucristo maremiena jira, cai facaina caina riidoite. <sup>2</sup> Cai jeacino facaina naimie fiodaite.

Iemona Jusiñamui riicaillifue anamona jillobidicai. Jesucristo cai facaina fiodaite; ia nana comini facaina jiai fiodaite. <sup>3</sup> Jusiñamui llogacinona cai inuamona, naimiena cai uiñuana jai uiñoticai. <sup>4</sup> “Naimiena uiñoticue” raitimiedi ie llogacinuai inoñenia, naimiedi tainona lloraima. Uanaicinona uiñoñede; <sup>5</sup> ia Jusiñamui llogacinuaina inotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticai. <sup>6</sup> “Cristona nabaidicue” raitimiedi, Cristo isoi, mare rafuena finoite.

### *Cristo rafuedo jaidomoi*

<sup>7</sup> Cue isiruiganodomoi. Creyentaina omoi jailla facaise bie rafuena cacadomoi. Ie jira jiaie rafuena birui omoimo cueñeticue; <sup>8</sup> ia naicinona abido dane lloiticue. Cristo iedo jaide. Iedo jiai jai jaidomoi. Jeacino anamo omoi jaie illamona, jitiredinomo itomoi isoidomoi; ia Cristo rafuena omoi jai uiñuamona, useredinomo jai itomoi isoidomoi. <sup>9</sup> “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitiredinomo naimie nia ite isoide. <sup>10</sup> Jiaie creyentena bu isiruia, Cristo rafuedo raise jaide. Iedo naimie jaia, jaimiena jeacinona finotañeite; <sup>11</sup> iadedi jiaie creyentena bu enoia, jitiredinomo nia ite isoide. Jeacino anamo nia ite. Uisinidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

<sup>12</sup> Cue uruiaí isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

<sup>13-14</sup> Einamaci, Jusiñamuina are omoi jai inuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabillamona, marañedimiena omoi jai anafetitaja jira, omoimo bie cartana cueticue. Naimiedi Taife. Uruiaí, Jusiñamui uaina omoi como inuamona, omoimo bie cartana cueticue. <sup>15</sup> Omoi ecimo marañede rafuena ebiruiño. Iena bu ebiruia, cai Moo Jusiñamuina isiruiñede. <sup>16</sup> Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiaí diga, abi ieducinodi Jusiñamui ieñede. <sup>17</sup> Jusiñamui ieñede rafue jaca fuite. Naie isoide rafuedo jaidinodi jiai faifitimaci; iadedi Jusiñamui jitaillacinona finodimie Jusiñamui illanomo jaca iite.

### *Cristona abi caitadino rafue*

<sup>18</sup> Cue uruiaí isoidomoi. Jesucristo abido billirui iaírei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaírei illana jai uiñotomoi. <sup>19</sup> Cai

creyentiaí motomo nano itimaci; ia Cristo díbeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caímona naimaci jailla jira, Cristomo naimaci duiñenana jai uiñoticaí. <sup>20</sup> Jesucristomona Jusiñamui Joreñona jai omoi feiñua jira, nana omoi Jusiñamui díbeimo ite rafuena jai uiñotomoi. <sup>21</sup> Ie jira uanaicinona bu llofueia, iena uiñotomoi. Uanaíñedicinona bu llofueia, iena jiaí uiñotomoi.

<sup>22</sup> Tainona llofuerainina ja cueiticue. “Cristo cai jil-loitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. <sup>23</sup> Cristona ñnoñedinodi Jusiñamuina jiaí ñnoñedimaci. Cristona ñnotino Jusiñamuina jiaí ñnotimaci. Jusiñamui Joreño omoimo illamona, iena jai uiñotomoi. <sup>24</sup> Ie jira creyentiaína omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiaí raise nabaitomoi. <sup>25</sup> Jusiñamui caímo jai llua isoi, naimie diga jaca iiticaí. <sup>26</sup> Omoína damierie jifueiacana jira, bie rafuena jai cueticue. <sup>27</sup> Jusiñamui Joreñona jai feiñotomoi. Omoína Jusiñamui rafuena naimie uiñotaja jira, jiaie rafuena llofuerainina jai jitaiñedomoi. Jusiñamui Joreño uanaicinona omoína uiñotacabide. Naimie omoína uiñotaja isoi, Cristona nabaicana omoi jai. <sup>28</sup> Cristo íco abido biite. Omoi jacinaiñellena, naimiena omoi meiruiñellena, naimiena birui raise omoi nabai. <sup>29</sup> Jusiñamui maremiéna cai uiñuamona, nana mare rafuena finocabidino naimiemo duillana jiaí uiñoticaí.

### 3

#### *Juandi Jusiñamui cominina llua rafue*

<sup>1</sup> Jusiñamui caina isiruillamona, naimie cominina jai jaidicaí. Iemo omoi comeciána facajana jitaídícué. Naimiéna naimaci uiñoñena jira, Jusiñamuina ñnoñedino cai uiñoga rafuena jiaí raise uiñoñedimaci. <sup>2</sup> Ero, birui Jusiñamui cominidicaí. Cristo dane bia, cai illena nia raise uiñoñedicai; ia naimie illa isoi cai íco illena jai uiñoticaí. Íco naimiéna cai cioillemona, iena raise uiñoiticaí. <sup>3</sup> Iemo cai ocuirillamona, naimie marena illa isoi, cai comeciái marena itataja. <sup>4</sup> Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode. <sup>5</sup> Jusiñamui dinena Cristo billanona, imana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino díbeimo naimie jaca iñede. <sup>6</sup> Naimiéna nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede.

Naimiena nia raise uiñoñede. <sup>7</sup> Cue uruiaí isoidomoi. Cristo llua isoi tainona llofueraíni birui itimaci. Jeacino finuana rairuiñedimaci. Naimaci omoína jifueñellena, abina rairui. Jescristo jaca maremie. Mare rafuena finocana cai jaia, naimie isoi mareniticaí; <sup>8</sup> ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafefitallena. <sup>9</sup> Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide. <sup>10</sup> Iemona Jusiñamui dibeimo itinona raise uiñoticaí. Taife dibeimo itinona jiaí raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiaí duiñede.

### *Coninina cai isiruilla rafue*

<sup>11</sup> Creyentiaína omoi jailla facaise: “Coninina isirui” raillana cacadomoi. Jiaie creyentiaína nia omoi isiruiñenia, Jusiñamuimo nia duiñedomoi. <sup>12</sup> Caín micorimona cai fueua. Naimie ie amana isiruiñena jira, Taife naimiena ramo faiamona, ie amana meinete. Ie ama Jusiñamui jitailla rafuena finouide; ia Caín micorí Jusiñamui jitailla rafuena finoñede. Uradoillamona ie amana meinete. <sup>13</sup> Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinaiñeno. <sup>14</sup> Cristona nia cai ñnoñena facaise jeacino anamo cai illa jira, Jusiñamuimona fiodaitino isoidicaí. Jiaie creyentena cai isiruia, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite. <sup>15</sup> Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede. <sup>16</sup> Cristomona cai fueua. Naimie jitailla jira, cai facaina fiodaite. Iemona jiaie creyentiaína cai isiruillana uiñoticaí. Ie jira naimaci facaina naimaci ramo jiriñellena fiodaiacaniticaí. <sup>17</sup> Jiaie creyentiaína cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruiñedomoi. <sup>18</sup> Cue uruiaí isoidomoi. “Jamai uaido jiaie creyentiaína isiruiticaí” cai raiñena; iadedi cai finoca rafuemona naimacina cai canua.

### *Jusiñamuimo jaciruiñeno jiredicai*

<sup>19</sup> Jiaie creyentiaína isiruicana cai jaia, Jusiñamui cominina cai illana raise uiñoticaí. Jusiñamui muidona cai comeci uri ite. <sup>20</sup> Cai comecimo iticinona uiñoticaí. Siñonamiéna jira, Jusiñamui iena jiaí uiñote. <sup>21</sup> Cai comecimo jeacino iñenia, Jusiñamuimo jaciruiñeno jiredicai. <sup>22</sup> Naimie llogacinona cai ñnoia, naimie jitaillacinona cai finoia, naimiemo cai jicaca

rafuena birui feiñoticaí. <sup>23</sup> Naimie Jito Jesucristo caí ñinuana jitaide. Cristo llua isoi, coninina caí isiruillana jiaí jitaide. <sup>24</sup> Naimie llogacinuaina caí ñinoia, naimiena nabaidicaí. Caina jiaí nabaide. Naimie Joreño caimo illamona, naimie caina nabaillana jai uñoticaí.

## 4

### *Juan tainona llofuerañina llua rafue*

<sup>1</sup> Omoina isiruiticue. Naga llofuerañima uaina ñinoñeno. Ailluena tainona llofuerañi birui illa jira, Jusiñamuimona naimaci feiñoga uaina ñica naimacina facaci: <sup>2</sup> “Jusiñamui dinena Jesucristo billanona, ñimana jaide” naimaci lloia, Jusiñamuimona naimaci uaina otimaci; <sup>3</sup> ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiemona naimaci uaina otimaci. Naimie billena jai fididomoi. Comini começaina feidocana birui jaidimaci. <sup>4</sup> Ero, Jusiñamuimo jai caí duillamona, Jusiñamui caimo ite. Taino llofuerañi díbeimo omoi jaiñena jira, naimaci llofuiana oñedomoi. Naie taino llofuerañimo Taife ite; ia Jusiñamui Taife baifemo faite. <sup>5</sup> Naie tainona llofuerañi Jusiñamuina ñinoñedinomo duidimaci. Naimaci ecimo ite rafuena llofuecabitimaci. Jusiñamuina ñinoñedino naimaci llofuiana ebiruitimaci. <sup>6</sup> Jusiñamuimo jai duidicaí. Jusiñamuina ñinotino caí llofuiana cacaacadimaci; ia Jusiñamuina ñinoñedino caí llofuiana cacaacaiñedimaci. Iemona Jusiñamui uaina llofuerañina uñoticaí. Iemona tainona llofuerañina jiaí uñoticaí.

### *Jusiñamui caina isiruilla rafue*

<sup>7</sup> Omoina isiruiticue. Coninina caí isiruilla. Jusiñamui caina isiruillamona, caina jiañona isiruitade. Ie isoi isiruitinodi Jusiñamui comini. Jusiñamui rafuena uñocana jaidimaci. <sup>8</sup> Jusiñamuimo caí duillamona, caina jiañona naimie isiruitaja jira, jiañona isiruiñedimiedi Jusiñamui rafuena ñia uñoñede. <sup>9</sup> Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticaí. Ie finoca rafuemona Jusiñamui caina isiruillana jai uñoticaí. <sup>10</sup> Jusiñamuina caí isiruillana ñaiñedicue; ia Jusiñamui caina isiruillana ñaiticue. Caí jeacino facaina fiodaillena, ie Jito eniruemo orede. Iemona caí jeacinona feitate. Iemona isiruillana raise uñoticaí. <sup>11</sup> Caina Jusiñamui isiruilla isoi, coninina caí isiruilla. <sup>12</sup> Buna Jusiñamuina jaca cioñede; iadedi coninina caí isiruillamona, Jusiñamui caimo illana jai uñoticaí. Naimiena isiruicana jiaí jaidicaí. <sup>13</sup> Naimie Joreño caimo itatajamona, naimiena caí nabaillana uñoticaí. Caina naimie nabaillana jiaí uñoticaí. <sup>14</sup> Bie rafuena jiaí



uiñoticaí. Jusiñamui ie Jitona eniruemo jaie oretate. Naimiena ñnoñedinona jilloitallena, naimiena oretate. Naimie Jitona ciodicai. Ie jira iena birui lloticaí. <sup>15</sup> “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiaí nabaide. <sup>16</sup> Ie jira Jusiñamui caina isiruillana uiñoticaí. Caina jiaínona naimie isiruitade. Iedo cai jaillamona, caina nabaide. Naimiena jiaí nabaidicaí. <sup>17</sup> Iemona Jusiñamuina isiruicana jaiticaí. Naimie uicomo ico nana cai ille facaise naimiena jaciruiñeíticaí. Jusiñamui Jitona Cristo illanona, Jusiñamui comínina cai jiaí illanona, naimiena birui jaciruiñedicaí. <sup>18</sup> Jusiñamuina cai isiruaia, naimiena jaciruiñedicaí. Eo raise naimiena cai isiruaia, ¿niese naimiena jaciruiticaí? Naimiena cai jaciruaia, naimie caina duere finuana jaciruiticaí. Jusiñamuina jaciruitimiedi Jusiñamuina nia raise isiruiñede. <sup>19</sup> Nano Jusiñamui caina isiruilla jira, caidi naimiena isiruiticaí. <sup>20</sup> “Jusiñamuina isiruiticue” raitimiedi jiaie creyentena enoia, jai taino llote. Creyentena cide; ia naimiena isiruiñede. Jusiñamuina cioiñede. ¿Niese ie cioiñenamiena isiruite? <sup>21</sup> Jusiñamui iena caimo jai llote: “Cuen a isiruitimie jiaie creyentena jiaí isiruite”. Ie jira conínina isirui.

## 5

### *Taife ie rafuena anafefitaticai*

<sup>1</sup> Jusiñamuimona Jesús billana cai ñnoia, Jesús cai Jilloitaraimana cai ñnoia, Jusiñamui comínina jaidicaí. Jusiñamuina cai isiruaia, nana naimie comínina jiaí isiruiticaí. <sup>2</sup> Jusiñamuina cai raise isiruaia, naimie llogacinuaina cai ñnoia, naimie comínina jiaí isiruiticaí. <sup>3</sup> Jusiñamuina cai isiruaia, naimie llogacinuaina jiaí jai ñnoticaí. Naimie uai raise ñnuamona, iena finollena sefuiruiñedicaí. <sup>4</sup> Jusiñamui díbeimo itinodi Taife ie rafuena anafefitatimaci. Cristona cai ñnuamona, Taife ie rafuena anafefitaticai. <sup>5</sup> Jesúdi Jusiñamui Jitonana cai ñnuamona, Taife rafuena anafefitaticai.

### *Jesucristodi Jusiñamui Jito*

<sup>6</sup> Jesucristona dane ñaiticue. Naimiedi Jusiñamui Jitona ñnoticaí. Naimie bautizajamona, naimie fiodaillamona naimiedi Jusiñamui Jitonana uiñoticaí. <sup>7</sup> Uanaicínona naimie uiñuamona, Jesucristo bautizaja facaise Jusiñamui Joreño caina iena jiaí uiñotade. <sup>8</sup> Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uiñoticaí. <sup>9</sup> Jesús bautizaja facaise “Jesúdi cue Jito” Jusiñamui caimo llote. Jesúna comín lloia, iena feiñoticaí. Comín llua baifemo Jusiñamui llua faia jira, Jusiñamui llua jiaí ua feiñoticaí. <sup>10</sup> Jesúdi Jusiñamui Jitonana cai ñnuamona,

cai comeciai daje isoi lloide; ia Jusiñamui ie Jitona llwana ñnoñedinodi: “Jusiñamui taino llote” raitimaci. <sup>11</sup> Biena ñaiticue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate. <sup>12</sup> Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca iñeitimaci.

*Jusiñamui caina raise uiñote*

<sup>13</sup> Jusiñamui diga ico omoi jaca illena omoi raise uiñollena, bie cartana jai cueticue. <sup>14</sup> Jusiñamuina cai ñnuamona, naimiena jai jaciruiñedicai. Naimiemo cai jüia, naimie jitailla isoide rafuena cai jicaia, naimie caina cacajana raise uiñoticaí. <sup>15</sup> Iese cai jüia, naimie jaca fairiuana jai uiñoticaí. <sup>16</sup> Jaiie creyente jeacino finuana omoi cioia, naimie facaina Jusiñamuimo jüi. Iemona Jusiñamui dibeimo naimiena dane itataitomoí. Jusiñamui rafuena jamaidimie facaina omoi jüiana lloñedicue. Naimie faificana jaiacade. <sup>17</sup> Jusiñamui llogacinona bu ñnoñenia, jeacino jai finode; ia naimie facaina omoi jüia, Jusiñamui iena feitaite. Faificana jaiacadimie facaina omoi jüiana lloñedicue. <sup>18</sup> Jusiñamui comini jeacinona finocana jaiñedimaci. Naiemona Cristo caina eenote. Ie jira Taife caina duere finonide. <sup>19</sup> Jusiñamuimo jai duidicaí. Naimie anamo jai iticaí; ia naimiena ñnoñedino Taife anamo jai itimaci. <sup>20</sup> Jusiñamui Jito jaiie eniruemo billana uiñoticaí. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicaí. Jesucristomo jai jai duidicaí. Ie jira Jusiñamui diga ico jaca iiticaí. <sup>21</sup> Cue uruiaí isidomoí. Daje rafuena nia lloiticue. Jiraraimona abina rairui. Jusiñamui ieñede rafuedo omoi jaiñeno. Mai. Juandicue.

## JUAN IE EMODOMO ORETAGA RABE

### *Uanaicinona coninina cai isiruilla*

<sup>1</sup> Juandicue. Creyentiana sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci. <sup>2</sup> Naie uanaicinona cai uiñua jira, omoina isiruiticai. Iena uiñocana jaca jaiticai. <sup>3</sup> Cai Moo Jusiñamui ie Jito Jesucristo diga, caina jaca duenaite. Iaimaia caina jaca uri itataite. Uanaicinona cai uiñuamona, iaimaiana cai isiruillamona, iese iiticai.

<sup>4</sup> Caimo cai Moo llua isoi, uanaicinodo o uruiaimona dajerie jailla jira, iobidicue. <sup>5</sup> Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñotica. Coninina cai isiruillana ñaiticue. <sup>6</sup> Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui lluacinona cacadomoi. Coninina cai isiruillana cacadomoi.

### *Diga taino lloraini ite*

<sup>7</sup> Diga taino lloraini illa jira, iena ñaiticue. Jesucristo monamona jai billanona, imana jaiñenana llofuecabitimaci. Bu iese llofueia, cominina jifujete. Naimiedi Cristona abi caitadimie. <sup>8</sup> Cristo rafuedo omoi jailla jira, Jusiñamuimona buena omoi faifiñellena, omoi abina rairui. Jusiñamuimona ibana feiñoitomoi. <sup>9</sup> Cristo llogacinona bu fañonocaia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jai, cai Moo Jusiñamuina uiñote. Ie Jitona jiai uiñote. <sup>10</sup> O jofomo Cristo rafuedo jaiñedimie bia, Cristo rafuena cue llofuia isoi naimie llofueñenia, naimiena nafueño. “Jusiñamui ona canuamona, marena o jai” lloño. <sup>11</sup> “Marena jai” o lloia, naimie marañede rafue facaina jai itio.

### *Rafuena nia lloiacade*

<sup>12</sup> Diga rafue ite omoimo cuellena; iadedi aillue cartana cueñeticue. Omoi dine raire cue illemo ocuridicue. Danomo cai rillamona ñaiticai, cai comeciai caimarecaillena. <sup>13</sup> O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

## JUAN IE EMODOMO JIAIE ORETAGA RABE

### *Gayo mare rafue finocana jaide*

<sup>1</sup> Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue. <sup>2</sup> Cue isiruigamiedio. Nana o finua rafue marena jaillana jitaidicue. O ecairenana jiai jitaidicue. O comeci marena illana jai uñoticue. <sup>3</sup> Cue dine dajerie creyentiai bite. Uanaicnodo omoi jaillana llote. Cristo rafuedo omoi jaillana llote. Ie jira iobidicue. <sup>4</sup> Uanaicnodo omoi jailla jira, eo iobidicue. Cue muidona Cristona omoi ñnua jira, cue uruiaidomoi isoidomoi. Uanaicnodo omoi jailla jira, eo iobidicue. <sup>5</sup> Cue isiruigamiedio. Naga icaiño jiaie creyentiaina o canoia, eo mare. Nia o uññoega creyentiai o illanomo ria, naimacina o canoia, ua eo mare. <sup>6</sup> Naie isoide creyentiaina o isiruillana jiai fididicue. Rollena creyentiai ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare. <sup>7</sup> Naimie rafue llua muidona, jai macaritimaci. Jusiñamuina uññoñedinomona jaca buena feiñoñedimaci. <sup>8</sup> Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

### *Diótrefes marañede*

<sup>9</sup> O dine ite creyentiaimo cartana jai oredicue. Diótrefesna janore ñaiacadicue. Naimiedi eo uicoidimie. Naimiedi cue uaina uññoiacañede. <sup>10</sup> O dine cue ria, naimie finoca rafuena omoimo lloiticue. Cuena jeare ñaite. Jiaie illanomona bite creyentiaina feiñoiacañede. Naimaci feiñuana rairuide. Rora como naimaci bia, naimacina jino dotade.

<sup>11</sup> Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uññoñede.

### *Demetrio marena ite*

<sup>12</sup> Nana creyentiaidi Demetriona marena ñaitimaci. Uanaicnodo naimie jaide. Iese naimiena jiai ñaiticai. Cai llucacnodi uanaicinona uñnotio.

### *Rafuena nia lloiacade*

<sup>13</sup> Diga rafuena cueiacadicue; iadedi cueñeiticue. <sup>14</sup> Raire ona cue cioillemo ocuridicue. Ie mei ñaiticoco. <sup>15</sup> Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

## JUDAS ORETAGA RABE

### *Judadi Jusiñamui fetocanomo cartana orede*

<sup>1</sup> Cue nabaiñiai, bie carta omoi dine oredicue. ¿Nie isoidomoi? Judadicue. Ie rafuena lollena, Jesucristo dibeimo jai maijidicue. Jacobo cue ama. Jusiñamui omoïna jai fetuana cue uiñuamona, bie cartana oredicue. Cai Moo Jusiñamui omoïna isiruite. Jeacinona omoi finoï raillano, Jesucristo omoïna jai sedade. <sup>2</sup> Jusiñamui omoïna eo duenaillana omoi uiñocana omoi jaillana jitaidicue. Naimie omoi comeciaina raise uri itatajana omoi uiñocana omoi jaillana jitaidicue. Naimie omoïna eo isiruillana omoi uiñocana omoi jaillana jitaidicue.

### *Tainocinona llofueraini ite*

<sup>3</sup> Cue isirugano, omoïmo Jusiñamui caina jai jillotaja rafuena iocire cueiacadicue; iadedi jiaie rafue birui illa jira, omoïmo cueticue. Jusiñamuimona cai feiñoga rafuena omoi eo riiduaana jitaidicue. Naie rafuena Cristo oretaganomona cacadicai. Naie rafuena meidonidicai. Ieconi duide. Jusiñamui jiaie rafuena lloñeite. <sup>4</sup> Caimo ite rafuena omoi eo riiduaana jitaidicue. Cai creyentiai motomo dajerie tainocinona llofueraini illa jira, iena jitaidicue. Uanaicinona llofuecana naimaci illamo cai comeciaina facadicai; iadedi Jusiñamui jitaillacinona finoñedimaci. “Jusiñamui caina duenaillamona, jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoiticue” Jusiñamui jaie llote. Naimie duere sefuillacino anamo jai itimaci.

<sup>5</sup> Iemona omoi raise fueollena, bie rafuemo omoi comeciaina faca. Bie rafuena navui llofueticai. Iena raise cacadomoi; iadedi iena dane uibiño. Iena lloiticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci ñnoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi ñnoñenia, omoïna duere finoite. <sup>6</sup> Ero, bie rafuemonona omoi fueua. Jusiñamui ecimo ite jaienisaïmona dajerie imaci illanona jaie jitañedimaci. Naimie isoi iacadimaci. Naimaci illano naimie ecimo jaie itimaci. Naimaci jitailla rafuena naimaci finollena, naimie

ecimo illana faïnnonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie riicaillafue anamo jai itimaci. Naimie dine nana comini illirui ia, naimacina duere finoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere finoite. <sup>7</sup> Ero, bie rafuemona omoi fueua. Sodoma railla nairai micoriai marañedicinona jaie eo finoidimaci. Gomorra railla nairai micoriai daje isoidimaci. Nainomo ianori ite nairai daje isoidimaci. Naimaci añede riñoniai diga itimaci. Naiñaiñuai iniñede iñiaia diga itimaci. Coninina aifiedotimaci. Iemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacinona finodinona duere finoite.

<sup>8</sup> Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaina jeare ñaitimaci. <sup>9</sup> Miguelna mameciredede jaienici isoi iñedimaci. Miguel Jusiñamui nanoca jaienici. Moisés micori fodailla mei, Miguel Moisés micori abina raiaidade. Taife diga Moisés micori abina uaitate. Taife Moisés micori abina bairoacade. Miguel iena jia jitaide. Miguel Taife diga riire ñaite; iadedi Taifena jeare ñañede. Miguel ie comecina facañede: “Cuemo ite uai Taifena oni oretallena”; iadedi naimiemo lloite: “Jusiñamui ona duere finoite”. <sup>10</sup> Naie taino llofueraini iese iñedimaci. Jusiñamui jaienisaina jeare ñaitimaci. Ocainaia imaci comecia uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci. <sup>11</sup> Caïn micori isoi naimaci illa jira, Jusiñamui naimacina duere finoite. Jusiñamui jitailla rafuena Caïn micori finoacañena jira, ie ama micori diga icirite. Icirillamona Caïn micori ie ama micorina jaie meinete. Caïn micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judíuai cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori ñnoñena jira, Jusiñamui naimie micorina meinete. Jusiñamui uaina naie taino llofueraini ñnoiacañena jira, jia faifitimaci. <sup>12</sup> Dani omoi nabairillamona danomo omoi guia, naie taino llofueraini jia bitimaci. Naimaci illa jira, raise nabairinidomoi. Meiruiñeno eo gutimaci. Dani naimaci comecimo ite jitaillacinona finodimaci. Omoina

canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riará isoidimaci. Llisilla facaise riará llisiñenia, maraiñede. Riará llisiñenia, iena oni aiñodicaí. Maraiñena jira, safenaite. Naimaci maraiñena jira, naie taino llofueraini jiai safenaitimaci. <sup>13</sup> Naie taino llofueraini jearede rana finocabidimaci. Eo bagode monailai isoidimaci. Monailai eo bagoia, monailai fuemo jearede rana oni ñaicosite. Ucuaina eruailamona naiona cai macarillana uiñoticaí; iadedi ucudu ana feia, cai macarillana raise uiñoñedicaí. Naie taino llofueraini ana fede ucudu isoidimaci. Comini uanaicinona uiñoñañedimaci. Naimaci llofuiacinomona Jusiñamui jitailla rafuedo cai raise jaillana uiñoñedicaí. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

<sup>14</sup> Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisaí diga biite, <sup>15</sup> nana naimiena iñoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote. <sup>16</sup> Naie taino llofuerainidi creyentiaina sedarainina uaitaside. Jusiñamuina jeare ñaoidimaci. Dani naimaci jitailla rafuena finoidimaci. Eo abina biriuidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

### *Cristona iñotonomo llucino*

<sup>17</sup> Cue isiruiga amatiaí, cai Nama Jesucristo oretagano jai llogacinona omoi comeci. <sup>18</sup> Raitimaci: “Jesucristo nia abido biñena facaiseconi naimie uaina iñoñedino jaca iitimaci. Naimaci jearede jitaillacinodo jaitimaci” raitimaci. <sup>19</sup> Naie taino llofueraini comini comeciaí daje isoi lloillana itañañedimaci. Jusiñamui dibeimo iñede rafuena gaidimaci. Jusiñamui Joreño naimacimo iñede.

<sup>20</sup> Cue isiruigano, naimaci isoi omoi iñeno; iadedi Jusiñamui rafue iñocana mai omoi jai. Naie rafuedi mare. Jusiñamui Joreño omoína canuacinodo Jusiñamuimo omoi jii. <sup>21</sup> Jusiñamui omoína isiruillacinona uiñocana omoi jai. Jusiñamui ecimo cai jaca illemo fecuise ocuri. Caina cai Nama Jesucristo duenailla jira, naimie ecimo jaca iiticaí. <sup>22</sup> Diga comini naie taino llofueraini rafuedo jaidimaci. Iemona dajerie Jusiñamui uaina raise nia iñoñedimaci. Naimacimo llono: “Mai iño. <sup>23</sup> Dajerie cominina Jusiñamui duere sefuillacinomona jillote”. Taino

llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruoicaida duenai.

*Jusiñamuimo iobillacinona cai fecacabillasa*

<sup>24</sup> Jusiñamuidi omoina jeacinona finoñenana itatarede. Naimie uicomo omoina ico itataite. Omoina jeacinona omoi jaca finoñedena nainomo itataite. Nainomo iocire iitomoi. <sup>25</sup> Jusiñamuidi jaca dajede. Cai facaina cai Nama Jesucristo fodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.



## JUAN ICO SUILLE RAFUENA CUIAFUE

### *Jesucristo ico suille rafue llwana cueticue*

<sup>1</sup> Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jiairuido ico ebena suille rafuena uiñotade. Cuena iena uiñotallena, iena cuemo llollena, ie jaienici cue dine oretate. <sup>2</sup> Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jiai jai cueticue. <sup>3</sup> Bie ico suille rafuena ado facacabidinodi caimare iitimaci. Biena cacacabidino iena ñnuamona, caimare iitimaci. Bie rafue suillirui iairei illa jira, iemo raise cacarei.

### *Siete creyentia; illanua;imo bie carta oredicue*

<sup>4</sup> Asia railla eniruemo ite creyentia; omoi dine cue uai oredicue. Siete illanomo omoi illamona, bie rafue omoi uiñuana jita;idicue. Iena omoi uiñollena, biena cueticue. Jusiñamui ie Joreño diga, Jesucristo diga, omo;ina duenaicabide. Omo;ina uri itatacabite. Iena omoi uiñocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie ab;imo illamona, omo;ina bie rafuena raise cacataite. Iena ñnotaite. <sup>5</sup> Ie Moo uaina raise ñnuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fioda;ñena jira, nana illaicom;ini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. <sup>6</sup> Naimie fiodaillamona naimie com;inina jaidicai. Naimie anamo illaima isoi caina sedallena, caina itatate. Naimie com;inina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jita;idicue.

<sup>7</sup> Ero, eniruemo uillie motodo Jesucristo biite. Naimie bia, nana com;ini naimiena cioitimaci. Naimiena jaie meinete naira;idi naimiena cioitimaci. Duere sefuillana jacinuamona nana com;ini eecuitimaci. Iese jaca suite.

<sup>8</sup> Cai Nama Jusiñamui cuemo llote: “Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iiticue. Siño jito;idicue”.

### *Juan Cristona ciode*

<sup>9</sup> Daajena Cristomo cai duilla jira, omoi amadicue isoidicue. Cristomo cai duillamona, birui duere sefu;idicai. Com;inina

ico naimie sedaia, nainomo iiticaí. Naimie cai comeciaina ocuiñotajamona iemo birui ocuiridicaí. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci. <sup>10</sup> Jusiñamuina cue sedajamona, naimie Joreño cuena namatajamona, iniñenamona nicairilla isoi cue jinafo dine damie adolluana cacadicue. Trompeta isoi ie uaidi ficirede. <sup>11</sup> Cuemo llote:

—O cioacalle rafuena cueno. O cacaacalle rafuena cueno. Ie mei bie siete illanuaímo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Dese illanuaímo oreta —llote.

<sup>12</sup> Cuemo llotimiena cue cioillena, jinafo dine erodaticue. Siete oromona finoca lamparíniai ciodicue. Naga lamparín ie oromona finoca rairacomo raide. <sup>13</sup> Naie lamparíniai motomo imana eruaidimiena ciodicue. Naimiedi Cristo. Areroina jitade. Oromona finoca cinturóna jitade. <sup>14</sup> Naimie ifotirai userede iniroi isoi eo userede. Naimie uisi irai boa isoi eruaide. <sup>15</sup> Naimie eillidi bronze eo dua isoi quenirede. Naimie uai aillue ille tua isoi eo ficirede. <sup>16</sup> Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiñua isoi.

<sup>17</sup> Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue. <sup>18</sup> Jaie fiodaiticue; iadedi naiemona jaie jillodicue. Jaca iiticue. Dane fiodaiñeiticue. Cue uai siñona jira, comini fiodailliruina lloticue. Cuena inoñedino fiodailla mei, naimaci joreñuai illinona jiai lloticue. <sup>19</sup> O como ciua rafuena cueno. Omo cue ja llole rafuena cueno. O ciolle rafuena jiai cueno. <sup>20</sup> Ailluena rafue omo lloiticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiaí llofueraíni isoide. Bie siete lamparíniaidí bie siete illanomo ite creyentiaí isoide. Bie creyentiaína ja ñaiacadícué —raite.

## 2

### *Cristo Efesomo ite creyentiaímo lloga rafue*

<sup>1</sup> Cristo cuemo llote:

—Efesomo ite creyentiaímo lloleña, nainomo ite llofueraímamo cue lluaña cueno: “Cue nabeillimo siete ucuduai ite. Siete oromona finoca lamparíniai motomo iticue. Omoína ñaiticue. Omoi llofueraíma cue anamo ite. Omoi motomo cue illamona, cuena nabaidomoi. <sup>2</sup> Omoi motomo cue illa jira, omoi illana raise uiñotícué. Omoi comeciái ocuiñocana iciriñeno itomoi. Maraiñedicinona finoraíni diga

nabairiñedomoi. Omoi motomo damierie ‘Cristo oretagacai’ raitinona facaciamona, naimaci tainona llorainina uiñotomoi. <sup>3</sup> Omoi comeciai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena ñnocana nia jaidomoi. <sup>4</sup> Iese itomoi; iadedi omoi abirafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi. <sup>5</sup> Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciai dane raise iñenia, omoina duere finoiticue. Iemona omoi lamparin oni uiticue. Omoi creyentiaina ñaiticue. Cue dibeimo raise omoi iñenia, jiairuido omoi illanomo creyentiai iñeitimaci. <sup>6</sup> Omoina marecinona jiai lloiticue. Nicolaítas railla comini finoca rafuena gaiñedomoi. Iena jiai gaiñedicue. Eo maraiñede rafuena finocana jaidimaci. <sup>7</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Cuena raise ñnotinomo Jusiñamui illanomo ite riarana iiticue. Ie lilllemona jaca iitimaci” cueno.

*Cristo Esmirnamo ite creyentiaimo lloga rafue*

<sup>8</sup> Cristo cuemo llote:

—Esmirnamo ite creyentiaimo llollena, nainomo ite llofueraimamo cue llwana cueno: “Jaié jaca iticue. Eniruemo jaié cue ia, fiodaiticue; iadedi naiemona jai jillodicue. Jaca iiticue. <sup>9</sup> Cue cominina omoi illa jira, duere sefuidomoi. Omoi duerenana uiñoticue. Benomo dueredomoi; iadedi Jusiñamui mona duenidomoi. Naimie dine ico omoi ia, buerenitomoi. Damierie omoina jeare ñaiana uiñoticue. Naimacidi judiuaí comini; iadedi cue dibeimo iñeditimaci. Taife anamo itimaci. <sup>10</sup> Ico omoi duere sefuia, jaciruiñeno. Taife cárcelmo omoimona damieriena itataite. Abido danomo omoi jaillena, iese omoina duere finoite. Diez digarui duere sefuitomoi. Omoi ille dinori cuena ñnocana omoi jai. Duere sefuillamona bu fiodaia, cue diga jaca iite. <sup>11</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faifiñeitimaci; ia Jusiñamui dine jaca iitimaci” cueno.

*Cristo Pérgamomo ite creyentiaimo lloga rafue*

<sup>12</sup> Cristo cuemo llote:

—Pérgamomo ite creyentiaimo llollena, nainomo ite llofueraimamo cue llwana cueno: “Nagafebei eo jairede lloebi cuemo ite. <sup>13</sup> Omoi illana uiñoticue. Taife anamo itino motomo itomoi; iadedi cuena ñnocana nia jaidomoi. Omoimona Antipas micorina navui meinetimaci. Naimie

micoridi cue rafuena raise llofueuide. Naie facaise cuena fañonocaiñedomoi; <sup>14</sup> iadedi cuemona janore rafue omoi diga birui ite. Omoi mona damieriedi Balaam micoridi llofuiacinodo jaidimaci. Balaam micoridi Balac micorimo jaie llua jira, omoi jaigai jeacino finodimaci. Balac cominimo omoi jaigai diga nabairillena llote. Ie jira omoi jaigai jiraraimo fecaca guillena naimaci diga guitimaci. Iemei naimacimona ainiaina otimaci. Jusiñamuina ñnoñedinomona ainiaina otimaci. Naiemona jearede rafue comuide. Omoi mona birui damierie iese isoidimaci. Cuena ñnoñedinomona ainiaina otimaci. <sup>15</sup> Omoi mona damierie nicolaítas railla llofuiacinodo jai jaidimaci. Naimaci llofuiacinodi uanañedicino. <sup>16</sup> Naie llofuiacinomona eneno mai omoi i. Iedo jaiñeno. Naie llofuiacinodo jaidinomo: ‘Omoi comeciai iuai dane meido’ llono. Iena naimaci finoñenia, cue dibeimo naimaci raise iacaiñenia, cuemo ite lloebi diga cuena ñnoñedinona duere finoiticue. <sup>17</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua. Judúuai jaigaimo maná railla guille cue illa isoi, cuena raise ñnotinomo monamo jai ite maná isoi iiticue. Biena ññaiticue. Imaci comeciaina ocuiñotajacinona iiticue. Cue cominina naimaci illamona, naimacimo userede noficina jiai iiticue. Nainomo mameci ite. Dani naiena feiñotino naie mamecina uiñoitimaci” cueno.

*Cristo Tiatiramo ite creyentiaimo lloga rafue*

<sup>18</sup> Cristo cuemo llote:

—Tiatiramo ite creyentiaimo llollena, nainomo ite llofueraimamo cue llua cueno: “Jusiñamui Jitona cue illanona, bie rafue omoi lloiacadicue. Cue uisi irai isoi boode. Cue eilli bronce eo dua isoi quenirede. <sup>19</sup> Omoi finoca rafuena uiñoticue. Jusiñamuina omoi isiruillana uiñoticue. Jiaie cominina omoi isiruillana uiñoticue. Cuena omoi ñnuana uiñoticue. Jiaie creyentiaina omoi canocabillana uiñoticue. Duere sefuidomoi; iadedi omoi comeciai ocuiñuana uiñoticue. Navui iese icana jaidomoi. Birui bai lliai jaidomoi; <sup>20</sup> iadedi cuemo omoi diga rafue ite. Omoi motomo marañede riño ite. Jezabelna ññaiticue. Naiñaiño omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanañedicinona llofuecabilla jira, omoi mona damieriena jifuate. Jearede rafuena llofuecabite. Omoi añede riño diga illana llofuate. Omoi ññide ñma diga illana llofuate. Jiraraimo fecaca guille guillena llofuate. Iena guilla jira, omoi mona damierie naie jiraraina sedade. Iese naiñaiño llofuecabite. <sup>21</sup> Naiñaiño comeci iuai meidollena are sedadicue; iadedi naiñaiño naie jearede rafuena fañonocaiacañede. <sup>22</sup> Naiñaiño duere sefuillena, naiñaiño duitaiticue. Naimaci comeciai iuai naimaci

meidoñenia, naiñaiño llofuiacinodo jaidinona jiai eo duere finoiticue. <sup>23</sup> Naiñaiño dibeimo itinona meineiticue. Nana creyentiaidi nana comini comeciai iuaillaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi. <sup>24</sup> Jezabel llofuiacinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue; <sup>25</sup> iadedi cue nia abido biñenia, cuemona omoi uiñoga rafuena ñnocana mai jai. <sup>26</sup> Cue Moomona cue uaina feiñoticue. Cuen a raise ñnuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci. <sup>27</sup> Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llaila isoi. <sup>28</sup> Cuen a ñnotinomo monairaicuduna jiai iiticue. <sup>29</sup> Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua” cueno.

### 3

#### *Cristo Sardimo ite creyentiaimo lloga rafue*

<sup>1</sup> Cristo cuemo llote:

—Sardimo ite creyentiaimo lollena, nainomo ite llofueraimamo cue lluana cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise ñnoticai’ raitomoi; iadedi omoi comeciaimona raise iñedomoi. <sup>2</sup> Cue dibeimo raise dane i. Cuen a dane raise ñnocana jai. Cuen a jai fainonocaiacadomoi. Jusiñamui omoi finoca rafueri iobiñede. <sup>3</sup> Cue rafuena jaie cacajamona, iena ñnotomoi. Iedo dane jai. Omoi comeciai iuaina dane meido. Cue dibeimo dane raise omoi iacaiñenia, fiiriraïma bainino billa isoi, omoina duere finollena, ebena biiticue. Omoi dine cue billiruina uiñoñeitomoi. <sup>4</sup> Omoimona damierie jearede rafuena finocana jaiñedimaci. Jusiñamuimona naimaci comeciai marena jira, cue dine naimaci illena, userede ñniroina jitaïimaci. <sup>5</sup> Cuen a ñnocana jaidinodi userede ñniroina jitaïimaci. Cuemo ite rabenicomona naimaci mameciaïna doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaïmo iena jiai lloiticue. <sup>6</sup> Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua” cueno.

#### *Cristo Filadelfiamo ite creyentiaimo lloga rafue*

<sup>7</sup> Cristo cuemo llote:

—Filadelfiamo ite creyentiaïma llolena, nainomo ite llofueraïmamo cue llwana cueno: “Mareuidimedicue. Uanaicinona jaca lloticue. David micori jitona cue illamona, illaimana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cue jitailla diese cominina feiñoñedicue. <sup>8</sup> Omoi finoca rafuena uiñoticue. Omoïna cue canua jira, jaca buna cue rafuena omoi llwana itatanide. Jamai bue isoidomoi; iadedi cue rafuena ñnocana jaidomoi. Cuena janoñedomoi. <sup>9</sup> Omoi dine damierie Taife anamo itimaci. Naimacidi judiui; iadedi cue dibeimo iñedimaci. Tainona llocabitimaci. Ero, omoi dine naimacina cue bitatajama, omoïna cue isiruillana uiñoitimaci. Cue dibeimo naimaci jailla mei, cuemo iobillacinona fecaitimaci. <sup>10</sup> Nana cuena ñnoñedinona ico eo duere finoiticue. Iemona cuena naimaci ñnoñenana uiñoiticue. Omoi duere sefuiñellena, naie facaisemona omoïna jillotaiticue. <sup>11</sup> Eniruemo ebena abido biiticue. Cuemona ibana omoi feiñoñeni raillano, cue dibeimo ñnocana omoi jai. Cue dibeimo raise omoi jaiñenia, cuemona jiaimie omoi facaina ibana feiñoite. <sup>12</sup> Cuena raise ñnotino comeciaina ocuiñotaiticue. Cue illanomo jaca iitimaci. Cuemo naimaci duilla jira, cue jiaie mamecina naimaci abimo cueiticue. Jusiñamui mamecina naimaci abimo cueiticue. Jusiñamui illano mamecina naimaci abimo cueiticue. Naimie illanodi comue Jerusaléna mameciredede. Naimiemona, monamona ico ana biite. <sup>13</sup> Jusiñamui Joreñomona cue lloga rafue ite, omoi creyentiaï iena. Bie rafue bu cacajia, iena jiai ñnua” cueno.

*Cristo Laodiceamo ite creyentiaïmo lloga rafue*

<sup>14</sup> Cristo cuemo llote:

—Laodiceamo ite creyentiaïmo llolena, nainomo ite llofueraïmamo cue llwana cueno: “Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate. <sup>15</sup> Omoi finoca rafuena uiñoticue. Cue rafuedo jaillana nia fainonocaiñedomoi; ia cue rafuedo eo raise jaiñedomoi. Janore ñnocana jaidomoi. <sup>16</sup> Omoi finoca rafuena cue gaiñena jira, cuemona omoïna oni dotaiticue. <sup>17</sup> ‘Ucuberedicai’ raitomoi. ‘Raruiaredicai. Nana cai jitailla ra caïmo ite’ raitomoi. Cuemona iese iñedomoi. Cuemona dueredomoi; ia iena uiñoñedomoi. Cuemona caïmare iñedomoi. Cuena omoi raise ñnoñena jira, uisindino isoidomoi. Taimiedomoi isoidomoi. <sup>18</sup> Ie jira omoïna dajerie rafuena llofueiticue. Cuemona omoi eo duerena jira, omoi comeciï raise iñena jira, omoïmo fiebidicinona cuemo jica. Cuemona ono. Omoi duenillena, cuemona eo mare oro isoide rana ono.

Omoi taimieñelle isoiñellena, cuemona omoi meiruiñellena, userede iniroi isoide ra cuemona ono. Omoi uisina cioille isoillena, cuemona manue ono. Omoi comeciaina ñaiticue. Cuena raise omoi inoia, buena omoi comeciaino fiebiñeite. <sup>19</sup> Cue isiruigano cue dibeimo raise illena, naimacimo riire llocabiticue. Cue uaina naimaci inollena, naimacina jiai duere finocabidicue. Ie jira cue dibeimo raise omoi i. Jeacino omoimo ia, iena fainonocai. <sup>20</sup> Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaina ñaiticue. Cue rafuena omoi cacaja mei, iena omoi inoia, cuena feiñoitomo. Iemona conini nabaiticai. <sup>21</sup> Eniruemo cue Moo jitailla rafuena jaie cue fuidua mei, naimie ecimo abido jai iticue. Cueri naimie iobillamona, illaimana cue illamona, naimie ecimo jai iticue. Ie isoide. Cuena raise inotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue. <sup>22</sup> Jusiñamui Joreñomona cue lloga rafue ite, omoi creyentiai iena. Bie rafuena bu cacajia, iena jiai inua” cueno.

## 4

### *Juan Jusiñamui illanomo ciua rafue*

<sup>1</sup> Dallu illanona monamo cue eruaia, jiaie rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimiedi cuena uaidote. Naimie uai trompeta isoi ficirede. Llote:

—Monamo bi. Jiairuido sülle rafuena omo acataiticue.

<sup>2</sup> Jusiñamui Joreño anamo cue illamona, nicairilla isoi Jusiñamui illanona ciodicue. Nainomo naimie ana raillana ciodicue. <sup>3</sup> Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo cide. Cornalina railla noficina eruaide. Cornalina jiairede. Naie illano ecimo ameona ciodicue. Ameo mocorena jira, esmeralde railla noficina eruaide. <sup>4</sup> Naie illano ecimo veinticuatro rairabici jiai ite. Nainomo userede iniroina jitajanona veinticuatro einamací ana raídímaci. Naimaci ifogímo oromona finoca nuicirai ite. <sup>5</sup> Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. <sup>6</sup> Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite. <sup>7</sup> Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide. <sup>8</sup> Nagamiiaimo seis

iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jai e jaca ite. Birui ite. Ico jaca iite.

<sup>9</sup> Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia, <sup>10</sup> naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, <sup>11</sup> rotimaci:

Cai Nama Jusiñamui, ona eo iobitaiacadicaí.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicaí.

## 5

### *Juan Jusiñamui illanomo ferinoga rabe illana ciodie*

<sup>1</sup> Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ibaibide.

<sup>2</sup> Jusiñamui ie nanoca jaienici ado llua cacadicue. Naimie jicanote:

—¿Bumo ite uaidi nitaca rabe econollena, naie rabena facalena?

<sup>3</sup> Monamo itinomona, enirue itinomona, jai fiódaitinomona, bumó ie uai iñede, naie rabe oni econollena. Naie rabe facanidimaci. <sup>4</sup> Jaca bumó naie uai iñena jira, eo eedicue. <sup>5</sup> Naie facaise naie veinticuatro einamacimona damie cuemo llote:

—Mai eeñeno. Judá nairai ie Leónna mameciredimiedi iena econorede. Naimiedi David micori comini imie. Ie díbeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

<sup>6</sup> Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreño jai orede. <sup>7</sup> Naie facaise Jusiñamui ie nabellimona naie rabena ote. <sup>8</sup> Iena naimie ua mei, naie cuatro cajedino, naie veinticuatro einamací diga, naimiena sedallena, naimie uicomo ana bitadatimaci. Nagamiemo guitarrana eruaide



arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamui comini jiacono mamecido ite. <sup>9</sup> Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

<sup>10</sup> Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jiairuido eniruemo ite cominina sedaitimaci.

Ie jira naie rabena oni suiñoedio.

<sup>11</sup> Iemei dane eruaillamona, naimie ecimo eo ailluena Jusiñamui jaienisaina ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. <sup>12</sup> Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiena eo abina uiñotajamona, naimiena jiai iobitaiacadicaí.

Naimiena cai inuanona, naimiemo iobillacinona feacaacadicaí.

<sup>13</sup> Ie facaise nana comini, nana Jusiñamui comuitaga ra diga, llwana cacadicue. Monamo itino, enirue itino, jai fiodaitino, monaillaimo itino llwana cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feacaacadicaí. Caina jaca sedallesa.

<sup>14</sup> Naie cuatro cajedino raitimaci:

—Ie isoi jiai lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

## 6

### *Juan siete nitaca ra oni suiñuana ciod*

<sup>1</sup> Toica Llauda isoidimie iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi llwana cacadicue. Naimie llote:

—Mai bi.

<sup>2</sup> Naimie llua mei, userede caballo billana ciodicue. Caballo emodo itimie iemo sicuira ite. Illaimana jira, naimie ifogimo nuicirai jide. Ie bacauai anafetallena, oni jaide.

<sup>3</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>4</sup> Naimie llua mei, jiairede caballo billana ciodicue. Caballo emodo itimie mo are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

<sup>5</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite. <sup>6</sup> Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomenicono finoia, dacaiño guille raifi ite. Tres kilos cebada ie core darui maijia ua ucube diese raifide. Iena damie oia, iemona llomenicono finoia, dacaiño amani guille raifi ite. Illimo riaro nia ite; ia iena iballena ucube baiñede. Ie muidona aime guitimaci —llote.

<sup>7</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>8</sup> Naimie llua mei, liai usereide caballona ciodicue. Ie emodo itimie mamecidi Fiodaitadimie. Jusiñamui uai naimie mo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riai uaimona ie cuarta facaina comini fiodaitimaci.

<sup>9</sup> Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidica!” naimaci llua jira, Jusiñamuina inoñedino naimacina meinetimaci. Jai fiodaillamona naimaci joreñuai Jusiñamui illanomo jai itimaci. <sup>10</sup> Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

<sup>11</sup> Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meinetimaci. Naimacina meinia mei, ibana oiticue.

<sup>12</sup> Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo

jitireficaide. Fivuidi diruena eruaide. Jiairede. <sup>13</sup> Riirede aifi riara ana llutaja isoi, monamona eniruemo ucuai llude. <sup>14</sup> Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide. <sup>15</sup> Ie jira illaicomini, jamai bue isoifedino, ucuberedino, patrón anamo itino, patrón anamo ifedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci. <sup>16</sup> Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui riicaillafuemona caina reirita. Llauda isoidimie riicaillafuemona caina reirita. <sup>17</sup> Iaimaiai riicaillarui jai ite. Naiemona buna jillobinide —llotimaci.

## 7

*Juan ailluena Israel comini Jusiñamui sello diga nitajana ciodé*

<sup>1-2</sup> Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiai beicimo itiaimaiai. Aifi biñellena itimaci. Ie muidona monaillai dne aifi iñede. Aifi iñena jira, amenaiai nirairiñede. Eniruena monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienismo ado llote:

<sup>3</sup>—Eniruena aifi diga maraiñeno nia finoñeno. Monaillaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uiecuai itofiai sello diga nia cai nitañena, eniruena maraiñeno finoñeno.

<sup>4</sup> Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. <sup>5</sup> Judá micori cominimona doce mil ite. Rubén micori cominimona doce mil ite. Gad micori cominimona doce mil ite. <sup>6</sup> Aser micori cominimona doce mil ite. Neftalí micori cominimona doce mil ite. <sup>7</sup> Simeón micori cominimona doce mil ite. Leví micori cominimona doce mil ite. <sup>8</sup> Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

*Juan ailluena comini userede iniroina jitajana ciodé*

<sup>9</sup> Naie facaise ailluena cominina ciodicue. Ailluena jira, naimacina facadonicue. Naga nairaiimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. <sup>10</sup> Ado llotimaci:

Bie Llauda isoidimie jaie fiodaillamona, cai jeacinomona Jusiñamui caina jai jillotate.

11 Naie facaise nana Jusiñamui jaienisai naimie ecimo naidaillana ciodicue. Naie veinticuatro einamací ecimo, naie cuatro cagedino ecimo jiai naidaidimaci. Naie facaise Jusiñamui uicomo ana bitadajanona, naimiena sedadimaci.

12 Raitimaci:

Bie comini isoi omo iobillacinona jiai fecaacadicaí.

Odi mareuidimedio. Abina eo uiñotio. Odi jaca siño jitodio.

Ie jira iese lloticaí.

Ona jaca cai iobitajasa.

13 Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

14 Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina iñoñedino meinegano. Naimaci iniroina jai jocatorimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiai ñaiticue. Llauda isoidimie fiodailla jira, naimaci comeciai jai jeanide. 15 Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite. 16 Dane duere sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. 17 Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eñeitimaci. Dane sunañeitimaci.

## 8

*Juan Llauda isoidimie iraié nitaca ra oni suiñuana ciode*

1 Toica Llauda isoidimie iraié nitaca ra oni suiñuanona, media hora monamo tii raiñoicaide. 2 Iemei siete Jusiñamui jaienicí naimie uicomo illana ciodicue. Nagamiemo daje trompetana fecade. 3 Naie facaise jiaie jaienicí billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina iñotino jiiacino Jusiñamuimo jaide. 4 Jobaillamona Jusiñamui uicomo a jaide. Nana Jusiñamuimo jiiacino diga a jaide. 5 Naie facaise Jusiñamuimo jobaisoillanomona boode reici jaienicí uanona, cucharóna eruaide ramo iena jonianona, eniruemo

iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

### *Juan trompetas fillana cacade*

<sup>6</sup> Iemei naie siete jaienici naimaci trompetas fillena llinote. <sup>7</sup> Damie ie trompetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue boñede; ia ailluena boode. Riai uaimona ie tercera facaina boode. Nainomo nana amenaiai boode. Nainomo nana raiticiño boode.

<sup>8</sup> Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. <sup>9</sup> Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciai fodaite. Nainomo ite botemona ie tercera facaina jiai anabaite.

<sup>10</sup> Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniai, ie tercera facaina jorainiai diga erireficaide. <sup>11</sup> Ie muidona naie ucudu Ajenjona mameciredede. Riai uai oni dobaiñuamona “Eriredimie”. Iemona jinui erireficaide. Iena jiruamona, ailluena comini fiodaitimaci.

<sup>12</sup> Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

<sup>13</sup> Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

## 9

<sup>1</sup> Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana cidicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. <sup>2</sup> Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide. <sup>3</sup> Uilliemona fioduaina eruailanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci. <sup>4</sup> Raiticiño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci. <sup>5</sup> Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo

isirenite. <sup>6</sup> Iese ico suia, eo duere comini sefuilla jira, fiódailana jítaitimaci. Naimaci abina meinecanitimaci. Fiodaicanitimaci; ia fiódainitimaci.

<sup>7</sup> Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci. <sup>8</sup> Naimaci ifotie arena illanona, riño ifotiena eruaide. Naimaci isiduai leones isiduaina eruaide. <sup>9</sup> Naimaci abiamo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci. <sup>10</sup> Naimaci omacai acaido isoide. Naie diga maillanona, cinco fivui cominina duere finoitimaci. <sup>11</sup> Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie. <sup>12</sup> Daje duere sefuilla rafue jai fuite. Mena nia suiñede.

<sup>13-14</sup> Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suiño — llote. <sup>15-16</sup> Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riaí uaimona ie tercera facaina meinetimaci. <sup>17</sup> Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogiai leones ifogiaina eruaide. Naimaci fuemona boode radi, uillie diga, azufre boa isoi jino bite. <sup>18-19</sup> Naimaci fuemona bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

<sup>20</sup> Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronceomona, nolicimona, amenomona finoca jiraraiaina nia sedaacadimaci. Naie isoide radi cajeñena jira, jaca cioiñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci. <sup>21</sup> Conini meinecabitimaci. Aimaniai dine jaicabidimaci. Naimaci aiñede riño, naimaci iniñede ima diga icabitimaci. Rana ficabidimaci. Jeacinona finocana nia jaidimaci.

## 10

*Juan Jusiñamui jaienicí, econoga rabenico díga, billana ciode*

<sup>1</sup> Ie facaise Jusiñamui illanomona eniruemo jiaie jaienicí billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. <sup>2</sup> Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. <sup>3</sup> León eo irilla isoi, ado llote. Naie facaise siete gurua ñaia isoidino uai cacadicue. <sup>4</sup> Naimaci llwana cacaja mei, iena cueiacadicue; iadedi monamona damie cuemo llote:

—Naie llwana lloñeno. Iena cueñeno.

<sup>5</sup> Naie jaienicí ie nabei onolli mona dine ñuitajanona, <sup>6</sup> Jusiñamuimo llote:

—Jaca itio. Monana nainomo ite ra díga finodio. Eniruena nainomo ite ra díga jiai finodio. Monaillai nainomo ite ra díga jiai finodio. Cue baifemo o faia jira, uanaicinona cue llwana uiñotio. O lloga uaina jaca suite. <sup>7</sup> Iraie jaienicí ie trompeta ja fiite. Filla mei, bie facaise Jusiñamui ie facaina lloraini micoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

<sup>8</sup> Monamona cuemo ailli llotimie dane llote:

—Jaienicí onollimo econoga ite rabenicono llinuai.

<sup>9</sup> Ie jira jaienicí dine cue jaillanona:

—Iena cuemo ine —llocue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

<sup>10</sup> Llinua mei, iena guticue. Ciifo isoi naimerede rana cacadicue; ia guilla mei, erirede ra isoi cue jebemo ite. <sup>11</sup> Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

## 11

*Juan menamie Jusiñamui rafuena llwana cacade*

<sup>1</sup> Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. <sup>2</sup> Cue jofo ecimo ite taibirina facañeno. Naie illano judíuaiñedinomo jainaiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. <sup>3</sup> Naie facaise menamiemo cue uaina iiticue. Iaimaiaí cue llole rafuena daje amani años abimo atomonado lloitiaimaiaí. Comini

comeci iuai meiduana iaímaiaí jitailla jira, sunaillamona, ebinide iniroina jítaitíiaímaiaí —llote.

<sup>4</sup> Iaímaiaí mena olivos railla riará mamecido itíiaímaiaí. Enírué Namana Jusíñamui illanona, naimíe uicomo mena ite lamparín ie rairaco mamecido itíiaímaiaí. <sup>5</sup> Iaímaiaína duere bu finoacania, naimíena meineitíiaímaiaí. Iaímaiaí fuemona boode ra billanona, naimíena meinetíiaímaiaí. Iaímaiaína duere finodino iese fiodaitímaci. <sup>6</sup> Iaímaiaí Jusíñamui rafue llole facaiseconi noci deitañellena, iaímaiaímo Jusíñamui uai iíte. Jinui díruena jaitallena iaímaiaímo uai iíte. Iaímaiaí jitaicabilla facaise, díga isoide rafue finuamona comínina duere finoitíiaímaiaí; <sup>7</sup> iadedí Jusíñamui rafue iaímaiaí llua mei, eo ana ite ifomona ocainana eruaillanona, Taife jino bíite. Jino billanona, iaímaiaí díga fúirite. Iaímaiaína anafefitaja mei, iaímaiaína meineite. <sup>8</sup> Raíafomo joneñeitímaci; iadedí iaímaiaí abí Jerusalén naisomo jamai fiebite. Jerusalén comíní jearede rafue finua jira, Jusíñamui rafuena naimíaci jítaiñena jira, Sodoma jaie ite nairai isoidímaci. Egipto jaie ite nairai jíai isoidímaci. Jerusalémo Jesúsna jaie jíai meinetímaci. <sup>9</sup> Raíafomo iaímaiaí joniana rairuitímaci. Darui amani abí atomonado ailluena comíní, naga nairaíaimona iaímaiaína jíbuisaíbitímaci. <sup>10</sup> Nana eníruemo ite comíní iaímaiaí fiodaillari iobitímaci. Iaímaiaímona comíní duere sefuilla jira, iaímaiaí jai fiodailla jira, iobitímaci. Rafuena finuanona, daní conínina rana fecaitímaci. <sup>11</sup> Darui amani abí atomonado illanona, fiodaillamona iaímaiaína Jusíñamui dane jillotaite. Ie muidona naidaitíiaímaiaí. Nana iaímaiaína cíodino eo jacinaítímaci. <sup>12</sup> Naie facaise monamona damíe iaímaiaína uaiduana cacadíiaímaiaí. Llote:

—Bene mai bí.

Ieconí iaímaiaína enoidímacídí uillíe motomo monamo iaímaiaí jaillana cíodímaci. <sup>13</sup> Naie facaise aillue fúisaño suide. Ie jira janore facai Jerusalén goide. Ríai uaimona ie décima facai goide. Naiemona siete mil comíní fiodaitímaci. Fiodaiñedíno jacinaillamona:

—Jusíñamuidí ua síño jito —lloitímaci. <sup>14</sup> Mena duere sefuilla facaise jai fuite. Nía daje suíñede; ía raíre suite.

*Juan íraíe trompeta fillana cacade*

<sup>15</sup> Naie facaise jíaíe jaíenící íe trompetana fíte. Monamo ítíno ado llotímaci:

Jusíñamui, Cristo díga, illaíma ísoi, eníruemo ite comínina bíruimona jaca sedaite.

Naie comíní naimíe anamo raíse íitímaci.

<sup>16</sup> Naie veinticuatro einamaci Jusíñamui ecímo illanona, naimíe uicomo ana bítadajanona naimíena sedadímaci.

<sup>17</sup> Llotímaci:

Jusíñamui, caí Nama, omo íobíllacínona fecaacadícái.



Siño jitodio. O jitailla rafuena jaca finodio.

O uaido bie cominina jai sedadio.

<sup>18</sup> Ona naimaci inoñenamona, o diga iciritimaci; iadedi naimacina emodofidio.

Bie facaise jai fioidaitino jillotajamona, ona naimaci inoñena jira, naimacimona ja ibana oitio.

Jearede rafuena naimaci finua jira, naie facaise ona inoñedinona duere finoitio.

O dibeimo maijidino, o facaina lloraini, nana ona inotino omona ibana feiñoitimaci.

Nibai jamai bue isoidimaci.

Nibai jamai bue isoñedimaci; iadedi omona ibana feiñoitimaci.

<sup>19</sup> Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Iecon borocabide.

Bue isoi eo ficirede. Gurucabide. Nuisaño suide. Monamona noci deilla isoi, ailluena hielu ana llude.

## 12

### *Juan daje riñona, eo aillue jaio diga, ciodicue*

<sup>1</sup> Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño inroidi jitoma isoi bairede.

Naiñaiño eilli anamo fivui ite. Naiñaiño ifogimo nuicirai isoi doce ucuduai ite. <sup>2</sup> Jai uruesite. Jocoacana jira, como isirede.

<sup>3</sup> Ie facaise monamo jiaimiena ciodicue. Naimiedi Taife. Naimie illamona jiaie rafue suillena uiñoticue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riai uaimona naimiedi dragón.

<sup>4</sup> Naimie omacai diga ailluena ucuaina eniruemo ana butade. Riai uaimona ie tercera facaina butade. Ie uruena gutallena, riño uicomo naidaita naiñaiño jocollena sedade.

<sup>5</sup> Naiñaiño imana jocode; ia jaio naimiena gutañede. Nana nairaiai naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite.

Ie ecimo Jusiñamui naimiena itatate. <sup>6</sup> Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

<sup>7</sup> Naie facaise monamo Jusiñamui jaienisaide jaiona eruaidimie diga fuiridimaci. Jaiona eruaidimie jaienisaide diga jiai fuiridimaci. Jusiñamui jaienisaide illaima mamecidi Miguel.

<sup>8</sup> Naimaci dinena emodofidimaci. Jaio ie jaienisaide anafesilla jira, Jusiñamui illanomo naimaci illano jai iñede.

<sup>9</sup> Eniruemo jaiona eruaidimie ie jaienisaide diga dotadimaci.

Naie jaiodi Taife. Satanás. Jaiona Taife jaie jaillanona, eo ailluena cominina jai jifuate. <sup>10</sup> Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise inoñenia, jecinona bu finoa, Jusiñamui uicomo birui naimie finocabilla isoi, Taife cana llogidoñeite. <sup>11</sup> Toica Llauda isoidimie naimaciri fiodailla jira, naimie rafuena naimaci lluamona, Taifena emodofidimaci. Fiodaitimacina, naie rafuena llocana jaiacadimaci. <sup>12</sup> Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are inellena uinote. Naimie icirillamona eniruemo itino eo duere sefuitimaci —llote.

<sup>13</sup> Eniruemo jaiona eruaidimie dotajamona, naiñaiñona duere finollena, naimiedi imana jai jococa riñona racade. <sup>14</sup> Naimiemona jilloillena, Jusiñamui mena iaico, majaiño iaico isoi, naiñaiñoite. Feianona, jofue inenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. <sup>15</sup> Ie facaise jaiona eruaidimie fueмона eo ailluena jinui bite. Ille isoi tote, naiñaiñona corobaitallena; <sup>16</sup> ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede. <sup>17-18</sup> Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino inotino diga, nana “Jesúmo duidicai” raitino diga, jobairiacade.

## 13

### *Juan mena riirede ocainana cide*

<sup>1</sup> Naie facaise monaillai fuemo cue naidaillanona, daje riirede ocaina monaillaimona billana cidicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiamo Jusiñamuina jeare ñaia mameci ite. <sup>2</sup> Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade. <sup>3</sup> Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicaillamona, nana eniruemo ite comini naimie dibeimo jaidimaci. <sup>4</sup> Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

<sup>5</sup> Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade. <sup>6</sup> Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. <sup>7</sup> Taife uai naimiemo illa jira, Cristona eniruemo ite inotino diga jobairite. Naimacina emodofide. Iemona nana comini naga nairaiaimona naimie anamo itimaci. <sup>8</sup> Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena inotino mameciaina naie rabenicomo jai cuete. Naimie illanomo jaca illena, naimaci mameciaina cuete.

<sup>9</sup> Omoi jeforena jira, raise fueollena, bie rafuemo cacarei. <sup>10</sup> Duere sefuillena, naie facaise cárcelmo Cristona inotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona inotino comeciai ocuiñocaida inocana jailla.

<sup>11</sup> Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite. <sup>12</sup> Monailaimona bite ocaina uai eniruemona bite ocainamo jiai ite. Ie uai diga, nana cominina monailaimona bite ocainana sedatate. <sup>13</sup> Eo siño rafuena finocabite. Comini cioillena, monamona eniruemo boode ra ana bitatate. <sup>14</sup> Siño rafuena finuamona, Taife jitailla jira, eniruemo itinona jifuate. Iena naimaci sedallena, cominina monailaimona bite ocaina joreño finuana ocuide. Monailaimona bite ocaina lloebi diga navui bofiamona jai jillode. <sup>15</sup> Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide. <sup>16</sup> Nana cominimo naimie númerona cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo iñedinomo cuetatate. <sup>17</sup> Iese bum o iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate. <sup>18</sup> Iena raise cacaillena, iemo omoi comeciaina faca. Abina uiñotimie bie númerona uiñoite. Come mamecido iite. Bie númerodi seiscientos sesenta y seis.

## 14

*Juan 144,000 comini ruana cacade*

<sup>1</sup> Naie facaise Jerusalémo Sion railla anedu muidomo Toica Llauda isoidimie naidaillana cidicue. Naimie diga ciento cuarenta y cuatro mil comini itimaci. Naimaci uiecuai itofaïmo naimie mameci, ie Moo mameci diga, jai cueda. <sup>2</sup> Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue. <sup>3</sup> Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaïno iena fueonidimaci. Bie ciento cuarenta y cuatro mil comini eniruemono naimaci dibeïmo iñedinomona jai jillodimaci. <sup>4</sup> Bie ciento cuarenta y cuatro mil comini jearede rafuena ebiruiñedinimaci. Llauda isoidimie rafuena ñnocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena. <sup>5</sup> Cristo rafuedo jeacinona finocabiñeno raise jaidimaci.

*Juan daje amani jaienïai rafue lluaana cacade*

<sup>6</sup> Naie facaise mona motomo jaienici feïana cidicue. Naga nairaimo, nana eniruemo itinomo mare rafuena lluaide. <sup>7</sup> Ado llote:

—Jusiñamuïna ñnuanona naimïena seda. Naimïemo iobillacinona feca. Naimïemo ñnoñedinona ja duere finoite. Monana, enirue diga, monaillai diga, ille diga, naimie finua jira, naimïena seda.

<sup>8</sup> Jiaïe jaienici billanona llote:

—Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaïe nairaiïana jeacinona jiai eo finotatimaci. Babiloni-amo jaie itino isoi, Jusiñamuïmona duere sefuitimaci.

<sup>9</sup> Naie facaise jiaïe jaienici billanona, ado llote:

—Monaillaimona bite ocainana bu sedaïa, ie joreñona bu sedaïa, ie uieco itofemo, ie onollimo ocaina cuetatagara bumoa ia, <sup>10</sup> Jusiñamui ricaillafuemono, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienïesaidi Llauda isoidimie diga, iena cioitimaci. <sup>11</sup> Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodaïño jaca duere sefuitimaci —llote.

<sup>12</sup> Bie rafue suille facaise Jusiñamui lloga uaina raise ñnuanona, Jesús dibeïmo raise illanona, comecïaï ocuiñocana naimaci jaille.

<sup>13</sup> Iemeï monamona Jusiñamui Joreño llote:

—Biena cueno: “Biruimona Jesúna ñnuamona, meineganodi caimare iitimaci. Jesús díbeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

*Juan Jusiñamui eniruemo itinona duere finua rafuena cacade*

<sup>14</sup> Naie facaise monamo cue eruaia, userede uilliena ciodicue. Uillie emodo Cristo raide. Imana eruaide. Naimie ifogimo oromona finoca nuicirai ite. Ie onollimo jairede lloebi ite. <sup>15</sup> Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite. <sup>16</sup> Jaienici llua isoi, ie lloebi diga Cristo cotade. Nana iena finode. Cominina duere finode. <sup>17</sup> Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite. <sup>18</sup> Ieconí Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

—Jai einaila jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite. <sup>19-20</sup> Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogí facaise a llerite.

## 15

*Juan siete jaienisaí cominina duere finoacana ciodé*

<sup>1</sup> Naie facaise monamo jiaie rafuena ciodicue. Ieri eo raijicaidicue. Iena cue ciuamona, Jusiñamuidi eniruemo itinomo suille rafuena cue uiñuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie riicaillifue saite.

<sup>2</sup> Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona, <sup>3</sup> jai emodofilla jira, Moisés micori ie ruana rotimaci. Moisés micori Jusiñamui facaina jaie maijuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.  
Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

<sup>4</sup> Cai Nama, nana comini ona jaciruillamona, ona inoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

<sup>5</sup> Jusiñamuina sedajanomo dane eruaidicue. Ie fo iticuartomo ciodicue. <sup>6</sup> Naiemona siete jaienisaí billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade. <sup>7</sup> Naie cuatro cagedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite. <sup>8</sup> Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

## 16

### *Juan eniruemo copas oni totajanona cide*

<sup>1</sup> Ie sedajanomona Jusiñamui naie siete jaienisaímo ado llote:

—Cue riicaillafue omoi copamo illa jira, eniruemo itinona duere finollena, omoi copas oni tota.

<sup>2</sup> Daje jaienici iena finode. Eniruemo ite cominina duere finode. Monailaimona bite ocaina cuetataganona jiai duere finode. Ocaina joreñona sedadinona duere finode. Naimaci abiaímo jodollaiaína comuitate. Iemona duere sefuidimaci.

<sup>3</sup> Iemei jiaie jaienici ie copa oni totajamona, monailaina duere finode. Nana monailaidi fiodaitino dirue isoi jaide. Eo jearedena eruaidi. Nana nainomo ite cagedino fiodaitimaci.

<sup>4</sup> Iemei jiaie jaienici ie copa oni totajamona, nana illiaí, nana jorainiaí diga, duere finode. Diruena jaide.

<sup>5-6</sup> Naie facaise nana jinuina sedacabide jaienici llote:

—Jusiñamui, o jaca mareuidimedio. Ona inotinona eniruemo itino meinia jira, o facaina llorainina naimaci meinia jira, naimacina o raise uiñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

<sup>7</sup> Jusiñamuimo caímare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

<sup>8</sup> Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino

eo usidimaci. <sup>9</sup> Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uiñotimaci; ia naimie dibeimo naimaci comeciái iuaina meidoiacaiñedimaci. Jeacinona finuana fainonocaiacaiñedimaci. Naimiemo iobillacinona fecaacaiñedimaci.

<sup>10</sup> Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitireficaide. Eo duere sefuillamona, comini imaci ifena ainitimaci. <sup>11</sup> Duere sefuillamona, Jusiñamuina jeare ñaitimaci. Naimaci abiaimo ite jodollaiai isirede; iadedi naimaci comeciái iuaina meidoñedimaci. Jeacinona finuana fainonocaiñedimaci.

<sup>12</sup> Naie facaise jiaie jaienici ie copamona ie duere sefuillacinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiái illaicomini, imaci soldaduai diga, ruica dine raise birenitimaci.

<sup>13</sup> Naie facaise aillue jαιο fueмона, monaillaimona bite ocaina fueмона, naimie facaina lloraima fueмона, daje amani jananiai billana cidicue. Nagamiemona daje janaba bite. Nai jananiai jerocina eruaide. <sup>14</sup> Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicomini uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci. <sup>15-16</sup> Armagedón railla illanomo ofitimaci. Naie illano mamecidi judíuai uai mameci. Ieconí cai Nama cuemo llote:

—Fuiriraima isoi ebena biiticue. Cue billemo ocuiridimie iocire iite. Cue billemo naimie ocuiria, cue bia, naimie cue jitaillacinona finuamona, naimie meiruiñeite.

<sup>17</sup> Naie facaise jiaie jaienici jafaici dine ie copamona ie duere sefuillacinona totade. Ieconí ie sedajanomona Jusiñamui llote:

—Bie duere sefuillacino diga, cominina cue duere finoacanacino ja fuite.

<sup>18</sup> Ieconí boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede. <sup>19</sup> Iemona nanoca nairai illano daje amani facaina goide. Nana jiaie illanuai jiai goidimaci. Jusiñamuidi Babilonia railla nairaina raise uiñuamona, nana ie riicaillafuemona iena eo duere finode. <sup>20</sup> Naie ñuisañomona naga uiasi jai cioiñena. Naga anedu jiai cioiñena. <sup>21</sup> Monamona noci deilla isoi, hieló jiai ana jurude. Naga hieló cuarenta kilos nibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

## 17

*Juan eo maraiñede riñona duere sefuillana ciode*

<sup>1</sup> Naie facaise naie siete copas diga ite jaienisaïmona cue dine damie billanona cuemo llote:

—Cue diga bi. Eo maraiñede riño duere sefuillana omo acataitïcue. Monailai emodomo naiñaiño jai raide isoide. Naiñaiñodi nanoca nairai illano mamecido ite. Nana illaïcomini naie nairai anamo itimaci. <sup>2</sup> Naiñaiñona sedajamona, naiñaiño diga, illaïcominidi jearede rafuena finocabidimaci. Naiñaiñona nabaillamona, eniruemo ite comini jearede rafuena eo ebiruitimaci —llote.

<sup>3</sup> Nicaïrilla isoi, jaienici cue joreñona uillanona, jofue iñenanomo cue joreñona uite. Eo jiaïrede riïrede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite. <sup>4</sup> Naie riño jiduirede iniroi, jiaïrede iniroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo maraiñede jearede rafuena finocana uite isoide. <sup>5</sup> Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuemona eo jearede rafue comuicana jaicabide. Cue muidona comini jearede rafuena finocabide”. <sup>6</sup> Naiñaiñodi ailluena Jusiñamuimo duidinona, ailluena ua Jesúna inotinona meinetajana eo ebiruite. Naiñaiñona cue cioia, eo raïjicaidicue. <sup>7</sup> Jaienici cuemo jicanote:

—¿Bue ñe raïjicaidio? Naiñaiñoite ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. <sup>8</sup> Naie ocaina navui ite; ia birui jai iñede. Ico eniruemonona, eo ana ite ifomona, dane biite; iadedi faifite. Ieri Jesucristona inoñedino raïjicaitimaci. Jesucristona naimaci inoñena jira, monamo Jusiñamuidi ie rabenicomo enirue nia finoñena facaise naimaci mameciaina jaca cueñede. Naimie illanomo jaca iñeitimaci. <sup>9</sup> Ocaina rafuena omo ja lloiticue. Jusiñamui ona uiñotajanona iena cacaitio. Bie siete ifogidi siete anedu mamecido ite. Riño nainomo raide. <sup>10</sup> Ie siete ifogidi siete illaïcomini mamecido ite. Naimacimona cinco illaïcomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

<sup>11</sup> Ifomona bite ocainana dane lloiticue. Cominina jiai sedaite; ia bie siete illaïcomini sedajacinomo duite. Cominina naimie sedaja mei, naimie faifite. <sup>12</sup> Ie diez sigaidi diez illaïcomini mamecido ite. Diez nairaina sedaitimaci; iadedi



nia sedañedimaci. Cominina dallu sedallena, ocainamona naimaci uaina feiñoitimaci. <sup>13</sup> Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. <sup>14</sup> Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiena jira, naimacina emodofite. Ie cominina naimie fetode. Naimiena innotimaci. Jai emodofitimaci —llote.

<sup>15</sup> Jaienicí nia llote:

—Riño monaillai emodomo raillana ailli ciodio. Monaillaidi nana comini mamecido ite. Naga nairai mamecido ite. <sup>16-17</sup> Naie diez illaicominidi, ocaina diga riñona enoitimaci. Naiñaiñoña duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iniroina oni dotatajanona, naiñaiño taiñaiñoña iite. Naiñaiñoña meineitimaci. Ie llicisina riitimaci. Ja muidomo iraimo naiñaiñoña dotaitimaci. Iese naiñaiñoña duere finuanona, naiñaiñoña fuidoitimaci. <sup>18</sup> Bie riñodi nanoca nairai illano mamecido ite. Naie nairai anamo nana eniruemo ite illaicomini iitimaci —llote.

## 18

*Juan Babilonia railla nairai illano goilla rafuena ciodie*

<sup>1</sup> Ie facaise monamona jiaie jaienicí ana billana ciodicue. Naimie uai siño. Naimie uai siñoña jira, eniruena lligaiñote.

<sup>2</sup> Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai inñedimaci. Nainomo Taife jaienisaí birui itimaci. Jananiaí nainomo birui itimaci.

<sup>3</sup> Nia goiñenia, bie nairai jeacinona eo finuamona, nana nairaií iena ebiruitimaci. Bie nairaina nabaillamona, nana illaicomini jearede rafuena jiaí finocabidimaci. Jearede rafuemonona nana rana fecaraini bie nairaimona ailluena ucubena ganacabidimaci —llote.

<sup>4</sup> Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. <sup>5</sup> Bie nairai jeacino eo finocana jaidimaci; iadedi iena Jusiñamui uiñuamona, naimacina jai duere finoacade. <sup>6</sup> Jusiñamui, naimaci finua diese ibana ono. Naimacina ua eo duere fino. <sup>7</sup> Jeacino finuamona iobidimaci. Iemona abi iedotimaci. Jeacino finuana eo ebiruitimaci. “Illaicomindicaí. Nana caí jitailla ra caimo ite. Feciño isoi duere jaca sefuiñeiticaí” comeциаína facadimaci; <sup>8</sup> iadedi caí Nama Jusiñamui naimacina ebena eo duere finoite.

Duicomona, sure illamona, aime guillamona fiodaitimaci. Naimaci jofue booite. Jusiñamui siño jitona jira, naimacina raire fuidoite —llote.

<sup>9</sup> Bouamona uillie naimaci cioia, sunaillamona, naie nairai diga nabairite illaicomini eo eeditimaci. <sup>10</sup> Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

<sup>11</sup> Naimaci rana naie nairai jai oñena jira, rana fecaraini eo sunaillamona eo eeditimaci. <sup>12</sup> Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronze, lloona, mare nofici, <sup>13</sup> guille caimaretade ra, caimare soride ra, vino, guille ie aceite, mare harina, core, juraretai, toica llaudai, caballos, carretas, comini. Vendelena, cominina aticabidimaci. <sup>14</sup> Sure illamona lloitimaci:

—Caimona omoi comeciai jitailla rana ja oñeitomoi. Omoi ebiruiga rana ja oñeitomoi.

<sup>15</sup> Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eeditimaci. Sunaitimaci. <sup>16</sup> Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca rana eo ebiruitimaci; <sup>17</sup> iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo majiuidino diga, nainomo jaidino diga, botedo rana fecaraini diga, <sup>18</sup> aaremona uilliena ciuamona, naie nairai bouana fidiano, lloitimaci:

—Naie nairai nana jiai nairai bai femo navui faite. Jiaie nairai ie isoi ebinide.

<sup>19</sup> Sure illamona, naimaci ifogimo imuicina faianona, eeditimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

<sup>20</sup> Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui majidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

<sup>21</sup> Naie facaise jiaie jaienicimo siño uai illanona, eo aillue nofici llinuanona, monaillaimo iena faite. Llote:

—Bie nofici dane cai cioiñena isoi, Babilonia railla nairai dane iñeite. Jusiñamui iena eo raire fuidoite. <sup>22</sup> Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca

fiñeite. Nainomo buna rana jaca niñeite. Rana jaca finoñeite. Buna jaca doberañeite. Llomenicono finollena, buna dane maijiñeite. <sup>23</sup> Nainomo naiona lamparíniai dane booñeite. Rafue dane iñeite. Eo caimare iobitaja rafue dane iñeite. Iraisñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci. <sup>24</sup> Naie nairai ailluena Jusiñamuina innotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

## 19

<sup>1</sup> Ie facaise monamo eo ailluena comini ado lluana cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

<sup>2</sup> O anamo itinona raise uifñuamona, uanaicinona o uifñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

<sup>3</sup> Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

<sup>4</sup> Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omoi llucino mare. Ie isoi jiai lloiacadica. Jusiñamuina cai iobitajasa.

<sup>5</sup> Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena innotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

*Juan Toica Llauda isoidimie aina ua rafuena cacade*

<sup>6</sup> Naie facaise monamo eo ailluena comini lluana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

<sup>7</sup> Eo iobidica. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

<sup>8</sup> Mare iniroi naiñaiño jai ite. Eo userede. Quenirede.

Jeanide

llo timaci. Iese iniroina llo timaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie inotino imaci mare finoca rafue isoide.

<sup>9</sup> Jaienicí cuemo llote:

—Biena cueno: “Lauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

<sup>10</sup> Jaienicí uicomo eillimo ana bitadaticue, naimiena sedalena; ia cuemo llote:

—Dama ite. Cuena sedaño; ia dama Jusiñamuina seda. Jesús ie díbeimo itinona uanaicinona jai uiñotade. Ie jira naga o diga naimiena inotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabíte. Ie muidona dama Jusiñamuina seda.

### *Juan userede caballo emodomo itimiena cide*

<sup>11</sup> Naie facaise mona ecorillana ciodicue. Nainomo userede caballona ciodicue. Naie emodomo itimiemo mena mameci ite. Inogamienna mameciredede. Uanaicinona Llocabitimiena jiai mameciredede. Naimacina raise uiñuamona, naimie díbeimo iñedinona duere finollena, naimaci diga jobairite. <sup>12</sup> Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uiñoñede. Dama naimie iena uiñote. <sup>13</sup> Naimie jitaca iniroi ie díbeimo iñedino diruemo mutaca. Jusiñamuina naimie uiñotaja jira, Jusiñamui Uairedimiena mameciredede. Naimiedi Jesucristo. <sup>14</sup> Naimie jinafona soldaduai isoi Jusiñamui facaina itino mona amona billana jiai ciodicue. Eo mare userede jeanide iniroina jita timaci. Userede caballuai emodomo itimaci. <sup>15</sup> Eniruemo ite nairaiana emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicaillifue anamo itinona eo duere finoite. <sup>16</sup> Naimie iniroimo, naimie idaímo jai cuega: “Nanoca Illaíma. Nanoca Nama”.

<sup>17</sup> Naie facaise jaienicí jitoma lligaiñuonomo ciodicue. Nana inoniaina uaidote:

—Llicisina mai riái. Jusiñamuidi ailluena cominina ja meiniamona rille eo iite. <sup>18</sup> Naimacina emodofillamona, ailluena llicisi ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isoidino itimaci. Jamai bue isoíñedino itimaci. Patrones anamo itino itimaci. Patrones anamo iñedino itimaci. Naimaci llicisi mai riái —llote.

<sup>19</sup> Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci. <sup>20</sup> Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreña sedadinona jifuecabite. Naie iaimaiaina gaitaja mei, eo boode iraimo iaimaiaina cajena dotadimaci. Azufre boa isoi irai boode. <sup>21</sup> Caballo emodomo itimiedi ie fuemo ite lloebi diga iaimaii soldaduaiaina meinete. Jaienicillua isoi, inoniai naimaci llicisina ritimaci. Iemona eo monidimaci.

## 20

### *Juan mil años Taife maiana ciode*

<sup>1</sup> Naie facaise monamona jaienicillana ciodicue. Eniruemo eo ana ite ifo llave naimiemo ite. Aillue lloeo ie onollimo ite. <sup>2</sup> Aillue jaiona eruaidimiena gaitade. Naimiedi Taife. Riai uaimona Satanás. Jiaici dragón. Mil años iese illena lloeo diga naimiena maite. <sup>3</sup> Ana ite ifomo naimiena dotade. Llave diga ifona ibaide. Cominina ramo faiñellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

<sup>4</sup> Ie mei monamo diga jueces illanuaiaina ciodicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidica!” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meineganodimaci. Monaillaimona bite ocainana sedañedimaci. Ie joreña sedañedimaci. Ie cuetataga ra naimaci uiecomo, naimaci onollimo iñede. Navui fiodaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruemo itinona sedaitimaci. <sup>5</sup> Naimacidi nano jillodino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci. <sup>6</sup> ¡Nano jillodino caimare marena iitimaci! Dane fiodaiñenamona Jusiñamui illanomo jaca iitimaci. Faiññeitimaci. Cominina sedajanona, comini Jusiñamuina raise uñollena, comini Cristona raise uñollena, naimacina canoitimaci. Cristo diga mil años naimacina sedaitimaci.

<sup>7</sup> Bie mil años fuilla mei, Jusiñamuidi ana ite ifomona Taife jino oretaite. <sup>8</sup> Nana eniruemo ite nairaiaina jifuiabite.

Gog railla illaicomina, Magog railla nairaia diga, jifueite. Naimaci nairaiaina ofitaite. Eo ailluena naimaci illa jira, conilliena cai facadonina isoi, naimacina facadonicue. Jusiñamuina inotino diga jobairillena, ofitimaci. <sup>9</sup> Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiga nairaina, ciribitaitimaci. Naie facaise monamona boode ra billanona, jobairiacadinona fuidoite. <sup>10</sup> Comina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaie dotade. Naimie facaina tainona lloraima jaie dotade. Nainomo ua jaca duere sefuitimaci

*Juan aillue rairabicina ciodé. Nainomona Jusiñamui duere finollicinona llwana cacade*

<sup>11</sup> Naie facaise aillue userede rairabicina ciodicue. Illaimana naimie illamona, nainomo Jusiñamuina jiai ciodicue. Naimie siño illamona, mona enirue diga jai inede. <sup>12</sup> Naie facaise Jusiñamui uicomo nana fiodaitino naidaillana ciodicue. Jamai bue isoinedino itimaci. Jamai bue isoidino itimaci. Naimacimo juez isoi Jusiñamui lollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cuega. Iemei Jusiñamui jiaie rabeniconna jibuide. Naimie diga jaca ille comini mameciai nainomo jai cuega. Naimaci mameciai nainomo inenia, naimaci finoca rafue diese Jusiñamui naimacimo duere sefuillena lloite. <sup>13</sup> Monaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite. <sup>14</sup> Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. <sup>15</sup> Monamo ite rabenicomo cueñega comini mameciai diese itinona iraimo dotaite.

## 21

*Juan comue monana, comue enirue diga ciodé*

<sup>1</sup> Birui ite mona, birui ite enirue diga jai inede. Monaimo jiai jai inede. Iemei comue mona ciodicue. Comue eniruena jiai ciodicue. <sup>2</sup> Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede. <sup>3</sup> Jusiñamui illanomona damie ado lloite:

—Comini motomo Jusiñamui illano jai ite. Naimaci diga naimie iite. Naimie comininitimaci. <sup>4</sup> Naimaci illanomo

naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodaiñeitimaci. Sunaiñeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci —llote.

<sup>5</sup> Jusiñamui llote:

—Ero, nana ra comuena birui finoiticue. Cue llucino uanaicinona jira, cue llucinona cue finua jira, bie rafuena cueno.

<sup>6</sup> Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciai eo caimare itataiticue. Ibatañeno cue diga illena, naimacina jaca itataiticue. <sup>7</sup> Cuen a raise inotinona iese itataiticue. Jaca naimaci Jusiñamuiticue. Naimaci jaca cue comininitimaci. <sup>8</sup> Jiaño jaca eo boode iraimo jaca iitimaci. Azufre boa isoi irai booite. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise inoñedino, jearede rafue finocabidino, cominina meinetino, aiñede riño diga icabitino, iniñede ima diga icabitino, aiñinai, jiraraina sedacabidino, tainona llocabitino —llote.

### *Juan comue Jerusaléna llote*

<sup>9</sup> Naie facaise naie siete jaienisaimona damie cue dine bite. Naie jaienisai imaci copamo cominina duere finollicinona navui ite isoide. Naimie cuemo llote:

—Cue diga mai bi. Ima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

<sup>10</sup> Nicañilla isoi, Jusiñamui Joreño cue joreñoña eo a ite aillue anedumo uite. Nainomona, Jusiñamui mona, mona Jerusalén billana cidicue. Jusiñamui iena jira, eo mare. <sup>11</sup> Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo cide. <sup>12</sup> Ie llaigafu eo a ite. Eo jedaciede. Doce nasiai ite. Naga nasemo daje jaienicu ite. Israel micorcu uruiai mameciai naie nasai mo cueda. Doce uruiai illa jira, naga naserie daje mameci cueda. <sup>13</sup> Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beicu dine eruaide llaigafomo daje amani nase ite. <sup>14</sup> Naie llaigafu anamo doce nofici ite. Nainomo Toica Llauda isoidimie ie doce llofueoicaigano mameciai cueda.

<sup>15</sup> Cue diga ñaite jaienicimo oromona ra facara ite. Naie nairai facallena ite. Ie nase, ie llaigafu diga, facallena ite. <sup>16</sup> Naie nairaina naimie facajamona, nagafebei daje isoi illana uñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. <sup>17</sup> Ie llaigafona jiai facade. Sesenta y cuatro metros a ite. Comini facaja isoi, jaienici iena facade.

<sup>18</sup> Ie llaigafu jaspe railla noficimona finoca. Bie nairai difai oromona finoca. Enefebecodo ciode. <sup>19</sup> Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede. <sup>20</sup> Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafu anamo ite noficiái doce diga ite. <sup>21</sup> Ie doce nasiáidi perlas. Userede. Naga nase daje perlamona finoca. Bie nairai naisuáidi difai oro. Enefebecodo ciode.

<sup>22</sup> Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaímaiaí uicomo sedaiticái. <sup>23</sup> Jusiñamui siñona jira, nainomo comini jítomana jitaíñeitimaci. Fivuína jitaíñeitimaci. Jusiñamui, Llauda isoidimie diga, iena lligaiñoite. <sup>24</sup> Nana comini iaímaiaína nabaicana jaitimaci. Nana illaicomini iaímaiaí ñine billanona, iaímaiaímo iobillacino jaca fecaitimaci. <sup>25</sup> Bie nairai nasiaí jaca ibaiñeite. Nainomo naionadi jaca iñeite. <sup>26</sup> Iaímaiaímo iobillacinona fecallena, nana comini nainomo biitimaci. <sup>27</sup> Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimiemo ite rabenicomo cuega mameciaí itinodi nainomo biitimaci. Bie rabenicomo Jusiñamui illanomo jaca iitino mameciaí jai cuega.

## 22

<sup>1</sup> Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. <sup>2</sup> Nanoca naiso motodo tote. Nagafabelle ñine jaca itataite amenaiaí ite. Naga fivui llisillamona, naga fivui llisilla ite. Ie ibiaí illamona, comini caimare marena itimaci. <sup>3</sup> Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. <sup>4</sup> Naimiena marefodo cioitimaci. Naimiemo naimaci duillamona, naimaci uiecuái itofiaímo



naimie mameci cueite. <sup>5</sup> Nainomo naionadi iñeite. Lamparina jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

*Juan Jesucristo billirui iairei illana cacade*

<sup>6</sup> Jaienici cuemo llote:

—Bie lluacinodi uanaicino. Naimie facaina llorainimo ie rafuena llolena, ie uaina itatate. Naimiena inotinona ico suille rafuena ja uiñotaiacade. <sup>7</sup> “Raire biiticue” Cristo llote.

Bie rabenicomo ite ico suille rafuena inotinodi camare iitimaci.

<sup>8</sup> Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomo ana bitadaticue. Naimiena sedaacadicue; <sup>9</sup> iadedi cuemo llote:

—Dama ite. Cuenasadaño. O diga, naimie facaina lloraini isoi, bie rabenicomo ite llogacinona inotino isoi, naimie dibeimo jiai maijidicue. Dama Jusiñamuina seda. <sup>10</sup> Bie rafue suillirui iairei illa jira, iena jino llono. Iena uiñota. <sup>11</sup> Bie rafuena bu inoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie inoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

<sup>12</sup> Jesucristo cuemo llote:

—Ero, raire biiticue. Naimie finoca rafue diese nagamiemo ibana fecaticue. <sup>13</sup> Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. <sup>14</sup> Naimaci iniroina naimaci jocoia, camare iitimaci. Naimaci comecina ñaiticue. Ie jeacinona oni dotacame jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; <sup>15</sup> ia naimacina jeacinona naimaci fainonocaiñenia, Jusiñamui illanomo marañede rafuena finocabidino, aima dine jaicabidino, añede riño diga icabitino, inañede ima diga icabitino, cominina meinetino, jiraraina sedacabidino, tainona llocabitino duiñeitimaci. <sup>16</sup> Creyentiaina bie rafuena uiñotallena, cue jaienici o dine jai oretaticue. David micori ie jitodicue. Monairaicudu bairia isoi, Jusiñamui jitaillacinona cue finollena, baireiticue —llote.

<sup>17</sup> Bie facaise Jusiñamui Joreñodi, Cristo jai oga ai railla comini diga, naimiena nia inoñedinona uaidote:

—Bie rafuena mai cacarei. Iena mai ino. Iena bu inoia, jaiamiemo iena lluai: Iena mai cacarei. Iena mai ino.

Jiroacadimiemo lloticue:

—Mai jiruaibi. Bie jinua raifiñede. Biena o jiroacania, jaca iitio. Iese lloticue; ia ie comecina ñaiticue. Bie rafue iinuana ñaiticue. <sup>18</sup> Bie ico suille rafue ite rabenicono bu facajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomo ite duere finuacino isoi, Jusiñamui naimiema duere finoite. <sup>19</sup> Bie rafuena bu jamaia, Jusiñamui naimiema duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai lloticue.

<sup>20</sup> Cristo raite:

—Bie rafue jaca suite. Ua raire biiticue.

Iena raire suillena jiai jitaidicue. Cai Nama Jesús raire billena eo jitaidicue. <sup>21</sup> Naimie duenaillacinona nana Jesucristona inotino uiñocana jaillana jitaidicue. Macaibaite. Juandicue.